

IREHKAN ME PILIPIL
DAHR SANGEHR NAN

PWUKEN MORMON

PIL KADEHDE PEN
JESUS CHRIST

IREHKAN ME PILIPIL
DAHR SANGEHR NAN
PWUKEN MORMON

Pil Kadehde pen
Jesus Christ

Pwuhk wet me audaudkidahr irehkei me pilipilda sangehr nan Pwuken Mormon. E wiawidahr en doadoahk ong ni lepin ansou ieu, lao Pwuken Mormon pahn kawehwehdi oh wiawihda ni mahsen en Pohnpei. Ni ansouo, pwuhk wet pahn sohla doadoahk.

Pwuken Mormon iei me audaudiki rongamwahu unsek en Jesus Christ. Ire pilipildahr pwukat me audaudiki ekei padahk kesempwal sang nan pwuhk sarawi wet, pwe misineri kan oh tohn Mwomwohdiso en Jesus Christ en Souleng en Imwin Rahn Akan oh pil ekei aramas sohte lipilipil me inengieng esehla duwen kopwurupwur dohn rongamwahu en Jesus Christ en doadoahngki ire pilipildahr pwukat.

Intingda sangehr Mwomwohdiso en Jesus Christ
en Souleng en Imwin Rahn Akan
Salt Lake City, Utah, USA

© 1998 by Intellectual Reserve, Inc.

All rights reserved

Printed in the United States of America 01/2012

Translation of Selections from the Book of Mormon

Pohnpeian

ISBN 978-1-59297-576-1 (Paperback 33568 885)

PWUKEN MORMON

IEI POADOAPOAD EHU ME
INTINGDIER POHN SLEIT AKAN
SANG NI PEHN MORMON
ME KOHSANG NI SLEIT EN NEPHI KAN

Ihme kahrehda, poadoapoad en mehn Nephi, oh pil mehn Laman mihmi ni oaralap -- intingiong mehn Laman kan me iei ehu keinek me wia kisehn mehn Israel akan; oh pil ong mehn Jews oh mehn liki kan -- intingdier sang ni kaweid en kosonned, oh pil sang nin duwen kokohp oh kaudiahl -- intingdier oh katengteng penehr, oh nekinek lahr rehn Kauno, pwe irail en sohte kak ohla -- pwe en kohda sang ni kisakis oh manaman en Koht ong ni kawehwehpeo -- katengteng penehr sang ni pehn Moroni, oh nekinek lahr rehn Kauno pwe en kohda ni ansou me konehng sang mehn liki kan -- kawehwehpeo pahn sang ni kisakis en Koht.

Ni oaralap e pil kohsangehr nan Pwuken Ether me iei ehu poadoapoad en mehn Jared akan, me tohrohr pesengehr ni ansou me Kauno ketin kapingadahr mahsen en aramas akan, ni ansou me irail wie kakau dauwero pwehn leldahla nanleng -- me pahn kasalehiong kisehn mehn Israel akan me kesempwal akan me Kauno ketin wiahiongehr samarail akan, me irail en kak ese inou kan en Kauno me irail sohte pahn lekdekla kohkohlahte -- oh pil pahn kahrehiong mehn Jews oh mehn liki kan en kamehlele me Jesus iei ihme Christ me Koht soutuk, me ketin kasaleiongehr ih wehi koaros -- oh met, ma mie sapwung kei, a iei sapwung en aramas; sang ni kahrepe wet, dehr kapwokoniki Koht mehkan, pwe sohte mwai ehu en kak dierek rehmwail ni mwoalen kopwung en Christ.

KAWEHWEHDIER NI MAHSEN EN WAI SANG
JOSEPH SMITH, NAHI

MEHN KAPEHSE

Pwuken Mormon iei ehu pwuhk sarawi me rasohng Bible. Iei poadopoad ehu me pid duwen sapwellimen Koht doadoahok kan ong mehn kawahko nan wehin America oh audepe kan me duwehte nan Bible, iei ihme kaunsek pen rongamwahu poatoapoato.

Pwuhk wet intingdier sang rehn soukohp tohto sang nin duwen ngenen kokohp oh kaudiahl akan. Mahsen kan, nin duwen arail intingdier pohn sleit kan oh duwen e intingdier ni oaralap sang soukohp emen me kin pil wia soupoad emen me adaneki Mormon. Poadopoad wet kasalehda duwen pweidahn pwihn riau. Ehu pwihn kohsangehr Jerusalem ni pahr wenepwiki (600) mwohn Christ, oh mwuri irail pwalpesengehr oh wiadahr wehi riau, me kitail kin kahdaniki mehn Nephi oh mehn Laman. Ehu pwihn me kodohr mwowe, ansou me Koht ketin kapingadahr mahsen en ansouo ni dauwer en Babel. Pwihn wet iei mehn Jared akan. Mwurin sounpar kid kei, koaros kamakamalahr, ihte mehn Laman akan me luhwehdi oh irail iei me tepin wia kadaudoken mehn Indian nan America.

Me keieu kesempwal me intingdier nan Pwuken Mormon iei padahk en Kaun Jesus Christ ong mehn Nephi kan mwurin e ketin iasadahro. Iei me kasalehdahr padahk kan en rongamwahuo, duwen plahn en kamouro, oh me padahkihong aramas akan dahme irail en kin wia pwe en alehda meleilei nan mour wet, oh komourla kohkohlahte nan mour me pahn kohdo.

Mwurin en Mormon eh kanekehla eh inting kan, e ahpw kihongehr poadopoado nah pwutak Moroni, me pil kapatahiongehr pein eh koasoai malaulau kei oh nekidalahr pohn nahna Cumorah. Ni Septemper 21, 1823, Moroni ohte ansouo wialahr aramas lingaling men oh aramas iasada men, pwarohngehr soukohp Joseph Smith oh padahkiongehr ih duwen poadopoad en kawao oh duwen e pahn kawehwehdiong ni mahsen en wai.

Ni ansou me Joseph Smith aleier pleitko, e ahpw kawehwehdier irail sang ni kisakis oh manaman en Koht. Poadoapoad wet wiadahr ni mahsen tohto nin duwen e wia ehu kadehde me kapw oh me pil kadehdehda me Jesus Christ iei Ieros en Koht ieias oh koaros me pahn kohdo reh oh kapwaihda sapwellime kosonned akan oh sapwellime rongamwahuo pahn komwouhrla.

Me pid duwen poadoapoad wet Joseph Smith kasalehdahr: "I indahiong riei kan me Pwuken Mormon me keieu pwung nan sampah oh iei me wia poahsoan en atail lamalam, oh aramas pahn kin keieu karanih Koht sang ni momouriki kosonned akan me mih loale sang pwuhk kan koaros."

Pwe en patehng Joseph Smith, Kauno ketkidahr irail ehk-emen en pein kilang sleit kohl akan oh en wia sounkadehde tohrohr ekei ong ni me mehlelo oh en kadehde me Pwuken Mormon kohsang rehn Koht. Arail kadehde me mihmi ni inting duwe met "Kadehde en meh Silimeno" oh "Kadehde en meh Welimeno".

Se luke aramas koaros nan wasa koaros en wadek Pwuken Mormon, en kin doandoaropwe nan arail mohngiong kan, oh en peki rehn Koht, Sahn Soutuk, ni mwaren Christ ma Pwuhk wet mehlel. Irail me idawehn kaweid wet oh peki ni pwoson pahn alehda kadehde mehlel oh sarawi en pwuhk wet sang ni manaman en Ngehn Sarawi (kilang nan Moroni 10:3-5).

Irail akan me alehda kadehde en Koht wet sang ni Ngehn Sarawio pahn esehla me sang ni manaman ohte me Jesus ketin wiahkilahr Soundoar pen sampah, me Joseph Smith iei ihme sapwellime souhn kou kupwur men oh sapwellime soukhp en ni imwin rahn pwukat, oh me Mwomwohdiso en Jesus Christ en Souleng en Imwin Rahn Akan iei me sapwellimen Kauno wehio, me pil pwurengehr kokouda pohn sampah, me kaunopada ongehr ni ketido keriau en Mesaia.

KADEHDE EN MEH SILIMENO

En dehdehiong wehi koaros, keinek koaros, loh kan koaros, oh aramas koaros, me doahk wet pahn lel ie: Me kiht, sang ni kalahngan en Koht Sahn oh atail Kaun Jesus Christ, kilangehr sleit kan me audaukidahr inting pwukat, iei ihme poadoapoad en mehn Nephi kan, oh pil riarail mehn Laman kan, oh pil mehn Jared kan, me koksangehr ni dauwero me kosoiepe mie. Oh se pil ese me irail pil kawehwehdier sang ni kisakis oh manaman en Koht, pwe ih me ketin mahsendohng kihtehr; eri se ese ni mehlel me doahk wet me mehlel. Oh se pil kadehde me se kilangehr inting pwukat me intingdier pohn sleitko; oh me irail sansalohng kihtehr sang ni manaman en Koht, oh kaidehn sang ni manaman en aramas. Oh se kasalehda ni ngoang, me tohnleng en Koht emen sang nanleng, me wahdo oh pwilikhdi sleitko mwohn masat kan, se kadehdeier oh kilangehr sleitko, oh inting kan pohrail, oh se ese me sang ni kalangan en Koht Sahn, oh atail Kaun Jesus Christ, me se kilangkhier oh kadehdehkier me mepwukat mehlel. Oh e inenen kopwuriamwei ong nan masat akan. Ahpw, kapitien Kauno me ketin mahsanihong kiht me sen kin kadehde mepwukat. Eri, pwe en kapwaiada kosonned en Koht akan, se kadehdehki mepwukat koaros. Oh se ese ma se loaloapwoat ong Christ, se pahn pwuhr sang nan aht likou me mie intahn aramas oh sohte mwahi ehu me pahn dierek reht ni mwoalen kopwung en Christ, oh wahu en kohieng Sahn, oh Nah, oh Ngehn Sarawih, Amen.

OLIVER COWDERY
DAVID WHITMER
MARTIN HARRIS

KADEHDE EN MEH WELIMENO

En dehdehiong wehi koaros, keinek koaros, loh kan koaros, oh aramas koaros, me doahk wet lel ie: Me Joseph Smith, Nahi, me kawehwedier doahk wet, kasalehiong kihtehr sleitko me kosoiepe mie, me mihmi ni mwomwen kohl; oh nin duwen tohtohn sleitko me Smith me sansalehro kawehwehdier, se doahkehkier pein peht akan; oh se pil kilangehr inting kan koaros powe, me mihmi ni mwomwen me irail wiawidahr keilahn aio. Oh me kopwuriamwei duwen wiawidahn sleitko. Oh met se wia aht kadehdehki lokaia kan ni mehlel me Joseph Smith kasalehiong kihtehr, pwe se kilangehr oh kolehr, oh ese duwen mehlel en Smith, me sansalehro, aledahr sleitko me se koasoihier. Oh se kasalehiong sampah adat akan, pwe en kadehdehiong sampah me se kilangehr sleitko. Oh se sohte likamw, Koht iei ihme ketin wia aht sounkadehde.

CHRISTIAN WHITMER
JACOB WHITMER
PETER WHITMER, NAHI
JOHN WHITMER

HIRAM PAGE
JOSEPH SMITH, SAHM
HYRUM SMITH
SAMUEL H. SMITH

KADEHDE EN SOUKOHP JOSEPH SMITH

Pein en Joseph Smith koasoai kan ong ni duwen kodahn Pwuken Mormon iei duwe met:

"Ni soutik en ... Septemper riesek-ehu nan pahr 1823 ... I pein kapakap oh pekipeki ni karakarahk rehn Koht, wasa lapalahpie.

"Ansou me I wie kapakap ong Kauno, I diaradahr marain ehu pwaradahr nan ei pereu, me wie maramarainla lao marain sang marain en souwas, ni ansouo aramas emen mwadangete pwarada limwahn ehi pehto, wie kesikesihnen nan wehwe, nehkan sohte sair nan tahto.

"E likouki likou pwuhpw ehu me keieu pwetepwet. Me inenen pwetepwet sang mehkoaros me I kilangehr nan sampah; oh I sohte kamehlele me mie mehkot nan sampah me kin pwetepwetala oh linganla duwehte met. Pehkan wie sansal, oh pil nan pehkan sangete pohn kumwutin pehkan; e pil duwehte nehkan me pil wie sansal, nin duwen mehkan sangete pohn paten nehkan. Moange oh tepinwere pil wie sansal. I diaradahr me e likoukihte likou pwuhpw wet. Nin duwen pwalpesang en likouo, I ahpw kak kilangada nan mwaremwaro.

"Kaidehnte eh likou puhpo me pwetepwet mehlel, ahpw paliwere pwon me lingan sang mehkoaros oh ni mehlel mesehu duwehte lioal. Nan pereu marainla mehlel, ahpw sohte duwehte marain me wie kapkapil ohlo. Ansou me I tepin kilangada ohlo; I ahpw masakada, ahpw ansou wet ei masako sohralahr.

"E likweri kin ie edei oh padahkiong ie me ih iei meninkeder me pekederdhong ie sang rehn Koht, oh ede iei Moroni; e kosoia me sapwellimen Koht doahk ehu mie me I pahn wia; ih eri kosoia me edeiet pahn kin mwahu oh suwed nan wehi koaros, keinek kan koaros oh loh kan koaros, oh aramas akan pil pahn kin koasoakoasoia duwen mwahu oh suwed en edeiet.

"E kosoia me mie pwuhk ehu serdier, inting kan mihmi pohn sleit kohl ekei me audaudiki poadoapoad en tohn sahpuwo keilahn aio oh wasa me irail tepisang ie, E pil kosoia me unsek en rongamwahuo mihmi loale nin duwen Soundoro eh ketkihiongehr tohn wasao keilahn aio.

"Pil mie takai riau me mihmi nan mehkei oh takai riau wet katengdiongehr mehn perehpen nan mwaramwar ehu, ihme kin kahdaniki Urim oh Dummim me seridier iangahki kohl sleitko; oh epwelope oh doadoahk en takai riau pwukat iei me *ohl sarawi* kan en keilahn aio en kilang loalera oh wehwehkihla dahme pahn kin wiawi; pwe Koht ketin kaunopadahr takai riau wet en wia mehn kawehwehpen pwuhk wet.

* * * * *

"E pil pwurehng indahiong ie duwen ei pahn alehda sleitko me e kasansalehdahro -- dene ansou me I pahn alehda sleitko saikinte leledo -- oh dene I sohte pahn kasalehiong emenemen aramas akan, pil duwehte mehn perehpen nan mwaramwareo me kin ieiang Urim oh Dummim; ihte irail akan me e pahn ketin mweidohng; dene ma I sohte pahn kapwaihda I pahn kamakamala, ni ansou me e wie kosokosoiahiong ie duwen sleitko, e mwomwen wasao sansalohng ie, I kakehr ese wasa me sleitko seridi ie, oh me inenen mwakelekel oh sansal mwahu pwe I esehte wasao ni ei pwarada wasao.

"Mwurin aht koasoai pene, I diaradahr me marain en nan pereu tepier kohpene limwahn ohlo me wie koasoakoasoaihiong ie, oh e wenlahte wia soahngo lao pereu milahr nan rotorot, ihte limwah me sohte iang rotorotala, ni ansouo I mwadangete kilangada sirang en ketipin ehu me kohdalahng nanleng oh ih eri dakehdahla lao e salongala, oh pereu milahr nan rotorot duwehte mwohn marain en nanlengo pwaradahr.

"I wendi oh medemedewe duwen dahme I kilangehr, oh medemedewe laud dahme meninkeder tohrohr menet kasalehiongehr ie; nan werengen ei medemedewe, I

mwadange te diarada me ei pere o pil pwurehng marainda, oh ni ansouohte, meninkederohte pil pwurehng miher limwahn ei pehto.

"E tapihada, oh pil pwurehng kosoiahdo duwehte mehkan me kasansaladahr ni tepin e pwarohng ie, sohte wekila ieu mie, eri ni ansou me nekiero, ih eri padahkiong ie apwal laud akan me pahn pwarada nan sampah iangahki ohla kan sang ni lehk, kedlahs, oh soumwahu, oh me kahpwal kansensuwed pwukat pahn lelodohng sampah ni dih wet, ni eh koasoi ahiongiehier mepwukat, e pil pwuradahla nanleng duwehte me e wiahier mahso.

"Sang ni ansou wet, I wendier oh pwuriamwei kilahr mehlel duwen me I kilangehr oh rongehr nin duwen dahme wiawihier me inenen loal nan ei madamadau me kahrehda I solahr men meir. Ahpw soangen ei pwuriamweila, ni ansou me I pil pwurehng kilangadahr meninkederohte limwahn ei pehto, oh rongehr duwen e kapwurehiong de pwurehng mehkan me duwehte e padahkihongiehier mahso. E kihong ehu peneu ong ie, me Satan pahn song ie (pwehki nin duwen semwehmwe en ei pahpa peneinei), pwe i en alehda sleitko mehn kahrehiong irail en kepwehpwe kihla. Met e inda me i en dehr wia soango, pwe sohte mehkot me I pahn lemehda ni ei pahn alehda sleitko, ahpw en kin wia mehn kelinganahda Koht, oh I sohte pahn dukila pahn en ekei ineng kan sang ni ei pahn wiahiong mehn kauwada sapwellime wehio, de ehu, I sohte kak alehda sleitko ma I pahn wiahda ehu mwekid tohrohr likin met.

"Mwurin kesilipak en eh pwarek ie, e pil pwuradahla nanleng duwehte me e wiahier mahso, oh I pil kelehpwla pwe I en medewehla soangen kopwuriamwei me I ahpwtehn lel loale. Mwurin ansouohte ni en meninkedero eh pwuradalahr nanleng, maleko pa koakorot, oh I diaradahr me ni sohrahnehr, eri aht wie kosoakoaso pene udahn pahn mihmi ni erein pwohngo koaros.

"Mwurinte ei piridahsang pohn ei pehto, oh nin duwen me kin wiawi, I kolahr pwe I en wia doadoahok kan me mie anahnepe rahno, ahpw ni ei song en wia doadoahk ni ansou kan, I diaradahr me ei kehl solahr mie on I ahpw solahr

kak. Ei pahpao, me wie doadoahk limwahi diaradahr me mie mehkot sapwung rehi, oh ih eri indahiong ie me I en kohla ni ihmwo. I tepier inangiada me I en kohla ni ihmwo, ahpw ni ei song en kotehla kehlo sang nan mwetuwel me se wie doadoahkie, ei kehl koaros ahpw sohrala sang ie, I ahpw pwupwidiongehr pohn pwehlo, oh ni ahsouo I solahr kehn wasa.

"Keieu me I kak tamanda iei ngihl ehu me peidohngie, ekerie. I ahpw saradahr oh kilangadahr meninkederohte me wie kesikesihnen pohn moangei, marain me kapelpene ih duwehte mahso. Ih eri padahkiongie mehkoaros me e kasaledahr pwohng mwoweo, oh kekehlkiongie me I en kohla rehn ei pahpahu oh indahiong ih sansal oh kosonned akan me I aledahr.

"I peihkiong ih; ngehi eri pwurala rehn ei pahpahu nan mwetuwelo, oh padahkihongehr ih mehkoaros. Ih eri sapengki me met iei kupwuren Koht, oh e kosoia me I en kohla oh doadoahngki duwen kehkehlk en meninkedero. I ahpw mweseldahsangehr nan mwetuwelo, oh kolahng wasa me meninkedero padahkihong ie me sleitko seridi ie. Pwehki sansal mwahu en kasansal me alahldier me pid wasao, ansouohte I ese wasao ni ei lel wasao.

"Karinihte kahnimw en Manchester, lopidi en Ontario, wein New York, mie dohl ehu me sais mwahu oh me keieu ileile nan wasao. Ni pali epeng en dohlo, sohte dohsang pohn dohlo, iei wasa me sleit kohl akan seridier nan kohpwa ehu, pahn takai sais mwahu ehu, takai wet me mosul oh pwonopwon nan wereng en pali powe, oh menipinip kolahng ni imwin kan, eri ahpw kisehn nan werengeo me sansal pohn pwehlo, ahpw imwin kan koaros mihmi pahn pwehlo.

"I eri kamwekidsangehr pwehlko, I ahpw alehda lepin tuhke ehu, oh nihdelong pahn takaio, oh I ahpw kamwekidier tuhkeo, takaio eri kohda, ngehi eri kilangehr loale, oh mehlel I kilangadahr sleitko, Urim oh Dummim, oh mehn perehpen nan mwaramwaro, me meninkedero kasaledahr. Kohpwa me irail mihier loale wiawihkihda takai kei me katengteng kihpene soangen siment ehu. Nan

kapio takai riau koasoansoandier, oh pohn takai pwukat
iei ihme sleitko oh ekei mehkan me pil iang
koasoansoandier powe.

"I songen kihsang irail loale, ahpw meninkedero sohte
mweidohng ie, oh e pil pwurehng padahkihong ie me ansou
me I en alehda irail saikinte lelledo, e sohte pahn leledo
lao sounpar pahieu sang ni ansouo; ahpw e indahiong ie me
I en kodohng wasao soangen ansouohte nan ehu ehu pahr
akan, oh me e pahn kin tuhwong ie wasao, oh me Ien kin
wiahte soahng lao lel ansou me I pahn alehda sleitko.

"Nin duwen me Ien kin wia, I kolahr ni imwin ehu ehu
pahr akan oh I kin diar meninkederohte ni ansou kan
wasao, oh I kin alehsang ih kaweid oh marain ni aht kin
wie kosoakoasoi pene kan me pid duwen dahme Kauno
pahn ketin wia, oh ia pahn oh ni mwohmw dahieu me
sapwellime wehio pahn kin wiawi ni imwin rahn akan.

* * * * *

"Ansou lelehr me I pahn alehda sleitko, Urim oh
Dummim, oh mehn perehpen nan mwaramwaro. Ni
Septemper rieisek-riau, kid welipwiki rieisek-isuh, I kin
pwurupwuralahngete wasa me re seridiero ni imwin pahr
akan, meninkederohte sang nanleng me kihong ie Ien
kohwahki kin irail: e inda me Ien kin kohwahkin irail; pwe
ma I pahn mweidraila, de ma I sohte insenohki, I pahn
lekdekla; ahpw irail pahn kin neknekla rehi ma I pahn kin
doadoahngki uhwen ei kak pwe en kolokol irail.

"I mwadangete I diaradahr kahrehpen ei pahn alehda
pwukoah apwal en nekid oh ia kahrehpen en meninkedero
kosoiahki me ma I neksangehr dahme I anahne wiahiong
sleitko, e pahn eker en wisikdohng ih. Pwe sohte pwand,
koaros eseier me I kolokol sleitko, irail eri doadoahngki
arail kehlail unsek pwe irail en kihsangie. Soangen
koasoandi koaros me kin kak wiawihda re kin doadoahngki
ong ni kahrehpe wet. Kalokoloko wie lalaudla sang mahso,
oh kapar en aramas suwed akan kin nantihlahte oh
songisong en kihsangie ma irail kak. Ahpw sang ni erepit

en Koht, sleitko mihmihte nan pehikat lao I kanekelahr dahme anahnepen pehiet en wiahda. Nin duwen koasoandikan, ni ansouo me meninkedero pahn eker kinie, I ahpw pahn kihong ih; oh e pwukoahkier irail lel rahn wet, ni keriau en rahn en May, kid welipwiki silisek-waluh."

Poadoapoad en keilahn aio wet, me kofsangehr nan pwehlo, iei ngilen'keinek en aramas ehu me kofsang nan pwehlo, oh kawehwehdier ong ni mahsen en ansou wet sang ni kisakis oh manaman en Koht me pein Koht ketin kamanalahr, pwuhk wet e tepin wiawidahr ong sampah ni lokaiahn wai nan pahr 1830.

DUWEN KAWEHWE NI OARALAP EN PWUKEN MORMON

Pwuken Mormon iei ehu pwuhk sarawi me pid duwen aramas akan nan America keilahn aio, oh me intingdier pohn sleit mete kei. Soangen sleit mete pahieu me pwaradahr nan pwuhk wet.

1. Sleit en Nephi kan, me mihmi ni soahng riau: Iei me sleit tikitik kan oh sleit laud kan. Sleit tikitik kan iei me audaud kidahr mehkan ni pali ngehn oh doadoahk kan oh padahk kan sang rehn soukohp akan, oh sleit laud akan me pali laud audaud kidahr poadoapoad en tiahk en aramas akan me duwehte (1 Nephi 9:2-4). Ahpw sang ni ansou en Mosiah, sleit laud akan pil audaud kidar mehkan me kesempwal mehlel ong ni pali ngehn.
2. Sleit en Mormon kan, me wiawidahr ni oaralap sang Mormon me kohsang ni sleit laud akan en Nephi, iangahki eh madamadau tohto kan. Sleit pwukat pil audaud kidahr uhsupen poadoapoad sang Mormon oh ekei kapatapat akan me sang nah pwutak Moroni.
3. Sleit en Ether kan, me kasaledahr duwen poadoapoad en mehn Jared akan. Poadoapoad wet Moroni wiadahr ni oaralap, me e intingihdier pein eh madamadau kan oh kihongehr intingko en iangala poadoapoad nan pwuhk me kahdaneki "Pwuken Ether."
4. Sleit prahs kan iei me nein Lehi aramas akan wadohr sang Jerusalem ni sounpar wenepwiki mwohn Christ. Mepwukat audaud kidahr (kilang nan 1 Nephi 5:12) "pwuhk limau en Moses,... Oh pil poadoapoad en mehn Jews akan sangete ni tapio,... kokodo lel ni mwein Zedekiah, nahnmwariki en Judah; Oh pil kokohp akan en soukohp sarawihkan" (1 Nephi 5:11-13). Tohto mahsen kan, me kosoia duwen Aiseia oh ekei soukohp en nan Bible oh soukohp akan me sohte mih loale, me pwaradahr nan Pwuken Mormon.

Pwuken Mormon wiawi kidahr pali eisek-limau me sansal, ihte ehu me soh, ehu ehu pwuhk kan kohieng ede

sang aramas akan me intingirailda kan. Pali keieuo (tapin pwuhk weneu kan, me keimwsengkihla Omni) iei me kawehwedihsang sleit tikitik kan sang Nephi. Nanpwungen pwuken Omni oh pwuken Mosiah iei kapatapat ehu me kahdaneki Mahsen en Mormon kan. Kapatapat wet me kihpenehr inting kan pohn sleit tikitik kan oh en Mormon inting kan ni oaralap pohn sleit laud akan.

Pali me keieu reirei, iei ihme sang Mosiah lel Mormon iralaud 7, iangahki kawehwe en Mormon ni oaralap pohn sleit en Nephi kan. Pali me keimwsekialao, iei me sang Mormon, ire laud 8 lel kaneknek lahn pwuhk laudo, me nein Mormon pwutako, Moroni me intingihdi, me sang ni e kaneke lahr duwen koasoiepen mour en eh pahpao. Ih eri intingihdi poadoapoad en mehn Jared akan ni oaralap (me iei Pwuken Ether) oh mwuri ahpw kapatahiong ekei me wiahda Pwuken Moroni.

Nan mwein ele pahr 421, mwurin matalahn Christ, Moroni, iei ih me keimwsek pen soukohp oh soupod en mehn Nephi kan katengedier poadoapoad sarawi wet, oh nekedalahr rehn Kauno, pwe en kohda ni imwin rahn akan, ihme soukohp en keilahn aio kan kohpadahr sang rehn Koht. Nan pahr 1823, Moroni ohte, me mwuri ahpw wiahier aramas iasadahr men oh pwarohngehr Soukohp Joseph Smith oh mwuri kihong ih sleit kan me me intingdahr powe.


DUWEN KILEL AKAN PAH

1. *Jesus Christ, Atail Sounkomour*
Sang Harry Anderson
2. *Soukohp Joseph Smith*
Sang Dale Kilburn
3. *Lehi diarada Liahona*
Sang Arnold Friberg
4. *Lehi Oh Nah Aramas Akan Lel Nan Sapwen Inouo*
Sang Arnold Friberg
5. *Alma Wie Pepdais Nan En Mormon Pihlo*
Sang Arnold Friberg
6. *Samuel Mehn Laman Wie Kokohp*
Sang Arnold Friberg
7. *Jesus Christ Ketin Pwarohng Men Nephi Kan*
Sang Arnold Friberg
8. *Mormon Kamwurala Wehi Ehu Me Wadawad Ni Ansou Kis*
Sang Arnold Friberg


















AHD AKAN OH KOASOANDI EN
PWUHK KAN NAN PWUKEN MORMON

Ahd	Iralaud akan me mihmi nan pwuhk wet
Pwuhk Keieu en Nephi	1-7, 16-18
Pwuhk Kariau en Nephi	1-4, 5:1-20, 9, 29, 31-33
Pwuken Jacob	Sohte iang
Pwuken Enos	Unsek
Pwuken Jarom	Sohte iang
Pwuken Omni	Sohte iang
Mahsen en Mormon Kan	Sohte iang
Pwuken Mosiah	2-5, 17, 18
Pwuken Alma	5, 11, 12, 32, 34, 39-42
Pwuken Helaman	13-16
Kesiluh en Nephi	1, 8, 11-30
Kapahieu en Nephi	Unsek
Pwuken Mormon	1, 4, 6-9
Pwuken Ether	Sohte iang
Pwuken Moroni	Unsek

PWUHK KEIEU EN NEPHI

EH MWEI OH EH DOADOAHK

Koasoeipen Lehi oh eh pwoud Sariah oh nah pwutak pahmen me kahdaneki (tepida sang ni me keieu mah) Laman, Lemuel, Sam, oh Nephi. Kauno ketin kehkehlik ong Lehi en mweselsang nan sapwen Jerusalem, pwehki e wie kokohpengehr aramas nin duwen arail suwed akan oh irail rapahki ih pwehn kihsang eh mour. E wie seiseilongki rahn siluh ong nan sapwtehno iangahki eh peneinei kan. Nephi ale rie kan oh pwuralahng nan sapwen Jerusalem pwehn alehda poadoapoad en mehn Jews akan. Kosoiepen arail kalokolok kan. Irail alehda nein Ishmael serepein akan arail pwoud. Irail alehda arail peneinei kan oh mweselang nan sapwtehno. Arail lokolok oh apwal akan nan sapwtehno. Wasa me irail kekeid selihie. Irail lelohng sehd kalaimwun. Rien Nephi kan pelianda ih. E ahpw kanamenekehla irail, oh e wiadahr sohp pwoat. Irail kahdaniki wasao Rakk. Irail kotehla sehd kalaimwuno oh kolahng nan sapwen inouo, oh pil mehte kan. Met iei koasoai en Nephi, de pil ehu, ngehi, me intingihdier poadoapoad wet.

IRALAUD 1

Nephi tepier intingih poadoapoad en nah aramas akan -- Lehi kilangadahr uren kisiniei ehu oh wadek sang nan pwuken kokohp ehu -- E kapinga Koht, kohpada duwen ketidohn Mesaia oh kokohp akan duwen ohlahn Jerusalem -- Mehn Jews akan ar kaloke ih.

1 Ngehi, Nephi, me ipwidi sangehr peneinei mwahu ehu eri I ahpw ekis kaiahn dahr ni duwen mehkan koaros me ei pahpao kin ese; oh I kilangehr kahpwal tohto nan ei rahn akan, ahpw, I keneinei lahr mehlel rehn Koht nan ei rahn akan koaros; ehi, sang ni duwen ei esehla laud duwen me mwahu oh me rir akan en Koht, eri I pahn wiahda poadoapoad ehu duwen mehkan me wiawiher mwohi.

2 Ehi, I pahn wiahda poadoapoad ehu ni mahsen en ei pahpahu me wiawikidahr sang dahme mehn Jews akan ese oh mahsen en mehn Egypt akan.

3 Oh I ese me inting pwukat me I wiadahr me mehlel; oh I wiakidahr pein pehiet; oh I wiadahr nin duwen ei ese.

4 Pwe e wiawiher me ni tepin keieun pahr ni mwein Zedekiah, nahnmwariki en Judah, (ei pahpao, Lehi, nin duwen e wie koukousoan nan eh mour nan Jerusalem); oh ni pahrohnte soukohp tohto me pwaradahr me wie kokohp ehngehr aramas akan me irail en koluhla, pwe ma soh, a kahnihmw lap en Jerusalem pahn udahn ohla.

5 Eri nin duwen me wiawiher ei pahpao, Lehi, nin duwen e kolahr oh kapakap ong Kauno, ehi, sang nan eh mohngiong unsek, ni eh weliandier nah aramas akan.

6 E wiawiher me nin e wie kapakap ong Kauno, mie uren kisiniei ehu ahpw pwaradahr mwowe oh mihmi pohn takai ehu; oh e ahpw kilangadahr oh rongehr me tohto; oh pwehki sang ni mehkan me e kilangehr oh rongehr, ih eri mwekid kidahr oh rerkidahr kouwahlapie.

7 Oh nin duwen me wiawiher me e pwuralahr ni imweo nan Jerusalem; oh ih eri pwupwidiongehr pohn eh pehto sang ni e direkilahr Ngehno oh mehkan me e kilangehr.

8 Oh nin duwen e direkilahr Ngehno, e ahpw milahr nan kasansal ehu, me e kilangehr nanleng ritdahr, oh e leme me e kilangehr Koht ketiket ni mwoale, me tounleng tohtohie kin wie kapikapil ni mwomwen me irail kin wie kokoul oh wie kapikapinga arail Koht.

9 Oh nin duwen me e wiawiher me e kilangadahr mehmen me ketidihdo sang nan werengen lahng, oh e kilangehr me sapwellime lingano marain sang ketipin en ni souwas.

10 Oh e pil kilangadahr me ehk-riemen me kin ideidawen ih; oh arail lingana laud sang usu kan nanleng.

11 Oh irail ketidohr oh ketiket selier pohn sampah; oh irail eri ketikihong ih pwuhk ieu pwe en wadek.

12 Oh e wiawiher me ni ansouo me e wadekehr ih eri direkihla Ngenen Kauno.

13 Oh e wadek me mahsanih: Meid suwediong, meid suwediong Jerusalem, pwe I kilangehr amwail tiahk kelingeringer kan, ehi, oh me tohto me ei pahpahu wadekehr me pid duwen Jerusalem, me pahn ohla, oh

towehkan; tohto me pahn mehkihla kedlahs oh tohto me pahn sella Babylon.

14 Oh e wiawiher me ni ansou me ei pahpahu wadekehr oh kilangehr me kesempwal oh me kopwuriamwei tohto kan, e ahpw werikihdahla rehn Kauno, nin duwe met: Sapwellimomwi doadoahk kan me lapalap, maing Kaun Koht lapalahpie! Mwoalemwi me ileile nanleng, oh sapwellimomwi manaman, oh mwahu, oh me kipedier koaros tohn sampah; oh pwehki komwi me ketin kalahngan, komwi sohte pahn ketin mweidohng irail akan me patohdo rehmwi en lekdekla.

15 Oh met iei mwomwen lokaia me ei pahpahu kepikepingahki Koht; pwe palingene wie pereperen oh eh mohngiong unsek direkilahr mehkan me e kilangehr, ehi, mehkan me Kauno ketin kasalehiongehr ih.

16 Oh met ngehi, Nephi, sohte intingiada ni unsek duwen poadoapoad en mehkan me ei pahpahu intingihdier, pwehki e intingihdier me tohtohie me e kilangehr nan kasansal akan oh nan auraman akan; oh e pil intingihdier me tohto kan me e kohpadahr oh kosoiahiongehr nah serih kan me I sohte pahn wiahda unsek en koasoieparail.

17 Ahpw I pahn wiahda poadoapoad en mehkan me wiawiher mwohn ei rahn akan. Kilang, I oaralape inting en ei pahpa me mihmi pohn sleit kan me I wiakidahr pein pehi pwukat; eri mwurin ei kamwote lahr inting en pahpao, I ahpw pahn intingiada duwen pein ei mour.

18 Eri, I men kumwail en ese me mwurin Kauno ketin kasalehiongehr ei pahpao, Lehi, duwen me kopwuriamwei tohto, ehi, mehkan me pid duwen olahn Jerusalem, kilang e kolahr rehn aramas akan pwehn tepida kokohp oh padahkiong irail duwen mehkan me e kilangehr oh rongehr.

19 Oh e wiawiher me irail mehn Jews kin kouruhr kin ih pwehki mehkan me e kadehdehier; pwe ni mehlel e kadehdedahdr duwen arail wiewia suwed oh duwen arail tiahk kelingeringer kan; oh e kadehdehier mehkan me e kilangehr oh rongehr, oh pil mehkan me e wadekehr nan pwuhko me kaledahdr duwen ketidohn Mesaia men oh pil duwen en sampah pahn komourla.

20 Oh ni ahnsouo me mehn Jews akan rongehr mepwukat irail ahpw lingerengerada pah; ehi, duwehte soukohp akan me miher mwohrail me re kin pwakih irail, oh kin kemehla, oh irail pil rapahki ih pwe irail kak

kihsang eh mour. Ahpw kilang, ngehi, Nephi, pahn kasalehwei rehmwail duwen kalahngan en Kauno me kin kipe irail akan me e ketin piladahr; pwehki arail pwoson kin wiahiong irail en kehlaila iei kehlail en pitila.

IRALAUD 2

Lehi kahrehla eh peneinei nan sahpwtehno limwahn Sehd Weitahta -- Irail pwilikihdi arail dipwisou kan -- Lehi wiahda meirong ehu ong Kauno oh padahkiong nah pwutang kan en kolokol kosonned akan -- Laman oh Lemuel lipahnde ara pahpahu -- Nephi me kin peik oh kin kapakap ni pwoson; Kauno ketin mahsaniong ih, oh e pilipildahr pwehn kaunda rie kan.

1 Pwe kilang, e wiawiher me Kauno ketin padahkiongehr ei pahpao, ehi, nan ouraman ehu oh ketin mahsaniongehr ih; meid pah kowe, Lehi, pwehki mehkan me ke wiahier; oh pwehki ke kin loaloapwoat oh kin padahkihong aramas akan mehkan me I padahkiong uhkehr en wia, kilang, irail kin rapahki pwe irail en kihsang omw mour.

2 Oh e wiawiher me Kauno ketin padahkihong ei pahpahu nan ehu ouraman me en alehda eh peneinei oh mweselahnng nan sahpwtehno.

3 Oh e wiawiher me e peikiongehr mahsen en Kauno, eri e wiadahr dahme Kauno ketin poahngokihong ih en wia.

4 Oh e wiawiher me e mweselahngehr nan sahpwtehno. Oh e pwilikidier imwe oh sahpw me e sohsohkio oh nah kohl, oh silper, oh eh kepwe kesempwal akan, oh sohte me e wahda, ihte eh peneinei oh mehkan me e anahne, oh ihmw pwal akan, oh mweselahngehr nan sahpwtehno.

5 Oh e ahpw kodilahr ni irepen sahpwo, limwahn oaroahr en Sehd Weitahta, oh ih oh eh peneinei me iei ei nohno Sariah riei pwutak lauhd kan me iei Laman, Lemuel, oh Sam kin wie kakahn seli nan sahpwtehno ni irepen sahpwo, limwahn Sehd Weitahta. Oh ahpw kodilahr ni irepen sahpwo, limwahn Sehd Weitahta; oh ih eri kin kakahn seli nan sahpwtehno ni irepen sahpwo limwahn Sehd Weitahta; oh e kin kakahnseli nan sahpwtehno iangahki eh peneinei, me iei nolno, Sariah, oh riei pwutak kan, iei Laman, Lemuel, oh Sam.

6 Oh e wiawiher me ni ahnsou me e kakahn selier rahn siluh nan sahpwtehno, ih eri kauwadahr imwe impwalo nan wahu ehu limwahn pillap ehu.

7 Oh e wiawiher me e kawadahr pei sarawi ehu me wiawihkidahr takai kei oh ih eri wiadahr ehu meirong ong Kauno, oh danke Kauno atail Koht.

8 Oh e wiawiher me e ahpw kihong eden pillapo, Laman, oh e kin pwillahng nan Sehd Weitahta oh nan wahuo me mihmi ni irepen sahpwo; wasa me pihlo kin pwilipwil wei nan Sehd Weitahta.

9 Oh ei pahpahu kilangehr me pihl en pillapo kin pwilipwil wei nan utuh pilen Sehd Weitahta, ih eri padahkihong Laman indahda: O me kowe en kak rasohng pillap wet me kin poaden pwilipwilahng utuh pihl kan koaros.

10 Oh e pil padahkiong Lemuel: O kowe en kak rasohng nan wahu wet me tengeteng oh loaloapwoat oh sohte kak mwekid ni kolokol kosonned akan en Kauno.

11 Met e kosoiahier pwehki duwen keptakai en Laman oh Lemuel; pwe kilang ira kin lipahnedehki ara pahpahu me tohto, pwehki e wia aramas en ouraman emen, oh pwehki e kahluwa irail sangehr nan Jerusalem pwe irail en pwilikidi sapwarail sapwen sohso, neirail kohl oh neiral silper, oh arail kepwe kesempwal akan, pwe irail en mehla nan sahpwtehno. Oh met ira kosoiahier me e wiawiher pwehki madamadau likamw kan me kohsangehr nan eh mohngiong.

12 Oh e wiawiher me ni ansou me e wia wadewadek, e ahpw direkilahr Ngenen Kauno.

13 Oh ih eri wadek, indahda: Mehd suwediong, mehd suwediong Jerusalem, pwe I kilangehr duwen omw kelingeringer kan! Ehi, oh me tohto me ei pahpahu wadekehr duwen Jerusalem -- me e pahn ohla, oh tohn wasao; me tohto pahn mehkihla kedlahs, oh me tohto me pahn selilahng Babylon.

14 Oh e wiawiher me ei pahpahu padahkiher ira nan wahu en Lemuel ki manaman sang ni e audaudkidahr Ngehn Sarawi, lao paliwara mwekidkida mwowe. Oh e karotongala ira pwe ira en dehr lipahnade ih; eri ira kin wiadahr dahme e padahkihongehr ira.

15 Ei pahpahu kin mihmi nan impwal ehu.

16 Oh ngehi, Nephi, sang ni ei inenen pwulopwul mehlel, ahpw paliwar laud oh pil ahneki anahn akan en esehla duwen me rir en Koht akan, eri, I ahpw likiweriohng Kauno; oh e ketin pwarehng ie oh ketin kamaterekala nan ei mohngiong pwe I kin kamehlele padahk koaros me ei pahpahu kasaledahr; eri, I ahpw sohte kin duwehte riei kan me kin uhwohng ei pahpao.

17 Oh I kosoiahieng Sam, kasalehiong ih mehkan me Kauno ketin kasaledohngiehier sang ni sapwellime Ngehn Sarawi. Oh e ahpw kin kamehlele ei koasoai kan.

18 Ahpw, kilang, Laman oh Lemuel sohte kin rong dahme I kosoiahdahr oh sang ni pahtou pwehki kekeluwak en nan ara mohngiong kan ih eri kin likiweriong Kauno.

19 Oh e wiawihier me Kauno ketin mahsandohng ie, mahsanih: Mehd pah kowe, Nephi, pwehki ahmw pwoson, me ke kin nantiong omw rapahkiniehki sang ni omw mohngiong karakarahk.

20 Oh nin duwen omw pahn kin kolokol ei kosonned akan, kowe pahn pweikihda oh pahn kolahng sapwen inou eh; ehi, iei sapwen inou eh me I kaunopadahng uhkehr; ehi, sahpw eh me mwahu sang sahpw koaros.

21 Oh nin duwen riomw kan pahn pelianuhkada, ira pahn kin lopila sang mwohn silangin Kauno.

22 Oh nin duwen omw pahn kolokol ei kosonned akan ke pahn wiahla kaun oh sounpadahk en riomw akan.

23 Pwe kilang, ni rahno me ira pahn pelianiehda, I pahn keriahkin irahla ria laud eh, oh ira pahn sohte ahneki kehl pohn noumw serihkan, ihte ma ira sohte pil pahn pelianiehda.

24 Oh ma e mehlel me ira pelianiehda, noumw seri kan pahn wiahki ira mehn kamakam pwe en kin kamwekidada ira nin duwen mehn kataman.

IRALAUD 3

Nein Lehi pwutango pwurala Jerusalem pwehn alehda prahs sleitko -- Laban sohte men mweihd irailda -- Nephi panawih oh kakehlaka riehkan -- Laban pirapahla arail kepwehkan oh songen en kemeiraila -- Laman oh Lemuel keme Nephi oh nem lipwoarehr sang tohnleng emen.

1 Oh e wiawihēr, ngehi Nephi, pwuralahngēhr ni impwal en ei pahpahu sang ei koasoiongēhr Kauno.

2 Oh e wiawihēr me e padahkihōng iehier, indahda: I ahnekier ehū ouraman me Kauno ketin mahsanihōngie duwen kowe oh riomw akan pahn pwurala Jerusalem.

3 Pwe kilang, Laman kolokol poadoapoad en mehn Jews akan oh pil kadaudek en ei pahpa kan mahso oh irail intingdiongēhr pohn sleit prahsko.

4 Eri, Kauno ketin mahsanihōngie me kowe oh riomw pwutang kan en kohla ni imwen Laban oh rapahkihda dahme intingdier kan oh wahdihdo wasaht nan sahpwtehn wet.

5 Oh met, kilang riomw kan pahn kin lipahned, indahda me dene apwal ehū me I padahkihōng ira en wia. Ahpw kilang kaidehn ngehi me padahkihōng ira ahpw iei poahngok sang rehn Kauno.

6 Eri, kohwei nei pwutak oh Koht pahn ketin kupwuramwahuwihiuk pwehki omw sohte kin lipahned.

7 Oh ngehi, Nephi, eri indahng ei pahpao: I pahn kohla oh wiahda dahme Koht ketin poahngoki, pwe I ese me Kauno sohte kin ketikihōng aramas kosonned akan, ma e sohte pahn ketin kaunopehng irail ahlo me irail en kak wiahda dahme e ketin poahngoki.

8 Oh ni ahsou me ei pahpahu rongēhr koasoai pwukat, ih eri perendahr kouwahlapie, pwe e eseier me Kauno ketin kapaiedahr.

9 Oh ngehi, Nephi, oh riei kan eri mweselahngēhr nan sahpwtehno iangahki imwat impwal kan pwe sen kohdahla nan sapwen Jerusalem.

10 Oh ahsou me se kohdalahr nan sapwen Jerusalem, ngehi riei kan eri tuhkipenehr irair wet.

11 Oh se usuhsehr pwe ihs reht me pahn kohla ni imwen Laban, oh Laman me usuhsdahr. Laman eri kolahngēhr ni imwen Laban, ih eri koasoiohngēhr Laban ni e mwohdehr reh nan imweo.

12 Oh e men Laban en kihōng ih poadoapoad akan me intingdiongēhr pohn prahs sleit kan me audaudiki kadoudok en ei pahpao.

13 Oh kilang Laban lingeringer dahr oh sikenlahsang ih mwowe; oh sohte men en alehda poadoapoad akan, eri, e ahpw kosoiahōng ih: Kilang kowe lipirap emen oh I pahn kemeiukala.

14 Laman ahpw tangasang mwowe, oh ih eri padahkihong kihtehr dahme Laban wiadahr. Oh kiht tepier pahoula mehleh, oh riei kan kereniong pwurula rehn ei pahpahu nan sahpwtehno.

15 Ahpw kilang I indahiong irail me: Nin duwen Kauno ketin ieias oh nin duwen aht momour, kitail sohte pahn kohdihhla rehn atail pahpahu lao kitail wiahda dahme Kauno ketin mahsanihong kitailehr.

16 Eri kitail en kin loaloapwoat ong ni dadauhr mahsen akan en Kauno; kitail eri en kohdihla nan sapwen sohso en atail pahpao, pwe kilang e pwilikidier kohl oh silper, dipwisou kesempwal koaros. Oh me pwukat koaros e wiahier pwehki sang ni kosonned en Kauno.

17 Pwe I eseier me Jerusalem udahn pahn ohla pwehki suwed lahn aramas akan.

18 Pwe kilang irail soikalahr mahsen en soukohp akan. Eri ma ei pahpahu pahn mihmi nan sahpwo mwurin en Koht ketin mahsanihong ih en tangasangie, kilang, e pil pahn mehla. Eri e uhdahn anahne en tangatang nan sahpwo.

19 Oh kilang, iei duwen erepit en Koht me kitail pahn alehda poadoapoad pwukat pwe kitail en nekid ong neitail serihkan nin duwen mahsen en aht pahpa kan.

20 Oh pwe kitail en nekid ong irail mahsen akan me kohsangehr nan ewen soukohp sarawi kan, me kohiengehr irail sang rehn Ngehno oh manaman en Koht sangete tepin sampah kokkohdo oh lel ahsou wet.

21 Oh e wiawiher me sang ni mwomwen koasoai wet me I kawekala riei kan pwe irail en kak loaloapwoat ong ni dadauhr kosonned en Koht akan.

22 Oh e wiawiher me kiht eri kohdihlahng sapwen aht sohso, oh se kihpenehr aht kohl akan oh aht silper akan, oh aht kepwe kesempwal koaros.

23 Oh mwurin aht kihpenehr mepwukat, kiht eri pil pwurehng kohdahla nan imwen Laban.

24 Oh e wiawiher me se kolahr nan imwen Laban oh se anahne en kihong kiht poadoapoad akan me intingdiongehr pohn prahs sleit akan, pwe se pahn kihong ih aht kohl akan, silper akan, oh aht dipwisou kesempwal koaros.

25 Oh e wiawiher me ni ahsouo me Laban kilangehr aht dipwisou me inenen kesempwal, ih eri noahrokedahr mehleh, ih eri sikenkiteilahr liki, oh kadarala nah tohn

doadoahok kan en kemeikitala, pwe en kak kihsang aht kepwe kan.

26 Oh e wiawiher me se tangasangehr mwohn nein Laban papah kan, oh se udahn pahn kihdi aht kepwe kan, oh irail milahr nan pehn Laban.

27 Oh eri se tangalahr nan sahpwtehno, oh nein Laban papah kan sohte koledi kiht, oh se rukila nan pwoaren takai ehu.

28 Oh e wiawiher me Laman lingeringer ong ie, oh pil ei pahpao; oh Lemuel pil insensuwed lahr pwe e rongalahr en Laman koasoai kan. Eri Laman oh Lemuel lokaia laud ong kiht riara me pwulopwul akan oh eri ira kin kemehkin kiht mehn poak ehu.

29 Oh e wiawiher me nin duwen ara kemehkin kiht lepin poak ehu, a kilang tounleng en Kauno kodohr oh mihmi mwohra, oh ketin padahkihong ira, inda: Dahme kahrehda kumwa kemehkin riamwa me pwulopwul en ki lepin poak ehu? Dah, kumwa sehse me Kauno ketin piladahpwe en wia amwa kaun, oh met wiawiher pwehki dipamwa kan? Kilang kumwail pahn pwuredalahng nan Jerusalem, oh Kauno pahn ketikihwei Laban nan pehmwail akan.

30 Oh mwurin tounlengo e mahsandoing kihtehr, ih eri mweseldahr.

31 Oh mwurin en tounlengo ketlahr, Laman oh Lemuel pil tepida lipahned, indahda: Ia duwen en Kauno eh kak ketikihdo Laban nan pehtail? Kilang, ih aramas kehlail emen, e pil kak kaunda aramas limehk, ehi, e kin kak kemehla aramas limehk; eri, dahme kitail sohte pahn kamkihla?

IRALAUD 4

Nephi kemehla Laban sang ni mahsen en Kauno oh eri nekedalahr sleit prahsko sang ni koasoandi ehu -- Zoram pilada en iangala peneinei en Lehi nan sahpwtehno.

1 Oh e wiawiher me I lokaiahiongehr riei kan, inda: Kitail pwurehng kohdahla nan Jerusalem, oh kitail en kin loaloapwoat ong dadauhr kosonned akan en Kauno; pwe kilang e ketin roson sang mehkoaros nan sampah, eri

dahme kahrehda e sohte pahn ketin roson sang Laban oh nah limehko, ehi, de nah me lopw akan?

2 Eri kitail kohdahla; kitail kehlaile duwehte Moses; pwe mehlel e lokaia lahng pilen Sehd Weitahta oh sehdo pwalpesengehr sang paliet oh lel palio, oh samatail akan keidehr pohn pwehl ngalangal, kolang nan arail kalidu, oh sounpei kan en Parao ahpw idawenla irail oh mehlahr nan pilen Sehd Weitahtao.

3 Kilang ahsou wet kumwa en ese me met me mehlel; oh kumwa pil ese me tounleng en Koht emen mahsendohngehr rehmwa, eri dah, kak kumwa en sohte kamehlele? Kitail kohdahla; Kauno kak ketin kapit kitaila duwehte samatail akan sang rehn mehn Egypt akan.

4 Ahsou wet me I kosoiahier mepwukat, ira ahpw pil inenen insensuwedla, oh ira pil wenlahte wie lipahned ahpw ira idahweniehdo lao se lel likin kehlen Jerusalem.

5 Oh wasa lao pwongier, I ahpw indahiong irail en rukila maslikin kehlo. Oh mwurin arail karukialahr pein irail, ngehi, Nephi, eri kerepelong nan kahnimwo, oh kolahr ni imwen Laban.

6 Oh Ngehno me ketin kahluwaiehier, pwe I sohte ese wehwehn mehkan me I en wia.

7 Ahpw I kolahr, oh nin duwen ei karaniher imwen Laban, I kilangadahr ohl emen, oh e pwupwidiongehr nan pwelo mwohi, pwehki e sakaukihlahr wain.

8 Oh ni ei kohdo reh I diaradahr me ohlo iei Laban.

9 Oh I eri kilangadahr nah kedilahso, oh I ahpw usada sang nan kidipeho oh mangilehn kedlahso me udahn kohl oh wiepehu me mwahu kouwahlapie, oh I diaradahr me kedlahso wiawihkidahr mete me keiou kesempwal.

10 Oh e wiawihier me Ngehno ketin idingkinie me I en kemehla Laban; ahpw I inda nan mohngiong: I saikinte kakerehdi intahn aramas. Oh I ahpw mwarosalahr oh sohte men kemehla ih.

11 Oh Ngehno pil ketin pwurehng mahsandohngie: Kilang Kauno ketikihweiehr ih nan pehmw akan. Ehi, oh I pil eseier me e rapahkier en khsang ei mour, ehi, e sohte pahn kin rong kosonned akan en Kauno; oh e pil khsangehr aht kepwe kan.

12 Oh wiawihier me ngehno pil ketin pwurehng mahsendohng ie: Kemehla, pwe Kauno ketikihwei ih nan pehmw akan.

13 Kilang Kauno kin ketin kemehla me suwed akan pwehn ketikihda sapwellime kahrepe pwung kan. E inenen mwahu ong emen en mehla sang ehu wehi en luwetala oh mehkihla arail soh pwoson.

14 Oh ahnsou wet, ngehi, Nephi, rongadahr mahsen pwukat, I ahpw tamandahr me Kauno ketin padahk kihongiehier nan sahpwtehno, me mahsani: Nin duwen kadaudok omw kan pahn kin audaudiki ei mahsen akan, irail pahn kin pweida nan sapwen inouo.

15 Ehi, oh I pil lemedahr me re sohte kak kolokol kosonned akan en Kauno me pid duwen kosonned en Moses, ma irail sohte alehda kosonnedo.

16 Oh I pil ese me kosonnedo inting diongehr pohn sleit prahs akan.

17 Oh pil ehu, I eseier me Kauno ketikidohr Laban nan pehi pwukat ong ni kahrepe wet, pwe I en kak alehda poadoapoad akan sang nin duwen sapwelime kosonned akan.

18 Eri I ahpw peikihongehr kapitien Ngehno, oh I ahpw koledier piten moangen Laban, oh I eri lopokasangehr moangen Laban ki pein nah kedlahso.

19 Oh mwurin ei lopokasangehr moangeo ki pein nah kedlahso, I ahpw aledahr en Laban likou kan oh pwuhriونغ loale, ehi, mehkoaros; oh katengehiong eh tetehn mahwino ni lukepei.

20 Mwurin ei wiadahr met, I ahpw kolahr nan en Laban wasahn nekineko. Oh nin duwen ei kohkohlahng en Laban wasahn nekineko, I kilangadahr papahn Laban, eh ladu men me kolokol kihen wasahn nekineko oh I ahpw ruwese ih ni duwen ngilen Laban, me e pahn iengie kolahng nan wasahn nekineko.

21 Oh e lemehkihong me ngehi iei eh kauno, Laban, pwehki e kilangadahr likou kan oh pil kedlahs me I pipiho.

22 Oh e kosoiahiongie duwen elder en mehn Jews akan, e ese me nih pwongo eh Kauno Laban kolahr likio rehrrail.

23 Oh I koasoai ong ih duwehte en Laban kin koasoai ong ih.

24 Oh I pil padahkiong ih me I pahn wahla inting kan me mihmi pohn sleit prahsko ong riei ohl me mahkan me mihmi likin kehlo.

25 Oh I pil indahiong ih en idawen ie.

26 Oh e kin lemeleme me I kosoiahier riei kan nan mwomwohdiso, oh me ngehi iei udahn Laban me I kemelahr, ih eri idawenie lahr.

27 Oh e kosoia dahr pahn pak tohto duwen elder en mehn Jews akan ni ei wie kohkohlangehr riei kan me mihmi likin kehlo.

28 Oh e wiawiher me ni ahsou me Laman kilangie dahr e ahpw masapwehkadahr kouwahlapie, oh pil Lemuel oh Sam. Oh irail tangasangehr mwohi pwe irail lemehkiohng me Laban, oh dene e kemeielahr oh pil rapahkier irail pwehn khsang arail mour.

29 Oh I eri likiwerlahng mwurirail oh irail rongadahr me ngehi; eri irail solahr tangasangrei.

30 Oh e wiawiher me ni ahsou me papahn Laban kilangadahr rieiko, ih eri rerrer, oh e pahn tangasang mwohi oh pwuralahng nan kahnihmw en Jerusalem.

31 Oh met ngehi, Nephi, sang ni ei paliwahr laud, oh pil aledahr roson laud sang Kauno, eri parokedi ladu en Laban oh koledier ih pwe en dehr tang.

32 Oh e wiawiher me I padahkiongehr ih, ma e pahn rong ehi koasoai kan, nin duwen Kauno ketin ieias, oh nin duwen ei momour ma iei mehlel e pahn rong ei koasoai kan, I pahn kapitala eh mour.

33 Oh I padahkihiong ih, iangahki kahula ehu, me en dehr masepwehk pwe e pahn wiahla ohl saledek emen duwehte kiht, ma e pahn iang kiht kohdihla nan sahpwtehno.

34 Oh I ahpw pil padahkihiong ih, inda: Mehlel me Kauno ketin mahsanihong kitail en wiahda meuwet; oh kitail sohte pahn kin nantihong kolokol sapwellimen Kauno kosonned akan? Eri, ma ke pahn kohdihla rehn ei pahpahu nan sahpwtehno, e pahn mie deum reht.

35 Oh e wiawiher me Zoram sohte masak koasoai kan me I kosoiahiengehr. Zoram menet iei eden luduo; oh e inoukidahr me e pahn kohdihla rehn aht pahpahu nan sahpwtehno. Oh e pil kahukilahr me e pahn milahr reht sangete ahsou kohla.

36 Ahsou wet se men en mihla reht pwehki kahrepe wet, pwe mehn Jews akan en dehr, ese aht tangalahr nan sahpwtehno, pwe irail de pwekikhitedo oh kemeikitala.

37 Oh e wiawiher me ni ahsou me Zoram kaulahr ong kitehr, se ahpw solahr masak ih.

38 Oh e wiawiher me se wadahr sleit prahsko oh nein Laban laduo, oh mweselahngehr nan sahpwtehno oh kolahr ni imwen ei pahpahu impwalo.

IRALAUD 5

Sariah lipahnedede Lehi. Ira koaros perenkihda pwuralahn neira pwutangko -- Irail wiadahr meirong kan -- Sleit prahs akan audaudiki en Moses eh inting kan oh soukohp akan -- Irail kasalehda me Lehi iei ih emen kadaudek en Joseph -- Lehi wia kokohp nin duwen kadoudokepe kan oh duwen nekinek pen sleitko.

1 Oh mwurin aht kohdilahr nan sahpwtehno rehn aht pahpao, kilang, e direkihlahr peren oh ei nohno Sariah pil perenda kowahlapie, pwe mehlel e kin wie sengiseng pwehki kiht.

2 Pwe e lemehiong me se melahr nan sahpwtehno; oh e pil kin lipahnedede ei pahpao, me dene ih iei ohl en ouraman emen, inda: Kilang ke kahluwa kiht sangehr nan sapwatail sapwen inouo, oh nei pwutak kan solahr mie, oh kitail pahn melahr nan sahpwtehn wet.

3 Oh iei mwomwen lokaia me ei nohno lipahnedehkier ei pahpao.

4 Oh e wiawiher me ei pahpahu padahkihongehr ih, inda: I ese me ngehi aramas en kasansal pwarehng emen, pwe ma I sohte kin kilangada mehkan me Koht ketin kupwuriki nan kasansal kan. I sohte pahn ese duwen kamwahupen Koht, ahpw I pahn mehla nan Jerusalem iangahki riei kan.

5 Ahpw kilang, I aledahr sapwen inou ehu, sang ni mehkan me I kin peren; ehi, oh I ese me Kauno pahn ketin kapitalla nei pwutangko sang nan pehn Laban akan oh pahn ketin kapwure iraildo rehta nan sahpwtehn wet.

6 Oh iei mwomwen lokaia me pahpao, Lehi, wiahier pwehn kansenamwahuwiala ei nohno Sariah, me pid duwen kiht, ahnsou se kakahn selier nan sahpwtehno kokkohlahng nan sapwen Jerusalem pwe sen alehda poadoapoad en mehn Jews akan.

7 Oh ahnsou me se pwurelahngehr imwen ei pahpa impwalo, kilang ara peren eri unsekala, oh ei nohno eri insenamwahula.

8 Oh e koasoia, indahda: Ahnsou wet I ese mehlel me Kauno ketin mahsanihong ei pwoud en tangalang nan sahpwtehno, oh I pil ese me mehlel ehu me Kauno ketin sinsilehier nei pwutak kan oh ketin kapit irail lahr sang nan pehn Laban, oh ketikihong irail manaman en wiahda me Kauno ketin mahsani ong iraillehr. Oh iei duwen me ei nohno koasoiahier.

9 Oh e wiawiher me ira perendahr kowahlapie, oh wiahier meirong isihng ong Kauno; oh ira eri dangke Koht en Israel.

10 Mwurin ara dangkehier Koht en Israel, ei pahpao, Lehi, eri aledahr podoapodo me inting diongehr pohn sleit prahsko oh e ahpw wadewadek sang ni tapio.

11 Oh e diaradahr me irail wiawikidahr pwuhk limau en Moses, me wiadahr duwen podoapoad en kapikpikdahn sampah, oh pil Adam oh Eve; iei me tepin atail pahpa oh nohno.

12 Oh pil podoapoad en mehn Jews akan sang nin tapio lel lahng mwein Zedekiah, nahnmwariki en Judah.

13 Oh pil kokohp en soukohp sarawi kan sang ni tapio lel lahng tepin mwein Zedekiah, oh pil kokohp tohto me kohsangehr nan ewen Jeremiah.

14 Oh e wiawiher me ei pahpa, Lehi, pil diaradahr pohn sleit prahs ko kadaudok en semeh kan, eri e diaradahr me ih iei kadaudok en Joseph; ehi, Joseph me nein Jacob me netilahr nan Egypt, oh me limen Kauno me ketin doarehla ih pwe en kak doarehla eh pahpa, Jacob, oh koaros tohn imwe pwe irail en dehr mehkihla lehko.

15 Oh ihte Koht ohte, me ketin doare irail lahr sang nan arail sensel oh pil ketin kahluwa irail sang nan sapwen Egypt.

16 Oh met ei pahpao, Lehi, diarehr duwen kadaudok en semeh kan. Oh Laban pil emen kadaudok en Joseph, ihme kahrehda ih oh semeh kan kin wie kolokoliki podoapoad akan.

17 Oh ahnsou wet, ni en ei pahpahu eh kilangehr mepwukat koaros, e ahpw direkilahr Ngehno, oh tepier kohpada duwen kadoudoke kan.

18 Me sleit prahs pwukat pahn kolahng wehi koaros, keinek koaros, loh koaros, oh kadaudoke kan, koaros.

19 Eri, e kosoiahier me sleit prahs pwukat pahn sohte ohla; Pil ansou sohte pahn kahrehiong en ediedla. Oh e kohpadahr me tohto duwen kadaudokehkan.

20 Oh e kedekedeo e lelehr met ngehi oh ei pahpahu kolokolehr kosonned akan me Kauno ketin poahngokihong kihtehr.

21 Oh se alehdahr intingko me Kauno ketin mahsanihong kihtehr en wia, oh se wadekehr oh diaradahr me mie anahneparail; ehi, me inenen kesempwal ong kiht pwe sen kak nekid ong nait serihkan kosonned akan en Kauno.

22 Eri, iei duwen erepit en Koht me se pahn weuwa irail, ni aht pahn kakahn seli nan sahpwtehno kolahng sapwen inouo.

IRALAUD 6

Nephi intingihdi duwen mehkan me sapwellimen Koht. Sapwellime kahrehpeo iei en kahrehiong aramas akan en kodohng Koht en Abraham oh en komourla.

1 Oh met ngehi, Nephi, sohte kihong kadoudok en ei pahpa kan nan wasaht me I en intingihada; oh sohte ahnsou ehuh mwuhr me I pahn kihong pohn sleit kan me I pahn intingih; pwe e kohdihongehr nan poadoapoado me ei pahpahu wie nekinekid; eri, I sohte intingihdi nan doahk wet.

2 Pwe I itarkier ei kasaledahr me kiht iei kadoudok en Joseph.

3 Oh e sohte katepehiong ie me I oaretikiada mehkoaros duwen ei pahpao, pwehki e sohte kak intingihdi pohn sleit pwukat, pwe I anahne wasa me I en intingihada mehkan duwen Koht.

4 Pwe me I inengieng ni unsek iei me I en kak wekedala aramas koaros en kodohng Koht en Abraham, oh Koht en Isaac, oh Koht en Jacob, oh en komourla.

5 Eri I sohte intingidi mehkan me mwahu ong sampah, ahpw mehkan me mwahu ong Koht oh irail akan me kaidehn kisehn sampah.

6 Eri, I pahn kihla kosonned ong kadoudokei kan, me irail sohte pahn intingihdiong nan sleit pwukat mehkan me sohte katepe ong aramas akan.

IRALAUD 7

Nein Lehi pwutak kan kan pwurala Jerusalem oh kihong Ishmael oh tohn imweh kan en iangala kahrepen arail mweseldao -- Laman oh ekei uhwongada irail -- Nephi panawih rie kan en pwoson Kauno -- Irail pirehkihdi ih sahl apwoat oh planedahr en kamakamala -- E saledek lahr sang ni manaman en eh pwoson -- rie kan pekmahk -- Lehi oh ienge kan wiahier meirong isih kan.

1 Oh met I men kumwail en kak ese me mwurin ei pahpa, Lehi, eh kaneke lahr eh kokohp nin duwen kadoudokeh kan, Kauno pil ketin pwurehng mahsani ong ih, mahsanih me e sohte konehng ih, Lehi, en wahla eh peneinei kelehpw nan sahpwtehno; ahpw me nah pwutak kan en alehda serepein akan arail pwoud, pwe irail en kak kakairada seri kan rehn Kauno nan sapwen inouo.

2 Oh e wiawiher me Kauno ketin mahsani ong ih, me ngehi, Nephi, oh riei pwutak kan en pwurala nan sapwen Jerusalem oh wahdihdo Ishmael oh e peneinei nan sahpwtehno.

3 Oh e wiawiher me ngehi, Nephi, iangahki riei kan eni pwurala nan sahpwtehno pwe sen kohdahla Jerusalem.

4 Oh e wiawiher me se kohdalahr ni imwen Ishmael oh se ahpw kenekenlahr reh, eri se ahpw padahk kiongehr ih duwen mahsen en Kauno.

5 Oh e wiawiher me Kauno ketin kamatereklahr mohngiong en Ishmael oh pil tohn imwe, irail ahpw mweseladahr iang kiht kohdihlahng imwen pahpa imwpwalo nan sahpwtehno.

6 Oh e wiawiher me nin duwen aht kakahn selier nan sahpwtehno, kilang Laman oh Lemuel, oh nein Ishmael serepein riemen, oh pwutak riemen oh arail peneinei kan uhwongadahr kiht; ehi, uhwongadahr, ngehi, Nephi oh Sam, oh arail pahpa Ishmael oh eh pwoudo oh nah serepein silimen.

7 Oh nin duwen uhpeneo, irail kin anahne pwuralahng sapwen Jerusalem.

8 Oh ngehi, Nephi, ahpw pahtou ki lahr duwen keptakai en nan ara mohngiong kan, eri I ahpw padahkiong ira, inda, ehi, ong Laman oh Lemuel: Kilang kumwa iei riei ohl me laud akan, oh iaduwen, pwe kumwa me inenen keptakai nan amwa mohngiong kan, oh inenen rotorot nan amwa lamalam, kumwa eri anahneie, riamwa pwutak me tikitik, en kin padahki kumwa, ehi, oh me I en kin wiahda karasepe mwahu ong kumwa.

9 Ia duwen amwa sohte kin karonge mahsen en Kauno?

10 Ia duwen kumwa manokehlahr me kumwa kilangehr emen tounleng en Kauno?

11 Ehi, oh ia duwen amwa manokehlahr me kesempwal akan me Kauno ketin wiahiong kitailehr, ni e ketin kapit kitail sang nan pehn Laban akan, oh me kital en alehda poadopoado?

12 Ehi, ia duwen amwa manokehlahr me Kauno kin ketin kak wia mehkoaros ong aramas akan nin duwen dahme e ketin kupwuriki, ma iei mehlel e kohsang nan arail kin doadoahngki arail pwoson ih? Eri, kitail en kin loaloapwoat ong ih.

13 Oh ma iei kitail en kin loaloapwoat ong ih, kitail pahn alehda sapwen inouo; oh kumwa pahn ese ni ehu ahnsou kohkohdo me mahsen en Kauno pahn pweida me pid duwen ohlahn Jerusalem; pwe me koaruhsie me Kauno ketin mahsanihier duwen ohlahn Jerusalem pahn uhdahn pweida.

14 Pwe kilang, Ngehn en Kauno pahn ketin kereniong tukidihsang eh ketiket rehrail; pwe kilang, irail soikalahr soukohp akan, oh irail kesehiongehr Jeremiah nan imweteng oh irail rapahkihier pwe ren kihsang mouren ei pahpao, irail ahpw eri kausasangehr ih nan sahppo.

15 Met kilang, I indahiong kumwa, ma kumwail pahn pwurala Jerusalem, kumwa pahn pil iang irail mehla. Oh ma kumwa pahn ahneki pilipil wet, kumwa kohdahla nan sahppo oh tamataman me I kosoia weier, pwe kumwa pil pahn mehla; pwe iet me Ngehn en Kauno me ketin idingkin ie Ien kasalehda.

16 Oh e wiawiher me ni ahnsou me ngehi, Nephi, padahkihiongehr rieiko mahsen pwukat, ira eri lingeringer dahr pahi, oh ira poakihkin ie pehra kan, pwe kilang, ira

mwehdahr kouwahlapie, oh pihiekinie penehr sahl ekei, pwehki ira rapahkihier pwe ira en kihsang ei mour, pwe ira en kihiehdi nan sahpwteho pwe mahn akan en kangiehla.

17 Ahpw e wiawihier me ngehi eri kapakap ong Kauno inda: Maing Kaun, nin duwen ei kin loalepoat ong komwi, komw ketikihsang ie nan pehn riei kan, ehi, eri ketikido roson pwe I en kak mweidpeseng sahl pwukat me pireie penehr.

18 Oh e wiawihier me ni ahsou me I kosoiahier mepwukat, kilang, sahl pwukat sapwedek lahr sang ni pehikat oh nehikat, oh I pwurehng kesihnendahr mwohn riei kan oh pwurehng padahki ira.

19 Oh e wiawihier me ira pil pwurehng lingeringer dahr pahi, oh rapahkinie pwe irahu parokiehdi; ahpw kilang, emen nein Ishmael serepeinko, ehi, oh pil eh nohno, oh pil emen nein Ishmael pwutangko me pekimahk kinie rehn rieiko, eri ira ahpw kamalailaiedi ara mohngiong kan oh tukedihsang ara nantihong en kihsang mouriet.

20 Oh e wiawihier me ira pahtou lahr mehlel pwehki sang ni ara suwed, ira eri poaridier mwahi oh peki Ien mahkohng ira mehkan me ira wiahiongihier.

21 Oh e wiawihier me ni mehlel I mahkehng irahier ni mehkoaros me ira wiadahr, oh I kaweid kin ira en kapakap kihong Kauno ara Koht en ketin mahkehng ira. Oh e wiawihier me ira wiadahr met. Oh mwurin ara kanekehlahr ara kapakap ong Kauno, kiht eri pil pwurehng mweseldahr nan aht seilok ong ni imwen ei pahpa impwalo.

22 Oh e wiawihier me se kohdilahr ni imwen aht pahpa impwalo. Oh mwurin ngehi, oh riei kan, oh koaros tohn imwen Ishmael kohdilahr ni imwen ei pahpa impwalo; irail eri dangkehier kauno arail Koht oh irail wiadahr meirong isih kan ong ih.

IRALAUD 16

Irail me suwed akan kin apwal en alehda mehlelo -- Nein Lehi pwutak ko pwoudkihda nein Ishmael serepein akan -- Liahona kin kahluwa irail ong wasa me irail kohkohlahngie nan sahpwteho -- Mahsen kan sang rehn Koht kin intingdiong pohn Liahona ni ehu ehu ahsou kan. Ishmael mehla; eh peneinei lipahned pwehki kahpwal akan.

1 Oh e wiawiher me mwuhr ngehi, Nephi, kanekelahr ei koasoai ong riei kan, kilang irail indahiong ie: Ke kin kasaleiong kiht mehkan me apwal ong kiht laud sang me se kak alehda.

2 Oh e wiawiher me I indahiong irahier me I ese me I kosoiahier me apwal akan ong irail me suwed akan nin duwen mehlelo, oh me pwung kan me I kasaledahr oh kadehdeier me irail pahn lapalapala ni imwin rahno, kahrepen me dipan akan kin apwaliki alehda mehlelo, pwe e pahn kin kamedekehla laud emen emen irail.

3 Oh met riei kan, ma kumwa kin pwung oh men rong mehlelo, oh kin karonge, pwe kumwa en kin kak alu inen mwohn Koht, eri kumwa sohte pahn lipahned pwehki mehlelo, oh kin inda: Ke kin padahkiong kiht mehkan me apwal me kin uhwongada kiht.

4 Oh e wiawiher me ngehi, Nephi, eri panawi riei kan ni ngoang koaros pwe ira en kin dadauhr kosonned akan en Kauno.

5 Oh e wiawiher me ira me peih karakarahkalahr mwohn Kauno; I ahpw ahnekier peren oh koapwoaroapwoarkin ira laud, pwe ira pahn alu nan elen me pwung kan.

6 Mepwukat koaruhsie sansalehr oh wiawiher ni ahnsou ei pahpahu kin wie koukouson nan impwal ehu nan wahu ehu me adaneki Lemuel.

7 Oh e wiawiher ngehi, Nephi, aledahr ei pwoud emen nein Ishmael serepeinko; oh riei pwutak pil aledahr arail pwoud nein Ishmael serepein kan. Oh Zoram pil aledahr eh pwoud nein Ishmael serepein me keieu laudo.

8 Oh met ei pahpahu kapwaiadahr kosonned kan koaros en Kauno me kohiengehr ih, oh ngehi, Nephi, me kapaidahr mehlel sang rehn Kauno.

9 Oh kepitien Kauno ahpw ketin mahsen iong ei pahpahu me mandahn rahno e pahn seiloak lahng nan sahpwtehno.

10 Oh e wiawiher me ni ahnsou me ei pahpahu piradahr ni mensengo oh kohlahngehr ni wenihmw en impwalo, e ahpw pwuriamweikilahr pwe e kilangadahr nan pwelo umwpwei pwonopwon ehu me kopwuriamwei duwen wiepehu; oh e wiawihkidahr prahs me kaselel akan. Oh nan umwpweio mie rah riau oh apwot kin idilahng wasa me se pahn kin kohla ie nan sahpwtehno.

11 Oh e wiawiher me se kihpenehr mehkan me se pahn wahlahng nan sahpwtehno, oh luwen mehkan koaros me se

anahne me Kauno ketikihong kitehr oh se wahdahr weren tuhke kan koaros me se kak walahng nan sahpwtehno.

12 Oh e wiawiher me se ahpw alehier aht impwal akan oh mweselahngehr nan sahpwtehno, sang ni at kotehla pillap Laman.

13 Oh e wiawiher me se kakahnselier erein rahn pahieu me inenlahng limwahn palimese en paliepeng, se pwurehng kauwadahr aht impwal kan oh kahdanekier wasao Shazer.

14 Oh e wiawiher me se alehier nait kesik ketiou kan oh nait arep akan, oh kohla nan sahpwtehno pwe sen rapahki mwenge ong aht peneinei kan; oh mwurin aht rapahkier mwenge kan ong aht peneinei kan, kiht pil pwuralahr rehrrail Shazer nan sahpwtehno. Oh se pil kokkohlahte nan sahpwtehno, idawenlahte wasa me pwehl mwahu en nan sahpwtehno, me mihmi limwahn irepen Sehd Weitahta.

15 Oh e wiawiher me se kakahn selier erein rahn tohto, wie sasaik kanat mwenge kan sang ni nait kesik ketieu kan, nait arep kan, takai kan, oh nait pehn paih kan.

16 Oh se kin idawen wasahkan me umwpweio kin idilahng, me kahrei kitehr ong wasa kan me pil pwel mwahu nan sahpwtehno.

17 Oh mwurin aht kakahn selier nan sahpwtehno ni ereihn rahn tohto kei, se kauwadahr imwat impwal akan ni ereihn ahsou kis, pwe sen kak pwurehng kommoaldi, oh rapahki mwenge ong aht peneinei kan.

18 Oh e wiawiher me ngehi, Nephi, nin duwen ei kolahng rapahki mwenge, kilang, I kauwelahr nei kesik ketieu me wiawikihda mete kaselel; oh mwurin ei kauwelahr nei kesik ketieuo, kilang riei kan eri kailongkinielahr pwehki olahn nei kesik ketieuo, pwe se solahr kin diar mwenge.

19 Oh se pwuralahngehr rehn aht peneinei kan oh sohte mwenge me se wa, oh pwehki irail inenen pwangadahr sang ni arail seiseilok selier, irail ahpw inenen mehkilahr arail men mwenge.

20 Oh e wiawiher me Laman oh Lemuel oh nein Ishmael pwutak kan tepier lipahned kouwahlahpie, pwehki arail lokolok kan oh apwal akan nan sahpwtehno; oh pil ei pahpahu pil tepier lipahned Kauno eh Koht; ehi, oh irail koaros insensuwed kilahr kouwahlahpie, ihme karehda irail kin lipahnedehkier Kauno.

21 Met e wiawiher me ngehi, Nephi, sang ni ei apwalahr iangahki riei kan; pwehki olahn nei kesik ketieuo oh selin

neirail kesik ketieu kan, e tepier apwal mehlel, ehi, eri se solahr kak diarada kisin mwenge.

22 Oh nin duwen me e wiawiher ngehi, Nephi, lokaia laudohnger rieikan pwehki irail pwurehng keptakai lahr nan arail mohngiong kan sang ni arail lipahnedede Kauno arail Koht.

23 Oh e wiawiher me ngehi, Nephi, wiadahr kesik ketieu ehu sang ni tuhke ehu oh sang ni lepin tuhke inen ehu, I wiadahr arep ehu; iangahki pahi ehu oh kisin takai kei. Oh ngehi eri ndahiongehr ei pahpao: Ia wasa I pahn kohlaie pwe Ien diar kisin mwenge?

24 Oh e wiawiher me e padahkikiongehr Kauno, me irail aktikitik lahr pwehki sang ni ei koasoai kan; pwe Indahiong iraillehr soahng tohto sang ni kehl en palingeni.

25 Oh e wiawiher me kapitien Kauno peidohngehr ei pahpao; oh e ahpw ale lokolok sang ni eh lipahnedede Kauno, ih eri milahr nan pahtou kouwahlahpie.

26 Oh e wiawiher me kapitien Kauno, ahpw ketin padahkihiong ih: Kilang pohn umpweio, oh kilang mehkan me intingdier powe.

27 Oh e wiawiher me ni ahnsou me ei pahpahu tehkehr mehkan me inting dihiongehr pohn umwpweio, e ahpw masapwehkadahr oh rerrer kouwahlapie; oh pil iangahki riei kan oh nein Ishmael pwutak kan oh aht pwoud akan.

28 Oh e wiawiher me ngehi, Nephi, kilangadahr me rahkan me mi nan umwpweio, kin wie doadoahk nin duwen pwoson oh ngoang oh keneinei me se kin wiahiong ira.

29 Oh e pil intingdiong powe inting kapw ehu me inenen sansal mwahu en wadawad me kin kawehweiong kiht, me pid duwen elen Kauno kan; oh e kin intingdi oh kin wekwekidek ni ehu ehu ahnsou kan sang nin duwen pwoson oh ngoang me se kin wia. Oh met se esehier me sang ni mehkot me tikitik Kauno kin ketin kak wiahkihda mehkot me laud.

30 Oh e wiawiher me ngehi, Nephi, kolahr pohn nahnao, nin duwen wasahkei me sansaladahr sang ni umwpweio.

31 Oh e wiawiher me I kemelahr mahn lawalo kan, eri, I ahpw koledier me aht peneinei kan pahn kang.

32 Oh e wiawiher me I pwuralahngehr inwaht impwal akan, weuwa mahn akan me I kemelahr; oh met irail diaradahr me I diaradahr kisin mwenge, ia uhwen laud en

arail peren! Oh irail eri pein karakarahkalahr mwohn Kauno, oh kin dangke ih.

33 Oh e wiawihher se pil pwurehngkehr aht seilok, wie kohkohlhng limwahn wasao me duwehte mahso; oh mwurin aht kakahn selier erein rahn tohto, se kauwadahr imwat impwal akan, pwe sen kak mihmi wasao erein ahsou kis.

34 Oh kedekedeo Ishmael melahr oh seridier wasahkis me kahdaneki Nahom.

35 Oh e wiawihher me nein Ishmael serepein kan wie mwahmwahiei kouwalahpie pwehki melahn arail pahpao, oh pwehki arail lokolok kan nan sahpwteho; irail eri lipahnade ei pahpao, pwehki e we iraildo sangehr nan sapwen Jerusalem. Aht pahpahu melahr, ehi, oh se kakahn selier werei nan sahpwteho, oh se lokolongkier apwal laud, se dupeklahr, men nimpiladahr, pwangadahr, oh mwurin lokolok pwukat koaros, se udahn pahn mehkihla duhpek nan sahpwtehn wet.

36 Oh met iei me irail lipahnedehkier ei pahpahu oh pil ngehi; oh irail eri men pwuralahngkehr Jerusalem.

37 Oh Laman padahkiongehr nein Ishmael pwutak kan oh Lemuel inda; kilang, kitail en kemehla atail pahpao; oh pil riatail Nephi, me pein wiahiongehr ih en wia atail kaun oh aht sounpadahk en rie kan me mahsang ih kan.

38 Met e kosoiahier me Kauno ketin mahsaniongehr ih, oh pil tounleng kan kin seuwese ih, ahpw kilang, se ese me e kin pitih kiht; oh e indahiong kitehr mepwukat, oh e wiadahr soahng tohto sang ni eh doahk mwersuwed kan, me en kak pitihkihdi masatakat, lemeleme me mwein e kak kahluwa kitail ong nan ehu sahpwtehn tohrohr en; e lemedahr en pein wiahong ih nahnmwariki oh kaun petail mwurin eh kahluwei kitail pwe en kak wiahiong kitail nin duwen insene oh duwen mehn wie kemehn kouruhr. Oh mwurin met, riei Laman kapingadahr arail mohngiong kan pwe irail en lingeringerda.

39 Oh e wiawihher me Kauno kin ketin ieiang kiht, ehi iei me kapitien Kauno me peidohng irail oh ketin kasalehiongehr irail me tohto, oh irail nem lupwoarehr sang ni mahsen akan. Oh mwurin arail nem lupwoarehr sang ni kapitien Kauno, irail eri sohpei sangehr arail lingeringer kan, oh koluhkilahr mehlel diparail akan,

Kauno eri ketin kapaikin kihtada mwenge pwe se dehr mehla.

IRALAUD 17

Koht ketin mahsani Nephi en wiahda apwoat sohp -- Riekan uhwongada ih -- E kaweid kin irail sang ni eh koasoiahieng irailehr duwen poadopoad en sapwellimen Koht doadoahk kan ong Israel -- E direkilahr manaman en Koht -- Rie kan sohte mweimwei ong en sair ih, irail masak pwe irail de mehla duwehte lirau mengila.

1 Oh e wiawiher me se pil pwurehng wia aht seiloklang nan sahpwtehno; oh se kakahn selier limwahn pali mese sang ni ahnsouo. Oh se kakahn selier oh loisangehr kahpwal laud nan sahpwtehno; aht pwoud akan kin neitikiada seri nan sahpwtehno.

2 Oh Kauno ketikidohng kitehr kapai kan me inenen laud pwe ni ahnsou me se momouriki uduk amas, aht lihkan kin kihla pilen dihdi tohto ong neirail seri kan. Oh irail eri kin kehlail, ehi, duwehte ohl akan; oh irail eri tepier wia arail seilok kan ni arail sohte kin lipahned.

3 Oh met se diaradahr me mahsen Koht akan pahn udahn pweida. Oh me mehlel ma aramas akan pahn kin dadauhr kosonned en Koht akan, e pahn ketin apwali irail, oh ketin karosone irail, oh ketikihong irail mehkan me irail en wiahda me e ketin mahsanih ong irail, eri, e ketikihong kihter mehkan ni aht mihmi nan sahpwtehno.

4 Oh se miher nan sahpwtehno ni erein pahr tohto, ehi, iei pahr waluh nan sahpwtehno.

5 Oh se ahpw kodohng sahpw me kahdaneki Rahk, pwehki duwen ngeder en wahntuhke kan oh loahng suke kan; oh mepwukat koaros kaunopadahr sang rehn kauno pwe se dehr mehla; oh se kilangadahr sehd ehu me se kahdanekier Irreantum, me kawehwepe iei pihl tohto.

6 Oh e wiawiher me se kauwadahr impwal akan ni oaroahro: Oh mendahte aht lokolok kier apwal tohto kan oh apwal laud, ehi, me laud mehlel pwe se sohte kak intingihdi irail koaros, se ahpw perendahr mehlel aht lelohng ni oaroahro; oh kiht eri kahdaniki wasao Rahk pwehki duwen tohtohn wahntuhke kan.

7 Oh e wiawihher me mwurin ngehi, Nephi, miher nan Rahk ni erein rahn tohto kei, kapitien Kauno ahpw peidohngie, mahsanih: Uhda, oh kohdahla pohn nahnao. Oh I ahpw kesihnendahr oh kohdalahr pohn nahnao. Oh ngehi eri likweriongehr Kauno.

8 Oh e wiawihher me Kauno ketin mahsendohngehr ie, mahsanih: Ke pahn wiahda apwoat sohp sang ni mwohmw me I pahn kasalehiong uhk, pwe I en kak wahkihda noumw aramas akan oh kotehkihla sehdo.

9 Oh I ahpw inda: Kaun, ia wasa I pahn kohla ie pwe I en kak diarada pelien mete me I en karangada, pwe I en kak wiahda kepwehn doadoahk kan en wiahda sohp ni mwomwen me komwi ketin kasalehiongehr?

10 Oh Kauno eri ketin padahkiong ie wasao me I en kohla pwehn diar pelien meteo, pwe I en kak wiahkihda kepwehn doadoahk kan.

11 Oh e wiawihher me ngehi, Nephi, eri wiadahr ehu mehn karangada mete mehn peuk kisineieio, sang ni kilin mahn akan oh mwurin ei wiadahr mehn karangada meteo, pwe I en kak ahneki mehn peuhk kisinieio, I ahpw iding pene takai riahuo, pwe I en kak wiahda kisiniei.

12 Pwe Kauno saikinte ketin mweidohng kiht ahsou wet pwe sen wiahda kisiniei laud ni aht kakahn selier nan sahpwtehno, pwe e ketin mahsaniher: I pahn wiahwei kanamwail mwenge en kin ieu sang ni amwail sohte pahn kin inimada.

13 Oh I pahn pil kamarainih kumwail nan sahpwtehno, oh I pahn kaunopada ahlo mwohmwail, ma mehleh kumwail pahn dadauhr ei kosonned akan, eri sang nin duwen amwail kin dadauhr ei kosonned akan me pahn kahrei kumwail ong nan sapwen inouo; oh kumwail en ese me I kin kahluwa kumwail.

14 Ehi, oh Kauno me ketin pil mahsanih me: Mwurin amwail lelehr nan sapwen inouo, kumwail en ese me ngehi, Kauno, iei Koht; oh me ngehi, iei Kauno, me kapit kumwail sangehr mehla; ehi, I wei kumwail sangehr nan sapwen Jerusalem.

15 Eri, ngehi, Nephi, kin nantihong pwe I en dadauhr kosonned akan en Kauno, oh I pil panauwihher riei kan en kin loalopwoat oh nantiong.

16 Oh e wiawihher me I wiadahr kepwehn doadoahk kan sang ni mete me I inimada sangehr ni takaio.

17 Oh ni ahsou me riei kan esedahr me I pahn wiada apwoat sohp, irail ahpw tepier lipahnedei, inda: Riatailo me pweipwei, pwehki e kin leme me e kak kotehla sehd laud pwukat.

18 Oh sang ni irair wet riei kan kin lipahnedei, oh irail kin anahne pwe irail en dehr doadoahk, pwe irail kamehlele me I sohte kak wiahda sohp pwoat; irail pil kin sohte kamehlele me I ale kaweid sangehr rehn Kauno.

19 Oh e wiawihher me ngehi, Nephi, pahtoukilahr kouwahlahpie pwehki keptakai en arail mohngiong kan; oh met ni ahsou me irail kilangehr me I tepier pahtoula, irail ahpw perenda kouwahlap nan arail mohngiong kan indahda: Se eseier me ke sohte kak wiahda sohp pwoat, pwe se eseier me sohte ahmw mehn tenek; ihme kahrehda, ke sohte kak kanekehla doadoahk laud en.

20 Ke duwehte atail pahpao, me salong kilahr madamadau en pweipwei kan en nan eh mohngiong; ehi, e kahreh sang kitailehr nan Jerusalem, oh kitail kakahn selier nan sahpwtehn ni erein pahr tohto pwukat; oh atail lih akan doahk laud, ni arail liseian, oh irail neitikiadahr serihkan nan sahpwtehno oh lokolok kier mepwukat koaros, ihte arail sohte kin mehkihla; oh e pahn mwahu ong irail en mehla mwohn arail kohsang nan Jerusalem sang arail lokolongki apwal pwukat.

21 Kilang pahr tohto pwukat me se lokolongkier nan sahpwtehno, iei ahsou me se kak en insenanwahuki aht kepwe kan oh sapwat sapwen sohso; ehi, mwein se pahn kak wie pereperen.

22 Oh se ese me aramas akan me mihmi nan sapwen Jerusalem iei aramas pwung kei, pwe irail kin dadauhr kosonned akan oh koasoandi kan en Kauno, oh sapwellime kosonned koaros nin duwen kosonned akan en Moses; eri, se ese me irail aramas pwung kei; oh aht pahpahu kauweihd irailehr oh e kahluwa irail pwehki sen kin rong eh koasoai kan, ehi, riatoko kin duwehte ih. Oh ie mwomwen lokaia me riei kan wia ni aral kin lipahned oh akpwung ong kiht.

23 Oh e wiawihher me ngehi, Nephi, ahpw padahkilahng irail, inda: Dah, kumwail kamehlele me samatail kan, me wia serien Israel, kak kohsang nan pehn mehn Egypt akan ma irail sohte pahn rong mahsen akan en Kauno?

24 Ehi, pwekida kumwail kin leme irail pahn kohsang nan arail kalidu, ma Kauno sohte ketin mahseniong Moses en kahluwa irail sang nan arail kalidu?

25 Met kumwail esehier me serien Israel akan miher nan kalidu: Oh kumwail kin ese me irail toutou kilahr doadoahk kan me inenen kasengeseng me kin wiawi; eri, kumwail ese me mie anahnepen mehkot me mwahu en koghieng irail, pwe irail en kohsang nan kalidu.

26 Met kumwail kin ese me Koht me ketin mahseniong Moses en wia doahk wet: Oh kumwail ese me sang e lokaiaiong pilen Sehd Weitahta me ahpw pwalpesengehr sang apali oh lel apali, oh irail kotehlahr ni arail keidehr pohn pwehl ngalagal.

27 Ahpw kumwail kin ese me mehn Egypt akan, me wia sounpei en Parao, duhlahr nan Sehd Weitahtao.

28 Oh kumwail pil kin ese me irail kangadahr mana nan sahpwtehno.

29 Ehi, oh kumwail pil ese me Moses, sang nin manaman en Koht me mihmi reh, poakiher takaio, oh pihl eri kusieila, pwe mehn Israel kan en dehr men nimpilda.

30 Oh kaidehnte e ketin kahluwa irailahr, ahpw Kauno arail Koht, arail Sounkomour, me kin ketiket mwohrail, ni e ketin kahluwahier irail ni rahn oh kin ketin kamarainih irail nihpwong, oh ketikihong irailahr mehkoaros me kin mwahu ong aramas en alehda, irail ahpw kin keptakai lahr nan arail mohngiong kan, oh kin karotehla nan arail mehn madamadau kan, oh irail kin lahlahwe Moses oh lahlahwe Koht Ieias oh me mehlel.

31 Oh e wiawihier me nin duwen sapwellime mahseno e ketin keme irailahr, oh nin duwen sapwellime mahseno e ketin kahluwa irailahr; oh nin duwen sapwellime mahseno e ketin wiahiong irailahr mehkoaros, oh sohte mehkot me pweidahr ihte ma pahn kin sang ni sapwellime mahsen.

32 Oh mwurin arail kotehlahr pillap Jordan, e ketin kakehle irail dahr pwehn pwakiasang serien wasao, ehi, ong ni katohre irail peseng pwe irail en mehla.

33 Oh met, dah, kumwail kin lemehiong me aramas akan me mihmi pohn sapwen inouo, me samatail akan pwakialahr, dah, kumwail kin lemeleme me irail pwung? Kilang, I indahiong kumwail, soh.

34 Dah, kumwail kin lemehkiong me atail pahpa pahn keneinei ma irail sohte pwung? I indahiong kumwail, soh.

35 Kilang, Kauno kin ketin kupwukupwure koaros me wiawihkihda soangen uduk tehieu. Mehmen me pwung kin kenikenla rehn Koht. Ahpw kilang, aramas pwukat soikalahr sapwellimen Koht mahsen koaros, oh irail milahr nan dihp; oh engieng unsek en Koht miher pohrail; oh Kauno ketin karialahr sahppo pwe irail en mehla, oh ketin kapaiadahr ong samatail akan pwe irail en ale manaman en kakaun powe.

36 Kilang, Kauno ketin kapikadahr sampah pwe en audauda; oh e ketin kapikada sapwellime seri kan en sapwen kihla.

37 Oh e kin ketin kapwarahda wehio me pwung, oh kin ketin kauwehla wehi sapwung kan.

38 Oh e kin ketin kahluwa me pwung kan ong ni sahppw kaselel kan, oh me e kin ketin kasohrala me suwed akan, oh ketin kariahla sahppo pwehki irail.

39 E ketin kakaun nanleng powe, pwe iei ih mwoale, oh sampah wet iei utupen aluweluwe kan.

40 Oh e kin ketin loaloale irail akan me pahn wiahki ih arail Koht. Kilang e kin ketin loaloale atail pahpa kan, oh e ketin inouieng iraillehr, ehi, iei Abraham, Isaac, oh Jacob; oh e kin ketin tamataman inou kan me e ketin wiadahr; ihme kahrehda, e ketikihdo irail sang nan sapwen Egypt.

41 Oh e ahpw ketikihong irail apwal akan ki sapwellime sokono; pwe irail kin kakeluwakiala arail mohngiong kan, duwehte me kumwail wiahier, oh Kauno ketikihong iraillehr apwal akan pwehki diparail akan. E ahpw ketin poaroanehla snek me lingaling me kin pihr nan pwungarail oh mwurin arail ngelengel peneier, e ahpw ketin kaunopadahr ahl ehpu pwe irail en kak mwahula; oh doahk ehute me irail pahn wia iei irail en sohpeilahng; oh pwehki mengei en ahlo, oh sohte pil apwale, a tohto me mehkilahr.

42 Oh irail kin pil kakeluwakiala arail mohngiong kan ni ahnsou kan, oh irail kin lahlahwe Moses oh pil arail Koht; mendahte met, kumwail kin ese me sapwellime manaman lapalahpie me kahluwa iraillehr ong nan sapwen inou.

43 Oh met mwurin mepwukat koaros, ahnsou lelehr me irail pahn suwedla, ehi, kereniong melahr nan dihp; oh I sehse ahpw rahn wet irail pahn kereniong mehla; pwe I ese me rahno udahn pahn kohdo me irail pahn mehla, ihte ma me malaulau me pahn pakahr lahng selidi.

44 Ihme kahrehda, Kauno ketin mahsani ongehr ei pahpahu en mweselahnng nan sahpwtehno; oh mehn Jews akan pil rapahkier pwe irail en kemehla ih; ehi, oh kumwail pil rapahkier pwe kumwail en kemehla ih; ihme kahrehda kumwail mwersuwed kei sang nan amwail mohngiong kan oh kumwail duwehte irail.

45 Kumwail kin mwiadang en wiahda me suwed, ahpw kin pwand en tamanda Kauno amwail Koht. Kumwail kilangehr tounleng emen oh e lokaia ong kumwailehr, ehi, kumwail kin rong ngileo ni ahsou kan. Oh e kin lokaiahwei rehmwail ni ngihl tikitik, ahpw kumwail sohte kak pehmada, pwe kumwail sohte kin pehm eh koasoai kan, eri, e ahpw kin kasalehwei kumwail me rasehng ngilen nansapwe, me kin kahrehiong sampah en rerrada me duwehte ma e pahn kin pwalpeseng.

46 Oh kumwail pil ese me sang ni manaman kouwahlahpie en eh lokaia, kin kak kahrehiong sampah en sohrala, ehi, oh kumwail pil ese me sang ni eh lokaia me e kak kahrehiong wasa mwangaingai kin en medendella, oh wasa medendel kan en mwangaingaila. O, eri, dahme kahrehda kumwail kin kak en kakeluwakiala amwail mohngiong kan?

47 Kilang, paliwereiet ni unsek teikihpesengehr ei pahtou pwehki kumwail, oh ei mohngiong weikek lahr; I masak pwe kumwail de pahn lekidekala kohkohlahte. Kilang, I eri direki lahr Ngenen Koht, pwe paliwereiet solahr kakohng.

48 Oh met e wiawiher me ni ei kosoiahier mepwukat, irail ahpw lingernger dahr pahi, oh anahne keseiehdilahng nan wasa loal en sehdo; nin duwen arail kodohng sairiehda, I ahpw inda: Nin mwaren Koht lapalahpie, I indahiong kumwail en dehr sairie, pwe I direkihlahr manaman en Koht, me kadirelahr paliwereiet; oh mehmen me pahn sairie pahn mehla rasehng lirau meng pwoat me pahn sohte wia mehkot mwohn manaman en Koht, pwe Koht pahn kemehla ih.

49 Oh e wiawiher me ngehi, Nephi, padahkihiong, irailer en dehr lipahnedede arail pahpahu de tokedihsang arail doadoahk ong ie, pwe Koht me ketin mahsani ongie me ren wiahda apwoat sohp.

50 Oh I ahpw indahiongehr irail: Ma Koht me ketin mahsani ongie me I en wiahda mehkoaros, I kak wiahda.

Ma e pahn ketin mahsani ongie me Ien indahng pihl wet en wiahla pwehl, e pahn wiahla pwehl; oh ma I pahn inda, e pahn kin pweida.

51 Oh met, ma Kauno ketikiher soangen manaman laud wet, oh e ketin wiadahr manaman tohtohie nan pwungen aramas akan, iaduwen eh sohte pahn kak ketin kaweid kinie me Ien wiahda apwoat sohp?

52 Oh e wiawiher me ngehi, Nephi, eri kosoiahier mehkan tohto ong riei kan, irail eri nameneklahr oh solahr kak pelianie, de pil sair kinie pehrail akan de doahke kinie pehrail akan erein rahn tohto. Eri met irail sohte kin wia pwe rede mehla mwohi, Ngenen en Koht me ketin roson mehlel; oh met e ketin lelohng iraillehr.

53 Oh eri Kauno ahpw ketin mahsanihiongie: Pwurehng kapahwei pehmw rehn riomw akan, oh irail pahn mourada mwohmw, ahpw I pahn kalus irailada oh met I pahn wia pwe irail en ese me ngehi Kauno arail Koht. Kauno ketin mahseniher.

54 Oh e wiawiher me ngehi eri kapahweiehr pehie rehn riei kan, oh irail eri kakehr mwekid mwohi; ahpw Kauno ketin kamwakidahr irail nin duwen mahseno me e ketin wiahier.

55 Oh met, irail inda: Se ese me mehlel ieu me Kauno ketin ieiang uhk; pwe se ese me iei manaman en Kauno me ketin kamwakidadahr kiht, oh irail eri pwupwudihier mwohi, oh pahn kaudek ong ie, ahpw I sohte mweidohng irail, ngehi eri inda: Ngehi riamwailo, ehi, riamwail me pwulopwulo. Eri, kumwail en kaudek ong Kauno amwail Koht, oh en kahkahki amwail pahpa oh nohno pwe kumwail en mour werei nan sahpwo me Kauno amwail Koht pahn ketkihong kumwail.

IRALAUD 18

Sohpo nekier -- Ipwidien Jacob oh Joseph kasansaldahr -- Pwihno mweselahnng sapwen inouo -- Nein Ishmael pwutak kan oh arail pwoud kan iangala weriwer seli oh uhwongada Nephi -- Nephi seldier oh sohpo kapwurpwur lahr pwehki melimel laud ehu. Nephi saledek lahr oh sang ni e kapakapo melimelo uhdier -- Irail lellangehr nan sapwen inouo.

1 Oh e wiawiher me irail eri kaudekiongehr Kauno, oh iengie lahr; oh se wiadahr doahk kopwuriamei sang ni tuhke kan oh Kauno kin ketin kasalehdohngie duwen ei pahn wiahda dinapw en sohpo.

2 Met ngehi, Nephi, sohthe wiada dinapw akan en sohpo ni mwomwen me aramas kin ese, I pil sohthe wiahda sohpo ni mwomwen en aramas kin wiahda, ahpw I wiadahr ni mwomwen me Kauno ketin kasalehiongie.

3 Oh ngehi, Nephi, kin kalap kohla pohn nahnao oh I kin kalap kapakap ong Kauno; sang ni kahrepe wet, Kauno eri ahpw ketin kasalehdo me kopwuriamei kan.

4 Oh e wiawiher me mwurin ei kaneke lahr sohpo nin duwen mahsen en Kauno, riei kan diaradahr me e mwahu, oh me wiepehu me mwahu kouwahlahpie, sang ni kahrehpe wet irail eri pwurehng aktikitik lahr mwohn Kauno.

5 Oh e wiawiher me kepitien Kauno eri peidohngiehr rehn ei pahpao, me sen uhda oh kohdihla nan sohpo.

6 Oh eri ni mandahn rahno, mwurin aht kaunopadahr meh koaros, tohto wahntuhke kan oh uduk sang nan sahpwteho, oh diren sukehn loahng oh mehkan koaros me se anahne nin duwen Kauno eh ketin mahsanihong kitehr. Se kohdihlahr nan sohpo, iangahkier aht kepwe oh aht weren tuhke kan, oh me koaros me se pil wahdahr, oh koarosieh nin duwen arail sounpar; eri, se kohdihlahr nan sohpo, iangahki aht pwoud kan oh nait seri kan.

7 Ahnsou wet, ei pahpahu wiadahr pwutak riemen nan sahpwteho; me laudo iei me adaneki Jacob, oh me tikitiko iei Joseph.

8 Oh e wiawiher me mwurin kiht koaros kodilahr nan sohpo, oh wahdahr mehkan koaros me se anahne oh mehkan me Koht ketin mahsani ong kitehr, se ahpw kidihlahr sohpo nan sehdo oh wie tangatang kowei mwohn kisinieng kan kolahng ni sapwen inouo.

9 Mwurin aht tangatang mwohn kisinieng kan kohkohwei ni erein rahn tohto kei, kilang, riei kan oh nein Ishmael pwutak kan, oh pil arail pwoud kan ahpw kaperenda irail mehleh, pwe irail eri tepier kahlek, oh tepier kouhl, oh lokaia lemei, ehi, pwe irail moanoke lahr soangen manaman me wahdohng iraillehr wasao, ehi, irail eri akalapalap kilahr arail lemei kowahlahpie.

10 Oh ngehi, Nephi, tepier masakada kouwahlahpie pwe Kauno de pahn ketin engiengda paht, oh ketin kemeikitala

pwehki dipat akan, sang ni en sehdo eh pahn kakihr kitala nan wasa loal en sehdo; eri ngehi, Nephi, tapiadahr koasoiengehr irail ni ei ngongki lahr mehlel, ahpw kilang irail lingenger ong ie, inda: Se sohte men riat me pwulopwulo en wiahla aht kaun.

11 Oh e wiawiher Laman oh Lemuel koliehdier oh pirekinie penehr sahl akan, oh ira wiaiongiehier suwed laud; ahpw Kauno ketin mweidohng pwe en kak ketin kasalehda sapwellime manaman ong ni pweidahn sapwellime mahsen me e ketin mahsanhier duwen me suwed akan.

12 Oh e wiawiher me mwurin irail pireie penehr I ahpw solahr kak mwekid, kampaso, me Kauno ketin kaunopadahr eri uhdi sangehr eh doadoahk.

13 Eri sang ni kahrehpe wet, irail ahpw sehsele mehlel ia wasa irail pahn katangahlaie sohpo, pwe mie eh kisinieng laud, ehi, laud mehlel oh suwed, oh ni erein rahn siluh se kin wie pwurupwurala oh irail tapiadahr masepwehkadahr kouwalapie pwe irail de pahn duhla nan sehdo, ahpw, irail sohte sapwadiehda.

14 Oh ni kapahiou en rahn me se wie pwurupwurala, kisiniengo ahpw tapiadahr suwedala kouwahlapie.

15 Oh e wiawiher me sehdo kereniong kakihr kitala nan wasa loal en sehdo. Oh mwurin aht kin wie pwurupwuralahr ni erein rahn pahieu pohn sehdo, riei kan diarada me Koht ketin kaloke irailahr, oh me irail uhdahn pahn mehla ihte ma irail koluhkihla diparail akan, eri, sang ni kahrehpe wet, irail eri kodohngie, oh sapwadadahr sahloko me piripire kumwutin pehi kat, oh kilang kumwutin pehr akan umwpwosadahr.

16 Ahpw I sopeilahr rehn ei Koht, oh wie kapikapinga ih rahno pwon; oh I sohte kin lipahnedede Kauno pwehki sang ni apwal akan me I ahneki.

17 Ahnsou wet ei pahpao, Lehi, padahkihiong irailahr me tohto, oh pil nein Ishmael pwutak kan; ahpw, kilang, irail eri kamasak mehmen me pahn uhkin ie; oh ei pahpa oh nohno kin wie sosoumwahu erein pahr tohto, oh sang ni pahtou kilahr laud neira seri kan, ehi, ira ahpw milahr nan ara peht en soumwahu kan.

18 Pwehki ara insensuwed oh pahtou lahr laud oh dipen riei kan, ira ni ahnsouo kereng ira en tuhwong ara Koht; ehi, sang ni pwetalahn piten moangara kan kahrehiong ara

kereniong kohdilahng wasa loal en pwehl; ehi, ira kereniong kolahng nan sousou me diren pihl sang ni ara pahtou.

19 Oh Jacob oh pil Joseph, me pwulopwul me mie ara anahn en kekeirada laud, oh ira insensuwed lahr pwehki duwen apwal akan en ara nohno; oh pil ei pwoudo iangahki pilen mese kan oh eh kapakap akan, oh pil nei seri kan sohte kamaterekala arail mohngiong kan pwe irail en sapwadiehda.

20 Oh sohte mehkot mie me kak kamaterekala arail mohngiong kan, ihte manaman en Koht me kin kamasaki irail pwehn kin kauwehla irail; ihme kahrehda ni ahnsou me irail diaradahr me sehdo pahn kereniongehr keduh iraila pahn sehdo, irail eri koluhkilahr mehlel mehkan me irail wiadahr, irail eri sapwadiedahr.

21 Oh e wiawiher me mwurin arail sapwediedahr, kilang, I aledahr kampaso oh eri e wie doadoahkehr ong wasa me I anahne. Oh e wiawiher me I kapakap ong Kauno; oh mwurin ei kapakapehr kisinieng kan eri uhdi; oh kisinieng laudo uhdi, oh mwele laud ehu ahpw kipehdier wasao.

22 Oh e wiawiher me ngehi, Nephi, eri kahluwaier sohpo, se ahpw pwurehngkehr tangatangala sapwen inouo.

23 Oh e wiawiher me mwurin aht tangatangehr rahn tohto se ahpw lelehr nan sapwen inouo; oh se kodahlahr pohn sapwo; oh se kauwadahr imwat impwal akan, oh se kahdaneki sahpwo sapwen inou.

24 Oh e wigwiher me se ahpw tapidahr koadoahkehier pwehlo, oh tepier poadokedi weren tuhke kan; ehi, se padokedier aht weren tuhke kan koaros nan pwehlo, me se wahsangehr nan sapwen Jerusalem, oh irail kekeirdahr mehlel. Kiht eri alehier kapai mehlel.

25 Oh e wiawiher me nin duwen aht wie kakahnselier pohn sahpwo, kiht eri diaradahr me mie soangen men kerep kan koaros nan welo, kou lih oh kou ohl, esel oh oahs, kout oh kout lawalohkan oh soangen mahn lawalo koaros me aramas kin doadoahngki. Oh se diarehr soangen metehkan me iangahki kohl oh silper oh kapa.

PWUHK KARIAU EN NEPHI

Koasoiepen en Lehi imwisekla. Rien Nephi kan pelianda ih, Kauno ketin kaweidki Nephi en mweselahnng nan sapwtehno. E wie kakahnselier nan sapwtehno, oh pil soahnng teikan.

IRALAUD 1

Lehi kohpadahr sapwen saledeko -- Oh nahkan pahn katohrohr peseng oh pahn kamakamla ma irail pahn soikala Koht Sarawi en Israelo. Oh e kaweidiki nah pwutak kan en kapwatkihda likou mete en pwuhngo.

1 Oh e wiawihher me ngehi, Nephi, mwurin ei kanekelahr ei padahk ong riei kan, aht pahpao, Lehi, pil padahkihong iraillehr me tohto kei, oh I pil pwurehng kosoia iong irail duwen me kopwuriamwei kan me Kauno ketin wiahiong iraillehr ni e ketiki sang irail nan sapwen Jerusalem.

2 Oh e kin padahkihong irail duwen arail kin uhwongada ih pohn sehdo, oh duwen kalahngan en Koht nin duwen eh ketin kapitalahr arail mour, pwe sehdo sohte kakihir iraila.

3 Oh e pil padahkihong irail duwen sapwen inouo, me irail koledier. Ia duwen en Kauno eh ketin kalahngan ni eh ketin kapehm kin iraillehr en tangasang nan sapwen Jerusalem.

4 Pwe, kilang, e koasoia: I kilangehr sansal ehu, me I ese me Jerusalem olahr; oh ma kitail pahn mihmi nan Jerusalem kitail pahn pil mehla.

5 Ahpw, e koasoia: Mendahte atail lokolok kan, kitail koledier sapwen inouo. Sahpw ehu me mwahu sang sahpw koaros; sahpw ehu me Kauno ketin inoukihongiehier me pahn wia sapwen sohso en nei seri kan. Ehi, Kauno ketin inoukihongieher sahpw wet, oh nei seri kan kohkohahte, oh pil irail koaros me pil mwesel sangehr nan sahpw teikan sang ni limen kauno.

6 Eri, ngehi, Lehi, wia kokohp nin duwen doadoahngkan en Ngehno me ketiket loalei, me sohte me pahn kohdo nan sahpw wet, ihte ma Kauno pahn ketin lime iraildo.

7 Eri, sahpw wet kohiengehr mehmen me e pahn ketikihong. Oh ma iei me irail pahn kin papah ih nin duwen kosonned akan me e ketikidahr. E pahn kin wia sapwen saledek ehu ong irail; eri, irail sohte pahn kin kaliduhla; ma iei irail pahn kin lohdi, e pahn kin sang ni dihp; pwe ma dihp pahn rekla, sahpwo pahn riahla pwehki irail, ahpw me pwung kan pahn kin pweida kohkohlahte.

8 Oh kilang, iei sang ni duwen sapwellime erepit me sahpw wet en karirirlahsang wehi koaros; pwe kilang, wehi tohto pahn kadirehla sahpwo, eri pahn solahr wasahn sohso.

9 Eri, ngehi, Lehi, me aledier ehu inou, me nin duwen irail akan me Kauno Koht pahn ketiki sang nan sapwen Jerusalem pahn kin kolokol sapwellime kosonned akan, irail en kin pweida pohn sahpwet, oh irail pahn tohrohrweisang wehi kan koaros, pwe irail en sapwenkihla sahpwet, oh ma e pahn mehlel me irail pahn kolokol sapwellime kosonned akan, irail pahn ale kapaih, oh sohte me pahn kauwe irail, de pil kihsang sapwarail sapwen inou: Oh irail pahn kousonla ni meleilei kohkohlahte.

10 Ahpw kilang, ansouo pahn leledo me arail soh pwoson pahn wie lalauhla, mwurin arail aledahr kapai laud kan sang ni limen Kauno -- sang ni esehla duwen kapikipik dahn sampah, oh aramas koaros, sang ni esehla doahk laud oh kopwuriamwei kan en Kauno sang ni tepin kapikipik dahn sampah; sang ni manaman me kohieng iraillehr en wia mehkoaros ni pwoson; sang ni dadauhr kosonned koaros sangete nin tapio, oh sang ni kamwahu poatoapat me e ketikidohng iraillehr nan sapwen inou kesempwal wet -- kilang, I inda, ma rahno pahn leledo me irail pahn soikala Koht Sarawi en Israel, iei Mesaia me mehlelo, arail Sounkomour oh arail Koht, kilang, apwal akan sang reh me kin pwung pahn kin mihmi pohrail.

11 Ehi, e pahn ketikidohng irail wehi kan, oh e pahn ketiki ong wehi pwukat arail kehl, oh e pahn ketiki sang arail sapwen sohso kan, oh pahn ketin wiahiong irail en mwerpeseng oh kamakamala.

12 Ehi, pahn mie inta keredi, sang ni ehu dih lelohng ni ehu dih, oh me kopwuriamwei kan me pahn leledohng irail sang powe. Eri, nei pwutak kan, Imen kumwail en tamataman; ehi, Imen kumwail en kin rong mahsen akan sang rehi.

13 Oh I men kumwail en pirida; pirida sang amwail meir kelik, ehi, iei meir en nan ehl, oh itikasang sahl mete kamasepwehk kan me pire kumwaildier, iei me pirepenehr aramas akan pwe irail en wisiklahng selidi nan lehn weikek oh pahtou kokkohlachte.

14 Pirida! oh kesihnenda sang nan pwehl, oh kin rong mahsen kan sang rehn amwail pahpao; me kin rerrer, me pehkan oh nehkan pahn kereniong kohdiong nan sousou lemblemwur oh meleilei, wasa me sohte sounseilok emen kak pwurasang ie; oh rahn ekeite me luhwehdi pwe I pahn mehla oh wiahla pwehl.

15 Ahpw kilang, Kauno ketin pwain ie dahr sang nan ehl; oh I kilangehr sapwellime klohri, oh e ketin kapel kin ie pene sapwellime limpoak soutuk ki limeh kan.

16 Oh I kin anahne pwe kumwail en tamataman oh dadauhr kosonned akan oh kopwung en Kauno; kilang, met iei me ei mour tihwoki lahr sangete ni tapio.

17 Mohngiong kin toutou kilahr pahtou ni ansou kan, pwehki sang ni ei masepwehk, pwehki duwen keptakai en amwail mohngiong kan, Kauno amwail Koht pahn ketikihong kumwail sapwellime engieng ni ansou, pwe kumwail en palidi oh ohla kokkohlachte;

18 De, ehu ria pahn kodohng rehmwail ni erein dih tohto; oh kumwail pahn mehkihla kedlahs, oh lehk, oh aramas pahn kailong kin kumwaila, oh kumwail pahn kekehid nin duwen anahn akan oh kalidu en tepelo.

19 Oh nei pwutak kan, mepwukat sohte pahn lelohng kumwail, ahpw pwe kumwail en kak wiahla aramas pilipil kei oh aramas akan me Koht kin ketin kupwure. Ahpw kilang, kupwure pahn kin wiawi; pwehki sapwellime ahl akan me kin pwung kokkohlachte.

20 Oh e ketin mahsanihier me: Nin duwen amwail kin dadauhr ei kosonned akan, kumwail pahn kin pweida nan sahpwet; eri nin duwen amwail sohte pahn kin dadauhr ei kosonned akan, kumwail pahn lekdek sang rehi.

21 Ansou wet ngeni kakehr peren kihda kumwail oh mohngiong kakehr mwesel sang sampah wet ni popohl pwehki kumwail, pwe I dehr kohdieng nan sousou ki insensuwed oh pahtou, uhda sang nan pwehl, nei pwutak kan, oh wiahla ohl, oh en pilada lamalam tehieu oh mohngiong tehieu, minimin pene ni mehkoaros, pwe kumwail en dehr lohdieng nan selpamwail.

22 Pwe kumwail en dehr ahnekihla ria lauhd ehu; oh pil, pwe kumwail en dehr kahrehiong engieng en Koht pohmwail, ong ni amwail Pahn mehla, ehi, mehla kokkohahte ong ni paliwar oh pali ngehn.

23 Pirda, nei pwutak kan, pwuhrihong nan amwail likou mete en pwung kan. Siken weisang sahl mehte kan me seli kumwail dier, oh kohsang nan rotorot, oh uhda sang nan pwehl.

24 Dehr kin uhwong riamwail en, pwe mehkoaros me e kin kilikilang iei me lingano, oh ih me kolokolehr kosonnedo sang ansou me kitail mwesel sangehr Jerusalem, oh ih me wiahier soun doadoahk emen nin limen Koht akan, sang ni e wadohng kitailehr pohn sapwen inou wet. Pwe ma sohte ih, kitail udahn pahn mehkihla men mwenge nan sapwteho; ahpw, kumwail rapahkier pwe kumwail en kihsang eh mour; ehi, oh e aledier lokolok sang ni pahtou laud pwehki kumwail.

25 Oh I inenen masakda oh rerrer kouwahlahpie pwehki kumwail, pwe e pahn pwurehng kalokolok; pwe kilang, kumwail kosoiahki ih me e rapahki manaman oh mweimwei en kakaun kumwail, ahpw I ese me e sohte kin rapahki mweimwei, oh manaman en kakaun kumwail, ahpw e kin rapahki klohri en Koht, oh mehn sawas pamwail kokkohahte.

26 Oh kumwail kin lipahned pwehki e kin lokaia mehlel ong kumwail. Komwail kin inda me e kin doadoahk ki lokaia keng; kumwail kosoia me e kin lingeringer pahmwail; ahpw kilang, eh lokaia keng kan iei keng en manaman en Koht, me kin mihmi loale, oh me kumwail kin kahdaniki lingeringer iei mehlelo, nin duwen dahme Koht ketin kupwuriki, me e sohte kak katokehdi duwen e kin kasahlehwei dipamwail akan ni sohte masak.

27 Oh mie anahnepen manaman en Koht en kin ieiang ih, ong ni e pahn kin padahkih kumwail pwe kumwail en kin peikihong ih. Ahpw kilang, kaidehn ih, ahpw Ngehn en Kauno me ketin ieiang ih, me kin ketiki peseng ewe pwehn kin koasoai me kahrehiong ewe solahr kin kak kohpene.

28 Oh met nei pwutak Laman, oh pil Lemuel, oh Sam, oh pil nei pwutak kan me wia nein Ishmael akan, kilang ma kumwail pahn rong ngilen Nephi, kumwail sohte pahn lekdekla. Oh ma kumwail pahn kin rong ih, I pahn kihdi

rehmwail ehu kapai, ehi, iei me pahn wia tepin ei kapaih ong kumwail.

29 Ahpw ma kumwail sohte pahn kin rong ih, I pahn kihsang rehmwail ei tepin kapaio, oh e pahn kohieng pohn Nephi.

30 Oh met Zoram, I indaiong uhk, kilang, kowe iei nein Laban papaho; ahpw eri kowe wisikieisangehr nan Jerusalem, oh I ese kowe iei kempoakpah mehleh en nei pwutak, Nephi, kohkohlahte.

31 Eri, pwehki omw kin loaloapwoat, kadaudok omw kan pahn kapaida iangahki kadaudokeh kan, pwe irail pahn werei arail mihmi nan arail pahi pohn sahpwet; oh sohte mehkot, ihte sang ni dihp me pahn kauwehla de kauwe arail pahi pohn sahpwet kohkohlahte.

32 Eri, ma kumwail pahn kin dadauhr kosonned akan en Kauno, Kauno pahn ketin kasarawiala sahpwet pwe en kin tengeteng ong kadaudokemw kan iangahki kadaudok en nei pwutak ko koaros.

IRALAUD 2

Komouro kohsang rehn Mesaia Sarawi -- Saledek en pilada iei ihme kesempwal ong momour oh kekeirda -- Adam pwupwidi pwe aramas en kak duwehla met -- Aramas kin mweimweiong en pilada saledek oh mour soutuk.

1 Oh met, Jacob, I indaiong uhk: Kowe iei nei me tepin ipwidi nin ansou en ei apwal akan nan sapwtehno. Oh kilang, ni omw seri ke aledahr lokolok oh pahtou laud, pwehki suwed en riomw akan.

2 Ahpw, Jacob, nei me tepin ipwidi nan sahpwtehno, ke ese duwen lapalap en Koht; oh e pahn ketin wiahiong uhk kahpwal akan pwehn wia kamwahupemw.

3 Eri omw mour pahn kapaida, oh ke pahn kin koukouson ni meleilei rehn riomw, Nephi; oh omw ansou kan ke pahn uhpa omw Koht. Eri, oh I ese me kowe maiaudahr, pwehki duwen pwung en omw Sounkomour; pwe ke wehwehkier me ni ansou me e pahn leledo me e pahn ketikihdo komour ong aramas koaros.

4 Oh ke kilangehr ni omw seri duwen sapwellime klohri; eri, kowe meid paih duwehte irail akan me e pahn ketin kapaida ni paliwar. pwe Ngehno kin ketin duweduwehte aio, rahnwet, oh pil pahn kohkohlahte. Oh ahlo kaunopadahr sangete ni pwupwilahn aramas, oh komouro sohte pweine.

5 Oh aramas kin alehda kaweid me itarohng irail en esehla me pwung sang me sapwung. Oh kosonned kohiengehr aramas akan. Oh sang ni kosonnedo sohte aramas me wiawihdahsang uduk me pwung; de sang ni kosonnedo aramas akan lekdeklahr. Ehi, sang ni duwen kosonned en paliwar aramas akan lekdeklahr; oh pil, sang ni kosonned en pali ngehno irail kin mehla sang dahme mwahu, oh weiweirek kohkohlahte.

6 Eri, komouro kohdo sang Mesaia Sarawi; pwe ih me diren paih oh mehlel.

7 Kilang, e ketikihda pein ih en wia mehn meirong pwehki dihp, pwe en kapwaiada anahnepen kosonnedo koaros, ong irail koaros me mohngiong irail olahr oh pali ngenirail karakarahk alahr; oh sohte emen me anahnepen kosonnedo kak pweida reh.

8 Eri, ia uwen kesempwal laud en wiahda mepwukat en sansal ong tohn sampah, pwe irail en kak esehla me sohte aramas kak mihla mwohn sihlangin Koht, ihte ma pahn kin sang ni me mwahu kan, oh kalahngan oh limpoak en Mesaia Sarawi, me ketin matalahr nin duwen pali uduk oh pwurehng ketikihda sapwellime roson sang ni manaman en Ngehno, pwe en kak ketin kahrehiong iasada en me mehlahr akan, sang ni e pahn ketin tepin iasada.

9 Eri, iei ih me tepin wahn Koht, pwehki e pahn ketin tomwikihla ih pwehki aramas akan; oh irail akan me kamehlele ih pahn komourla.

10 Oh pwehki tompen aramas koaros, aramas koaros en kodohng Koht; eri, irail en uhda mwohn Koht pwe en ale kopwung sang reh nin duwen mehlel oh sarawi me mi reh. Eri, Sarawio anahnepen kosonnedo koaros, me Koht pahn ketikihla, en kin doadoahngki kalokoloko me kin uhsangete kosonnedo, iei kalokoloko me kin wekisang popohlo me kohsang ni kosonnedo, pwehn kapwaiada anahnepen tomwo.

11 Pwe udahn mie anahnepen mehn pelianda mehkan koaros. Ma soh, nei pwutak me tepin ipwidi nan sapwtehno, pwuhng sohte kak wiawi, de pil suwed, de pil

sarawi, de pil pahtou, de pil mwahu, de pil suwed. Ihme kahrehda, mie anahnepen mehkoaros en patkihpene, pwe ma paliwar ehu pahn kelehplwa, e pahn kin momour nin duwen me mehla emen, sohte kin ahneki mour de mehla, de pil mwasahngotala de mwamwahu te, de pil kin pehm de sohte kin pehm.

12 Eri, e udahn pahn wiawihong mehkot me sohte kahrehpe; eri e sohte pahn mie kahrehpen kapikipikadao. Eri, mehwet en kin anahne kauwehla erepit en Koht oh sapwellime koasoandi soutuk kan, oh pil manaman, oh kalahngan, oh pwung pahrek en Koht.

13 Oh ma kumwail pahn inda me sohte kosonned, kumwail pil pahn inda me sohte dihp. Ma kumwail pahn inda sohte dihp, kumwail pil pahn inda me sohte pwung. Oh ma sohte pwung, sohte popohl pahn mie. Ma sohte pwung de popohl, sohte kalokolok de weirek laud pahn mie. Oh ma mepwukat koaros sohte mie, Koht sohte pahn ketin mie. Oh ma sohte Koht, kitail sohte pahn mie, de sampah sohte pahn pil mie. Pwe e sohte pahn mie kapikipikdahn mehkoaros, de pil sohte mehkot pahn kapikipikada pwe en wia de wiahwiong mehkot, ihme kahrehda mehkoaros pahn sohrala.

14 Oh met, nei pwutangkan, I padahkihong kumwailehr mepwukat ong ni mehn wia kamwahu pamwail oh kumwail en esehla; me mie Koht emen, oh e ketin kapikadahr mehkoaros, me mih nanleng oh sampah, oh audepekan koaros, oh mehkoaros me pahn kin wiahda mehkan oh mehkan me kin wiawihdahsang rehrazil.

15 Oh en wadohng sapwellime koasoandi soutuk kan ong ni imwilahn aramas akan, mwurin eh ketin kapikadahr tepin samatail oh inatail, mahn en nan mohs akan oh menpihr en nan wehwe kan, oh ni imwilao mehkoaros me kapikipik dahr pahn kin mie peliarail, karasepe iei weren tuhke me irairdio oh tuhkehn kamouro; me ehu me kin mem oh ehu me kin katik.

16 Ihme kahrehda, Koht ketikihongehr aramas akan en pein wiewia irail. Eri, pein aramas emen sohte kak wiahiong ih mehkot, ihte ma ehu rehraz me pahn kamwakidada ih.

17 Oh ngehi, Lehi, nin duwen mehkan me I wadekehr, en kin medewehla me tounleng en Koht emen, nin duwen e inting dier, me pwupwidi sangehr nanleng; eri, e wialahr

tepel emen, me kin raparapahki mehkot me suwed mwohn Koht.

18 Oh pwehki e pwupwisangehr nanleng, oh e ahpw suwed lahr kokkohahte, oh e pil rapahkier kapahtou en aramas koaruhsie. Ihme kahrehda, ih, ehi, iei serpent en kawao, iei ihme tepelo, iei ihme pahpa en likamw koaros, eri indahng Eve: Kang wahn tuhke me sohte mweimweio, oh ke solahr pahn mehla, ahpw ke pahn duwehla Koht, ese me mwahu oh me suwed.

19 Oh mwurin Adam oh Eve alehier wahn tuhkeo kelikiliko, ira eri lekdekla sangehr nan mwetuwel en Eden, pwe ira en koadoahkehda pwehlo.

20 Oh ira wiadahr serihkan; ehi, ni mehlelo, peneinei koaros nan sampah.

21 Oh rahn en aramas akan kareirei lahr, nin duwen kupwuren Kauno, pwe irail en kak koluhla ni arail kolokol paliwar me wiawikihda uduk; eri, arail irairo wialahr irair en kasongosong ehu, oh arail ansou kareirei lahr, nin duwen kosonned akan Koht ketikihongehr aramas akan. Pwe e ketikihongehr aramas koaros ni kosonnedo me irail pahn udahn koluhla; pwe e ketin kasalehiongehr aramas koaros me irail salongalahr, pwehki dipen arail pahpa oh nohno kan.

22 Oh met, kilang, ma Adam sohte kauwehla kosonnedo, e sohte pahn pwupwidi, a e pahn mihmihte nan mwetuwel en Eden. Oh mehkoaros me kepikpik dahr pahn mihmi ni irairohte me irail kapikpikda sang ehrie; oh irail pahn duweduwehte kokkohahte, oh sohte imwsekla.

23 Oh ira sohte pahn naineki seri; eri, ira pahn mihmi ni irair en mwakelekel, sohte ahniki peren, pwe ira sohte pahn ahniki lokolok; wiewia mesawed, pwe ira sohte ese dihp.

24 Ahpw kilang, mehkoaros wiawiher nin duwen erepit en ih me ketin mwahngi mehkoaros.

25 Adam pwupwila pwe aramas en kak duwehla met, pwe irail en kak ahneki popohl.

26 Oh Mesaia pahn ketido ni ansou me pahn konehng pwe en kak ketin kamauhrala aramas akan sang nan arail pwupwilao. Oh pwehki irail komouhr lahr sangehr ni arail pwupwilao, irail saledeklahr kokkohahte, eselahr me mwahu sang me suwed; pwe irail en pein wia irail oh kaidehn emen en kin wiewia irail, ihte irail pahn lokolok ni

rahn neko, e pahn kin sang ni arail kauwehla kosonned akan me Koht ketikidohr.

27 Eri, aramas kin saledok nin duwen pali udok; oh mehkoaros kin kohieng irail iei me kin konehng aramas. Oh irail kin mweimweiohng en pilada saledok oh mour soutuk, sang rehn Sountomw lapalap en aramas koaros, de irail en pilada selidi de mehla, nin duwen selidi oh manaman en tepelo; pwe e kin rapahki aramas koaros en kak pahtoula duwehte ih.

28 Oh met, nei pwutangkan, I men kumwail en sopeilahng Sountomw lapalapo, oh rong sapwellime kosonned akan; oh en kin loaloapwoat ong sapwellime kosonned akan, oh pilada mour soutuk, sang nin duwen kupwuren sapwellime Ngehn Sarawio;

29 Oh dehr pilada mehla soutuk, ni duwen insenen udok oh dihp me mihmi loalamwail, me kin kihong tepelo manaman en kol kumwaildi, wai kumwail dihla nan ehl, pwe en kak kakaun kumwail nan eh wehio.

30 I kosoiahier koasoai mwotomwot wet ong kumwail koaros, nei pwutak kan, ni imwinlahn rahn en ei songisong kan; oh I piladahr pali mwahuo, nin duwen mahsen akan sang soukohpo. Oh I sohte ahneki ehu kahrepe tohrohr, ihte ma pahn ong ni sawasepen amwail mour kokkohlahte. Amen.

IRALAUD 3

Joseph nan Egypt kilangehr mehn Nephi kan ni sansal -- E kohpadahr duwen Joseph Smith, iei ohl sarawi en imwin rahn akan, duwen Moses, me pahn kapitara Israel -- Oh kodahn Pwuken Mormon.

1 Oh met I koasoiehg uhk, Joseph, nei pwutak me pekindhdi, ke impwidier nan sapwtehno ni ei apwal akan; ehi, ni ansou en ei pahtou kan me keieu laud me omw nohno kaipwiukidi.

2 Oh Kauno en pil ketin kolokol sahpu wet ong uhk, iei sahpu me keieu kaselel, ohng sapwomw sapwen sohso oh sapwen sohso en kadaudokemw kan oh iangahki kadaudok en riomw kan ong ni mehn kakehlepepwail kokkohlahte,

ma pahn mehlel amwail pahn kin kolokol kosonned akan en Koht Sarawi en Israelo.

3 Oh met, Joseph, nei pekindihdi, me I wahdo sangehr nan sapwteho sang ni ei kahpwal akan, Kauno en ketin kapaiukada kohkohlachte, pwe noumw kan karos en sohte sohrala kohkohlachte.

4 Pwe kilang, kowe iei nei; oh ngehi iei kadaudok en Joseph me selahngehr nan Egypt. Oh inou kan me Kauno ketin wiahiongehr Joseph me kesempwal.

5 Eri, Joseph ni mehlel kilangehr atail ansou kan. Oh e aledier inou ehu sang rehn Kauno, me sang ni kadaudokehkan, Kauno Koht pahn ketin kapwarehda ehu rah me pwung sang ni keinek en Israel; kaidehn Mesaia, ahpw rah eu me pahn tipwasang, ahpw, en dehr manoknokla nan inou kan en Kauno me Mesaia pahn ketin sansal ong irail ni imwin rahn akan, ni engin manaman pwe en ketikidohng irail nan marain sang nan rotorot -- ehi, sang nan rotorot me kin rir oh sang ni selidi kolahng nin saledek.

6 Pwe Joseph kadehdedah ni mehlel, inda: Ohl sarawi men Kauno ei Koht pahn ketikihda, iei me pahn wia ohl sarawi pilpil men sang nan kodoudekei kan.

7 Ehi, Joseph ni mehlel kosoiahier: Iet me Kauno ketin mahsanihong ie: I pahn kapwarehda ohl sarawi pilpil men sang nan kodoudokemw kan; oh kodoudokemw kan pahn kin wiahki ih aramas lapalap emen. Oh I pahn kihong ih kosonned ehu pwe en wia doahk ehu ong ni kodoudekomw akan, riehkan, me pahn kesempwal ong irail, iei en wadohng irail en esehla inou kan me wiahiongehr samamwail akan.

8 Oh I pahn kihong ih kosonned ehu me e pahn sohte wia ehu doahk tohrohr, ihte doahko me I pahn padahk kiong ih. Oh I pahn wiahiong ih en lapalap mwohn mesei; pwehki e kin wiahda ei doadoahk.

9 Oh e pahn lapalap duwehte Moses, me I kasaledahr me I pahn kiong kumwail pwe en kapitala nei aramas akan, O mehn Israel.

10 Oh I pahn kihda Moses, pwe en kapitasang noumw aramas akan sang nan sapwen Egypt.

11 Ahpw I pahn kapwarehda emen ohl sarawi sang ni kadoudek omw akan; oh I pahn kihong manaman en wadohng kadoudek omw kan mahseno sang rehi -- oh

kaidehn wadohte ei mahseno, me Kauno ketin mahsani, ahpw ei mahseno en kawik iraila, me pahn kin kohla rehral.

12 Eri, kadoudokomw pahn inting; oh Judah pahn inting; oh mehkan me pahn inting dihsang, kadoudok omw, oh pil mehkan me pahn inting dihsang kadaudoken Judah pahn patpene pwehn kasapwunge padahk likamw akan, oh kasohrehla mahwen akan, oh kauwada meleilei nanpwung, kadaudokemw kan oh wai iraildo pwe irail en esehla duwen samarail akan ni imwin rahn akan, oh pil esehla duwen ei inou kan, iet me Kauno ketin mahsaniher.

13 Oh sang ni luwet, e pahn kin kehlaila ni rahno me ei doadoahk pahn tapihada rehn nei aramas akan, pwehn kapwurehdo kumwail, oh mehn Israel, me Kauno ketin mahsaniher.

14 Oh met iei me Joseph kohpadahr, inda: Kilang, Kauno pahn ketin kapaiahda ohl sarawio, oh irail me pahn rapahki pwehn kemehla ih pahn udahn mehla, pwe inou wet, I kihsangehr rehn Kauno, ong ni duwen pweidahn kadaudokei. Kilang, I inenen kamehlele me inou wet pahn pweida.

15 Oh ede pahn kohsang ni edei, oh ahdo pahn pil kohsang ni eden eh pahpao. Oh e pahn duwehte ngehi; pwe iei me Kauno pahn ketin kapwarehda sang ni limeo, sang ni manaman en Kauno pahn ketin wahdo nei aramas akan pwe ren komourala.

16 Ehi, met iei me Joseph kohpadahr: I kin kamehlele meuwet duwehte ei kin kamehlele inou en Moses; pwe Kauno ketin mahsani ongiehier me e pahn ketin kolokol kadaudek amwail kohkohlahte.

17 Oh Kauno ketin mahsani: I pahn kapwarehda emen Moses; oh I pahn kihong ih manaman nan sokon pwoat; oh I pahn kihong ih en kin inting ni sansal. Ahpw I sohte pahn kihsang lewehu, pwe en kin kosoia mehkoaros, pwe I sohte pahn mweidohng ih en kehlail ni koasokoasoi. Ahpw I pahn intingi ong ih ei kosonnedo, sang ni pein sendin pehikat; oh I pahn kihong ih emen soun koasoa koasoi.

18 Oh Kauno pil ketin mahsani ongiehier: I pahn kapwarahda emen sang nan kadaudekomw akan; oh I pahn kihong ih emen sounkoasokoasoi. Oh kilang, I pahn kihong ih en intingihdi inting en kadaudekomw kan pwe en

kohieng kadaudekomw kan; oh sounkoasokoasoio pahn kolang ni kadoudokomwo me pahn kin kasalehda.

19 Oh mahsen akan me e pahn intingi edi pahn iei mahsen akan me konehng sang nin duwen ei marain me pahn kolahng rehn kadaudokemw kan. Oh e pahn rasohng ma kadaudokemw kan pahn kin likweriong irail sang nan pwehlo; pwe I ese duwen arail pwoson.

20 Oh re pahn likwer sang nan pwehlo; ehi, iei ong riarail akan en koluhla, iei mwurin pahr tohto me pahn douwer powe. Oh e pahn wiawi me mahsen akan sang irail pahn pwilwei, nin duwen sohte mehkot pahn kapatpat ong.

21 Pwehki arail pwoson akan, mahsen akan sang rehrail pahn kolahng rehn riarail akan me iei kadoudok omw akan sang nan eweiet; oh I pahn kalaudehla ar pwoson sang ni luwet en mahsen akan sang rehrail, pwe irail en kin tamataman kosonnedo me wiahiongehr samarail akan.

22 Oh met, kilang, nei pwutak Joseph, iei duwen met me ei pahpa en keilahn aio kohpadahr.

23 Eri, pwehki sang ni inou wet, meid paih kowe; pwe kadoudok omw kan sohte pahn kamwomw mwomwla, pwe irail pahn kin rong mahsen en nan pwuhko.

24 Oh mie emen me kehlail me pahn pwarada nan pwung arail, me pahn kin wiahda mwahu ni lokaia oh ni tiahk, sang ni e wie soundoadoahk emen nin limen Koht ki pwoson kouwahlapie, pwe en wiahda doadoahk lap kopwuriamwei kan, oh en wiahda mehkan me kesempwal mwohn silangin Koht, pwehn kapwarahda laud duwen kapwurupwur pene en mehn Israel, oh duwen kapwurupwur pene en kadaudokemw kan.

25 Oh met, kowe meid pai, Joseph, kilang, ke me tikitik; eri ken kin rong ngilen riomw, Nephi, oh e pahn kin pweieing uhk nin duwen dahme I koasoihier. Tamataman mahsen akan sang ahmw pahpa me luwetlahr. Amen.

IRALAUD 4

Lehi kihla kaweid oh kapaida kadoudoke kan -- E melahr oh seridier -- Nephi klohrhki en Koht ketin kupwurmwahu ong ih -- Nephi kihong eh likilik rehn Kauno kokkohlahte.

1 Oh met, ngehi, Nephi, kosoia duwen kokohp akan me ei pahpahu kosoiahier nin duwen Joseph me wisik lahngehr nan Egypt.

2 Pwe kilang, ni mehlel, e kohpadahr duwen kadoudoke kan koaros. Oh sohte kokohp tohto me lauhdsang kokohp akan me e intingi dier. Oh e kohpadahr duwen kiht oh nait dih en mwuri kan; oh irail inting dier pohn prahs sleitko.

3 Eri, mwurin ei pahpahu kaimwsek lahr eh kasalehda duwen kokohp akan en Joseph, ih eri ekerpene nein Laman akan, nah pwutak kan oh serepein akan, oh indahiong irail: Kilang, nei pwutangkan oh nei serepein akan, me nein nei meseniho, I men kumwail en rong mahsen akan sang ie.

4 Pwe Kauno Koht me ketin mahsanihier me: Nin duwen amwail kin dadauhr ei kosonned akan kumwail pahn kin pweida: Oh nin duwen amwail kin sohte dadauhr ei kosonned akan kumwail pahn kin lekdek sang ie.

5 Ahpw kilang, nei pwutak kan oh serepein akan, I sohte kak kohdila nan ei sousou lao I kapai kumwailda; pwe kilang, I ese me ma kumwail pahn kekeirada nan ahl me pwungo, kumwail sohte pahn kohwei sang ahlo.

6 Eri, ma kumwail pahn riahla, kilang, I pahn pwiliki pohmwail ei kapai, pwe riah en kohsang rehmwail oh pahn kolahng pohn amwail pahpa kan oh amwail nohno kan.

7 Eri, pwehki sang ni ei kapai kumwail dahr, Koht sohte pahn ketin mweidohng kumwail en lekdekla; eri, e pahn kin ketin kalahngan ong kumwail oh kadoudok amwail akan kohkohahte.

8 Oh e wiawiher me mwurin ei pahpahu kaneke lahr eh koasoing nein Laman pwutak kan oh serepein akan, e ahpw men nein Lemuel pwutangkan oh serepein akan en wisikdo mwowhe.

9 Oh e ahpw padahkihong irailehr, inda: Kilang, nei pwutak kan oh nei serepein akan me nein nei pwutak keriemeno; kilang I pahn pwiliki pohmwail soangen kapaiohte me I kiongehr nein Laman pwutangkan oh serepein akan; eri, kumwail sohte pahn sohrala koaros; ahpw ni imwio kadaudok amwail akan pahn kapaida.

10 Oh eri ni ansou me ei pahpahu eh kaneke lahr eh koasoai ong irail, kilang, e ongehr nein Ishmael pwutak kan, ehi, oh duwehte tohn imweh kan koaros.

11 Oh mwurin eh kaimwsek lahr eh koasoai ong irail, ih eri padahk kiong Sam, inda: Meid paih kowe, oh kadaudok omw akan, pwe ke pahn sohsohki sahpuwo duwehte riomw Nephi. Oh kadoudok omw pahn iangala kadoudokeh kan; oh ke pahn duwehla riomwo, oh kadaudok omw akan pahn duwehla kadaudokehkan; oh kowe pahn kapaida nan omw ansou kan koaros.

12 Oh eri mwurin ei pahpao, Lehi, kasalehiongehr tohn imwehkan koaros, nin duwen pepehm kan en nan eh mohngiong oh nin duwen Ngenen Kauno me ketiket reh, e ahpw likeilapalahr. Oh kedekedeo ih eri melahr, oh serdier.

13 Oh eri mwurin rahn ekei ei pahpahu melahr, Laman oh Lemuel oh nein Ishmael pwutangkan lingeringer dahr pah pwehki duwen kehkelik kan sang rehn Kauno.

14 Pwe ngehi, Nephi, nin duwen sapwellime mahseno, len dehr lokaiahieng irail, pwe I padahk kiong irailehr soahng tohtohie; oh pil duwehte ei pahpahu mwohn e pahn mehla; koasoai tohto me inting diongehr pohn ekei nei sleit akan; ong ni kalaude pen kisehn poadoapoad iei me inting dier pohn ekei nei sleit kan.

15 Oh pohn mepwukat, I pahn intingihdihong mehkan kan sang nan mohngiong, oh mahsen tohto en Koht akan me intingiongehr pohn sleit prahs akan. Pwe pali ngeni kin perenkihda mahsen en Koht akan, oh mohngiong kin medemedewe irail, oh intingihdi irail ong mehn wia kaiahn oh kapai ong nei serihkan.

16 Kilang, ngeni kin perenkihda mehkan me pid Kauno; oh mohngiong kin poaden medemedewe mehkan me I kilangehr oh rongehr.

17 Ahpw, mendahte kamwahu lapalahpie en Kauno, ni e ketin kasale dohngiehier sapwellime doahk lap oh kopwuriamwei kan, mohngiong kin werikihda: O ohl suwed emen me duwe ngehi et! Ehi, mohngiong kin pahtoula pwehki paliwerei; ngeni kin pahtoula pwehki dipei kan.

18 I ahpw milahr loale, pwehki kasongsong kan oh dipei akan me wiawiher.

19 Oh ni ei kin men perenda, mohngiong kin sengiseng loal pwehki dipei akan; ahpw, I ese ihs me I kin liki.

20 Ei Koht iei ei soun sawas; e ketin kaluwaiehsangehr nan ei kahpwal akan nan sapwtehno; oh e ketin doaroielahr pohn sehdo.

21 E ketin kadireie kilahr sapwellime limpoak, iei me kadire lahr pali wereiet.

22 E ketin kapinga dahr ei imwintihti kan, pwe en kahrehiong irail en kin rerrer mwohi.

23 Kilang, e ketin karongeier ei wie likilikwer nin rahn akan, oh e ketin kamarainkiniehier sang ni sansal akan me k in wiawi nihpwong kan.

24 Oh ni rahn akan I kin kekeirada ni ei sohte masak kapakap mwohn sihlengin Kauno; ehi, ngilei kan kin kadaradahla wasa ileile; oh tounleng kan kodohr oh kin sewese ie.

25 Oh paliwereiet ahpw wisikieilahngehr pohl dohl akan me ileile mehlel. Oh meseiet kilangehr me kopwuriamwei kan ehi, iei me laud sang aramas en kilang; I eri sohte mweimweiong en intingi iraildi.

26 Oh eri, ma I kilangehr me kowahlap akan, ma Kauno ni e ketin rasohngala aramas akan, e ketin pwarohngehr aramas akan ki mahk lapalahpie, dahme kahrehda mohngiong i en kin sengiseng oh ngeni en kin mihmi nan wahu en kapahtou, oh udukei en kin sohla katepe, oh ei kehl en luwetala, pwehki ei apwal kan?

27 Oh dahme kahrehda I en lohiong pahn dihp, pwehki paliwereiet? Ehi, dahme kahrehda I en mweidohng elen kasongsong kan, pwe me suwedo en kin mie dewe nan mohngiong i pwe en kauwehla meleilei oh kaloke ngeni? Dahme kahrehda I en kin lingeringer pwehki ei imwintihti?

28 Ngeni, pirida! Dehr pwupwidiong nan dihp. O mohngiong i, perenda, oh dehr mweidada perehn imwintihti en mie nan ngeni.

29 Dehr pwurehng lingeringerda pwehki ei imwintihti kan. Dehr katikala ei kehl pwehki ei lokolok kan.

30 Perenda, mohngiong i, oh likwer dalahng Kauno, oh inda: O Kaun, I pahn dangke komwi kokkohlahte; ehi, ngeni en kin peren kihda komwi, ei Koht, oh ei paipen komour.

31 O Kaun, ia duwen, omwi pahn ketin doarehla ngeni? Ia duwen, omwi pahn ketikihsang ie nan pehn ei imwintihti

kan? Ia duwen, omwi pahn ketin wiahiong ie pwe I en kin mwekid kihda ni en dihp kin pwarada?

32 Ewen kelen ehl en kin retidahng mwohi ni ansou kan, pwehki mohngiong olahr oh ngeni kolulahr! O Kaun, komwi sohte pahn riting dahng mwohi sapwellimomwi ewen kehl en pwung kan, pwe I en kak keid nan ahlo me mihmi nan wahu loalo, pwe I en kak mihmihte nan ahl ineno.

33 O Kaun, komwi pahn ketin pidakikinie pene sapwellimomwi likou puhp en pwuhngo! O Kaun, komwi pahn ketikihong ie apwoat ahl en me I en kin tangasang mwohn ei imwintihti kan! Komwi dehr ketikihong takain dipekelekelo nan ei ahlo -- ahpw komw pahn ketin kamwakelehda ei ahlo mwohi, oh komw dehr ketin kelehda ei ahlo, ahpw komw ketin kelehda elen ei imwintihti kan.

34 O Kaun, I kin liki komwi, oh I pahn liki komwi kohkohahte. I sohte pahn kihong ei likilik ong nan pehn aramas akan; pwe I ese me aramas emen kin riahkihla ni e kin kihong eh likilik rehn aramas akan. Ehi, ria pahn kohieng mehmeno me kihong eh likilik rehn aramas akan de wiahiong peh en wia kisehn sampah.

35 Ehi, I ese koht pahn ketin kupwur sapan ong mehmen me kin peki reh, ma e pahn peki ni pwung; ihme kahrehda I pahn kalaudehla ngilei ong komwi; ehi, I pahn likweriong komwi, ei Koht, iei ihme paip en ei pwung kilang, ngilei pahn kin poaden kohkohda wei rehmwi ei paip lap oh ei Koht kohkohahte. Amen.

IRALAUD 5

Mehn Nephi kan katohre irail sang mehn Laman akan, duwenahr kolokol kosonned en Moses, oh duwen ahr kauwada ehu tehnpas sarawi.

1 Kilang, e wiawiher me ngehi, Nephi, ahpw likweriong, ehr Kauno ei Koht, pwehki duwen lingeringer en riei kan.

2 Ahpw kilang, arail lingeringer ong ie me kin wie lalaudla kouahlapie, eri irail rapahkiniehier pwe ren kihsang ei mour.

3 Ehi, irail kin lipahnedei, inda: Riatail me tikitiko lemeleme me e pahn kaunda kitail; oh kitail alehier apwal

laud pwehki ih; eri, met kitail en kemehla ih, pwe kitail en dehr alehkihda lokolok laud pwehki sang ni mahsen akan me sang reh. Pwe kilang, kitail sohte pahn wiahki ih atail kaun, pwe iei kitail, rie me mah kan me pahn kaunda aramas pwukat.

4 Met I sohte intingihdi koaros pohn sleit akan duwen mehkan me irail kin lipahnedehkin ie. Ahpw e itarohng len inda, me irail rapahkier pwe irail en kihsang ei mour.

5 Oh e wiawiher me Kauno ketin kehkehlik ongiehier, me ngehi, Nephi, pahn kohsang reh rail oh tangala nan sapwteho, oh irail koaros me inengieng en iangiehla.

6 Eri, e wiawiher me ngehi, Nephi, aledahr ei peneinei, oh Sam, me mahsang ie oh eh peneinei, oh Jacob oh Joseph, riei me pwulopwul akan, oh pil riei serepein akan, oh koaros me inengieng en iangiehla. Oh irail koaros me men iangiehla iei irail me kin kamehlele kehkelik kan oh kaudial akan en Koht; ihme kahrehda; irail kin rong mahsen kan sang rehi.

7 Oh se aledahr aht impwal kan oh mehkan koaros me se kak en wahda, oh seiloak lahr nan sapwteho ni erein rahn tohto kei. Oh mwurin rahn tohto kei me se wie seiseilok selier, se kauwadahr imwat impwal akan.

8 Oh nei aramas akan men sen kahdeneki wasao Nephi; ihme kahrehda, se kiongki eden wasao, Nephi.

9 Oh irail akan koaros me iangielahr adaniki lahr mehn Nephi.

10 Oh se nantiheng wiahda koasoandi kan, oh kosonned akan, oh kosonned en Kauno kan ni mehkoaros nin duwen kosonned en Moses.

11 Oh Kauno ketin ieiang kiht ehr; oh se pweidahr kouwahlapie, pwe se kamwarakehr weren tuhke kan, oh se pil dolongehr me tohto ie. Oh se tepier apwaliada pelin sihpw akan, pelin kow kan, oh soahngen mahn koaros.

12 Oh ngehi, Nephi, pil wadahr poadoapoad kan me intingihongehr pohn sleit prahs akan; oh pil umpweio de kamposo me kaunopehngehr ei pahpahu sang ni limen Kauno, nin duwen dahme intingdier.

13 Oh e wiawiher me se tepier pweidahr kowahlap, oh kaparapar lahr nan sahpuwo.

14 Oh ngehi, Nephi, alehier kedlahs en Laban oh sang ni mwomwo, I wiakidahr me tohto, pwehki e kakete aramas akan en ansou wet irail akan me adaneki mehn Laman kan

pahn kodohng kit oh kemeikitala; pwe I ese duwen arail lingersinger pahs oh pahn nei seri kan oh irail koaros me kin adaneki nei aramas akan.

15 Oh I padahkihongehr nei aramas akan en kauwada ihmw akan, oh padahkihong irailehr en wia soahngen doadoahk kan koaros me pidada tuhke, oh mete, oh kapa, oh kohl, oh silper, oh pelien mete kesempwal akan, me inenen tohto mehlel.

16 Oh ngehi, Nephi, wiadahr tehnpas sarawi ehu; I wiadahr ni mwomwen tehnpas sarawi en Solomon, ahpw ihte e sohte wiawikihda dipwisou kesempwal tohto kan; pwe irail kin sohte dierek nan sahpwo, sang ni kahrehpe wet, e sohte kak kokouda pwe en duwehte tehnpas sarawi en Solomono; oh wiepehu me inenen mwahu mehlel.

17 Oh ngehi, Nephi, indaiong nei aramas akan en kin pwerisek, oh irail en kin doadoahk ki pehrail akan.

18 Oh irail eri men Ien wiahla arail nahnmwariki. Ahpw ngehi, Nephi, sohte men irail en ahnekihla emen nahnmwariki; ahpw, I wiahier nin duwen me I kak.

19 Oh kilang, mahsen akan en Kauno pweiongehr riei kan, me e ketin kasaledahr duwen irail, me I pahn wiahla arail kaun oh arail sounpadahk. Sang ni kahrehpe wet, I wialahr arail kaun oh arail sounpadahk, nin duwen kosonned akan en Kauno, lao lel ansouo me irail rapahki pwe en kihsang ei mour.

20 Eri, mahsen en Kauno pweidahr ni eh ketin kasalehiongiehier, me mahsanih; pwehki arail sohte pahn kin rong omw lokaia, irail pahn kin poaridisang mwohn sihlangin Kauno. Oh kilang, irail eri lekdek sangehr mwohn sihlangin Kauno.

IRALAUD 9

Mehn Jews akan pahn pokonpene nan sapwarail sapwen inou kan koaros -- Tomwo pwainda aramas akan sang ni pwupwilao -- Paliwaren me melahr akan pahn kohsang nan sousou kan, oh ngenirail sang nan ehl oh sang nan paradais -- Irail pahn ale kadeik -- Tomwo doarehla aramas akan sang mehla, ehl, tepelo, oh tehtehrek soutuk -- Me pwung kan pahn komourla nan wein Koht -- Kolokepen dihp akan

koasoandier -- Koht Sarawi en Israelo iei ih me ketin wia silepen ewen kehlo.

1 Oh met, riei kempoak kan, I wadekehr mepwukat pwe kumwail en ese duwen inou kan en Kauno me pein ih ketin inouki ongehr mehn Israel akan.

2 Pwe e ketin padahk kiongehr mehn Jews akan, sang ni ewen sapwellime soukohp sarawi kan, sangete ehu ehu dihkan ni tapio lao lel ansouo me re pahn kapwurehda mwomwohdiso mehlelo oh kehl en Koht; ansou me irail pahn pwurepene ong arail wasa nan sapwarail sapwen sohso kan, oh pahn poahsoanda nan sapwarail sapwen inou kan koaros.

3 Kilang, riei kempoak kan, I padahkihong kumwailehr mepwukat pwe kumwail en kak perenda, oh sarada kohkohlahte, pwehki sang ni kapai kan me Koht pahn ketikihwei pohn noumwail seri kan.

4 Pwe I ese me e laud amwail rapahkier, kumwail me tohto me men esehla mehkan me pahn kohdo; eri I ese me kumwail ese me paliwaratail pahn ohla oh mehla; ahpw, paliwaratail kan, kitail pahn kilangki Koht.

5 Ehi, I ese me kumwail ese me ni pali uduk me e pahn ketin kasalehiong irail pein ih nan Jerusalem, wasa me kitail kohsangie; pwe e konehng en wiawi rehrrail; pwe e konehng Sounkapikada lapalapo en ketin mweidala ih en ketin wia udukala, oh matikihla aramas koaros, pwe aramas koaros en kak kodohng reh.

6 Pwe nin duwen mehla kin kipe aramas koaros, pwe en kin kapwaiahda koasoandi kalahngen en Sounkapikada lapalapo, udahn pahn mie anahnepen manaman en iasada, oh pwe iasadao en mie rehn aramas akan sang ni kahrehpen pwupwilao; pwupwilao kohsang ni kahrehpen dihp; oh pwehki aramas pwupwila, irail eri lekdeksangehr mwohn sihlangin Kauno.

7 Sang ni kahrehpe wet, mie anahnepen tomw ehu me soh imwi me pahn wiawi -- ihte sang ni tomw soh imwi wet, me paliwar wet pahn sohte okihla. Eri, keieu en koasoandi me kohiengehr aramas iei irail en mehla kohkohlahte. Oh ma iei, paliwar wet pahn seridi pwe en kin mwasahngotala oh mwerediong nan pwehlo, pwe en dehr iasada.

8 Oh iei duwen erepit en Koht, sapwellime mahk oh kalahngan! Pwe kilang, ma paliwar sohte pahn iasada, ngenitail pahn sohte iasada oh pahn mihla pahn tounlengo me pwupweisangehr mwohn sihlengin Koht Soutuko, oh wialahr tepelo.

9 Oh ngenitail pahn udahn duwehla ih, oh kitail eri wialahr tepil akan, iei tounleng kan en tepelo, pwe en kin ritidi sang mwohn sihlengin Koht, oh en kin mihmi rehn pahpahn likamw akan, wie tehtehrek, duwehla ih; ehi, pwe ih me pitihdier atail tepin nohno oh pahpa, pwe e kin kawekala ih en duwehla emen tounleng en maraino, oh kin kapingada aramas akan-ong ni doahk rir mwersuwed akan oh soangen doahk rir koaros nan rotorot.

10 Oh ia uwen mwahu kouwahlahpie en atail Koht, me ketin kaunopadahr ahlo me kitail en tangasang nan pehn eri kamasapwehk menet; ehi, enio, iei mehla oh ehl, me I kin kahdaniki melahn paliwaro, oh pil melahn ngehno.

11 Oh pwehki I kasaledahr me sapwellimen atail Koht, Koht Sarawi en Israel alen kamouro, iei ihme mehla wet melahn paliwar, pahn kin kihda irail iei melahn nan sousouo.

12 Oh mehla wet me I koasoiahier, iei ihme melahn pali ngehno, me pahn kihda me melahr akan sang reh, iei mehla wet ihme ehl. Eri, sang ni kahrehpe wet, mehla oh ehl pahn udahn kihda me melahr akan rehra, oh ehl udahn pahn kihda ngehn akan me kin sensel reh, oh wasahn seridio pahn udahn kihda paliwar akan me e kin kolokol. Oh paliwar akan oh ngehn en aramas akan pahn patpene pwe en wiahla ehu; oh met iei sang ni manaman en iasada en Koht Sarawio en Israel.

13 O ia uhwen kesempwal en sapwellimen Koht koasoandio! Pwe pil ehu, paradais en Koht pahn kihda ngenen me pwung kan, oh sousouo kin kihda paliwaren me pwungo; oh ngehno oh paliwahro pahn pwurepene, oh aramas pahn solahr kak mwerpeseng, oh solahr mehla kohkohahte, irail iei aramas momour ekei me ahneki dahme kitail kin esehla ni pali uduk, ahpw ihte atail kataman pahn kin unsek.

14 Eri sang ni kahrehpe wet, kitail pahn esehla ni unsek duwen dipatail akan; atail samin, oh atail sohte kapwatkihda likou puhp en pwuhngo; oh me pwung kan pahn esehla ni unsek duwen arail popohl, arail pwung, sang

ni arail kapwatki likou mwakelekel, ehi, iei likou puhp en pwuhngo.

15 Oh e pahn wiawi me ni ansouo me aramas koaros pahn mourada sang ni arail mehla keieu, pwehki irail solahr pahn mehla, irail udahn pahn kesihnen mwohn mwoalen kopwung en Koht Sarawi en Israel. Oh irail eri udahn pahn kadeik nin duwen kopwung sarawi en Koht.

16 Oh sang ni kamehlelepe, nin duwen Kauno ketin ieias, pwe Kauno Koht me ketin mahsaniher, oh iei sapwellime mahsen soutuk, me sohte kak sohrala, me irail me pwung kan pahn pil wie pwungipwungte, oh irail me samin akan pahn pahn pil samisaminte; sang ni kahrehpe wet, irail akan me kin samin iei ihme tepelo oh nah tounlang kan; oh irail pahn kohla nan kisiniei poatoapoato me kaunopadahng irailehr; oh arail lokolok iei me pahn duwehte lehn kisiniei ehu oh takai mwehl ieu, me umpwulo kin wie umpwumwpwul poatoapoat oh kokkohlahte, oh sohte kin tukedi.

17 Oh ia uwen lapalap oh pwung pahrek en Koht! Pwehki e kin ketin kapwaihda sapwellime mahsen akan, oh me mahsen akan kohsangehr nan dawase, oh me sapwellime kosonnedo en kin udahn pweida.

18 Ahpw, kilang, me pwung kan, souleng kan en Koht Sarawi en Israel, iei irail me kin kamehlele Koht Sarawio en Israel, irail iei ihme kalwehdier lohpuw en sampah kan, oh kin sohte kin namenekla, irail iei me pahn sohsohki wein Koht, me kaunopadahng irailehr sang ni poahsoan lap en sampah, oh arail popohl pahn unsekala kokkohlahte.

19 Oh ia uwen kalahngan lapalap en atail Koht, Koht Sarawi en Israel! Pwehki e ketin kapitasang sapwellime souleng kan rehn eni kamasapwehko, iei ihme tepel, oh mehla, oh ehl, oh lehn kisinieio oh takai mwehlo, me iei ihme lokolok kokkohlahte.

20 O ia uwen sarawi kouwalahpie en atail Koht! Pwe e ketin mwahngier mehkoaruhsie, oh sohte mehkot mie me e sohte ketin mwahngi.

21 Oh e ketido sampah pwe en kak ketin kamourla aramas koaros ma irail pahn rong kapitieo; pwe kilang, e pahn ketin lokolongki dipen me momour koaros, ohl, lih, oh serihkan, me kisehn peneinei en Adam.

22 Oh en ketin lokolongki met pwe iasada en kak lelohng aramas koaros, pwe aramas koaros en kak uh mwowe ni rahn lapalapo oh rahn en kadeiko.

23 Oh e ketin pahngokihong aramas koaros en koluhla, oh pepdaisala ni mware, sang ni arail pwoson mehlel Koht Sarawi en Israel, de ma soh, irail sohte pahn mourla nan wehin Koht.

24 Oh ma irail sohte pahn koluhla oh kamehlele ni mware, oh sohte pahn pepdaisala ni mware, oh sohte pahn dadaurete lel imwi, irail pahn lekdekla; pwe Kauno Koht, Koht Sarawi en Israel me ketin mahsaniher.

25 Eri sang ni kahrehpe wet, e ketikidahr kosonnedo ehu, oh me wasa me kosonnedo sohte kin mie, sohte kalokepe kin pil mie; oh wasa me sohte kalokepe mie, sohte dipada kin mie; oh wasa me sohte dipada, kalahngan en Koht Sarawi en Israel pahn sapwellimaniki pwung en sapwellimanki iraila, pwehki tohmwo; me irail en kamourkihla sang ni sapwellime manamano.

26 Pwe tomwo kaitarala anahnepen sapwellime kosonnedo ong koaros me sohte alehda kosonnedo, pwe irail en pitsang pahn eni kamasapwehko, mehla oh ehl, oh tepelo, oh lehn kisinieio, oh takai mwehlo, me iei lokolok kokkohlahte; oh irail en kin pwuredohng Koht me ketikihong irail esingek, iei Koht Sarawi en Israel.

27 Ahpw meid suwediong ih me aledahr kosonnedo, ehi, me kin kolokol kosonned koaros en Koht, duwehte kitail, me kauwelahr irail, oh kasolepehla rahn en eh kosongosong kan, pwe mehd nohk suwed irehn mehmeno!

28 O koasoandi pil en me suwedo! O ia uwen sohte katepe oh luwet akan, oh ia duwen pweipwei en aramas akan! Ansou me irail kin loalekengla, irail kin leme me irail kin marain, oh sohte kin rong kaweid en Koht akan, pwe irail kin soikala met sang ni arail lemeleme me irail pein ese, eri, arail loalokong iei pweipwei oh e sohte kin wiahiong irail mehkot. Oh irail pahn kin sohrala.

29 Ahpw en loalekengla pahn kin mwahu ma irail kin rong kaweid en Koht akan.

30 Ahpw meid suwediong irail me kepwehpwe kan, me kin kepwehpwehki dipwisou en sampah kan. Pwehki ni arail kin kepwehpwehla, re kin pohnsehsehla me semwehmwe kan, oh irail kin kaloke me ohpampap akan, oh arail mohngiong kin uhwong arail dipwisou kan; eri,

arail dipwisou kan kin wiahla arail Koht. Oh kilang, arail dipwisou kan pahn pil iang irail mwasahngotala.

31 Oh meid suwediong irial me kin salongopon kan me sohte pahn karonge; pwe irail pahn sohrala.

32 Meid suwediong irail me kin masukun akan me sohte pahn kilang wasa; pwe irail pahn pil sohrala.

33 Meid suwediong irail me soh sirkomsais nan arail mohngiong kan, pwe diparail akan pahn lelohng irail ni keimwsek lahn rahno.

34 Meid suwediong me likamwo, pwe e pahn psikendihla nan ehl.

35 Meid suwediong me mwerisuwedo me kin insaniki kemehla aramas, pwe e pahn kamala.

36 Meid suwediong irail me kin wiahda dipen nenek kan, pwe irail pahn psikendihla nan ehl.

37 Ehi, meid suwediong irail akan me kin pwongi eni mwahl akan, pwehki tepel en tepel akan koaros kin perenkihda irail.

38 Oh, meid suwediong irail akan me kin mehla nan diparail akan pwe ni imwio, irail pahn pwurala rehn Koht oh pahn kilang wasa ilehn Koht oh pahn mihmihte nan diparail kohkohlahte.

39 Oh riei kempoakepahi kan, tamatam kasuwed pen kauwehla kosonned en Koht Sarawio, oh pil kasuwedpen lohdiheng pahn kasongsong kan en me likamwo. Tamataman, medemedewehte paliwar iei mehla, oh medemedewehte pali ngehn iei mour soutuk.

40 O, riei kempoakepahi kan, rong ei padahngkan. Tamataman duwen lapalap en Koht Sarawi en Israel. Dehr inda me I lokaia laud ong kumwail; pwe ma kumwail wia met, kumwail pahn uhwongada mehlelo; pwe I kosoiahier mahsen akan sang rehn me ketin kapik kumwailadahr. I ese me mehlelo kin apwal ong me samin koaros; ahpw me pwung kan sohte kin masak irail, pwe irail kin poakehng mehlelo oh sohte pahn kin mwekid.

41 Oh eri, riei kempoakepahi kan, kohdo rehn Kauno, Koht Sarawio. Tamataman me sapwellime ahl akan me pwung. Kilang, ahlo me aramas en kin keidla ie me tehtik, ahpw kin inen kohla mwohrail, oh Koht Sarawi en Israel me ketin sinsile ewen kehlo; oh e sohte ketin doadoahngki emen wasao; oh sohte mwahn apwoat ahl

wasao, ihte ahl me kolahng ni ewen kehlo; pwe aramas en dehr pitih ih, pwe Kaun Koht iei ihme mware.

42 Oh mehmen me pahn letelet, e pahn ritidahng ih; oh me loalokong kan, oh me alehdi kaiahn akan, oh irail me kepwehpwe kan, me kin pohnmwahsuhla, pwehki sang ni arail kaiahn akan, oh arail loalokong, oh arail kepwehpwe kan -- ehi, irail iei me e sohte kin ketin wiahki mehkot; oh ihte ma irail pahn kesehla mepwukat, oh leme me irail pweipwei kei mwohn Koht, oh pahn karakarahkala mehlel, e ahpw pahn ketin ritingadahng irail ewen kehlo.

43 Ahpw mehkan me pid me loalokong kan oh me koahiek kan pahn ririsang irail kokkohlahte -- ehi, iei popohlo me kaunopengehr souleng kan.

44 Oh, riei kempoak kan, tamataman mahsen kan sang rehi. Kilang, I kihsang ei likou oh itik mwohmwail; I peki rehn Koht me komourpei en ketin mahsandohng ie ki pein sihlangi; eri, sang ni kahrehpe wet, kumwail en ese me ni imwin rahno ansou me aramas koaros pahn kadeingki arail doadoahngkan, Koht en Israel pahn ketin kadehde me I itiksangehr dipamwail rehi, oh me I pahn linganla mwohn Kauno, oh ngehi solahr pahn pwukoahki intahmwail.

45 Oh, riei kempoakepahi kan, sohpeisang dipamwail akan, itikasang selen mete en ohlo me kin pireikumwailede teng; kohdo rehn Koht me iei amwail paip en kamouro.

46 Kumwail kaunopada ngenomwail oh paliwaramwail akan ong ni rahn lingalingo ni ansou me pwung pahrek pahn kohieng irail me pwung kan, iei ni rahn en kadeiko, pwe kumwail en dehr mwaroskihla amwail masepwehk kouwahlapie, pwe kumwail en dehr tamataman duwen amwail dihp suwed koaros, oh en katokehdi amwail en werikihda: Sarawi, sarawi iei sapwellimomwi koasoandihkan. O Kaun Koht Lapalap -- Ahpw I ese dipei: I kauwelahr sapwellimomwi kosonned akan iei ihme dipei, oh tepelo aleiehier, pwe I en lohdi ong nan eh kalokolok suwed.

47 Ahpw kilang, riei kan, dah, e konehng I en kapir kumwailada ong ni mehlel en suwed pwukat? Ia duwe, I pahn kaloke amwail mour ma amwail medemedewe kan kin mwakelekel? Dah, I en kin koasoai inen wei rehmwail nin duwen udahn mehlelo ma iei kumwail saledeksangehr dihpamwail kan?

48 Kilang, ma kumwail me sarawi, I pahn koasoai ong kumwail nin duwen me sarawi; ahpw nin duwen amwail sohte sarawi, oh kin wiahkin ie nin duwen sounpadahk emen, e udahn konehng I en padahkihong kumwail mehkan me kin kahrehda dihp.

49 Kilang, ei mour kin lingeringeriki dihp, oh mohngiongki kin pereniki pwung; oh I pahn kin dangke lengileng sarawi en ei Kohto.

50 Riei kan, kumwail kohdo koaros me men nim pilada, kumwail kodohng ni pihl akan; oh mehmen me sohte nah mwohni, en kohdo ale oh mwenge; ehi, kohdo ale wain oh milik ni sohte mwohni oh ni sohte pweipwei ehu.

51 Eri, dehr netikihla noumwail mwohni ong ni mehkot me sohte katepe, de kihong amwail doadoahk ong ni mehkot me sohte pahn katepe. Nantihong rong ie, oh tamataman mahsen akan me kan me I koasoiahier; oh kodohng Koht Sarawi en Israel, oh kin pereniki mehkot me kin sohte sohrala, de pil mehkot me sohte kin kak ohla, oh mweidohng amwail mour en kin insenamwahu nan amwail direkihla mepwukat.

52 Kilang, riei kempoakepahi kan, tamataman mahsen akan en amwail Kohto; kumwail en kin poaden kapakap ong ih ni rahn, oh kin dangke mware me sarawi ni pwon. Amwail mohngiong kan en kin pereperen.

53 Oh kilang ia uhwen kesempwal en inou en Koht akan oh ia duwen laud en eh ketin duwehla aramas akan; oh pwehki sapwellime lapalap, kalahngan oh mahk, e ketin inoukihong kitailehr me neitail kan sohte pahn sohrala koaros, nin duwen paliwar, ahpw me e pahn ketin kolokol irail; oh irail pahn wiahla rah pwung ehu en mehn Israel akan ni dih en mwuhr kan.

54 Oh met, riei kan, I men padahkihong kumwail ekis laud sang met; lakapw I pahn ahpw kasalehwei rehmwail mahsen akan me I saikinte koasoia. Amen.

IRALAUD 29

Tohto mehn liki pahn soikala Pwuken Mormon -- Irail pahn inda: Se sohte anahne ehu Bible -- Kauno ketin mahsaniong wehi tohto -- E pahn ketin kadeik sampah sang nan pwuhk kan me intingdier.

1 Ahpw kilang, mie me tohto -- ni rahno me I pahn pwurehng wia ei doadoahk kopwuriamei rehn aramas akan, pwe I en kin tamataman inou kan me I wiahiong irailehr, pwe I en pwurehng kihwei pehiet ni keriapak pwe en kapwurehdo nei aramas akan, iei mehn Israel akan.

2 Oh pil, pwe I en kin tamataman inou kan me I wiahiongehr uhk, Nephi, oh pil omw pahpao; me I pahn tamataman kadaudokemw kan; oh me mahsen akan sang kadaudok omw kan en kin kolahng kadaudok omw kan sang nan ewei; oh ei mahsen kan pahn kolahng nan sampah ni ngihl keng, ong ni mehn kasalepen nei aramas akan, me iei irail mehn Israel akan.

3 Oh pwe ei mahsen pahn kohwei ni ngihl keng -- mehn liki tohto pahn inda: Ehu Bible! Ehu Bible! Se nainekier ehu Bible, oh sohte kak pil mie ehu Bible.

4 Ahpw iet me Kaun Koht mahsaniher: O kumwail pweipwei kei, irail pahn naineki ehu Bible; oh e pahn kohsang rehn mehn Jews akan, Oh dahme irail en kalahngan kihong mehn Jews akan ki Bible me irail kihsangehr rehn mehn Jews akan? Ehi, dahme mehn likihkan kin koasoia? Dah, irail kin tamataman lokolok kan, doadoahk kan, oh weirek en mehn Jews akan, oh duwen arail kin pwerisek ong ie, ni wadohng komouro ong mehn likihkan?

5 O kumwail mehn likihkan, dah, kumwail kin tamataman mehn Jews akan, nei aramas en inou akan mahso? Soh, ahpw kumwail kin keria, oh kin kailongkin irail, oh kumwail sohte kin rapahki pwe en komourla irail. Ahpw kilang, I pahn kapwukohkin kumwail mepwukat koaros; pwe ngehi Kauno saikinte manokehla nei aramas akan.

6 Kowe pweipwei men me pahn kin inda: Bible ehu, se nainekiher ehu Bible, oh se solahr anahne ehu Bible. Kumwail alehier ehu Bible ihte sang rehn mehn Jews akan?

7 Pwekida, kumwail sehse me wehi kan me tohto sang ehu? Kumwail sehse me ngehi, Kauno amwail Koht, me wiadahr aramas koaros, oh me I kin tamatam irail akan me mihmi pohn sapwen nan sehd akan oh I kin kakaun nanleng powe oh pahn sampah; oh I wadohng ei mahseno ong aramas akan, ehi, ong wehi kan koaros nan sampah.

8 Eri, dah, kumwail kin lipahned, pwehki amwail en alehdi koaros ei mahsen kan? Kumwail kin sehse me kadehde en wehi riau iei ihme pahn kadehde ong kumwail me ngehi Koht emen, pwe dah, I sohte kin tamataman ehu wehi pil duwehte ehu wehi? Eri, I kin pil kihla ei mahsen akan duwepenehte ong ni wehi riau wet. Ansou me ira pahn patpene, kadehde en wehi riau wet pahn pil wiahla ehu.

9 Oh I wia met pwe I en kak kadehde ong me tohto me ngehi duwehte aio, rahnwet, oh pahn pil kokkohlahte; oh me I kihla ei mahsen akan nin duwen me I kin anahne. Oh pwehki I kasalehda ehu mahsen, kumwail dehr leme me I sohte kak pil kasalehda ehu; pwe ei doadoahk saikinte nekla; de e sohte pahn nekla lao aramas akan pahn sohrala, de pil sohte kak nekla sangete ansou oh pahn pil kokkohlahte.

10 Eri, pwehki kumwail naineki ehu Bible, kumwail en dehr medemedewe me ei mahsen koaros mihmi loale; de kumwail en pil dehr medemedewe me I sohte mweidohng ekei mahsen en kin intingdi.

11 Pwe I kin kaun aramas kan, koaros nan palimese oh palikapi, oh palipowe, oh pali pah, oh nan sahpw akan me mihmi nan sehd, pwe irail en intingihdi ei mahsen akan me I kin kasalehiong irail; pwe sang nan pwuhk kei me pahn intingdi me I pahn kadeingki sampah, nin duwen doadoahk en aramas akan me intingdier.

12 Pwe kilang, I pahn kihla ei mahsen akan ong mehn Jews akan oh irail pahn kin intingihdi; oh I pahn kihla ei mahsen akan ong mehn Nephi akan oh irail pahn kin intingihdi, oh I pahn pil kihla ei mahsen akan ong ekei keinek en Israel, me I kahluwa irailahr, oh irail pahn intingihdi, oh I pahn pil kihla ei mahsen akan ong wehi kan en sampah oh irail pahn intingihdi.

13 Oh nin duwen me pahn pweida, mehn Jews akan pahn alehda mahsen en Koht akan, oh mehn Nephi akan pahn alehda mahsen en Koht akan sang mehn Jews akan; oh mehn Nephi kan oh mehn Jews akan pahn alehda mahsen en Koht akan sang rehn keinek en Israel me salongalahr kan; oh keinek en Israel me salongalahr kan pahn alehda mahsen en Koht akan sang rehn mehn Jews akan oh mehn Nephi akan.

14 Oh e pahn wiawi me nei aramas akan, me iei keinek en Israel kan, pahn pwurepene ni arail wasa nan sapwarail sapwen sohso kan; oh pil ei mahsen akan pahn patpene wiahla ehu. Oh I pahn padahkihong irail me kin pelianda mahsen akan sang ie oh nei aramas akan, me iei mehn Israel akan, me ngehi iei Koht, oh me I inoukihongehr Abraham me I pahn tamataman kadaudokehkan kokkohahte.

IRALAUD 31

Nephi kosoia kahrehpen Jesus Christ eh ketin pepdaisla -- Aramas akan pahn udahn idawehn Christ, en pepdaisla, alehda Ngehn Sarawi, oh dadaurete lel imwi pwe irail en komourla -- Koluhla oh pepdais iei ihme ewen kehlo me kolahng ahl ineno oh ahl tehtiko -- Mour soutuko kodohng irail akan me kin kolokol kosonned akan mwurin arail pepdaisla.

1 Oh Met ngehi, Nephi, kanekelahr ei kokohp ong kumwail, riei kempoak kan. Oh I sohte kak inting, ahpw me malaulau kei, me I ese me udahn pahn wiawi; de I pil sohte kak inting, ahpw me malaulau kei sang rehn riei Jacob me pahn intingdi.

2 Eri, mehkan me I intingihdier e itar oh iehier, ihte me malaulau kei me I pahn kosoia duwen padahk en Christ. Eri, I pahn kin koasoai ni sansal ong kumwail, sang nin duwen sansal en ei wie kokohp.

3 Pwe ngeni kin pereniki mehkot me kin sansal; pwe iei duwen en Koht kin ketin doadoahk rehn aramas akan. Pwe Koht me kin ketin kamaraini irail en wehwehkihla; pwe e kin ketin mahsanihong irail ni arail mahsen, me irail en wehwehki.

4 Eri, I men kumwail en kin tamataman me I padahkihong kumwailehr duwen soukohpo me Kauno ketin kasalehiongiehier, me pahn pepdaisiala Simpwul en Kohto, me pahn ketikihwei sang dipen sampah.

5 Oh met, ma Simpwul en Koht, me kin ketin sarawi, oh kin ketin anahne pwe en pepdais ki pihl pwe en kapwaiahda mehkoaros. O eri ia uwen pahn laud en atail

pahn anahne pepdaiskihla pihl, ni kaidehn kitail aramas sarawihkei!

6 Oh met, I men kalelepek rehmwail, riei kempoakepahi kan, ia mwomwen Simpwl en Koht ketin kapwaiadahr mehkoaros ni e ketin pepdaiskilahr pihlo?

7 Kumwail sohte ese me eme ohlo me ketin sarawi? Ahpw e ketin pwilikihdi sapwellime sarawio, ih eri ketin kasalehiong aramas akan ni e pahn ketin wia aramasla, pwe en ketin karakarahkala mwohn Sahmo, oh ketin kadehdehiong ih ni e pahn ketin kolokol sapwellime kosonned akan.

8 Eri, mwurin e ketin pepdais kihier pihl, Ngehn Sarawio ahpw pahn kitiket kohdi ni mwomwen mwuroi emen.

9 Oh pil, iei me kasalehiongehr aramas akan duwen inen en ahlo oh tehtik en ewen kehlo me irail en pedelong, sang ni e ketin wiadahr mehn kahlmengo mwohrail.

10 Oh e ahpw ketin mahsanihong aramas akan: Kumwail idaweniehdo. Eri, ia duwe, riei kempoakepahi kan, kitail kak idawen Christ ma kitail sohte men kolokol kosonned akan en Sahmo.

11 Oh Sahmo ketin mahsanih: Kumwail koluhla, kumwail koluhla oh pepdaisla ni mwaren nei pwutak kempoakeo.

12 Oh kapitien Ieroso pil peidohng ie me mahsanih: Emen me pepdaisala ni edei, Sahmo pahn ketikihong ih Ngehn Sarawio duwehte ngehi; eri, kumwail idaweniehdo, oh wiahda mehkan me kumwail kilangehr I wia.

13 Eri, riei kempoakepahi kan, I ese me ma kumwail pahn idawehn Ieroso, ki mohngiong unsek, dehr wia duwehte mwalaun akan oh dehr mwomwehda mwohn Koht; ahpw ni udahn ineng, koluhkihla dipamwail akan, kadehde ong Sahmo me kumwail anahne alehda mwaren Christ sang ni pepdaiso -- ehi, sang ni amwail idawehnla Kauno oh amwail Soundoar kohla nan pihlo, nin duwen sapwellime mahsen, kilang, kumwail ahpw pahn alehda Ngehn Sarawio; ehi, eri pepdais en kisiniei oh Ngehn Sarawi pahn wiawi; oh kumwail eri kak koasoai ki mahsen en tounleng kan, oh weriweriki amwail kaping kan ong Koht Sarawi en Israel.

14 Ahpw, kilang, riei kempoakepahi kan, iet duwen kapitien Ieroso ong ie, me mahsanih: Mwurin amwail koluhkilahr dipamwail akan oh kadehde ong Sahmo me

kumwail men kolokol ei kosonned akan, sang ni amwail pepdaislahr nan pihlo, oh aledahr pepdais en kisiniei oh Ngehn Sarawio, oh kak koasoai ki mahsen kapw, ehi, iei mahsen en tounleng kan, oh mwurin met ahpw sohpeisang ie, e pahn mwahu ong kumwail en dehr eseiehla.

15 Oh I rongehr kapitien Sahmo, me mahsanih: Mahsen en nei Kempoake iei ihme mehlel oh loalapwoat, mehmen me dadaurete lel imwio, iei ihte me pahn komourala.

16 Oh met, riei kempoakepahi kan, I ese me sang met sohte emen kak komourla ihte ma e pahn dadaurete lel imwio, ni e kin idawehn kahlmeng en Ieroso en Koht ieiaso.

17 Eri, kumwail en kin wiahda mehkan me I padahkihong kumwailehr me I kilangehr me amwail Kauno oh amwail Sounkomour kin ketin wia; pwe, sang ni kahrehpe wet, e sansalohngiehier, pwe kumwail en kak ese me menia ewen kehl, me kumwail en pedelongala loale. Pwe ewen kehlo me kumwail pahn pedelong iei koluhla oh pepdaiskihla pihl; oh eri lapwapen dipamwail akan pahn wiawi sang ni kisiniei oh sang ni Ngehn Sarawi.

18 Oh eri kumwail milahr nan ahl wet me inen oh tehtik me kolahng mour soutuk; ehi, kumwail pedelongehr loale sang ni ewen kehlo; kumwail wiahier nin duwen kosonned akan en Sahmo oh Naho; oh kumwail aledahr Ngehn Sarawio, me kin ketin kadehde Sahmo oh Naho, pwe en kapwaiada inouo me e ketin wiahiong kumwailehr, me ma kumwail pahn pedelong loale sang nan ahlo kumwail pahn udahn alehda mour soutuk.

19 Oh met, riei, kempoakepahi kan, mwurin amwail kolahr nan ahl inen oh tehtik wet, I pahn idek ma mehkoaros wiawiher? Kilang, I indaiong kumwail, soh; pwe kumwail saikinte leledo wasao, ihte ma pahn sang ni mahsen en Christ ni amwail kin tengdihong pwoson ih, ong ni me mwahu kan koaros en ih me kin ketin roson en komourla aramas akan.

20 Eri, kumwail en nantihla mwowe ni amwail tengdihong rehn Christ, sang ni koapwoaroapwoar unsek, oh poakehng Koht oh aramas koaros. Eri, ma kumwail pahn nantihla mwowe, pereniki mahsen en Christ, oh dadaurete lel imwi, kilang, iet me Sahmo me mahsaniher: Kumwail pahn ahneki mour soutuk.

21 Oh met, kilang, riei kempoake kan, iei ahlo met; oh sohte apwoat ahl tohrohr de mwahr ehu me mihmi pahn

lahng me aramas kak kamourkihla nan wein Koht. Oh met, kilang, iei met duwen padahk en Christ. Oh iei ihte padahk mehlel en Sahmo, oh Naho, oh Ngehn Sarawio, me ketin wia Koht tehmen kokkohahte. Amen.

IRALAUD 32

Tohnleng kan kin koasoai sang ni manaman en Ngehn Sarawio -- Aramas akan pahn udahn kapakap oh alehda maraihn ong peih irail sang Ngehn Sarawi.

1 Oh met, kilang, riei kempoakepahi kan, I kamehlele me kumwail kin ekis medemedewe nan mohngiongimwail duwen dahme kumwail en kin wia mwurin amwail pedolongehr loale sang ni ahlo. Ahpw, kilang, dahme kumwail en kin medemedewehki mepwukat nan amwail mohngiong kan?

2 Kumwail sohte kin tamataman me I indahweiehr me mwurin amwail aledier Ngehn Sarawio, kumwail kakehr lokaiahki mahsen en tounleng kan. Oh met, iaduwen amwail kak lokaiahki mahsen en tounleng kan, kaiden ma pahn kin kohsang Ngehn Sarawio?

3 Tohnleng kan kin lokaia sang ni manaman en Ngehn Sarawi; eri sang ni kahrehpe wet, irail kin lokaiahki sapwellimen Christ mahsen akan. Eri, I indaiong kumwail, kumwail en perenki sapwellimen Christ mahsen akan; pwe kilang, sapwellimen Christ mahsen akan pahn kasalehda mehkoaros me kumwail en kin wia.

4 Eri, met mwurin ei kosoiahier mepwukat, ma kumwail sohte wehwehki, e pahn pwehki sang ni amwail sohte kin peki, de sang ni amwail sohte kin letelet; eri sang ni kahrepe wet, kumwail saikinte marainla, ahpw kumwail pahn udahn salongala nan rotorot.

5 Pwe kilang, I pil indaiong kumwail ma kumwail pahn pedolong loale sang ni ahlo, oh alehda Ngehn Sarawi, e pahn ketin kasalehiong kumwail mehkoaros me kumwail en wia.

6 Kilang, met iei padahk en Christ, oh solahr pahn kohieng kumwail lao e pahn ketin kasalehiong kumwail pein ih ni pali uduk. Oh ni e pahn ketin kasalehiong

kumwail pein ih ni pali uduk, mehkan e pahn ketin padahkihwei kumwail en kin nantiheng wiahda.

7 Oh met ngehi, Nephi, solahr kak usehla ei koasoi; Ngehno ketin kairalahr ei koasoi, oh ngehi eri kelehpwla wie mamauhk pwehki duwen soh pwoson, oh dihp, oh pohn sense, oh keptakai en aramas akan; pwe irail sohte kin rapahki marain, de irail en pil marainkihla laud, ni ansou me padahk en Christ pahn kohieng irail ni sansal, nin duwen sansal me koasoai kak wiahda.

8 Oh met riei kempoakepahi kan, I ese me kumwail kin doandoaropwehte nan amwail mohngiong kan; Oh I pahn kin kosoia me pid duwe met pwe e kapahtouialahr mehlel. Pwe ma kumwail kin karonge Ngehno me kin ketin padahkihong aramas duwen kapakap, kumwail pahn ese me kumwail pahn kin kapakap; pwe ngensauto kin sohte padahkihong aramas en kapakap, ahpw e kin padahkihong aramas en dehr kapakap.

9 Ahpw kilang, I indaiong kumwail me kumwail en kin poaden kapakap, oh dehr luwetala; pwe kumwail en dehr wiahiong Kauno mehkot, ihte me kumwail en keieu wia iei kapakap ong Sahmo, ni mwaren Christ, pwe e pahn ketin kolokol ahmwail wiewia kan, pwe amwail wiewia en wia mehn sawaspen amwail mour.

IRALAUD 33

En Nephi eh mahsen akan mehlel -- Mahsen akan kin kadehde duwen Christ -- Irail akan me kamehlele Christ pahn kamehlele mahsen akan sang Nephi -- Mahsen akan pahn wia ehu kadehde mwohn mwoalen kopwungo.

1 Oh met ngehi, Nephi, sohte kak intingihdi padahk kan koaros me kohkohseli rehn nei aramas akan; I pil sohte kehlail en inting, duwehte ei kin koasokoasoi: Pwe ni ansou me aramas emen kin koasoiki manaman en Ngehn Sarawi, manaman en Ngehn Sarawio me kin ketikihong nan mohngiong en aramas akan.

2 Ahpw kilang, pwe me tohto keptakailahr nan arail mohngiong kan ong Ngehn Sarawio, eri, e solahr ketiket rehrrail; ihme kahrehda, irail kin keshla me tohto kan me

intingdier oh re kin lemekiong me mehkan me re keselahr kin sohte katepe.

3 Ahpw ngehi, Nephi, intingihdier oh lemehiong me pahn katapan laud, oh ni mehlel ong nei aramas akan. Pwe I kin poaden kapakap kin irail ni rahn, oh pilen meseikat kin kausekesekehla ei uluhlo nihpwong, pwehki irail; oh I kin likweriong ei Koht ni pwoson, oh I ese me e pahn ketin karonge ei likiwer.

4 Oh I ese me Kauno Koht pahn ketin wiahiong ei kapakap akan pwehn wia mehn kamwahupen nei aramas akan. Oh mahsen akan me I intingihdi me luwet ahpw pahn kin kehlail ong irail; pwe en kin wekid iraila ong ni wiewia mwahu; en kasalehiong irail duwen samarail akan; oh e kasalehda duwen Jesus, oh en kin wekid iraila pweren kamehlele ih, oh en kin dadaurete lel imwi, me iei mour soutuko.

5 Oh me kasaledahr duwen e uwongada dih p kouwahlahpie me sang ni duwen udahn mehlelo; eri, sohte aramas emen pahn lingerengerki mahsen akan me I intingihdier, ihte ma pahn kin kohsang rehn ngenen tepelo.

6 Oh I kin klohri ni sansal; I kin klohri ki mehlelo; I kin klohri ki ei Jesus, pwe ih me ketin doarehla mouri sang ehl.

7 I ahneki limpoak mehlel ong nei aramas akan, oh pwoson laud Jesus Christ me I pahn en tuhwong me mwakelekel tohto ni sapwellimen Christ mwoalen kapwungo.

8 I ahneki limpoak unsek ong mehn Jews akan -- I inda mehn Jews akan, pwe en wehwehki me I kohsang arail wasao.

9 I pil ahneki limpoak unsek ong mehn likihkan. Ahpw kilang, pwe sohte nan pwungen mepwukat me I kak koapwoaroapwoariki, pwe ihte irail akan me pahn loal amwahu ong Christ, oh pedelong nan ewen kehl tehtiko, oh alu nan ahl apwal me kolahng mour, oh kekeidte nan ahlo lao lel imwin rahno me songisong pahn nekla.

10 Oh met, riei kempoakepahi kan, oh mehn Jews, oh kumwail koaros me mihmi nan sampah, rong mahsen pwukat oh kamehlele Christ; oh ma kumwail sohte kamehlele mahsen pwukat, kamehlele Christ. Oh ma kumwail pahn kamehlele Christ, kumwail pahn kamehlele mahsen pwukat, pwe iei irail me mahsen en Christ, oh e

ketikihongehr ie; oh mahsen pwukat padahkihong aramas koaros en kin wiewia mwahu.

11 Oh ma irail kaidehn mahsen en Christ, kumwail en teneki -- pwe Christ pahn ketin kasalehwei rehmwail ni rahn neko, sang ni manaman oh lingan laud, me irail iei sapwellime mahsen akan; oh kumwail oh ngehi pahn kilang emenemen mwohn sapwellime mwoalen kapwungo; oh kumwail pahn ese me e ketin poahngokihongiehier me ih en intingihdi mepwukat, mendahte mie ei luwet.

12 Oh I kapakap ong Sahmo ni mwaren Christ pwe me tohto kitail, ma kaidehn koaros, en kak komourla nan sapwellime wehi ni rahn lapalap oh imwilahn rahno.

13 Oh met, riei kempoakepahi kan, koaros mehn Israel akan oh tohn sampah koaros, I koasoai wei rehmwail nin duwen ngilen mehn me kin wie liklikiwer sang nan pwehlo: Kaselel lao rahn lapalapo pahn kohdo.

14 Oh kumwail me sohte pahn iang alehda duwen kamwahu en Koht, oh wauneki mahsen akan sang rehn mehn Jews akan, oh pil mahsen kan sang ie, oh mahsen akan me pahn pwildohsang ni dawas en Simpwul en Koht, kilang, I pahn kamwurala kumwail kohkohlahte, pwe mahsen pwukat pahn kesehdi kumwail ni rahn neko.

15 Pwe dahme I katengehdi pohn sampah, pahn uhwong kumwail ni mwoalen kapwung; pwe ihme Kauno ketin mahsaniongiehier, oh I pahn udahn peikihong. Amen.

PWUKEN ENOS

*Enos kapakak ni ngoang oh aledahr mahkepen dipehkan --
Kapitien Kauno peidohng nan moange inoukihong ih duwen
komour pen mehn Laman akan ni ehu rahn kohkohdo --
Mehn Nephi kan rapahki pwe irail en kamwahuila mehn
Laman akan ni arail rahn akan -- Enos perenkihda eh
Soundoro.*

1 Kilang, e wiawiher me ngehi, Enos, esehier me ei pahpahu iei aramas pwung men -- pwe e kin padahk kiongie eh mahsen oh sang ni epwele oh kaweid en Kauno -- oh mehd paih ni mwaren Kauno pwehki met --

2 Oh I pahn indaiong kumwail duwen ei nannanti me I wiahier mwohn sihlengin Koht, mwohn ei aledier lapwapen dipei kan.

3 Kilang, I kolahr pwe ien pwek mahn nan welo; oh eri padahk kan me I kin kalap rongasang ei pahpahu me e kin kosoia duwen mour en Koht, oh duwen popohl en souleng kan, ahpw lelehr wasa loal en nan ei mohngiong.

4 Oh ei mour ahniki madamadau lauhd; oh I kelepwukidier mwohn me ketin kapikiedahro oh I ahpw likiweriong ih ni ngoang sang ni ei kapakap oh pekipek ong ni mouri; oh erein rahno pwon me I wie likilikwer ong Kauno; ehi, ni eh wasa pwohngier, I pil kalaudehla ngilei pwe en kak lelledahla nanleng.

5 Oh kapitieo ahpw peidohng ie, me mahsani: Enos, dipomw akan pahn lapwadahr, oh ke pahn kapaida.

6 Oh ngehi, Enos, eseier me Koht sohte kak ketin likam; ihme kahrehda, dipei akan mwakelekel dahr.

7 Oh ngehi eri inda: Kaun, ia mwomwen met e wiawiher?

8 Oh e ahpw ketin mahsani ongie: Pwehki ahmw pwoson Christ me kowe sohte kin kilang oh rong. Oh pahr tohto me pahn kohdo me e pahn ketin kasalehda ih ni pali uduk; eri, kohla pwe ahmw pwoson me wiahiong uhk en unsekala.

9 Met, e wiawiher me ni ansou me I rongehr mahsen pwukat, I tapidahr pehm duwen ei kin inengieng en sewese riei mehn Nephi; ngehi eri kihong ei mohngiong unsek rehn Kauno pwehki irail.

10 Oh ni ansou me I wie nannanti ni pali ngehn, kilang, kepitien Kauno pil pwurehng peidohngie, mahsanih: I pahn kin pwarohng riomw kan sang nin duwen arail kin nantihong dadauhr ei kosonned akan. I kiong iraillehr sahpwet, oh iei sahpw sarawi ehu; oh I sohte pahn kariaala, ihte ma dihþ me pahn karehda. Eri, I pahn pwarohng riomw akan nin duwen me I indahier; oh sang ni diparail akan me I pahn kahrekiomg pahten pahrail.

11 Oh mwurin ngehi, Enos, rongehr mahsen pwukat, ei pwoson Kauno tepier kehlailahr; oh I kin wie nannanti kapakapki ansou werei riei kan, mehn Laman akan.

12 Oh mwurin ei kapakapehr oh ngoangkilahr ei doahk laud, Kauno ahpw ketin mahsani ongie: I pahn kihwei nin duwen ahmw anahn akan, pwehki ahmw pwoson.

13 Oh met kilang, met iei anahno me I anahne sang ih -- pwe ma e pahn mehlel, me nei aramas akan, mehn Nephi akan, pahn pwupwidiong nan dihþ, oh pahn sohrala, oh mehn Laman akan sohte pahn sohrala, pwe Koht en kak ketin wie nekinekid poadoapoad en nei aramas en Nephi kan; iei ma e pahn mehlel e pahn wiawi sang ni manaman en limeo me sarawi, pwe en wadohng mehn Laman akan ni ansou kohkohdo, pwe irail en kak kodohng komouro --

14 Pwe ni ansou wet aht wie nannanti en kapwurehdo irail ong ni pwoson mehlelo kin sohte katepe. Oh irail kaukilahr nin duwen arail mwakar, me ma e pahn kak wiawi, irail pahn kauwehla mehkan me se intingihdier, oh pil kasohrehla tiahk koaros en aht pahpa kan.

15 Ihme kahrehda, ngehi eseier me Kauno kak ketin nekinekid aht poadoapoad akan, I ahpw kin poaden likweriong ih ni ansou kan, pwe e ketin mahsani ongiehier: Mehkot me ke kin peki rehi ni pwoson, kamehlele me ke pahn alehda ni mwaren Jesus Christ, e pahn kin pweing uhk.

16 Oh I ahnekier pwoson, oh I ahpw likiweriong Koht en ketin nekinekid aht poadoapoad akan; oh e ketin inoukihongieher me e pahn ketin kapwarahieng mehn Laman akan ni ansou me konehng.

17 Oh ngehi, Enos, eseier me e pahn wiawi nin duwen inou me e ketin wiadahr; eri ei mohngiong ahpw meleileilahr.

18 Oh Kauno ketin mahsanihong ie: Sememw akan kin pil inengieng me I en kihong irail mehwet; oh e pahn wiawi

nin duwen arail pwoson; pwe arail pwoson akan kin rasehng ahmw pwoson.

19 Oh met ngehi, Enos, kolahr rehn mehn Nephi akan, wiahier kokohp akan nin duwen mehkan me pahn kohdo, oh kin wia kadehde mehkan me I rongehr oh kilangehr.

20 Oh I kadehde me mehn Nephi kan kin rapahki ni ngoang pwe en kapwurehdo mehn Laman akan ong ni pwoson mehlel en Koht. Ahpw aht doadoahk kin sohte katepe; irail tengidier nan arail kin kailongkin kit, oh arail kin kahluwakin irail duwen arail suwed me kahrehiong irail lawalohkilahr, oh men pei, oh men kam aramas, direkilahr eni mwahl akan oh me samin; kin wie kangkang mahn akan me irail kin koledi; kin wia mihmi nan impwal akan, oh kin kohkohseli nan sahpwtehno ki arail likou kilin mahn mwotomwot ehu me kin mihmi ni lukeperail akan oh irail kin sihpiala piten moangerail akan; oh irail kin samani doadoahngki neirail mehn kesik kan, oh neirail naip akan, oh neirail sile kan. Oh irail me tohto me kin kangete uduk amas; oh irail kin poaden rapahki pwe ren kin kemeikitala.

21 Oh e wiawihher me mehn Nephi akan koadoahkedahr pwelin sahpwo, oh kin kaikaraida soangen tuhke koaros en wiahda pilawa kan, oh soangen tuhke koaros me kin kihla wahrail akan, oh pelin mahn akan, oh pelin kou kan koaros, oh kout akan, oh kout lawalo kan, oh pil tohto oahs akan.

22 Oh soukohp tohtohie me mihmi reht. Oh aramas akan kin kepitakai, oh me kin apwal sen wehwehkila irail.

23 Oh sohte mehkot mie, ihte suwedlahr kouwahlapie, irail ahpw wie padapadahk, wie kokohp ong nin duwen mahwen akan, oh pingiping kan, oh ohla kan, oh kin poaden kataman ong irail duwen mehla oh duwen mour kohkohlahte, oh kalokolok kan oh manaman en Koht, oh mepwukat koaros -- re ahpw kin poaden kamwakidadahr irail pwe en kahrehiong irail en kin masak Kauno. I indahier koaros mepwukat, oh me inenen sansal kouwahlapie, pwe en kin kolokol irail en dehr mwiadang en sohrala. Oh mwurin met I ahpw intingihdi irail.

24 Oh I kilangehr mahwen kan nan pwungen mehn Nephi akan oh mehn Laman akan ni ei ansou kan.

25 Oh kedekedeo I ahpw ohl laudlahr, oh sounpar epwiki isihsek-duwau daulier ni ansou me aht pahpa Lehi mwesel sang nan Jerusalem.

26 Oh I kilangehr me ansou mwadang I pahn kolahr nan ei sousouo, nin duwen manaman en Koht me Ien kin padahk oh kokohp ong aramas pwukat, oh kasalehda mahseno nin duwen mehlelo me mihmi rehn Christ. Oh I ahpw kin kihla mahseno ni ansou koaros, oh I ahpw kin perenki laudsang mehkoaros nan sampah.

27 Oh ni ansou keren I pahn kolahng wasa I pahn komoaldie, iei wasa me I pahn iangala ei Soundoro; pwe I kin ese me sang reh me I pahn komoalie. Oh I kin popohliki ni rahno me paliwereiet pahn alehda mour kohkohlahte, oh I pahn kesihnenda mwowe; eri, I pahn kilang sihlangi ni peren, oh e pahn mahsani ongie: Kohdo rei, mehd pah kowe, mie ehu dehumw me kaunopadahr nan tehnpas en Semei. Amen.

PWUKEN MOSIAH

IRALAUD 2

Nahnmariki Benjamin ketin wiadahr dauwer ehu me e ketin padahk ong sapwellime aramas akan -- E ketin kasalehda duwen pwung, mwahu, oh mwekimwekid en pali ngehno ni sapwellime mweio -- E ketin kaweidki irail en papah aril namwariki en nanleng -- Irail akan me pelianda Koht pahn ale weirek duwehte kisiniei sohtuk.

1 Oh e wiawiher me mwurin en Mosiah wiahier nin duwen mahseno sang rehn eh pahpao, oh ih eri wiadahr ehu pakair nan sahppo pwon, pwe aramas koaros en kohpene sang nan sahppo unsek, pwe irail en kohdahla ni tahnpas sarawio pwe en karonge mahsen akan me nahnmariki Benjamin pahn ketikihong irail.

2 Oh me ngeder, me inenen tohto mehlel me re sohte kak wadekada irail; pwe irail kaparaparalahr mehlel or kekeiradahr nan sahppo.

3 Oh irail pil aledahr neirail meseni en neirail mahn akan, pwe irail en wiahda meirong oh meirong isihns akan nin duwen kosonned en Moses.

4 Oh pwe irail en pil danke rehn Kauno arail Koht, me ketikido irailehr sang nan Jerusalem, oh ketiki sang irailehr nan pehn arail imwintihti kan, oh ketin piladah ohl pwung kan en kin wia arail sounpadahk kan, oh pil ketin piladahr emen ohl pwung en wiahla arail nahnwariki me ketin kameleileidier nan Zarahemla, oh me ketin padahkihong irailehr en kolokol kosonned en Koht akan, pwe irail en popohl oh direkihla limpoak ong Koht oh limpoak ong aramas akan.

5 Oh e wiawiher me ni ahnsou me irail kodohr ni tehnpaso, irail kauwadahr imwarail impwal akan limwahn wasao, nin duwen en emenemen ohl eh peneinei kan, me iangahk; eh pwoud, nah pwutak kan, oh nah serepein kan, oh nein neirail pwutak kan oh serepein kan, ehu ehu peneinei kin wie totohrohr.

6 Oh irail kauwadahr imwarail impwal akan me kapil penehier tehnpas sarawio, koaros ohl akan kin wiahiong wenihmw en imwarail impwal akan en kin salehng tehnpas

sarawio, pwe irail en mihmi nan imwarail kan oh rong mahsen me nahnwariki Benjamin pahn kin ketin padahkihong irail;

7 Pwehki sang ni duwen pokon lauhdo me kahrehiongehr nahnwariki Benjamin en sohte kak ketin padahki irail koaros me mihmi limwahn kehlo, eri, e ahpw ketin mahsani me eh dauwer en kokouda, pwe sapwellime aramas akan en kak rong mahsen akan me e pohn ketin padahkihong irail.

8 Oh ih eri ketin tapihadahr padahk ong sapwellime aramas akan sang ni dauwero; oh irail koaros sohte kak rong sapwellime mahsen akan pwehki sang ni duwen laud en pokono. Eri, e ketin kupwurehda me sapwellime mahsen akan en kin intingdi oh pekederlahng irail akan me sohte kak rong eh padahko, pwe irail en pil iang alehda sapwellime mahsen akan.

9 Oh iet mahsen akan me e ketin kasaledahr oh kupwuredahr pwe en intingdi, me ketihtihki: Riei kan kumwail koaros me pokon penehr pwe en rong ei padahk me I pahn kasalehiong kumwail rahnwet; pwe I sohte padahkihong kumwail en kohdahdo oh kasohwe mahsen akan me I pahn koasoia, ahpw kumwail en kin rong ie, oh kin kihpeseng salengemwail akan pwe kumwail en kak rong, oh ritingda amwail mohngiong kan pwe kumwail en kak wehwehkihla, oh me rir en Koht akan en kak sansal ong kumwail.

10 I sohte padahkihong kumwail en kohdahdo met pwe kumwail en kin masakie, de kumwail en lemehiong me ngehi kesempwal sang ekei aramas.

11 Ahpw I kin duwehte kumwail, me kin lelohng dih koaros me paliwar oh lamalam kin wiahda; ahpw I ale kasarawi sang ei pahpao, oh mweimwei sangehr ni limen Kauno me I pahn wiahla kaun emen oh wiahla nahnwariki en aramas pwukat, oh sapwellime manamano me sohte mehkot rasehng me kin wie kolokol or nekinekidie, pwe Ien pahkihong kumwail ei kak unsek, ei lamalam unsek, oh ei kehl unsek me kauno ketikidohngiehier.

12 I indaiong kumwail nin duwen ei mweimweiongehr en doadoahk kihla ei ansou kan ni ei pahn papah kumwail, me rasehng ahnsou wet, oh I sohte kin rapahki kohl de silper de soangen dipwisou kesempwal sang rehmwail.

13 De I sohte pil kin mweidohng kumwail en selidihong nan kalapwuhns kan, de emenemen kumwail en kaliduhla, de kumwail en kin mwersuwed, de kuli, de pirap, de kamwahl, de I pil mweidohng kumwail en wiahda ehu soangen dihp akan, oh I ahpw padahkihong kumwailehr me kumwail en kin dadauhr kosonned akan en Kauno, ni mehkoaros me e kin ketin mahsani ong kumwail en kin wia.

14 Oh mehlel ngehi, pein ngehi, me doadoahk kier pein pehikat pwe Ien kak papah kumwail, oh me kumwail en dehr toutoukihla taksis, oh me sohte mehkot me kapahtou me kumwail en weuwa -- oh duwen mepwukat koaros me I kasaledahr, pein kumwail me wiahier sounkadehde rahnwet.

15 Ahpw, riei kan, I sohte wiahki mepwukat pwe Ien kin suwei, de indahki mepwukat pwe Ien kin karauni kumwail; ahpw I indaiong kumwail mepwukat pwe kumwail en ese me I kak kadehde sang ni mehn kataman mwahu mwohn Koht rahnwet.

16 Kilang, I indahiong kumwail me pwehki ei indaiong kumwailehr me I doadoahngkilahr ei ansou kan sang ni ei kin wie papah kumwail, I sohte anahne pwe I en kin suwei, pwe I kin mihte nan ei wie pahpa Koht.

17 Oh kilang, I indaiong kumwail pwe kumwail en kak marainkihla; pwe kumwail en kak esehla me ni ahnsou me kumwail kin mihla nan amwail papah kempoakpamwail akan, kumwail kin mihte nan amwail kin pahpa Koht.

18 Kilang, kumwail kin eker kin ie amwail nahnmwariki; oh ma ngehi, me kumwail kin eker amwail nahnmwariki, kin wia doadoahk pwe en papah kumwail, eri dah, kumwail, kumwail sohte pahn doadoahk pwe kumwail en kin papah emenemen kumwail?

19 Oh pil kilang, ma ngehi me kumwail kin ekerki amwail nahnmwariki, me doadoahngkilahr eh ansou ong ni papah kumwail, oh ahpw me I kin wiewia ni ei kin papah Koht, eri I ahpw kin kesempwaliki soangen kalahngan koaros sang rehmwail, O ia pahn duwen ma kumwail kihong kalahngan rehn amwail Nahnmwariki en nanlengo!

20 I indaiong kumwail riei kan, me ma kumwail pahn kihong kalahngan oh kaping koaros me paliwar unsek kin kak kolokol ong Kohto me ketin kapik kumwaildahr, oh ketin wie kolokol oh nekinekid kumwailehr, oh me

ketikihong kumwailehr en kin popohl, oh ketin mweidohng kumwailehr en kin momour pene ni meleilei.

21 I indahiong kumwail ma kumwail pahn papah ih me ketin kapik kumwail dahr sang ni tapio, oh papah ih me ketin wie nekinekid kumwail ni ehu ehu rahn akan, sang ni e ketikihong kumwailehr esingek pwe kumwail en kak momour oh mwekid oh wia nin duwen insenamwail akan, de pil ketin sewese kumwail ni ehu ehu ahnsou kan -- I inda, ma kumwail pahn papah ih ni amwail mohngiong unsek ahpw kumwail pahn wie papah ni amwail sohte sohte kak pwainla.

22 Oh kilang, ihte me e ketin kupwuriki sang rehmwail iei me kumwail en kolokol sapwellime kosonned akan, oh e ketin inoukidahr me ma kumwail pahn kin kolokol sapwellime kosonned akan kumwail pahn kin pweida nan sahpwet; oh e sohte kin ketin wekilahsang dahme e ketin mahsaniher, eri ma kumwail pahn kin kolokol sapwellime kosonned akan e pahn ketin kapaiahda oh ketitikihong kumwail en kin pweida.

23 Oh met, ni tepio e ketin kapik kumwaildahr, oh ketikihweiehr amwail mour, pwe iei ihme kumwail kin pweipwand ong ih.

24 Oh keriau, e ketin kupwuriki kumwail en kin wia dahme me e ketin mahsanihong kumwailehr; pwe ma kumwail pahn kapwaiada, e pahn ketin mwadangete kapaida kumwail; oh eri e ketin pwain kumwailehr. Oh kumwail pil pweipwand ohngete ih, oh kin pweipwand, oh pahn kin pweipwand kokkohlahte soutuk; eri, dahme kumwail pahn kin suweiki?

25 Oh met I kalelapak, dah, kumwail kak inda mehkot ong pein kumwail? I sapeng, Soh. Kumwail sohte kak kosoia me kumwail pahrekiong pwelen sampah; ahpw kumwail wiawihkihda pwelen sampah; ahpw kilang, pwehlo iei sapwellimen ih me ketin kapik kumwaildahr.

26 Oh ngehi, iei ih, me kumwail kin kahdaneki amwail nahmwariki, I sohte mwahu sang kumwail; pwe ngehi pil kohsang nan pwehlo. Oh kumwail eseier me I mahlahr, oh I kereniong pwilikihdi paliwar wet ong nan pwelen sampah.

27 Ihme kahrehda, me nin duwen ei indahiong kumwailehr me I kin papah kumwail sang ni ei kin alialuhki lamalam mwakelekel mwohn Koht, me mehleh rasehng ansou wet me I kahrehiong kumwailehr en pokon

pene, pwe I en dehr pwukoahki, oh me amwail inta en dehr mihmi pahi, ni ahsou me I pahn kesihnenda pwe I en kadeik rehn Koht ong ni mehkan me e ketin poahngokehkiniehier duwen kumwail.

28 I indahiong kumwail me I kahrehiong kumwailehr en pokon pene pwe I en kihsang ei likou kan me amwail inta mihie, ni ansou wet me I kereniongehr kohdihla nan ei sousou, pwe I en kohdihla ni meleilei, oh ngeni me pahn kin mour kohkohlahte en kak iangala pwihn en koul en powe ong ni kokoulki kaping kan ong Koht me pwungo.

29 Oh pil ehu, I indahiong kumwail me I kahrehiong kumwailehr en pokon pene, pwe I en kak kasalehiong kumwail me I solahr wia amwail sounpadahk, de pil amwail nahnmwariki.

30 Pwe ahsou wet, paliwereiet unsek kin rerrer kouwahlahpie ni ei kin song en koasoai ong kumwail; ahpw Koht me ketin seuwese ie, oh ketin mweidohngiehier pwe I en koasoieng kumwail, oh e ketin poahngokehkiniehier me I en kasalehwei rehmwail rahnwet, me nei pwutak Mosiah iei me pahn wiahla nahnmwariki emen oh amwail kaun.

31 Oh met, riei kan, I men kumwail en wia nin duwen dahme kumwail kin wiahier mahso. Nin duwen amwail kin kolokol ei kosonned akan, oh pil kosonned akan en ei pahpao, kumwail kin pweidahr, oh kin sohte lohdieng nan pehn amwail imwintihti kan, mehlel e rasehng ma kumwail pahn kolokol kosonned en nei pwutako, de kosonned en Koht akan me e pahn kihwei rehmwail sang rehn Koht, oh amwail imwintihti kan pahn sohte kin kaunda kumwail.

32 Ahpw, O nei aramas akan, mwasahn pwe mie uhpene kei pahn pwarada nan pwungamwail, oh kumwail eri pahn pilada me kumwail en pekihong ngehn sauto, me ei pahpa Mosiah ketin kasaledahr.

33 Pwe kilang, mie suwed ehu kin kohieng pohn mehmen me pilada pwe en pekihong ngehno; pwe mehmen me kin pilada pwe en kin pekieng ih, oh kin mihmi oh mehla nan eh dihp akan, ihete me pahn kihong dihp nan paliwere unsek, pwe en ale pweine lokolok kohkohlahte, sang ni e kauwelahr kosonned en Kohto me kin uhwongada dahme e kin ese.

34 I indahiong kumwail me sohte emen rehmwail, ihte noumwail kisin serihkan me saikinte esehla duwen mepwukat, ahpw dahme kumwail kin ese iei ihme kumwail

kin pweipwand ong Sememwail Nanleng kohkohahte, en kihong ih mehkoaros me kumwail ahniki oh kihla pein kumwail; oh kumwail pil eselahr duwen inting kan me kolokol kokohp akan me soukohp sarawihkan kohpadahr lelledohngehr ni ansou me atail pahpa, Lehi, mweselahsangehr Jerusalem;

35 Oh pil, mehkoaros me samatail akan kasaledahr sang mahs lelehr ahnsou wet. Oh kilang, irail pil kin kosoia me Kauno ketin poangokihong irailehr; ihme kahrehda, irail kin mehleh oh pwung.

36 Oh met, I indaiong kumwail, riei kan, mwurin amwail diaradahr oh eselahr mepwukat koaros, ma kumwail pahn kauwehla oh uhwongada dahme sansalehro, pein kumwail kin kihsang kumwail Ngenen Kauno, pwe Ngehno solahr pahn kak ket loalemwail pwe en ketin kaweid kin kumwail alen marain akan pwe kumwail en kak kapaida, kekeirada, oh dehr mehla.

37 I indaiong kumwail, me mehmen me kin wia met, ihete me kin sansal mwahu ni e kin uhwongada Koht; ihme kahrehda, e kin pilada pwe en kin peikihong ngehn sauto, oh kin wiahla imwintihti en pwuhngo. Ihme kahrehda, sohte tehnpas en Kauno reh, pwe e sohte kin ket nan tehnpas akan me sohte sarawi.

38 Eri ma mehmeno sohte koluhla, oh kin mihmi oh mehla nin duwen e wia imwintihti en Koht emen, anahn akan duwen kosonned en Koht kin kaiasada mehmeno en kin momour kohkohahte pwe en kin pehmada pein dipe, me kin kahrehiong ih en kin nuridi mwarosola mwohn Kauno, oh nan mwaremware kin direkihla dihp, medek, oh weirek, me kin duwehte kisiniei sohtuk ehu, me kin lullul kohkohdahla powe kohkohahte sohtuk.

39 Oh met I indaiong kumwail me aramas menet sohte pwung en alehda kalahngan; eri imwin eh mour iei e pahn mihmihte nan lokolok soutuk.

40 O, koaros kumwail ohl likeilapalahr akan, oh pil me ohl pwulopwul akan, oh seri kan me kak wehwehki mahsen akan sang ie, pwe I kasaledahr ni sansal pwe kumwail en kak wehwehki, I peki kumwail en pirida pwe kumwail en tamataman duwen irair suwed akan me irail pwupwidiongehr loale.

41 Oh pil ehu, I men kumwail en kin teneki irair en kapai de popohl en irail akan me kin dadauhr kosonned en

Koht akan. Pwe kilang, irail kapaidahr ni mehkoaros, ong ni paliwar oh pali ngehn; oh ma irail kin kolokolete arail loaloapwoat lao lel ni imwio, irail pahn kohla nanleng, pwe irail en mihla rehn Koht nan irair en popohl soutuk. O tamataman, tamataman me mepwukat koaros me mehleh; pwe Kauno me ketin mahsanier.

IRALAUD 3

Sapwellimen nahmwariki Benjamin poahngoko wenlahte -- Kaun roson kouwahlapie pahn ketin padahk ong aramas nin duwen kahlap en pwehl -- Inta pahn kohsang ni pwoar akan koaros ni ahnsou me e pahn ketin tomwiki dipen sampah -- Sapwellime lengilengo iei ihte lengilengo me komouro pahn kohsangie -- Aramas akan kak pwilikihdi duwen ahnepen aramas oh wiahla souleng sang ni tomwo -- Lokolok en me suwed akan pahn duwehte lehn kisiniei ehu oh takai mwehl ehu.

1 Oh pil ehu riei kan, I men kumwail en rong, pwe mihete me I pahn padahkihong kumwail, pwe kilang, me mie mehkan me I pahn padahkihong kumwail me pid duwen mehkan me pahn kohdo.

2 Oh mehkan me I pahn padahkihong kumwail iei tounleng emen me kasalehiongehr ie: Oh e ahpw indahiong ie: Pirida; oh I ahpw piridahr, oh kilang e kesihnendahr mwohi.

3 Oh ih eri indahiong ie: Pirida, oh rong mahsen akan me I pahn padahkihong uhk; pwe kilang, I wadohng uhk rohng kaperen kouwahlapie.

4 Pwe Kauno ketin karongehier ahmw kapakap akan, oh ketin tenekier duwen ahmw kin pwung, oh ketin poaroneiehdo pwe I en padahkihong uhk me kowe en popohl, oh me kowe en kak padahkihong noumw aramas akan, pwe irail en pil kak direkihla popohl.

5 Pwe kilang, ahnsouo pahn kohdo, oh me keren, me sang ni manaman, Kaun roson kouwahlapie, me ketier ni tapio oh pahn pil kohkohlahte soutuk, pahn ketido rehn aramas akan sang nanleng, oh pahn ketiket nan erikso ieu me wiawihkihda pwehl, oh pahn ketila rehn aramas akan, ketin wiahda manaman laud akan, me rasehng

kamwahuiala me soumwahu akan, kapwourada me melahr akan, kahluhda me neh mwator akan, me masukun kan pahn kin kilangada wasa, oh me salengepon kan pahn kin rongada wasa, oh e pahn ketin kamwahuiala soangen soumwahu koaros.

6 Oh pahn ketin kausala tepel akan, de pil ngehn saut akan me kin mihmi nan mohngiong en aramas akan.

7 Oh kilang e pahn ketin lokolok ki songisong akan, medek en paliwar, men konot, men konot pihl, oh ketin pwangada me laud sang aramas emen kak lokolongki, ihte lokolok wet me aramas sohte kak ong mehla wet, pwe kilang, inta pahn kohsang ni pwoahr koaros, me iei duwen laud en sapwellime lokolongki me suwed akan oh tiahk kelingeringer en sapwellime aramas akan.

8 Oh e pahn mwareniki Jesus Christ, Ieros en Koht, papahn nanleng oh sampah, ih me ketin kapikadahr mehkoaros sang ni tapio; oh sapwellime nohno pahn adaniki Mary.

9 Oh kilang, e pahn e ketidohng sapwellime kan, pwe komouro en kak kohdo rehn aramas akan sang ni arail pahn pwoson mwareo; oh mwurin met irail pahn lemehkihong me ih aramas emen, oh pahn kosoia me tepelo kin mihmi reh, oh pahn poaki ih, oh pahn kalohpwuala ih.

10 Oh e pahn ketin iasada sang me melahr akan ni rahn kesiluh, e pahn ketin kadeikada sampah; oh kilang, mepwukat koaros wiawiher pwe kadeik mehlelo en kak kodohng rehn aramas akan.

11 Pwe kilang, oh sapwellime intao me tomwikier irail me pwupwikilahr dipen Adam, pwe irail melahr sohte ese kupwuren Koht me pidada duwen irail, de irail akan me kin wiahda dihp akan ni arail kin sehse.

12 Ahpw mehd suwediong, ih me kin ese me e kin uhwongada Koht! Pwe komouro sohte kin kohieng soangen aramaso, ihte en kin sang ni koluhla oh pwosonla Jesus Christ.

13 Oh Kaun Koht ketin poaronedohr sapwellime soukohp akan rehn aramas akan, pwe irail en kasalehda mepwukat ong keinek koaros, wehi koaros, oh lokaia koaros, pwe mehmen me pahn kamehlele me Christ pahn ketido, ihete me kak alehda lapwapen dipehkan, oh pahn kin perenda kouwahlapie, me kin rasehng me e ketidohr rehrail.

14 Ahpw Kauno Koht ketin mwahngier me sapwellime aramas akan me iei aramas keptakai kan, oh e ahpw ketikihong irail ehu kosonned, iei kosonned en Moses.

15 Oh kilel, kopwuriamei, oh manaman, oh sansal akan e pahn ketin kasalehiong irail, duwen e pahn ketido; oh sapwellime soukohp sarawi kan padahkihong iraillehr duwen e pahn ketido; oh ahpw irail kin kakeluwakiala arail mohngiong kan, oh sohte kin wehwehkihla me kosonned en Moses pahn kin sohte katepe, ihte ma e pahn sang ni tompen sapwellime intaho.

16 Oh ma iei kisin seri kan en kak wiahda dihp, irail sohte pahn kak komourala; ahpw I indaiong kumwail me irail kapaidahr; pwe kilang, sang ni Adam, de sang ni duweo, irail pwupwidier, eri iei intahn Jesus Christ me pwaindahr diparail akan.

17 Oh, pil ehu, I indahiong kumwail, me sohte ehu mwahr me pahn kohdo de ehu ahl de mehкот me pahn kahrehiong komouro en leledohng aramas akan, ihte ma pahn oh sang ni mwaren Christ, iei Kauno me ketin roson kouwahlapie.

18 Pwe kilang e pahn ketin kadeik, oh sapwellime kadeiko me pwung; oh seri emen sohte kin mehla ni pali ngehn ma e mehla ni eh pwelel; ahpw aramas akan pahn pein kihong kalokepen arail mour, ihte ma irail pahn karakarahkla oh rasohngala kisin seri kan, oh kamehlele me komour miehler, oh kin mihmi, oh pahn kohdo ni oh sang ni tompen intahn Christ, Kauno me ketin roson kouwahlapie.

19 Pwe duwen udahn aramas emen iei me kin wia imwintihti en Koht, oh iei me kin sangete ni pwupwilahn Adamo, oh e pahn kin kokkohlahte, ihte ma e pahn lohdi ong pahn songisong en Ngehn Sarawio, oh pwilikihdi nin duwen aramas emen oh wiahla souleng emen sang ni tompen Christ, oh wiahla nin duwen serihmen, me peik, ohpampap, karakarahk, kanangamah direkihla limpoak, kin men dukila pahn mehkoaros me Kauno ketin mwahngi me konehng en kohieng ih, nin duwen seri emen me kin dukila rehn eh pahpao.

20 Oh pil ehu, I indaiong kumwail, me ahnsouo pahn kohdo me rong en Sounkamouro pahn lolohk seli nan wehi koaros, keinek koaros, loh koaros, oh aramas koaros.

21 Oh kilang, ni ahnsou pahn kohdo, sohte emen pahn dierek mwakelekel mwohn Koht; ahpw kisin seri kante, ihte ma pahn sang ni arail koluhla oh pwoson mwaren Kaun Koht me ketin roson kouwahlapie.

22 Oh ni ahnsou wet, ni ahnsou me kumwail padahkihongehr noumw aramas akan duwen mehkan me Kauno amwail Koht ketin poahngokihong kumwailehr, ansouohte irail solahr pahn mwakelekel mwohn sihlangin Koht, ihte ma irail pahn keid nin duwen mahsen akan me I kasalehiong kumwailehr.

23 Oh met I kasaledahr mahsen akan me Kauno ketin mahsani ongiehier.

24 Oh iet me Kauno ketin mahsanih: Mahsen akan pahn wia nin duwen ehu kadehde sansal me pahn uhwongada aramas pwukat nin rahn en kadeiko; eri, irail pahn kin pakadeikada, nin duwen en emenemen eh doadoahngkan, ma irail pahn mwahu, de ma irail pahn kin suwed.

25 Oh ma irail pahn kin suwed, e pahn kohieng irail duwen suwed en kilang pein arail dipaniki oh tiahk kelingeringer kan, me kin kahrehiong irail en mwarosala sang mwohn sihlangin Kauno, ong ni irair en pahtou oh lokolok soutuk, wasa me irail sohte kak pwuresangie; ihme kahrehda, irail pein alehiong irail lokolok soutuk.

26 Ihme kahrehda, irail kin alehda engieng en Koht, eri kosonnedo solahr kak kapwurehdo irail me rasohng pwupwilahn Adamo pwe e aledahr wahntuhke me irairdio; kahrehda, solahr pwung en kalahngan en kak komour iraila kohkohlahte.

27 Oh arail kalokolok pahn rasehng lehn kisiniei ehu oh takai mwehl ehu, me kin lullul sohte kak tukedi, me edinieio kin kohkohda kohkohlahte soutuk. Met iei me Kauno ketin poahngokehkiniehier me I wia.

IRALAUD 4

Nahnwariki Benjamin ketin koadoakoadoke lahte sapwellime padahk -- Komour kohdo pwehki tomwo -- Kemehlel Koht pwehn komourla -- Kolokol mahkepen dipanwail akan sang ni pwoson -- Kihla amwail dipwisou kan ong me semwehmwe kan -- Wia mehkoaros ni marain oh pwung pahrek.

1 Oh met me ni ahsou me nahnmwariki Benjamin ketin kanekelahr sapwellime mahsen akan me tounleng en Kauno padahkihongehr ih, e ahpw ketin mahsanlahng pohn pokono, oh kilang irail pwupwidihongeher pohn pwehlo, pwehki lomw en Kauno miher rehrrail.

2 Oh irail kilangehr duwen irair en pein paliwar arail, iei me tikitik sang pwelen sampah. Oh irail koaros wiahki ehuh ngihlaudada, indahda: Maing, kupwurehla, oh ketin doadoahngki tomwpen intahn Jesus Christ pwe sen kak alehda mahkepen dipat akan, oh aht mohngiong kan en kak mwakelekelada; pwe se kamehlele Jesus Christ, Ieros en Koht, me ketin kapikadahr lahng oh sampah, oh mehkoaros, me e pahn ketidiho rehn aramas akan.

3 Oh e wiawihher me mwurin arail kosoiahier mepwukat, Ngehn en Kauno ahpw ketier pohrrail; oh irail ahpw direkilahr popohl, sang ni arail alehda lapwapan diparail akan, sang ni meleilei en arail pepehm akan, pwehki sang ni arail ahneki pwoson laud me Jesus pahn ketido, nin duwen mahsen akan me nahnmwariki Benjamin padahk kiong iraillehr.

4 Oh nahnmwariki Benjamin ketikihpeseng dawase oh mahsanihong irail, mahsani: Kempoakepahi kan oh riei ohl akan, kisehi kan oh nei aramas akan, I pil men kumwail en sohpeido, pwe kumwail en kak rong oh wehwehkihla keimwseken mahsen akan sang ie me I pahn kasalehwei rehmrail.

5 Pwe kilang, ma amwail esehla duwen kamwahupen Koht ansou wet me kapir kumwaildahngehr pwehn pehmada duwen amwail sohte mehkot, oh duwen sohte katepemwail oh duwen irair en amwail pwupwilahro.

6 I indaiong kumwail, ma kumwail esehla duwen kamwahupen Koht, oh sapwellime manaman kowahlapie, oh sapwellime erepit, oh sapwellime kanangamah, oh sapwellime nanti ong aramas en sampah; oh pil tomwo me kaunopadahr sangete ni poasonepen sampah, pwe sangete mwo komouro en kak kodohng mehmen me pahn kin kihong eh likilik rehn Kauno, oh pahn kin nantiong kolokol sapwellime kosonned akan, oh dadaurete ni pwoson lao lel imwin eh mour, me wehwehki mour en sampah wet --

7 I koasoia, me iei aramas menet me pahn ale mour soutuk, sang ni tomwo me kaunopadahr sang ni poahsonepen sampah ong aramas koaros, me sangete ni

pwupwilahn Adam, de irail akan me momour, de irail akan me pahn momour lao sampah pahn imwisekala.

8 Oh met iei mehkan me kahrehiong komouro en kohdo. Oh sohte ehu komour ihte met me sansal ehr; de pil sohte irair ekei mie me pahn kahrehiong aramas akan en kak komourla ihte sang ni irair akan me I kasalehiong kumwailehr.

9 Kamehlele Koht; kamehlele me iei ih, oh me e ketin kapikadahr mehkoaros nan sampah oh nanleng; kamehlele me e sapwellimaniki erepit koaros, oh manaman koaros nan sampah oh nanleng; kamehlele me aramas sohte kin kak wehwehkihla mehkan koaros me Kauno kin kak ketin mwahngi.

10 Oh pil ehu, kamehlele me kumwail pahn udahn koluhkihla dipamwail akan oh kesehla irail, oh kumwail en karakarahkala mwohn Koht; oh kin peki ih ni mohngiong mehlel pwe en ketin mahkehng kumwail; oh met, ma kumwail kin kamehlele mepwukat koaros, kilang pwe kumwail en wiahda irail koaros.

11 Oh I pil pwurehng indaiong kumwail me nin duwen ei kasaledahr mahso, me nin duwen amwail esehla duwen klohri en Koht, de ma kumwail diaradahr sapwellime kamwahu kan oh songehr sapwellime limpoak, oh alehier lapwapen dipemwail akan, me kin kahrehda popohl nan ngenimwail akan, me mehlel I men kumwail en kin tamataman, oh kin poaden tamataman duwen lapalap en Koht, oh pein kumwail sohte mehkot, oh sapwellime kamwahu kan oh kanangamah ong kumwail; me sohte kin warohng kan, oh kumwail en pein kin karakarahkala ni duwen karakarahk me loal, wie likilikiweri mwaren Kauno rahn koaros, oh kehlail pwosonte mehkan me pahn kohdo, me tounlengo kasaledahr sang ni eweo.

12 Oh kilang, I indaiong kumwail ma kumwail pahn wia nin duwe met, kumwail pahn kin poaden popohl, oh direkihla limpoak en Koht, oh kin poaden kolokol lapwapen dipemwail akan; oh kumwail pahn kekeirada ni amwail esehla duwen klohri en ih me ketin kapik kumwaildahr, de ni mehkan me pwung oh mehlel.

13 Oh kumwail pahn sohte kin medewehda me kumwail en kin kamedekehla emenemen kumwail, ahpw kin momour ni meleilei, oh pahn kapwurehiong aramas koaros nin duwen dahme irail ahniki.

14 Oh kumwail sohte pahn kin mweidohng noumwail serihkan en men mwengehda, de kilisouda, de pil mweidohng irail en kauwehla kosonned en Koht akan, oh dehr mweidohng irail en kin pei oh akamai ong emenemen, oh papah tepelo, iei ihme kaun en dihp, de iei ihme ngehn sauto, me kin wia imwintihiti en pwuhng koaros.

15 Ahpw kumwail pahn padahkihong irail en kin weid nan ahl akan me pwung oh mehlel; kumwail en kin padahkihong irail en poakehng emenemen, oh en kin papah emenemen irail.

16 Oh pil ehu, pein kumwail pahn sewese irail akan me anahne amwail sawas; kumwail pahn katohrehpeseng amwail dipwisou kan ong mehmen kin anahne; oh kumwail sohte pahn mweidohng pekipek en me semwehmweo en wia mwahl ieu oh kapwurehla ih pwe en mehla.

17 Ele kumwail pahn koasoia: Mehmeno pein kihong ih eh apwal laud; eri, I pahn kihsang ih ei kepwehkan, oh sohte kihong ih kenei kisin mwengehkan, de I en pil dehr kihong ih ei dipwisou pwe e de sohla lokolok, pwe eh kalokolok me pwung.

18 Ahpw I indaiong kumwail, O aramas akan, mehmen me kin wia met, ihete me kin ahneki kahrepe laud en koluhla; oh ma e sohte koluhkihla mehkan me e wiadahr e pahn salongala kohkohlahte, oh sohte pweise nan wehin Koht.

19 Pwe kilang, kaidehn kitail koaros kin wie aramas en pekipek kei? Kaidehn kitail koaros kin ale sawas sang aramas emente, iei Koht, ong ni likou oh mwenge, oh ong ni kohl, oh ong ni silper, oh ong ni ehu ehu kepwe kesempwal kan koaros me kitail kin ahneki?

20 Oh kilang, e rasehng ahsou wet, kumwail kin wie likilikweriong mware, oh pekipeki lapwapen dipamwail akan. Oh dah, e kin ketin mweidohng amwail pekipek en kin wia mehkot mwahl? Soh; e ketin kapwilewei sapwellime Ngehno rehmwail, oh ketin kahrehiongehr amwail mohngiong kan en direkihla peren, oh ketin karehiongehr ewemwail akan en kundi pwe kumwail en sohte kak diar lokaia, pwehki amwail peren me laud kouwahlapie.

21 Oh met, ma Koht, me ketin kapik kumwaidahr, me iei ih me amwail mour akan kin kohsang ie oh mehkoaros me kumwail ahneki oh pein kumwail, e kin ketikihwei

mehkan me kumwail kin peki ni pwung, ni pwoson, kamehlele me kumwail pahn ale, O eri, ia duwe kumwail en udahn kihpeseng dipwisou kan me kumwail ahneki ong emenemen.

22 Oh ma kumwail kin teneki mahmen me pahn peki amwail dipwisou kan me e sohte pahn mehla, oh kin kipwoari, ia uhwen amwail pwung en ale lipwoar sang kolokol amwail dipwisou kan, me kaidehn amwail ahpw sapwellimen Koht, me pil ketin kolokol amwail mour; ahpw eri kumwail sohte kin kapwaiahda pekipek ehute, de pil koluhkihla me kumwail me kumwail wiadahr.

23 I indaiong kumwail, mehd suwediong mehmeno, pwe eh dipwisou kan pahn iang ih sohrala; oh met I kosoia mepwukat ong irail akan me kepwehpwe nin duwen me pid dipwisou en sampah wet.

24 Oh pil ehu, I indaiong kumwail me semwehmwe kan, me sohte amwail mehkot oh eri kin itar, pwe kumwail kin momour ni ehu ehu rahn akan; I kosoia kumwail koaros me kin sohte mwahuki kihla rehn me semwehmweo, pwehki sohte amwail dipwisou; I men kumwail en kin inda nan amwail mohngiong kan me: I sohte kin kihla pwehki sohte ei, ahpw ma mie ei, I pahn kihla.

25 Oh met, ma kumwail kin inda met nan amwail mohngiong kan me kumwail kin mwakelekel, pwe kumwail de pahn dipaniki; oh amwail kalokolok me pwung pwe kumwail kin noaroahke mehkot me kumwail saikinte alehda.

26 Oh met, pwehki sang mepwukat me I padahkihong kumwailehr -- me pwehki sang kolokol pen lapwapen dipamwail akan ni ehu ehu rahn akan, pwe kumwail en kin kak kekeid ni amwail mwakelekel mwohn Koht -- I men kumwail en kin kihla amwail dipwisou kan ong me semwehmwe kan, aramas koaros nin duwen me irail anahne, me rasehng kamwenge me semwehmwe kan, kalikouiada me kilisou kan, pwaralang me soumwahu akan oh kihla sawas en pali ngehn oh paliwar, nin duwen arail anahn akan.

27 Oh kumwail en kin kilang pwe mepwukat koaros en kin wiawi ni marain oh en kin koasoandi pwung; pwe sohte anahnepen aramas emen en tang marahra sang eh kehl. Oh pil pwurehng, e konehng me e pahn nantihong, pwe

sang ni irair wet, ih en kak ale kisakiso; ihme kahrehda, me koaros pahn kin wiawi ni pwung en koasoandio.

28 Oh I men kumwail en kin tamataman, me mehmen me kin pekihda mehkot sang mehn impeo pwe en doahdoahngki oh kapwurehla, a en kin kapwurehla nin duwen e pwungkidahr, de ma so kumwail pahn wiahda dihp; oh ele kumwail pahn kahrehiong mehn impamwail akan en pil wiahda dihp.

29 Oh eri, I sohte kak indaiong kumwail koaros mehkan me kin kahrehiong kumwail en kak wiahda dihp; pwe mie ahl tohto kei oh soahng tohto kei, me inenen tohto ie me I sohte kin kak wadekada irail.

30 Ahpw met iei uhwen ei kak indaiong kumwail, pwe ma kumwail sohte kin kaleke pein kumwail, oh amwail madamadau kan, oh amwail lokaia kan, oh amwail tiahngkan, oh amwail kin kolokol kosonned en Koht akan, oh amwail kin nantihlahte pwoson dahme kumwail rongehr duwen ketidohn atail Kauno, lao lel imwin amwail mour, kumwail eri pahn udahn lekdekla. Oh met, O aramas koaros, tamataman, oh kumwail en dehr lekdekla.

IRALAUD 5

Souleng kan wialahr sapwellimen Christ pwutak kan oh serepein akan sang ni pwoson -- Ederail pahn kin kohsang ni mwaren Christ -- Nahmwariki Benjamin ketin kaweid kin irail en kin kehlail oh sohte kin kak mwekid nan doadoahk mwahu kan.

1 Oh met, e wiawiher me ni ahnsou me nahnmwariki Benjamin ketin mahsanihier met ong sapwellime aramas akan, e ahpw ketin poaroanehla ekei rehrrail, kupwuriki en mwahngiala ma irail pahn kamehlele mahsen akan me e ketin kasalehiong irailehr.

2 Oh irail koaros ahpw werikihda ni ngihl ehute, indahda: Ehi, se patohan kamehlele mahsen akan koaros me komw mahsanihongkihtehr; oh pil, se patohan ese arail mehlel oh mehlelo, pwehki Ngenen en Kaun roson kouwahlapie, me ketin wiadahr ehu wekila laud loalet, de nan aht mohngiong kan, pwe sen dehr anahne wiahda suwed, ahpw en kin poaden wiahda mwahu.

3 Oh kiht, pil pein kiht, sang ni kamwahu en Koht lapalahpie oh duwen me sapwellime Ngehno ketin kasaledahr, se patohanehr mehkan me pahn kohdo, oh ma e konehng, se pahn patohan kohpada mehkoaros.

4 Oh iei pwosono me se kolokol sang ni mehkan me aht tungoal nahnmwariki ketin kasaledahr me kahrehiong aht en patohanla laud mehlel, kahrehda sen pil patohan perenda laud mehlel.

5 Oh se men patohan wiahda ehu inou ong aht Koht me se pahn patohan wiahda nin duwen kupwure, oh me se pahn kin patohan peki reh sapwellime kosonned akan ong ni mehkoaros me e pahn ketikihong kit, ni aht ansou kan koaros me luwehdi pwe kiht en dehr patohan ong pein kiht lokolok soutuk, me nin duwen me sansalsangehr tounlengo, me sen dehr patohan ohng kiht engieng en Koht.

6 Oh met, mepwukat iei mahsen akan me nahnmwariki Benjamin ketin kupwuriki irail en wia; oh ih eri mahsanih ong irail: Kumwail kosoiahier me I anahneo; oh me inou me kumwail wiadahro iei inou mehlel ehu.

7 Oh met, pwehki inouo me kumwail wiadahro, kumwail pahn kin adaniki serien Christ, iei ihme sapwellime pwutangkan oh serepein akan; pwe kilang, rahnwet kumwail ipwisangehr ih ni pali ngehni; pwe kumwail kosoiahier me kumwail wekilahr sang ni amwail pwoson mware; eri, kumwail ipwisangehr ih oh wialahr sapwellime pwutangkan oh serepein akan.

8 Oh pahn tahpw wet me kumwail saledek kilahr, oh sohte ehu tahpw me pahn kahrehiong kumwail en kak saledekala. Sohte ehu mwahr mie me pahn kahrehiong komouro en kohdo; eri, I men kumwail en alehiong kumwail mwaren Christ, kumwail koaros wiadahro inouo ong Koht me kumwail pahn peikihong lao amwail mour imwisekala.

9 Oh e pahn wiawi me mehmen me kin wia met pahn kin dierek ni pali maun en Koht, pwe e pahn kin ese ahd me pahn kin kohieng ih; pwe e pahn kohsang ni mwaren Christ.

10 Oh met e pahn wiawi, me mehmen me sohte pahn alehiong ih mwaren Kauno, pahn udahn kin adaneki ehu ahd tohrohr; eri, e pahn kin dierek ni pali meing en Koht.

11 Oh, I men kumwail en pil tamataman, pwe met iei mwahro me I kasaledahr me I pahn kihwei rehmwail pwe en dehr sohrala, ihte ma pahn kin sang ni dihp; eri, rong

pwe kumwail dehr wiahda dihp, pwe mwahro en dehr sohrala sang nan amwail mohngiong kan.

12 I indaiong kumwail, I men kumwail en kin tamataman pwe kumwail en kin kolokol mwahro pwe en kin wie intinting ahnsou koaros nan amwail mohngiong kan, pwe kumwail en dehr dierek ni pali meing en Koht, ahpw kumwail en kin rong oh ese kapitieo pahn eker kumwail, oh pil ahdo me e pahn ketin malipehkin kumwail.

13 Pwe ia duwen en aramas emen en ese soumas emen me e sohte kin papah, oh me e kin wia aramas kapw men ong ih, oh me e kin dohsang ih ni madamadau oh ineng en nan eh mohngiong kan?

14 Oh pil ehu, mie emen aramas kak ale nein mehn impeo doangki, oh kin nekid? I indahiong kumwail, soh; e sohte pil pahn mweidohng en mwenge rehn nah pelin mahn akan, ahpw e pahn pwakisang ih wasao, oh I indaiong kumwail, me e pahn kin mie nan pwungamwail me kumwail sehse ahdo me kumwail pahn kohieng kumwail.

15 Eri, I men kumwail en kin kehlail oh dehr mwekid, en kin poaden audaudkihda doahk mwahu kan, pwe Christ, me Kaun Koht me roson kouwahlapie, en ketin katengehdi me e pahn ketin sapwellimenikihla kumwail, pwe kumwail en kak kolahng nanleng, pwe kumwail en kak ahneki komour kohkohlahte oh mour soutuk, sang ni erepit, oh manaman, oh pwung, oh kalahngan en ih me ketin kapikadahr mehkoaros nanleng oh sampah iei Koht me ketin lapalapasang koaros. Amen.

IRALAUD 17

Alma kamehlele oh intingihdi mahsen akan sang Abinadi -- Abinadi mehkihla lokolok sang ni kisinie -- E kohpadahr duwen soumwahu oh mekilahr kisinie sang irail akan me kemelahr.

1 Oh met e wiawiher me ni ahnsou me Abinadi kanekelahr koasoai pwukat, nahnmwarikio eri ketin padahkihong samworo kan en ale ih oh kemehla.

2 Ahpw mie emen nan pwungarail me adaniki Alma, me pil emen kadaudek en Nephi. Oh ih mwahnakapw pwulopwul men, oh e kin kamehlele mahsen akan me Alma

kasansaledahr, pwe e ese duwen dihpo me Abinadi kadehdehiong irail ehr; ih eri tepiada peki rehn nahnmwarikio en dehr engieng pahn Abinadi, ahpw me en ketin mweidala me en patohla sang wasao ni meleilei.

3 Nahnmwarikio ahpw ketin mwekidkidahr laud, oh ahpw ketin mahsani me e pahn lekdeksang nanpwungarail, oh poaroanehla sapwellime papah kan pwe irail en kemehla ih.

4 E ahpw tangasang mworail oh rukilahr wasahkis me irail sohte kak diar. Oh ni e wie rukuruk rahn tohto, e ahpw intingihdi mehkoaros me Abinadi kaledahr.

5 Oh e wiawiher me ni en nahnmwarikio ketin mahsani sapwellime sounpei kan en kapel pene Abinadi oh koledi ih; oh irail eri pirehdi ih oh kesehiong ih nan imweteng.

6 Oh mwurin rahn siluh ahpw ketin mahsanih me Abinadi pahn pil wisidohng mwowe sang ni kaweid en sapwellime samworo kan.

7 Oh e ahpw ketin mahsanihiong ih: Abinadi, se diaradahr dahme ke dipikidahr oh ke konehng mehla.

8 Pwe kowe kosoiahier me pein Koht pahn ketidihdo rehn aramas akan; oh met, sang ni kahrepe wet ke pahn kamala ihte ma ke pahn kihsang mahsen suwed koaros me kowe wiahiongehr ngehi oh nei aramas akan.

9 Met Abinadi eri patohan ong ih: I patohan ong komwi, I sohte pahn patohan kauwehla mahsen akan me I wiahiongehr komwi duwen aramas pwukat, pwe irail me mehleh; oh pwe komwi en kak mwahngih duwen mehleh en mepwukat, I patohan mweidadahr pein ngehi en lohdi ong nan limomwi kan.

10 Ehi, oh I pahn patohan lokolok lao I mehla, oh I sohte pahn patohan kauwehla mahsen akan, oh irail pahn pweida nin duwen kadehde ehu me pahn uhwong komwi. Oh ma komwi pahn ketikihsang ei mour, komwi pahn ketin kakerehdi inta mwakelekel, oh met pahn pil wia nin duwen kadehde ehu me pahn uhwongada komwi ni keimwsek lahn rahno.

11 Oh ni ansou wet kereniong nahnmwariki Noah en ketin lapwahda ih, pwe e ketin masakadahr duwen mahsen akan me patohanehr; pwe e ketin masak kadeik en Koht akan me pahn kodohng ih.

12 Ahpw samworo kan ahpw ngihlaudida pwe irail en pelian ih, oh tepier karauni ih, indahda: E patohan

MOSIAH 18

lipwoarehier nahnmmwarikio. Eri nahnmmwarikio ahpw engieng pah, oh ketin mweidala pwe ih en kamakamala.

13 Oh e wiawiher me irail eri koledi ih oh pirehdi ih, oh woakihki ih kepekep en tuhke kan kilio, ehi, pwe irail en mehla.

14 Oh met ni en kisinieio tepier isik ih, e ahpw werikihong irail, inda:

15 Kilang, me nin duwen amwail wiahiongiehier, iei e pahn pil wiawi me noumwail akan pahn kahrehiong me tohto me pahn lokolongki medek pwukat me I lokolongkier, me rasehng medek en mehla kan sang ni kisiniei; oh met pwehki irail kamehlele komour en Kauno arail Koht.

16 Oh e pahn wiawi me kumwail pahn lokolongki soangen soumwahu koaros pwehki dipamwail akan.

17 Ehi, oh kumwail pahn kin kamakan wasa koaros, oh re pahn pwakih kumwail oh kumwail pahn kin katohrohrala oh katohrohrpeseng rasehng pelin mahn lawalo me mahn lawalo oh komwad akan kin pwakihseli.

18 Oh ni rahno amwail imwintihti kan pahn kaus kumwail, oh irail pahn parok kumwailedi, oh kumwail eri ahpw pahn ale lokolok duwe ie me mehkihla medek kan en kisiniei.

19 Iet duwen kalokolok me Koht ketikihong irail akan me kin kemehla sapwellime aramas akan. O Koht, komw ketiki mouri.

20 Oh met, ni en Abinadi kosoiahier mahsen pwukat, ih eri pwupwidi sang ni eh mehkilahr lokolok en kisinieio; ehi, e melahr pwehki sang ni eh men kapwaiada kosonned en Koht akan, sang ni eh katengehdier mehlel en mahsen akan sang reh ni eh melahro.

IRALAUD 18

Alma kin padahk ni rir -- E wiahda inou en pepdaiso oh kin pepdais ni pihl kan en Mormon -- E kauwada Mwomwohdiso en Christ oh kasarawiala samworo kan -- Pein irail me kin apwali irail oh kin padahki aramas akan -- Alma oh nah aramas akan tangalang nan sahpwtehno sang nahnmmwariki Noah.

1 Oh met, e wiawihher me nin duwen Alma, me sopohsanger papahn nahnmwariki Noah kan, kolukilahr dipehkan oh eh wiewia suwed akan, oh kolahr ni rir rehn aramas akan, oh tepier padahngki mahsen akan sang Abinadi --

2 Ehi, me pid duwen me pahn kohdo, oh pil duwen iasadahr en me melahr akan, oh duwen komourla en aramas akan, me pahn wiawi pwehki manaman, oh lokolongkan, oh matalahn Christ, oh sapwellime iasadao oh ketidahla nanleng.

3 Oh e kin padahkihla mahseno ong irail me tohto me kin men rong. Oh e kin padahki irail ni rir, pwe nahnmwarikio en en dehr mwahngiada. Oh tohto irail me kamehlelahr duwen mahsen kan sang reh.

4 Oh e wiawihher me tohto irail akan me kin kamehlele ih, kin kolahng ehu wasa me adaniki Mormon, me nahnmwarikio me ketikihongehr, me mihmi ni irepen sahpw, me pahn pak tohto de pil ni ahsou kan me mahn lawalo kan kin kadirehla.

5 Met mie utuhn pihl mwakelekel ehu nan Mormon, oh Alma kin rukila wasao, wasao me mihmi limwahn welin tuhke tikitik ehu, wasa me e kin rukila nin rahn sang ni roporop akan me nahnmwarikio ketin wiahier.

6 Oh e wiawihher me tohto irail akan me kin kamehlele ih kin kohla wasao pwe irail en rong duwen mahsen akan sang reh.

7 Oh eri mwurin rahn tohto kei wasao, mie aramas tohto me mihmi ni uhwe mwahu ieu me pokon penehier wasahn Mormon, pwe irail en rong mahsen akan sang Alma. Ehi, irail koaros me pokon penehier pwe irail en rong mahseno sang reh. Oh e padahkohng irailehr, oh padahkihong irailehr duwen koluhla, oh komourala, oh pwoson Kauno.

8 Oh ih eri indahiong irail: Kilang, iet en Mormon pihlo (pwe iet duwen eden pihlo) oh met, nin duwen amwail kin anahne kodohng nan kehl en Koht, oh pahn kin adanikihla sapwellime aramas akan, oh kin men wahda en emen katoutou kan pwe irail en kak marahrahda;

9 Ehi, oh me kumwail kin men mauk iang irail akan me kin mauk; ehi, oh kin kamwaiti irail akan me anahne en kin kamwaitala, oh en wia nin duwen sounkadehde kan en Koht ni ahsou koaros oh ni mehkoaros, oh ni wasa koaros,

me kumwail pahn mie lao kumwail mehla, pwe kumwail en kak komourla rehn Koht, oh en iang towe irail akan me pahn iasada mahs, pwe kumwail en kak ahneki mour soutuk--

10 Met I indahiong kumwail, ma met iei duwen anahnepen amwail mohngiong kan, dahme kumwail kin uhwong ki amwail en pepdaiskihla mwaren Kauno, nin duwen mehn kadehde ehu mwowe me kumwail wiahiongehr ih inou ehu, me kumwail pahn pahpa ih oh kolokol sapwellime kosonned akan, pwe en ketin kapwiliwei rehmwail sapwellime Ngehno ni mwuledek?

11 Oh met ni en aramas akan rongadahr mahsen pwukat, irail eri lopwolopwadahr ki arail perendahr, oh werikihda: Met iei anahnepen aht mohngiong kan.

12 Oh met Alma eri koledi Helam, ih iei emen irail akan me tepiadahro, oh kolahr oh kesihnendahr nan pihlo, oh werida, indahda: O Kaun, komwi ketin kapwiledo Ngenomwi pohn sapwellimomwi papah menet, pwe en kak wia doahk wet ni mohngiong sarawi.

13 Oh ni e kasaledahr mahsen pwukat, Ngehn en Kauno eri ketier reh, oh e inda: Helam, I pepdaisiukala, sang ni manaman en Koht lapalahpie, nin duwen kadehde ehu me kowe wiadahro inou ieu me kowe pahn papah ih lao kowe mehla nin duwen paliwar wet; oh Ngehn en Kauno en ketiket rehmw; oh me en ketikihwei mour soutuk, sang ni tompen Christ, me e ketin kaunopadahro sang ni poahsondahn sampah.

14 Oh mwurin Alma kasaledahr mahsen pwukat, Alma oh Helam koaros eri duhdier nan pihlo oh ira ahpw eri kesinenda oh kohsang nan pihlo wie popohl, sang ni ara direkilahr Ngehno.

15 Oh Alma pil ale emen, oh kohdilahr nan pihlo keriapak, oh pepdaisialahr ih duwehte ni tepio, ihte Alma sohte pwurehng duhla nan pihlo.

16 Oh mwurin soangen mwohmw wet e wiawiher, ih eri pepdaisialahr koaros irail akan me kolahr wasao nan Mormon; oh irail ele mihmi ni tohtohn aramas riepwiki pahmen; ehi, oh irail eri pepdaisialahr ni en Mormon pihl, oh irail ahpw direkilahr kalahngan en Koht.

17 Oh iei irail me re kin kahdeneki Mwomwohdiso en Koht, de Mwomwohdiso en Christ sangete ni ahnsouo kohla. Oh e wiawiher me mehmen me pepdaisialahr sang ni

manaman oh mweimwei en Koht, e kin towehla sapwellime mwomwohdiso.

18 Oh e wiawiher me, sang ni mweimweio me sang rehn Koht, Alma eri kasarawialahr samworo kan; emen samworo me kasarawialahr en kin padahk ong irail akan me mihmi ni tohtohn me limehk, oh e pahn kin padahkihong irail duwen mehkan me pid wein Koht.

19 Oh e indaiong irail me irail en padahk kihte mehkan me e padahk kiong iraillehr, oh me sansaldahsangehr ni ewen soukohp sarawihkan.

20 Ehi, e pil padahkihong irail me re pahn padahngkihte koluhla oh pwoson Kauno, me pahn ketin pwainda sapwellime aramas akan.

21 Oh ih eri padahkihong irail me sohte akamai pene pahn wiawi rehrrail, ahpw irail en sohpeila mwowe ong ni wasahtehki, kolokol pwoson tehieu oh pepdais tehieu, arail mohngiong kan en kin patkihpene ki minimin oh limpoak ong emenemen.

22 Oh iet me e padahkihong iraillehr en padahk ki. Oh sang met irail wialahr serien Koht.

23 Oh e padahkihong irail en kin wauneki rahn en sapwado, oh irail en kin kasarawiala rahno, oh pil rahno irail koaros en danke Kauno arail Koht.

24 Oh e pil padahkihong irail me samworo kan me e kasarawialahr pahn pein doadoahngki pein pehrail ong ni epwelparail.

25 Oh mie rahn ehu nan wihk ehu me koasoandi me irail en pokon pene pwe irail kin padahki aramas akan, oh en kin pwongi Kauno arail Koht, oh irail en pil kin pokon pene nin duwen ahnsou kan me irail kak.

26 Oh samworo kan en dehr kin sohpeilahng aramas akan ong ni epwelparail; ahpw sang ni arail doadoahk me irail en kin ale kalahngan en Koht, pwe irail en kehlail ni arail kekeirada ni Ngehno, esehla duwen Koht, pwe irail en kak padahngki manaman oh mweimwei sang Koht.

27 Oh Alma pil pwurehng padahkihong irail me aramas akan me towelahr mwomwohdiso wet en kin kihla arail dipwisou kan, emenemen irail koaros en kihla nin duwen me emen kin ahneki; ma mehmen me kin ahneki me tohto, e pahn kin kihla me tohto; oh duwen mehmen kin ahneki me malaulau, e pahn kin anahne kihla me malaulau, oh pahn kin kohieng mehmen me sohte mehkot me ahniki.

28 Oh iet duwen irail en kin kihla arail dipwisou kan sang ni pein insenarail oh arail ahnahn mwahu kan ong Koht, oh ong samworo kan me kin mie arail anahn akan, ehi, oh ong koaros me kin mie arail anahn akan oh me sohte arail likou kan.

29 Oh e ahpw indahiong irailehr duwen met, sang ni en Koht ketin poahngokihong ih en kin wia, oh irail eri aluhier inen mwohn Koht, oh kin kihla rehn emenemen, nin duwen arail anahne akan oh nin duwen me irail kin anahne kan ong ni palingehn oh paliwar.

30 Oh eri mepwukat koaros wiawiher nan Mormon, ehi, limwahn en Mormon pihlo, nan welin Mormon me mih limwahn en Mormon pihlo; ehi, wasao en mormon, en Mormon pihlo, nan welin Mormon, ia uhwen arail kaselel ong nan mesen irail akan me eselahr duwen arail Sounkomouro; mei paih irail, pwe re pahn kokoul kapikapinga ih kokkohlahte.

31 Oh mepwukat wiawiher ni irepen sahpwo, pwe nahnmwarikio en dehr mwahngiada mepwukat.

32 Ahpw kilang, e wiawiher me nahnmwarikio mwahngiadahr mwekid ehu rehn aramas akan, ahpw poaroanehla sapwellime ladu kan pwe ren mwasahn irail. Eri rahno me irail pokon pene pwe irail en rong mahsen en Kauno, irail ahpw kasalehiong nahnmwarikio.

33 Oh ni ansou wet ahpw ketin mahsanih me Alma kapingadahr aramas akan pwe irail en uhwongada ih; ih eri ketikihla sapwellime karis en sounpeio en kemehla irail.

34 Oh e wiawiher me nin duwen Alma oh sapwellimen Kauno aramas akan diaradahr duwen kokkohdohn karis en nahnmwarikio; eri irail ahpw alehda imwarail impwal oh arail peneinei kan oh mweselahnng nan sapwtehno.

35 Oh irail tohtohki ele aramas epwiki-limehk.

PWUKEN ALMA

NEIN ALMA PWUTAK

Mahsen akan me Alma me Samworo Lapalap nin duwen koasoandi sarawi en Koht, me e padahk ihongehr aramas akan nan kahnimw akan oh kousapw akan lelohngehr nan wasahkan koaros nan sahpraw. Iei me wiadahr iralaud 5.

IRALAUD 5

Duwen aramas en ale komouro, irail en kin koluhla oh dadauhr kosonned akan, ipwidi sapahl, arail likou kan en mwakelekel kihda intahn Christ, en karakarahkala oh en kihsang irail akalapalap oh peirin, oh en wia doahk pwung kan -- Silepen sihpw mwahuo pahn ketin malipe sapwellime aramas akan -- Irail akan me kin wia doahk suwed akaniei irail me serien tepelo -- Alma kadehde duwen mehlel en sapwellime padahk kan oh indaiong aramas akan en koluhla -- Eden irail me pwung kan pahn intingdihong nan pwuken komouro.

1 Met e wiawiher me Alma tepier padahkngi mahsen en Koht ong aramas akan, keieu nan sapwen Zarahemla, oh sang wasao lellahng wasa koaros nan sahpraw.

2 Oh metiei mahsen akan me e kasalehiongehr tohn mwomwohdiso me wiawihdahr nan kahnimw en Zarahemla, me sang nin duwen me e intinghdier, me mahsani:

3 Ngehi, Alma, sang ni en ei pahpa, Alma, kasarawiehlahr pwe ien wiahla samworo lapalap en mwomwohdiso en Koht, ni manaman oh mweimwei sang rehn Koht pwehn en wia mepwukat, kilang, I indaiong kumwail me e tepier kauwada mwomwohdiso ehu nan sahpraw, me mihmi ni irepen Nephi; ehi, sahpraw kahdaniki sapwen Mormon; ehi, oh e pepdaisialahr rie kan nan en Mormon pihlo.

4 Oh kilang, I indaiong kumwail, irailiei me pitsangehr nan pehn sapwellimen namwariki Noah aramas akan, sang ni kalahngan oh manaman en Koht.

5 Oh kilang, mwurin ansouo, irail ahpw kalidu lahr sang ni pehn mehn Laman akan nan sahpwtehno; ehi, I indaiong kumwail, irail wie senselehr, oh Kauno pil ketin pwurehng kapit iraila sang nan arail kalidu ki manaman en sapwellime mahseno; oh kitail wisikdongehr nan sahpwet, oh met kitail tepier pil pwurehng kauwada mwomwohdiso en Koht pohn sahpwet.

6 Oh met kilang, I indahiong kumwail, riei kan, kumwail me kin towe mwomwohdiso wet, ia duwe, kumwail kin itarkiher amwail kolokol duwen katamanpen selidien samawail ako? Ehi, oh dah, kumwail kin itarkiher amwail kolokol duwen kataman pen sapwellime kalahngan oh kanangamah ong irail. Oh pil, ia duwe, kumwail kin itarkiher amwail kolokol duwen kataman pen eh ketin doare irail sangehr nan ehl?

7 Kilang, e wekidalahr mohngiong irail akan, ehi, e ketin kapidahhr irail sang nan ar meir kelik, oh irail piridahngehr rehn Koht. Kilang, irail kin mihmi nan werengen rotorot; ahpw, arail mour marain lahr sang ni marain en mahsen soutuko; ehi iei irail me sahl akan me kin pirepene me mehla kan, oh sahl mete kan en ehl, oh mehla soutuk kin kapikapil oh awiawi.

8 Oh met I kalelepek rehmwail, riei kan, dah, irail melahr? Kilang indaiong komwail, soh, irail sohte mehla.

9 Oh I pil pwurehng kalelepek, dah, sahl akan me kin pirepene me mehla kan mweipesengier, oh sahl mete kan en ehl me kapelpene irail sapwedekdahhr? I indaiong kumwail, ehi, irail sapwedekdahhr, oh irail perendahhr, oh koulkier duwen limpoak me pwain irailadahhr. Oh I indaiong kumwail me irail komouralahr.

10 Oh met I kalelepek rehmwail ong ni ire dahkei me irail komourkilahr? Ehi, soangen poahsoan dahkei me irail en kin koapwoaroapwoarikihki komouro? Dahme kahreda me n sapwedek kidahsangehr selin mehla kan, ehi, oh pil sahl mete kan en ehl?

11 Kilang, I kak indaieng kumwail -- kaidehn ei pahpa Alma kamehlele mahsen akan me kohsangehr nan ewen Abinadi? Oh kaidehn ih soukohp sarawi men? Kaidehn e padahngkier mahsen en Koht, akan, oh ei pahpahu Alma kin kamehlele irail?

12 Oh nin duwen eh pwoson, wekila laud ieu me wiawihher nan eh mohngiong. Kilang, I indaiong kumwail me mepwukat koaros me mehlel.

13 Oh kilang, e kin padahkohng amwail pahpa kan, oh pil wekidekala laud ieu me pil wiawihongehr nan arail mohngiong kan, oh irail kin pein karakarahkala oh kin kihong arail likilik rehn Koht mehlel oh Koht ieiaso. Oh kilang, irail kin loalapwoatete lel imwi; Ihme kahrehda irail komourkilahr.

14 Oh met kilang, I kalelepek rehmwail, riei kan nan mwomwohdiso, dah, kumwail ipwisangehr rehn Koht ni pali ngehn? Dah, kumwail alehiong kumwailehr duwen Koht? Dah, kumwail pehmehr wekidekla laud wet nan amwail mohngiong kan?

15 Dah, kumwail kin doadoahk ki amwail pwoson komouro sang ih me ketin kapik kumwaildahr? Dah, kumwail kin kileng kihwei mwowe pwoaren mas en pwoson tehieu, oh kilang duwen en paliwahr wet pahn iasadahng mour kohkohlahte, oh paliwahr me kin mwerpeseng wet pahn iasada ni paliwahr unsek, pwe en kesihnen mwohn Koht pwehn kadeik ki duwen tiahk kan me e wiadahr?

16 I indahiong kumwail, dah, kumwail kak lemehiong me pein kumwail me rongada kapitien Kauno, me pahn mahseniong kumwail rahno: Kohdo rehi kumwail me kapaidahr akan, pwe kilang, amwail doadoahk kan iei me doadoahk pwung kan nan sampah?

17 De ia duwe, kumwail kin pein lemehda kumwail kak pitih Kauno ni rahno, oh kosoia -- Kauno, aht doadoahk kan me pwung nan sampah wet -- oh me e pahn ketin doarei kumwaila?

18 De ehu, kumwail kak pein lemehiong pein kumwail me wisikdohr mwohm mwualen kopwung en Koht sang ni amwail dipikidahr dihp oh poakehla, sang ni amwail tamandahr dipamwail akan koaros, ehi, kataman unsek ehu en amwail suwed akan, ehi iei kataman ehu ong ni amwail kin sohte mouriki kosonned en Koht akan.

19 I indahiong kumwail, kumwail kak sopeikidalahng Koht rahno ki nan mohngiong mwakelekel oh nan pehmwail mwakelekel? I indahiong kumwail, kumwail kak kilangalahng, sang ni sansal en Koht me wiawihonger ni masamwail akan?

20 I indahiong kumwail, dah, kumwail kak leme me kumwail pahn kamouralahr ni ansou me kumwail kin dukila pwe kumwail en mihla pahn tepelo?

21 I indahiong kumwail, kumwail pahn ese me ni rahno kumwail sohte pahn komourala; pwe sohte aramas emen kak komourla ma eh likou kan sohte pahn kamakel lau pwetepwetala; ehi, eh likou kan pahn lao kamwakelekeladahsang mwahi koaros, sang intahn ih me samatail akan kasaledahr me pahn ketido pwe en ketin pwainda sapwellime aramas akan sang diparail akan.

22 Oh met I kalelepek rehmwail, riei kan, ia duwen pepehm en emen emen kumwail, ma kumwail pahn kesihnenda mwohn mwoalen kopwung en Koht sang ni amwail likou kan me mie mwahi sang ni inta oh samin koaros? Kilang, dahme irail pahn kin kadehdehkin kumwail?

23 Kilang, dah, irail sohte pahn kadehdehda me kumwail mwersuwed kei, ehi, oh pil me kumwail dipkidahr soang en suwed koaros?

24 Kilang, rieikan, ia duwe, kumwail kin leme me mehmen me duwehteih en kak mie dewe me e pahn mwohdie nan wein Koht, rehn Abraham, rehn Isaac, oh rehn Jacob, oh pil rehn souko hp sarawi kan, me arail likou kan me udoudehr, oh solahr mwahi, mwakelekelada oh pwetepwetala?

25 I indahiong kumwail, soh; ihte kumwail kin wiahki ih me ketin kapik kitaildahro aramas likamw emen sangete ni tapio, de kumwail lemehki me ih aramas likamw emen sangete ni tapio, kumwail sohte kin lemehda me soangen aramaso sohte dewi nan wein Koht; ahpw irail pahn lekdekla pwe iei irail serien wein tepelo.

26 Oh met kilang, I indahiong kumwail, rieikan, ma kumwail pehmehr wekidekala ieu nan amwail mohngiong kan, oh ma kumwail pepadahr pwe kumwail en koulki limpoak en kamour, I men idek, dah, kumwail kakehr pehmada met?

27 Dah, kumwail kin alu ni amwail kolokol amwail mwakelekel mwohn Koht? Ia duwe, kumwail kak inda nan loalemwail, ma kumwail pahn mehla ansou wet, kumwail itarkier duwen amwail karakarahkala? Eri dah, amwail likou kan udoudehr oh pwetepwetalahr sang ni intahn

Christ, me pahn ketido pwe en ketin doarehla sapwellime aramas akan sang ni diparail akan?

28 Kilang, dah, amwail pohnmwahsu kohsang ehr? I indahiong kumwail, ma saikinte, kumwail saikinte kaunopada duwen amwail pahn tuhwong Koht. Kilang kumwail en kaunopada mwadang; pwe wein nanleng kerendohr, oh sohte soangen aramaso pahn ahneki mour soutuk.

29 Kilang, I inda, mie emen nan pwungamwail me saikinte kohsang eh peirin? I indaiong kumwail me memenet saikinte kaunopada; oh I men en kaunopada mwadang, pwe awao kerendahr, oh e sehse iaht me ansouo pahn kohdo, pwe mehmeno sohte pahn kin mwakelekel.

30 Oh I pil pwurehng indahiong kumwail, mie emen nan pwungamwail me kin wie kouruhriki rieo, de kalaudehla kamakam en rieho?

31 Meid suwediong aramaso, pwe e saikinte kaunopada, oh ansouo kerendohr me e udahn pahn koluhla pwe e de sohte kak komourala!

32 Ehi, me pil meid suwediong tohn doadoahk dipan akan; koluhla, koluhla, pwe iei Kauno Koht me ketin mahsaniher!

33 Kilang, e ketikihla luhk eh uong aramas koaros, pwe limehkan me kalahngan kin kipe irail, oh e ketin mahsaniher: Koluhla, oh I pahn ale kumwailda.

34 Ehi, e mahsanier: Kohdo rehi oh kumwail pahn alehda wahn tuhkehn komouro; ehi, kumwail pahn ale pilawao oh nim pilen komour ni sohte pweipwei.

35 Ehi, kohdo rehi oh wahdo amwail doahk pwung kan, oh kumwail sohte pahn palidi oh lekdekla nan kisinieio.

36 Pwe kilang, ahnsouo kerendohr me mehmen me pahn kihda wah suwed; de mehmen me sohte wia doadoahk pwung, ihete me pahn kahrehiong ih en sengiseng oh pahteu.

37 O kumwail soundoadoahk suwed akan; kumwail kin kalahki dipwisou sohte katepe en sampah kan, kumwail kin kosoia me kumwail eseier ahl pwung kan, mendahte ma kumwail salongalahr, rasehng sihpw me sohte silepe, mendahte silepeo eh ketin malipei kumwailehr oh kin ketin wie malimalipei kumwail, ahpw kumwail sohte pahn rong kepitieo!

38 Kilang, I indaiong kumwail, me silepe mwahuo ketin malipei kumwail ehr; ehi, ni mwareo me e kin ketin malipehkin kumwail, iei ni mwaren Christ; oh ma kumwail sohte pahn karonge kapitien silepe mwahuo, ong ni ahd me pahn kohieng kumwail, kilang, kumwail iei kaidehn sihpw en silepe mwahuo.

39 Oh ma kumwail kaidehn sihpw en silepe mwahuo, soangen kehl dahieu amwail? Kilang, I indaiong kumwail, me tepelo iei silepemwailo, oh kumwail mih nan eh kehlo; oh ansou wet, ihs me kak kamahmiki met? Kilang, I indaiong kumwail, mehmen me kahmahniki met iei ih aramas likamw emen oh serien tepelo.

40 Pwe I indaiong kumwail me mehkot me mwahu kin kohsang rehn Koht, oh mehkot me suwed kin kohsang rehn tepelo.

41 Eri sang ni kahrehpe wet, ma aramas emen kapwarahda doahk mwahu kan, e kin rong kapitien silepe mwahuo, oh e kin idawehn ih; ahpw mehmen me wiahda doahk suwed akan; ihete me pahn wiahla serien tepelo, pwe e kin rong ngileo, oh kin idawehnla ih.

42 Oh mehmen me kin wia met pahn udahn ale pweine; eri sang ni kahrehpe wet pweine me e pahn ale iei mehla, nin duwen mehkan me pwung, doahk mwahu koaros melahr.

43 Oh met, riei kan, I men kumwail en rongie, pwe I koaskoasoai sang ni kehl en paliwerei; pwe kilang, I padahkihong kumwailehr ni sansal me kumwail dehr salongala, de I padahkihong kumwailehr nin duwen kosonned en Koht.

44 Pwe I likiwerdohr pwe ien padahk duwe met, nin duwen koasoandi sarawi en Koht, me mih nan Christ Jesus, ehi, I idihdiongehr me I en kesihnenda oh kadehdehiong aramas pwukat mehkan me samatail akan kasaledahr duwen mehkan me pahn kohdo.

45 Oh kaidehn koaros met. Dah, kumwail sohte kin leme me I pein ese mepwukat? Kilang, I kadehdeiong kumwail me I kin ese mepwukat me I kosoiahier me mehlel. Oh iaduwen amwail leme me I ese ma mepwukat mehlel?

46 Kilang, I indaiong kumwail me Ngehn Sarawi en Koht me ketin padahkihongiehier. I kaisoisolehr oh kapakapehr rahh tohto pwe ien pein ese mepwukat. Oh met pein ngehi kin ese me mepwukat me mehlel; pwe Kauno Koht me

ketin padahkihongiehier sang ni sapwellime Ngehn Sarawio; oh pil sang ni ngenen kaudiahl me mihmi rehi.

47 Oh kalaudepe, I indahiong kumwail met kasansal dohngiehr ie me mahsen akan me samatail akan kosoiahier iei me mehlel, met iei duwen ngenen kokohpo me mihmi rehi, me pil kasansal ehu sang Ngenen koht.

48 I indahiong kumwail, I ese duwen pein ngehi me dahme I pahn indahwei rehmwail, nin duwen mehkan me pahn kohdo, iei me mehlel; oh I indahiong kumwail, me I ese me Jesus Christ pahn ketido, ehi, iei ihme naho, Ieros en Koht, me ketin direkihla kalahngan oh mahk, oh mehlel. Oh kilang, iei ih me pahn ketido pwe en ketiki sang dipen sampah kan, ehi dipen aramas koaros me pahn kin tengeteng ni arail kamehlele mwareo.

49 Oh met I indahiong kumwail me iei koasoandi me luhk ohng, ehi, pwe ien padahkihong riei kempoak kan; ehi, oh koaros me mihmi nan sahpwet; ehi, pwe ien padahkihong koaros, me mah oh me pwulopwul kan, me selidi kan oh me saledek kan; ehi, I indahiong kumwail me likeilapalahr akan, oh pil irail akan me sohte nohk mah kan, oh dien mwuri kan; ehi, ien wer ong irail en koluhla oh ipwsapahl.

50 Ehi, iet me Ngehno ketin mahsaniher: Kumwail koaros koluhla nan sampah, pwe wein nanleng kerendohr; ehi, Ieros en Koht pahn ketido ni sapwellime klohri, ni sapwellime rosen, ringan, manaman, oh manaman en kaun. Ehi, riei kempoak kan, I indahiong kumwail, me Ngehno ketin mahsaniher: Kilang duwen ringan en nahnmwariki en sampah; oh pil nahnmwariki en nanleng me pahn ketin sansalohng aramas kan koaros.

51 Oh Ngehno pil ketin mahsanihongie, ehi, ketin kasaledohngie ni ngihl laud, mahsani: Kohla oh indahiong aramas pwukat -- Koluhla, pwe ma kumwail sohte pahn koluhla, kumwail sohte kak sohsohki wein nanleng.

52 Oh I pil indahiong kumwail, Ngehno ketin mahsani: Kilang, sileo pwilidier ni kalowen tuhkeo; Eri tuhke koaros me kin kapwarahda wah suwed pahn kin palidi oh lekdekla nan kisinieio, ehi, kisiniei ehu me sohte kak sohrala, iei kisiniei poatoapoat ehu. Kilang oh tamataman pwe Koht Sarawio me ketin mahsanier.

53 Oh met riei kempoak kan, I indahiong kumwail, dah, kumwail kak ong padahk pwukat; ia duwe, kumwail kak

kesehla mepwukat, oh tiakidi Koht Sarawio pahn nehmwail akan; ehi, eri dah, kumwail kak kalaudehla amwail pohn mwahsu en nan amwail mohngiong kan, ehi, ia duwe, kumwail pahn kin nantilahte nan amwail kin likouki likou pweilaud akan oh amwail mohngiong kan kin uhlahng dipwisou sohte katepe kan en sampah, oh amwail paih kan?

54 Ehi, kumwail pahn nantilahte ni amwail kin medemedewe me kumwail kin mwahu sang emenemen irail; ehi, kumwail pahn nantilahte nan amwail kin kaloke riamwail akan, me pein irail karakarahkalahr oh kin alu ni koasoandi sarawi en Koht, me irail kohkihdohngehr nan mwomwohdiso wet, sang ni arail mwakelekel kidahr Ngehn Sarawio, oh irail kin kapwarahda doahk me konehng koluhla.

55 Ehi, oh dah, kumwail pahn kin nantilahte sohpeisang me semwehmwe kan, oh irail akan me mie arail anahn akan, oh kumwail ahpw kin kihsang amwail dipwisou kan rehrazil?

56 Oh eri, kumwail koaros pahn kin nantilahte nan amwail suwed akan, I indaiong kumwail me iei irail pwukat me pahn palidi oh ledekla nan kisinieio ihte ma re pahn mwiadang en koluhla.

57 Oh met I indaiong kumwail, kumwail koaros me anahne en idawehn kapitien silepe mwahuo, kumwail kohsang rehn me suwed akan, oh tohrohrala, oh dehr doahke arail me samin akan; oh kilang, adarail akan pahn kohsang, pwe eden me suwed akan sohte pahn iang wadawad nan pwungen eden me pwung kan, pwe mahsen en Koht en kak pweida, me mahsani: Eden me suwed akan sohte pahn patehng eden nei aramas akan;

58 Pwe eden me pwung kan pahn kin intingdihong nan pwuhk en komouro, oh ong irail I pahn kihong ehu sohso ni pali mauni. Oh met, riei kan, dahme kumwail en kin uhwongki met? I indaiong kumwail, ma kumwail pahn uhwongada e sohte pahn katepe, pwe mahsen en Koht pahn udahn pweida.

59 Pwe soangen silepen sihpw dahmen me mihmi nan pwungamwail me naineki sihpw tohto ahpw sohte kin sile irail, pwe kidi en wel akan en dehr pedelong oh kangala nah pelohn sihpw akan? Oh kilang, ma kidi en wel men pedelong nan pelohn sihpwo, e sou pahn pwakihala ih liki? Ehi, oh eri ma e kak, e pahn kemehla ih.

60 Oh met I indaiong kumwail me silepen sihpw mwahu emen kin likiweri kumwail; oh ma kumwail kin rong ngileo, e pahn wahdo kumwail nan eh kehlo, oh kumwail iei ih nah sihpw akan; oh e pahn indaiong kumwail me kumwail en dehr mweidohng emen kidi en wel me duhpek lahr en pedelong nan pwungamwail, pwe kumwail en dehr mehla.

61 Oh met ngehi, Alma, me indahiong kumwailehr ni mahsen en ih me ketin mahseniongiehier, me kumwail en nantiheng kapwaiada mahsen akan me I padahkihong kumwailehr.

62 I indaiong kumwail me towe mwomwohdiso wet nin duwen ei kin iding emenemen; oh ong irail akan me sohte iang towe mwomwohdiso wet, I koasoai nin duwen luhk ehu, me ketihtihki: Kohdo oh pepdaisla sang ni amwail koluhla, pwe kumwail en pil duwehla irailko me alehda wahn tuhken komouro.

IRALAUD 11

Mwohni en mehn Nephi koasoandier -- Amulek uhwongada Zeezrom -- Christ sohte pahn ketin komourla aramas akan me mihmi nan diparail akan -- Ihte irail akan me pahn sohsohkihla wein nanleng pahn komourla -- Aramas koaros pahn iasadahng sohla mehla kohkohlahte -- Sohte mehla pahn mie mwurin iasadao.

1 Met nin duwen kosonned en Mosiah me koaros me kin wia sounkopwung en kosonnedo, de irail me pilipildahr pwe en wia sounkopwung kan, pahn ale pwepwei nin duwen ahsou me re pahn doadoahk pwe irail en kopwung irail akan me pahn wisikdohng rehrail pwe irail en kadeik.

2 Met ma emen kin pweipwand ong emen, oh e sohte pahn kin pwainla me e pwaipwandki reh, mehteio pahn kadipe rehn sounkapwungo; oh sounkopwung pahn doadoahngki manaman, oh kadarala soun doadoahk kan pwe irail en wahdo ohlo mwowe; oh e ahpw kin teneki ohlo nin duwen kosonnedo oh sang mehn kadehde kan me kin uhwongada ih, oh sang ni koasoandi wet, ohlo eri pahn idihdiong en pwainla me e pweipwandikiero, de e pahn

kohsang eh dipwisou kan, de pil lekdek sang nan pwungen aramas nin duwen soun pirap emen oh mehn kuli emen.

3 Oh sounkopwung men kin alehda pweine kan nin duwen eh ansou -- senin en kohl ehu ong ni rahn ehu, de senum en silper ehu, me pahrekiong ehu senin en kohl; oh met iei duwen kosonnedo me kohieng iraillehr.

4 Met iei eden neirail soangen kohl akan sohte kin duwepenehte, oh duwen eden neirail silper kan, nin duwen kesempwal pehrail. Oh ahd pwukat iei ihme kohieng iraillehr sang mehn Nephi akan, pwe irail sohte kin wiahki mepwukat duwehte en mehn Jews akan nan Jerusalem; de irail pil sohte kin sosohng ni mwomwen en mehn Jews akan kin wia; ahpw duwen wekilahn arail wadawad oh arail sosohng, kin sang ni duwen arail madamdau oh duwen irair en aramas akan sang ni dih koaros, lao lel mwein sounkopwung kan, iei irail me wiawidahr sang namwariki Mosiah.

5 Met iei duwen koasoandio -- ehu senin en kohl, ehu seon en kohl, ehu suhm en kohl, oh ehu limna en kohl.

6 Ehu senum en silper, ehu amnor en silper, ehu esrom en silper, oh ehu ondi en silper.

7 Ehu senum en silper kin pahrekiong senin en kohl ehu, oh duwen ehu rehra ong ni sosohng nin duwen ia uhwen parli, oh pil sosohng nin duwen ia uhwen soang en kisin weren tuhke kan.

8 Met uhwen ehu seon en kohl pahn kin pak riau laud sang senin ehu.

9 Oh ehu suhm en kohl me pahn pak riau laudsang seon ehu.

10 Oh uhwen ehu limna en kohl iei me pahrekiong irail koaros.

11 Oh uhwen ehu amnor en silper kin pahrekiong senum riau.

12 Oh uhwen ehu esrom en silper kin pahrekiong senum pahieu.

13 Oh uhwen ehu ondi kin pahrekiong irail koaros.

14 Met iei uhwen mwohni tikitingkan arail koasoandi ni ansou wet.

15 Ehu siplon iei apali en senum; eri, sang ni kahrehpe wet, ehu siplon ong ni apali en sosohng en parli.

16 Oh ehu siplum iei ihme apali en ehu siplon.

17 Oh ehu lia iei ihme apali en ehu siplum.

18 Met iei arail wadawad, nin duwen arail koasoandi ansou wet.

19 Met ehu andion en kohl kin rasehng siplon siluh.

20 Met, iei sang ni kahrepe tehieu pwe irail en kepwehpwehkihla, pwehki irail kin ale pweinen arail doadoahk, ihme kahrehda irail kin kapingada aramas akan en wiahda pingiping kan, pwe irail en kak ahniki doadoahk laud pwe irail en kak ale mwohni nin duwen koasoandi en kosonnedo me kasansal ong irailehro; irail eri kapingidahr aramas akan en uhwong Alma oh Amulek.

21 Oh Zeezrom menet tepier kalelapak rehn Amulek, inda: Dah, ke pahn kak sapeng ei kalelapak malaulau kan me I pahn kalelapak rehmw? Ni ahnsou wet Zeezrom iei ohl emem me samani doadoahk ki dipwisou en tepelo, pwe en kin kauwehla mehkot me mwahu; eri e ahpw idek rehn Amulek: Dah, ke pahn sapeng ei kalelapak kan me I pahn idek rehmw?

22 Oh Amulek indaiong ih: Ehi, ma e pahn mih nin duwen Ngenen Kauno me ketiket rehi, pwe I sohte pahn inda mehkot me pahn pelianda Ngenen Kauno. Oh Zeezrom indaiong ih: Kilang iet onti en silper weneu, oh koaros mepwukat I pahn kihong uhk ma kowe pahn kamahmkihla me mie Koht lapalap emen.

23 Ansou wet Amulek ahpw inda: O kowe serien ehl, dahme ke songkinie? Dah, ke ese me pwung kan sohte kak lohdi ohng soangen kasongsong kan me duwehte men?

24 Dah, ke kamehlele me sohte Koht? I indaiong uhk, soh, ke ese me mie Koht, ahpw ke kin poakohng mwohni laud sang omw poakohng Koht.

25 Oh met ke wiadahr likamw ongie mwohn Koht. Ke kosoiahiongiehier -- Kilang onti weneu pwukat, me inenen kesempwal, I pahn kihong uhk -- ni omw kin medemedewe nan ahmw mohngiong me kowe sohte pahn kihongie; oh iei ahmw anahn tehieu me ien kamahmkihla Koht ieias oh mehlel, pwe kahrehiong uhk en kak kauweiehla. Oh met kilang, pwehki suwed mehlel wet. Ke pahn ale pweine.

26 Oh Zeezrom ahpw idek reh: Kaiden ke kosoia me mie Koht ieias oh mehlel emen?

27 Oh Amulek ahpw sapeng: Ehi, mie Koht ieias mehlel men.

28 Ahnsou wet Zeezrom ahpw idek: Ia duwe, Koht tohtohsang mehtehmen?

29 Oh e ahpw sapeng, soh.

30 Ni ansou Zeezrom pil pwurehng indaiong ih: Ia duwen ahmw ese mepwukat?

31 Oh e ahpw sapeng, inda: Tohnleng en Koht emen me kasalehiongihier.

32 Oh Zeezrom pil pwurehng idek: Ihs me pahn ketido? Iei ih me Ieros en Kohto?

33 Oh e ahpw indaiong ih, ehi.

34 Oh Zeezrom pil pwurehng idek: Dah, e pahn ketin komourla sapwellime aramas akan sang nan diparail akan? Oh Amulek sapeng oh indaiong ih: I indahiong uhk me e sohte kak ketin wia, pwehki e sohte kak ketin kamahmkihla sapwellime mahsen akan.

35 Ahnsou wet Zeezrom indaiong aramas akan: Kilang pwe kumwail en tamatam mepwukat; pwe e indahier me mie Koht ahpw emente, ahpw e pil inda me Ieros en Koht pahn ketido, ahpw e sohte pahn ketin komourla sapwellime aramas akan -- ni mwomwen me mie eh manaman kaunda Koht.

36 Ni ahnsou wet Amulek indaiong ih: Kilang ke wiahier likamw, pwe ke kosoia me I kin kosoia ni mwomwen I ahneki manaman en kaunda Koht pwehki I indahier me e sohte pahn ketin komourla sapwellime aramas akan me mihmi nan dihp.

37 Oh I pil pwurehng indahwei me e sohte pahn kak ketin komour iraila sang nan arail dihp; pwe I sohte kak kahmahmkihla sapwellime mahseno, oh e ketin mahsanihier me sohte mehkot me samin kak sohsohkihla wein nanleng; eri, sang ni kahrehpe wet, ia duwen amwail en kin kak komourala, kaidehn ihte ma kumwail pahn sohsohkihla wein nanleng? Eri, ihme kahrehda kumwail sohte kak komourkihla ni amwail mihmi nan dihp.

38 Met Zeezrom pil pwurehng idek reh: Kaidehn Koht Sahn Soutukiei ihete Ieros en Koht?

39 Oh Amulek indaiong ih: Ehi, ihete me Koht Sahn Soutuk en nanleng oh sampah, oh mehkoaros me mihmi loalera; lhiei me tapio oh imwio, kehieu mwowe oh keieu mwuri;

40 Oh e pahn ketidohng sampah pwe en ketin kamaurala sapwellime aramas akan; oh e pahn ketiki sang dipen irail akan me kin kamehlele mware; oh irail pwukatiei irail

akan me pahn ahneki mour soutuk, oh komouro sohte pahn kodohng emen torohr liki.

41 Eri me suwed akan pahn duduwehte me mwomwen komouro saikinte wiawi, ihte ma sahl akan me kin pirepene me mehla pahn sapwedek peseng; pwe kilang, rahno pahn kohdo me koaros pahn iasada sang mehla oh uh mwohn Koht, oh pahn kadeik nin duwen arail doadoahk kan.

42 Met, mie ehu mehla me kahdaneki melahn paliwar: Oh matalahn Christ ketin sapwadadahr sahl akan en melahn paliwar, pwe koaros en iasada sang melahn paliwar wet.

43 Ngehno oh paliwahro pahn pwurehng pwurepene oh unsekla, pehkan, nehkan, oh kakon akan pahn pwurehng arail wasahkan ni paliwahro, me duwehte kitail ahnsou wet; oh kitail pahn kolahng pwe en uh mwohn Koht, ese duwehte atail kin ese met, oh ahneki kataman mwahu ehu duwen dipatail koaros.

44 Met, kapwurupwuredo wet pahn wiawihong koaros, koaros me mah oh me pwulopwul, koaros me sensel kan oh saledek kan, koaros ohl akan oh lih akan, koaros me suwed akan oh me pwung; oh mehlel sohte mwahn pitenmoahng ehu pahn salongala, ahpw mehkoaros pahn pwuralahng duwen unsek en paliwahro, me duwehte met, de nan paliwahro, oh pahn kin wisikalahng oh pahn sapeng mwohn mwoalen kopwung en Christ me Ieroso, oh Koht Sahn, oh Ngehn Sarawi, me wia Koht Soutuk, pwe irail en kadeiki duwen arail doadoahk kan, ma irail pahn mwahu de suwed.

45 Met, kilang, I kosoiahiong kumwailehr duwen melahn paliwar, oh pil duwen iasadahn paliwar wet. I indaiong kumwail me paliwar wet pahn iasada sang mehla pwe en wiahla paliwar ehu me pahn mour kohkohlahte, me iei sang ni mehla keieu ong ni mour, pwe irail en solahr kak pwurehng mehla; me ngeni rail kin patehng paliwararail akan, solahr pahn kohpeseng; met iei duwen unsekla en pali ngehn oh pali war me pahn momour kohkohlahte, pwe irail solahr kak pwurehng mwasahngotala.

46 Met, ni en Amulek kanekelahr mahsen pwukat, aramas akan tepier pwurehng pwuriamwei kihla mehlel, oh Zeezrom tepier rerrer. Oh met iei kaimwsek pen mahsen kan sang Amulek, de met iei koaros me I intingidier.

IRALAUD 12

Alma uhwongada Zeezrom -- Me rir en Koht akan kak kohiengete irail me pwoson akan -- Aramas pahn kadeik sang ni arail madamadau kan, me irail kin kamehlele kan, koasoai kan, oh doadoahk kan -- Me suwed akan pahn lokolok ki melahn ngehno -- Mour en sampah wet iei irair en kasongosong ehu -- Plahn en komouro kahrehiong iasada oh sang ni pwoson, lapwapen dihp akan en wiawi -- Me koluhlao kin mie eh pwung en ahneki mahk sang rehn Ieroso.

1 Met Alma kilangehr me mahsen akan sang Amulek kameleileidier Zeezrom, pwe e kilangehr me Amulek kadierekada duwen eh likamw oh likamw akan me pahn kauwehla ih, oh e kilangehr me e tepier rerkihda duwen dihp me e wiadahr, ih eri sarapesengehr oh tepier lokiahiong ih, oh pwe en kadehde duwen mahsen kan sang rehn Amulek, oh pwe ien kawehwe mehkan laud sang, de en kasalehda mahsen en Koht akan laud sang me Amulek wiahier.

2 Met aramas akan me pokon penehier limwah rongehr mahsen akan sang Alma ong Zeezrom, pwe pokono me tohto, oh iet duwen eh koasoia:

3 Met Zeezrom, ke eseier me kowe poaridiher nan omw wia likamw oh ese likamw, pwe kaidehn ke kin pitiete aramas, ahpw ke pil pitiher Koht; pwe kilang, e ketin mwahngih ahmw madamadau kan koaros, oh ke diaradahr me ahmw madamadau kan sansalohng kihtehr sang sawellime Ngehno.

4 Oh ke kilangehr me se ese me ahmw koasoandi me iei inenen koasoandi loalokong ehu, nin duwen loalokong en tepelo, pwehn likamw oh pitih aramas akan, pwe kowe en kak kahrehiong irail en pelianda kiht, pwe irail en lokaia suwed oh en keseikihtala liki.

5 Met iei koasoandi en ahmw imwintihtio, e doadoahk kier manaman nan loalemw. Met imen kowe en tamataman me dahme I indahiong uhk I kin indaiong koaros.

6 Oh kilang I indaiong kumwail koaros me iet ehu lidip en imwintihtio; me e kihdier pwe en kin lidipihdi aramas pwukat, pwe en kak wahdo kumwail en mihla pah, pwe en

kak kapelkin kumwail pene nah sahl meteo, pwe en kak saliedi kumwail ong mehla kohkohahte, nin duwen eh manaman en sali kumwaileidi.

7 Met ni en Alma kosoiahier mepwukat, Zeezrom tepier laudla eh rerrer kowahlapie, pwe e wie lalaudla eh dukila nin duwen manaman en Koht; oh e pil kamehlele me Alma oh Amulek wehwehkier duwen ih, pwe e kamehlele me ira wehwehkier duwen madamadau oh ineng kan me mih nan eh mohngiong; pwe manamano kohieng irahier pwe ira en esehla mepwukat koaros nin duwen ngenen kokohpo.

8 Oh Zeezrom ahpw tepier kalelapak rehra ni ngoang, pwe en kak esehla mehlel duwen wein Koht, oh ih eri idek rehn Alma: Ia wewehn en Amulek indahki duwen iasadahn irail me melahr akan, me koaros pahn iasada sang me melahr akan, koaros me pwung kan oh me sapwung kan, oh pahn kohlang pwe en uh mwohn Koht pwe irail en kadeik sang nin duwen arail doadoahk kan.

9 Oh met Alma ahpw tepier kawehwe mepwukat ong ih, inda: E kohieng iraillehr me tohto en esehla me rir en Koht akan; ahpw irail milah pahn kosonned itoit ehu me irail en kin kasalehda kisehn sapwellime mahseno me e ketikihongehr aramas akan, nin duwen arail kin karonge oh ngoang me re kin kihong ih.

10 Eri, mehmen me pahn kekeluwakiala eh mohngiong, iohte pahn pahn ale ekis en mahseno; oh mehmen me sohte kakeluwakiala eh mohngiong e pahn ale pali laud en mahseno, lao e pahn kohieng en esehla me rir en Koht akan ni eh pahn kin esehla irail koaros ni unsek.

11 Oh irail akan me pahn kekeluwakiala nan arail mohngiong, pahn kin kohieng pali tikitik en mahseno lao irail pahn kin sehsehla duwen sapwellime me rir akan; oh eri tepelo pahn kol irailedi, oh pahn kahluwa irail ni duwen insene ong ni mehla. Oh met iei wehwehn sahl mete en mehla kan.

12 Oh Amulek kosoiahier ni sansal duwen mehla, oh duwen iasada sang mour wet ong ni irair en mour kohkohahte, oh irail pahn wisikidohng mwohn kopwung en Koht, pwe en kadeik nin duwen arail doadoahk kan.

13 Eri ma atail mohngiong kan kekeluwakialahr, ehi, ma kitail kekeluwakialahr atail mohngiong kan ong ni mahseno, eri, e sohte pahn dierek loaletail, eri irair me

kitail pahn mihmi loale pahn kin suwed mehlel, pwe sang ansouo kitail pahn lekdekla.

14 Pwe atail lokaia kan pahn kin kihong dipatail, ehi, atail doadoahk kan koaros pahn kin kihong dipatail; kitail sohte pahn kin mwakelekel; oh atail madamadau kan pahn pil kihong dipatail; oh nan irair suwed mehlel wet kitail kin masak en kilangdalahng atail Koht; oh kitail pahn peren ma kitail kak indaiong takai kan oh nahna kan en pwupwidiong pohtail pwe en karir kitaila sang mwohn sihlengin Koht.

15 Ahpw met sohte kak wiawi; kitail udahn pahn kohdo oh uh mwohn Koht nan sapwellime klohri oh sapwellime manaman, oh sapwellime roson, lingan, oh manaman en kakaun, oh ong ni atail namenek soutik, kitail pahn wehkada me kalokolok kan me pwung; pwe ih me ketin pwung mehlel ong ni sapwellime doadoahk kan koaros, oh pwe ih me ketin kalahngan ong aramas akan, oh me sapwellimaniki manaman koaros pwe e ketin kamourala aramas koaros me kin kamehlele mware oh kin kapwarahda wahn koluhla.

16 Oh met kilang, I indaiong kumwail, mwurin ansouo ehu mie mehla pahn wiawi, iei mehla keriau, me iei melahn ngehno, eri iei ahnsou me mehmen me mehla nan dipehkan, nin duwen melahn paliwar wet, pahn pil mehla ni melahn ngehno; ehi, e pahn mehla nin duwen mehkan me pidada me pwuhngo.

17 Eri iei ahnsouo me arail lokolok kan pahn duwehte lehn kisiniei ehu oh takai me kin mwehl, me kisiniei pahn poatoapokat oh soh imwi; oh eri ahnsouo iei ahnsou me irail pahn selidi ong mehla kokkohlachte, nin duwen manaman oh selidi en Satan, sang ni e pahn kihong irail pahn pein insene.

18 Eri, I indaiong kumwail, irail pahn mihmi ni mwomwen me sohte komour wiawiher; pwe irail sohte kak komourla nin duwen pwung en Koht, oh irail sohte pan mehla, ni arail pahn solahr pahn mwasahngotala.

19 Met e wiawiher me ni ahnsou me Alma kaneke lahr eh kasalehdahr mahsen pwukat; aramas akan tepier pwuriamweila.

20 Ahpw mie emen iei Antionah, iei ihme kakaun irail, ahpw kohdo oh indaiong ih: Dahkot met me ke koasoihier, me aramas pahn iasada sang mehla oh pahn

wekisang ni paliwar wet ong ni mour kokkohahte, pwe paliwahro unseko pahn sohla mehla kokkohahte?

21 Ia wewehn mahsen en pwuhk sarawo, me Koht ketikihla kerupim oh kedlahs kisiniei ni palimesehn mwetuwel en Eden; pwe me keper ong tepin atail pahpa oh nohno de pedelong oh alehda wahn tuhke en komouro, oh pahn momour kokkohahte? Oh met kitail eseier me sohte irair ehu me kak wiawi pwe ira en kak momour kokkohahte.

22 Met Alma indaiong ih: Met iei ihme I pahn kereniong kawehwehda. Met kitail ese me Adam pwupwidiher sang ni e alehda wahntuhke me sohte mweimweio nin duwen mahsen en Koht; oh sang met kitail ese, me sang ni eh pwupwilao, aramas salongalahr oh wialahr aramas pwupwilahr ekei.

23 Oh met kilang, I indaiong kumwail me ma Adam kak alehda wahn tuhke en komouro ni ahnsouo; sohte mehla pahn wiawi, oh mahseno sohte pahn pweida, kahrehiong Koht pahn ketin wia aramas likamw emen, pwe e ketin mahsaniher: Ma kumwa pahn kang met kumwa pahn uhdahn mehla.

24 Oh kitail ese me aramas alehiong irailehr mehla, ehi, mehlaho me Amulek kasaledahr, iei melahn paliwar, ahpw mie ahnsou me e mweimweidahr me aramas en koluhla; ihme kahrehda mour wet wialahr irair en songisong ehu; ansou en kaunopada ieu pwe kitail en tuhwong Koht; ansou en kaunopadahng nan irair me pahn poatoapoat kokkohahte me se kosoiahier, me pahn wiawi mwurin iasadahn me melahr akan.

25 Met, ma sohte plahn en komouro, me wiawidahr sang ni poahsoan en sampah, iasada en me melahr akan sohte pahn kak mie; ahpw plahn en komouro wiawidahr me pahn karehiong me melahr akan en iasada, me kosoiepe miehier.

26 Oh met kilang, ma e kak ong atail tepin pahpa oh nohno en kohla oh alehda tuhke en komouro, ira pahn suwed kokkohahte sang ni ara sohte ahneki irair en kaunopada, oh met plahn en komouro pahn sohla mwahu, oh mahsen en Koht sohte pahn pweida, sohte mehkot pahn pweida.

27 Ahpw kilang, e sohte mehleh; oh e wia idihd ehu ong aramas me irail pahn mehla; oh mwurin mehla, irail en

kodohng ni kopwung, iei ihte kopwung me se kosoiahier ni imwio.

28 Oh muwrin en Koht ketin piladahr mepwukat me pahn kodohng aramas, kilang, e mahsanihier me e konehng aramas en ese mehkan me e ketin piladahng iraillehr en wia.

29 Ihme kahreda e ketin poaronehdo toanleng kan en lokaiahieng irail pwe en kahrehiong aramas akan en kin kilang duwen sapwellime klohri.

30 Oh irail tepier ni ahsouhte likiweriong ni mware; eri sang ni kahrehpe wet Koht kin ketin mahsaniong irail, oh ketin kasansalehiong irail plahn en komour, me kaunopadahr sang ni poahsoan dahn sampah; oh met e ketin kasansalehiong iraillehr nin duwen arail pwoson oh koluhla oh arail doadoahk sarawi kan.

31 Ihme kahrehda, sang ni arail tepin kauwelahr kosonned keieu kan, e ahpw ketikihongehr kosonned rehn aramas akan nin duwen mehkan me pid paliwar, oh duwen duwehla Koht, esehla me mwahu sang me suwed, kihong pein irail nan irair en wiewia ehu, de pein kihong irail nan irair en wiewia nin duwen insenarail akan oh arail peren kan, ma irail en kin wia me mwahu de wia me suwed.

32 Eri Koht ahpw ketikihong iraillehr kosonned akan, mwurin eh ketin kasalehiong iraillehr plahn en komour, pwe irail en dehr wia me suwed, oh kalokepeo iei mehla keriau, me iei mehla kokkohlahte, nin duwen mehkan me pidada pwuhng; pwe ong ni soahng wet, plahn en komour sohte kak manaman, pwe doadoahk kan en kosonned en dehr sohrala nin duwen me pid kamwahu lapalap en Koht.

33 Ahpw Koht kin ketin malipe sapwellime aramas akan, ni mwaren sapwellime Ieros (met iei plahn en komour me wiawidahr) me ketihtikki: Ma kumwail pahn koluhla, oh dehr kekeluwakiala amwail mohngiong kan, eri I pahn mahk ong kumwail, sang ni nei Ieroso.

34 Eri, mehmen me koluhla, oh sohte kin kekeluwakiala nan eh mohngiong, e pahn ahniki mahk sang ni nei Ieroso, ong ni lapwapen dipehkan, oh irail pwukat pahn pedelong nan ei wasahn kommoal.

35 Oh mehmen me pahn kakeluwakiala nan eh mohngiong oh pahn wiahda dihp, kilang, I kahula ni ei lingeringer me e sohte pahn pedelong nan ei wasahn kommoal.

36 Oh met, riei kan, kilang I indaiong kumwail, me ma kumwail pahn kakeluwakiala amwail mohngiong kan, kumwail sohte pahn pedelong ong nan wasahn kommoal en Kauno; eri dipamwail akan me kahrehiongehr ih en ketikidohng kumwail sapwellime engieng me duwehte sapwellime engieng en nin tapio, ehi, nin duwen mahsen en mwuhro me rasehng nin tapio pwe en ketin kasohrehla kumwail kohkohlahte; ihme kahrehda, sang ni sapwellime mahseno ong ni melahn mwuhro pahn duwehla mehla keieuo.

37 Oh met riei kan, kitail eshier me mepwukat me mehlel, kitail en koluhla dehr kakeluwakiala nan atail mohngiong kan, pwe kitail en dehr kamwakaraha Kauno atail Koht pwe e de pahn ketikidohng kitail sapwellime engieng ong ni mepwukat sang ni keriapak en sapwellime kosonned kan me ketikidohng kitailehr; ahpw kitail en pedelong ong nan wasahn kommoal en Koht, me kaunopadahr nin duwen sapwellime mahseno.

 IRALAUD 32

Alma padahkohng me semwehmwe kan me akitikitik kilahr arail lokolok kan -- Pwoson iei koapwoaroapwoar mehlel ehu me kitail kin sohte kilang -- Alma kadehde me tounleng kan kin apwalih ohl akan lih akan, oh serihkan -- Alma karasahiong mahseno ong weren tuhke ehu. E udahn pahn poadidi oh epwelipe pahn kohieng -- Eri e ahpw pahn wiahla tuhke pwoat -- me wahn tuhkehn mour soutuko pahn dondolsangie.

1 Oh e wiawier me irail kolahr tepier padahk ki mahsen en Koht ong aramas akan, oh re kin pidelong nan sinakoke kan, oh nan imwarail akan, oh re pil padahk ki mahseno pohn ahl akan.

2 Oh e wiawiher me mwurin ar doadoahk laudehr nan pwungarail, arair doadoahk ahpw tepier pweida mwahu rehn me semwehmwe kan, pwe kilang, re lekdekiei sangehr nan sinakoke kan pwehki arail likou suwed.

3 Ihme kahrehda irail kin sohte mweimweiong ren kin iang pedelong nan sinakoke kan pwe ren iang kaudokiong Koht, sang ni ar kin wiahkin irail nin duwen aramas samin

kei; eri irail me semwehmwe; ehi, riarail kan kin wiahkin irail duwehte kid me kin lekdekla kei; ihme kahrehda irail semwehmwehki nin duwen dipwisou en sampah kan; oh pil semwehmwe nan arail mohngiong kan.

4 Met, ni ansou me Alma wie padapadahk oh kosoakoasoi ong aramas akan pohn dolen Onidah, pokon kalaimwun ieu ahpw kodohng ih, pwehki arail semwehmwehki dipwisou en sampah kan, iei irail akan me se kasaledahr, me semwehmwe nan mohngiong irail.

5 Irail ahpw kodohr rehn Alma; oh me keieu tieng nan pwungarailo ahpw idek reh: Kilang, dahme rieikat pahn wia, pwehki sang ni arail semwehmwe me aramas kan kin kailongkihkin irail, ehi, ahpw ni mehlelo iei atail samworo kan; pwe re kin pwakih kiht sang nan atail sinakoke kan me se doadoahklaud ki aht pein kaukihda peht oh re ahpw kaus kitalahr pwehki sang ni aht semwehmwe kouwahlap; oh solahr at wasahn kaudekiong atail Koht; oh kilang, dahme se pahn wia?

6 Eri ansou me Alma rongehr met, e ahpw pirekekila, oh mwadange te kilang pein ohlo oh e ahpw kadehde ih, ni e perenda mehlel; pwe e kilangehr duwen arail lokolok kan me kahrehiong irail en karakarahkala mehlel, oh kaunopada irailehr pwe ren rong mahseno.

7 Eri e ahpw solahr kosoia mehkot ong pwihn teio; ahpw kapahla peh, oh werkilahng irail kan me kolulahr mehlel, oh indaiong irail.

8 I kilangehr me kumwail karakarahklahr sang nan amwail mohngiong kan; mehd paih kumwail ma met mehlel.

9 Kilang riamwailo idekehr, dahme se pahn wia? -- pwe se lekdekiei sangehr nan atail sinakoke kan, eri se solahr kak kaudekiong at Koht.

10 I indaiong kumwail, dah, kumwail kin leme me kumwail sohte kak kaudekiong Koht, ihte ma kumwail pahn kaudek nan sinakoke kan?

11 Oh pil miehte me I men idek, dah, kumwail kin medewe me kumwail pahn kin kaudekiong Koht pak tehieu nan ehuh wikk?

12 I indaiong kumwail, e mwahute amwail lekdekiesang nan sinakokehkan, pwe kumwail en aktikitikla, oh kumwail en marainla; pwe mie anahnepen amwail en marainla; iei kahrehpen amwail lekidek lahr, pwe riamwail kin

kailongkin kumwail pwehki amwail semwehmwe mehlel, pwe kumwail en aktikitikla nan amwail mohngiong kan; pwe kumwail anahne kumwail en kin aktikitikla.

13 Oh met, mehd paih kumwail pwehki irail wiahiong kumwailehr en akitikitikla; pwe ekei pak ong aramas emen, ma e kin itoitiehng en akitikitikla, rapahki koluhla; oh met mehlel, me mehmen kin koluhla pahn diar kalahngan; oh mehmen me kin diar kalahngan oh dadaurete lel imwi, ihete me pahn komourala.

14 Oh met, nin duwen ei indaiong kumwailehr, me pwehki kumwail itiotiengehr en akitikitikla kumwail eri kapaidahr, dah, kumwail sohte kin leme me irail akan me koluhla mehlel kin kapaida laud pwehki mahseno?

15 Ehi, mehmen me pein koluhla ni mehlel, oh kin koluhkihla dipehkan, oh dadaurete lel imwi, ihete pahn kapaida -- ehi, e pahn laudsang irail akan me me kin itoitiehng en akitikitikla pwehki arail semwehmwe mehlel.

16 Eri, meid paih irail me sohte kin itoitiehng en akitikitikla, de pil, ni eh u koasoi, mehd paih irail me kin kamehlele mahsen en Koht, oh kin pepdaisla ni mohngiong marahra, ehi, e sohte kin esehla mahseno, de pil itoitiehng pwe en esehla mwohn arail pahn kamehlele.

17 Ehi, me tohto me kin koasoia: Ma ke pahn kasaledohng kiht eh u kilel en sang nanleng, eri se pahn esehla ni mehlel; se ahpw pahn kamehlele.

18 Met ngehi eri idek, dah, pwoson ieu met? Kilang, I indaiong kumwail, soh; pwe ma mehmen me kin eseier duwen mehkot, sohte kahrepen e pahn kamehlele, pwe e eseier.

19 Oh met, ia uhwen pahn laud en dipen mehmeno me kin esehla duwen kupwuren Koht oh sohte kin wiahda, sang aramas emen me kin kamehlelehte, de pil emen me mie kahrepen e kin kamehlele, oh e ahpw pwupwidiong nan dihp?

20 Ong ni meuwet, kumwail en pein teneki. Kilang I indaiong kumwail, me mihmi pohn apali mehn teneko pahn kin pahrekiong pali teio; oh e pahn kohieng aramas koaruhsie me pid duwen arail doadoahk.

21 Oh met nin duwen ei koasoiadahr duwen pwoson -- pwoson iei kaidehn en esehla unsek en mehkan; ihme kahrehda kumwail kin ahniki pwoson oh koapwoaroapwoar ong ni mehkan me mehlel me kumwail sohte kin kilang.

22 Oh met, kilang, I indaiong kumwail, oh I kin men kumwail en tamataman, me Koht kin ketin kalahngan ong koaruhsie me kin kamehlele mware; eri me e keieu ketin kapware, kumwail en kamehlele, ehi, iei sapwellime mahseno.

23 Oh met, e ketin kapwiliwei sapwellime mahseno ong aramas akan sang rehn tonnleng kan, ehi, kaidehn ohl ete ahpw pil lih akan. Met kaidehn koaros; seri kan kin kolokol mahsen akan me kin koieng irail pahn pak tohto, me kin kanamenekehla me loalokong kan oh me kaiandahr kan.

24 Oh met riei kempoak kan, nin duwen amwail kin anahne esehla sangie duwen me kumwail en wia pwehki amwail medeklahr oh lekdeklahr -- Met I sohte anahne me kumwail en leme me I men kadeik kumwail ohngete ni mehkot me mehlel--

25 Pwe I sohte inda kumwail koaros me pein idingehng kumwail en akitikitikla; pwe mehlel I kamehlele me mie ekei nan pwungamwail en akitiktikla, mweidohng irail en kin mihla nan irair sohte lipilipil kan me irail pahn mihlaie.

26 Met, nin duwen ei kosoiahier duwen pwoson -- me kaidehn esehla mehkot ni unsek -- pil duwehte mahsen kan sangie. Kumwail sohte kak esehla mehlel duwen unsekarail nin tapio laud sang pwosono iei me kin esehla mehkot ni unsek.

27 Ahpw kilang, ma kumwail pahn pepehd oh kapidada amwail mehn madamadau kan, iei pwehn sohngada duwen mahsen akan sang rehi, oh doadoahk ki kisehn pwosono, ehi, iei ma sohte palilahsang amwail anahn en kamehlele, mweidohng anahn wet en doadoahk loalamwail, lao en lel ni irair ehu me kumwail pahn kamehlelehla pwe kumwail kak kihong deun mahsan akan sang rehi en mihlaie.

28 Met, kitail pahn karasahiong mahseno werentuhke ieu. Met ma kumwail pahn mweidohng ehu wasa nan amwail mohngiong pwe weren tuhkeo en poadie, kilang, ma weren tuhke mehlel ieu, de weren tuhke mwahu ieu, ma kumwail sohte pahn kesehla sang ni amwail soh pwoson, pwe kumwail en pelianda Ngenen Kauno, kilang e pahn tepida wie lalaudla nan mwaramwar amwail akan, eri ansou me kumwail pehmehr duwen e wie lalaudlao, kumwail pahn pein kosoia loalamwail -- e udahn weren tuhke mwahu iei met, de mahseno me mwahu, pwe e

tepier kalaudehla pali ngeni; ehi, e tapidahr kalaudehla ei marainkihla, ehi, e tapidahr mwahu ongie.

29 Met kilang, dah, amwail pwoson sohte pahn lalaudla? I indaiong kumwail, ehi, mendahte e saikinte kekeirdahng ni marain unsek ehu.

30 Ahpw kilang, nin duwen weren tuhkeo e kin lalaudla, oh kin osada, oh ahpw tapidahr kekeirda, eri kumwail pahn kosoia me weren tuhkeo me mwahu; pwe kilang e laudlahr, oh osehr, oh tepier kekeirda. Oh met, kilang, dah, kaidehn met pahn kakehlaka amwail pwoson? Ehi, e pahn kakehlaka amwail pwoson, pwe kumwail pahn kosoia me I ese me weren tuhke mwahu ehu met; pwe kilang e osehr oh tepier kekeirda.

31 Met kilang, dah, kumwail mehlel me weren tuhke mwahu ieu met? I indaiong kumwail, ehi, weren tuhke koaros kin kekeirda sang ni mwomwarail akan.

32 Eri, ma weren tuhke ieu osada e kin mwahu, ahpw ma e sohte kin osada, kilang pwe e sohte kin, mwahu, ihme kahrehda e pahn lekdekla.

33 Oh met, kilang, pwehki amwail songehr duweo, oh padokehr weren tuhkeo oh e laudlahr oh osehr, oh tepier kekeirada, kumwail udahn anahne ese me weren tuhkeo me mwahu.

34 Oh met, kilang, dah, amwail ese kin unsek? Ehi, amwail ese en kin unsek ong ni meuwo, oh amwail pwoson en kin duduwehte; oh met pwehki kumwail ese, kumwail en ese me mahseno me laudlahr nan pali ngenomwail, oh kumwail pil ese me e osadahr, pwe amwail wehwehki kin tepier maramarainla, oh amwail madamadau kin tepier lalaudla.

35 Eri, kaidehn met me mehlel? I indaiong kumwail, ehi, pwehki e marain, oh mehkot me marain, kin mwahu, pwehki e kin kak sansal, eri kumwail udahn pahn ese me e kin mwahu; oh met kilang, mwurin amwail songehr marain wet, iaduwe, amwail ese kin unsekla?

36 Kilang I indaiong kumwail, soh; kumwail pil sohte pahn pwilikihdi amwail pwoson, pwe kumwail en kin doadoahngkihte amwail pwoson ong ni padokedi weren tuhkeo pwe kumwail en songada mehwet pwehn en esehla ma werengen tuhkeo me mwahu.

37 Oh kilang, ni ansou me tuhkeo tepier kekeirada, kumwail pahn koasoia: Kitail en apwalih mwahu, pwe en

kak kadar kalowe, pwe en kekeirada oh kihda wah ong kitail. Oh kilang, ma kumwail pahn apwalih mwahu e pahn kadar kalowe, oh kekeirada, oh kihla wah.

38 Ahpw ma kumwail pahn pohn sehsehla tuhkeo, oh sohte lemehda me kumwail en apwalih, kilang e sohte pahn kadar kalowe; oh ansou me karakar en ketipin pahn kohdo oh e pahn isikala, pwehki sohte kalowe e pahn kin mengla, oh kumwail eri ahpw pahn usada oh kesehla.

39 Met, kaidehn pwehki weren tuhkeo me sohte mwahu, de pil kaidehn me waho me sohte mwahu; ahpw pwehki amwail pwehlo me pwehl suwed, oh kumwail sohte pahn apwalih tuhkeo, ihme kahreda, kumwail sohte kak dolung wahn tuhkeo.

40 Oh sangete ni mwohmw wet, ma kumwail sohte pahn apwalih mahseno, oh kin wie kilikilangweite ni pwoson ong ni wahn tuhkeo, kumwail sohte kak dolung wahn tuhkehn komouro.

41 Ahpw ma kumwail pahn apwalih mahseno, ehi, apwalih tuhkeo ni ansou e tepida wie kekeirda, sang ni ahmwail pwoson iangahki ngoang mehleh, oh iangahki kanangamah, ni amwail kin wie kasikasik wahn tukeho, e udahn pahn kihda kalowe; oh kilang e pahn wiahla tuhke pwoat me pahn osadahng mour soutuk.

42 Oh pwehki amwail ngoang oh amwail pwoson oh amwail kanangamah ong ni apwapwalih mahseno, pwe en kak osada loaloamwail, kilang ehu ansou kumwail pahn dolung waho, me keieu kesempwal, me keieu iou sang mehkoaros, me pwetepwet sang mehkoaros, ehi, oh mwakelekel sang mehkoaros; oh kumwail pahn kang wah wet lao kumwail medla, pwe kumwail en solahr men mwengehda de pil men nimpilada.

43 Eri, rie kan kumwail pahn dolung pweinen amwail pwoson, oh amwail ngoang, oh amwail kanangamah, oh amwail dadaurete kanangamah, awiawih pwe tuhkeo en kihda wah ong kumwail.

 IRALAUD 34

Amulek kadehde me mahseno sang rehn Christ me kolahng ni komouro -- Ma sohte tomw ehu pahn wiawi, aramas koaros pahn salongala -- Kosonned unsek en Moses

kin uhlahng meirong en Ieros en Koht -- Plahn en komour
soutuk kin kohsang ni pwoson oh koluhla -- Kapakapki
kapai pen paliwar oh pali ngehn akan -- Mour wet iei ih
ahnsouo me aramas akan en kaunopada pwe irail en
tuhwong Koht -- Koadoahkehda amwail mour sang ni
masak oh rerrer.

1 Oh met e wiawiher me mwurin Alma eh kasalehiong
irailehr mahsen pwukat, ih eri mwohndihong pohn pwehlo,
oh Amulek eri udahr oh tepiada padahk ong irail, inda:

2 Riei kan, I leme me kumwail sohte kak pohnsehsehla
mehkan me kasansaledahr me pid duwen ketidohn Christ,
me se padahngkier me pahn ketin wia Ieros en Koht; ehi, I
ese me mepwukat kohweieho pahn pak tohto mwohn
amwail pwupwlahsang reht.

3 Oh nin duwen amwail anahne riei kempoak kan en
kasalehwei dahme kumwail en wia, pwehki, amwail apwal
akan; oh e kasaledahr ekis duwen amwail kaunopada
amwail madamadau kan; ehi, oh e kaweid kin kumwailehr
ong ni pwoson oh kanangamah.

4 Ehi, iei me kumwail en ahneki pwoson laud me
rasehng kumwail en padokedi mahseno nan amwail
mohngiong kan, pwe kumwail en song duwen kamwahupen
mahseno.

5 Oh se eseier duwen kalelepek laud me mihmi nan
amwail madamadau kan duwen ma mahseno pahn Ieros en
Koht, de Christ sohte pahn ketin mie.

6 Oh kumwail pil kilangehr me rieio kamehlelehiong
kumwailehr, ni irair tohto, me mahseno rehn Christ me
kin kolahng ni komouro.

7 Rieio kidahr mahsen akau sang Zenos, me komouro
ketido sang Ieros en Koht, oh pil sang ni mahsen akan sang
rehn Zenock; oh e pil doadoahngkier mahsen akan sang
rehn Moses pwehn kamehlelehda me mepwukat me mehlel.

8 Oh met, kilang, I pahn kadehdehiong kumwail duwen
pein ngehi me mepwukat me mehlel. Kilang, I indahiong
kumwail me Christ pahn ketido rehn aramas akan, pwe e
ketiki dipen sapwellime aramas akan, oh me e pahn ketin
tomwikihla dipen sampah; pwe Kauno Koht me ketin
mahsaniher.

9 Pwe mie anahnepen tomw ehu en wiawi; pwe nin
duwen koasoandi lap en Koht Soutuk me mie tomw pahn

wiawi, de ma sohte, aramas koaros pahn mehlahte; ehi, irail me kekeluwaklahr kan koaros; ehi, koaros me pwupwidiher oh salongalahr, oh re udahn lekdekla ma sohte tomw ehu pahn wiawi.

10 Pwe e konehng en mie meirong lap ehu oh me pahn wia keimwsek pen meirong; ehi, kaidehn en aramas meirong, de pil en mahn kerep, de pil en menpihp; pwe e pahn wia ehu meirong en paliwar; ahpw e pahn wia meirong me soh imwi oh meirong en Koht ehu.

11 Ahnsou wet sohte emen aramas me kak meirongkihla pein eh inta me pahn pwainla dipen emen. Ahnsou wet, ma emen kemehla emen, kilang kaidehn atail kosonned kin pwung ma kitail pahn kemehla riego? I indaiong kumwail, soh.

12 Ahpw kosonned anahne mour en mehmeno me wiadahr mwerisuwedo; ihme me kahrehda sohte mekot me sohte kak pahn tomw lapalapo, me pahn itarohng dipen sampah kan.

13 Eri, e konehng me en wiawihda ehu meirong laud oh ehu imwisekpen meirong, oh eri e pahn wiawi, de mie anahnepen me e pahn mie ehu katuktukidi en inta; eri kosonned en Moseso pahn pweida; ehi, e pahn pweida koaros, mwahi koaros oh me pisetik koaros oh sohte ehu pahn sohrala.

14 Oh kilang, met iei wehwe unsek en kosonnedo, me mwahi koaros me kin doakedoake meirong me laud oh keieu mwuhr; oh meirong me laud oh keieu mwuhr pahn iei tompen Ieros en Koht, ehi, me soh imwi oh sapwellimen Koht.

15 Oh nin duwen met e pahn ketikihdo komour ong koaros me pahn pwoson mware; met iei kahrehpen meirong en mwuhr wet, pwe en ketikihdo kalahngan lapalap, me pahn powehdi kopwungo, oh ketikihdo mehkan rehn aramas akan pwe irail en ahneki pwoson ong ni koluhla.

16 Oh sang nin duwen met kalahngano kak kaitarala en kosonnedo pwung kan, oh kalahngan kin kapel irail pene ni sohte keper, eri mehmen me kin sohte doadoahk ki pwoson pwehn koluhla pahn pengpeng lahng kalokolok en anahn akan en kosonnedo koaros.

17 Eri Koht en ketin mweidohng kumwail, riei kan, pwe kumwail en kak tapiada koadoahke amwail pwoson pwe

kumwail en koluhla, pwe kumwail en tepiada likweri sapwellime mwahr sarawio, pwe en ketin mahk ong kumwail.

18 Ehi, likiwerkihong ih duwen kalahngan; pwe ih me ketin roson en doarei kumwaila.

19 Ehi, kihdi pein kumwail, oh nantihlahte kapakap ong ih.

20 Likwerkihong ih ni ansou me kumwail kin mihmi nan mohs akan, ehi, ong ni nounwail sihpw akan.

21 Likwerkihong ih nan imwamwail akan, ehi, duwen tohn imwomwail koaros ni menseng, ni souwas, oh nin soutik.

22 Ehi, likwerkihong ih duwen kehlail en amwail imwitihti kan.

23 Likiwerkihong ih duwen tepelo me wia imwintihti en pwung koaros.

24 Likwerkihong ih duwen amwail tuhke kan nan amwail mwetuwel akan, pwe kumwail en kak pweikihda irail.

25 Likwerkihong ih duwen sihpw akan nan amwail wahu kan, pwe kumwail irail en kak tohtohla.

26 Ahpw kaidehn koaros met; kumwail pahn kihla mohngiongawail reh nan wasahn nekinek likou kan, oh amwail wasa rir akan, nan amwail wasa nan sawptehno.

27 Ehi, oh ni ahnsou me kumwail sohte likiwerkihong Kauno, kumwail en mweidohng amwail mohngiong en direla, kumwail en kapakap ong ih ni ansou koaros ong ni amwail sawas, oh pil ong sawas en arail me mihmi limwahmw.

28 Oh met kilang, riei kempoak kan, I indaiong kumwail, dehr leme me iei koaros met; pwe mwurin kumwail wiahier mepwukat koaros, ma kumwail soikala me semwehmwe kan, oh me kilisou kan, oh sohte pwarehng me soumwahu kan oh me apwal akan, oh kihwei amwail dipwisou, kan ma kumwail udahn pahn wia, ong irail me mihmi nan anahn -- I indaiong kumwail, ma kumwail sohte wiahda ehu ehu rehn mepwukat, kilang, amwail kapakap kin sohte katepe, oh sohte pahn wiahiong kumwail mehkot, oh kumwail iei duwehte mwalaun akan me kin kasohwe pwosono.

29 Eri, ma kumwail sohte kin tamataman me kumwail en limpoak mehlel, kumwail iei ihme duwehte kihd, me

sounkamwakelo kin kesehla, (e solahr katepe) oh aramas kin tiakidiong pahn neh rail akan.

30 Oh met, riei kan, I kangoangehki kumwail me mwurin amwail alehdar kadehde tohto kan, eseier me pwuhk sarawihkan kadehdehier mepwukat, kumwail eri kohdo oh kapwarahda wahn koluhlao.

31 Ehi, I men kumwail en kohdo oh dehr kakeluwakiala nan amwail mohngiong kan; pwe kilang, met iei ahnsou oh rahn en amwail komourala; oh eri ma kumwail pahn koluhla oh dehr kakeluwakiala nan amwail mohngiong kan, plahn en komour lapalapo pahn mwadangete kodohng rehmwail.

32 Pwe kilang, mour wet iei ahnsou me aramas akan en kaunopada pwe irail en tuhwong Koht; ehi, kilang, ni mour wet iei ansou me aramas akan en wiahda arail doadoahk kan.

33 Oh met, nin duwen ei indaiong kumwailehr mahso, nin duwen amwail ahneki sounkadehde me tohto kan, ngehi eri peki rehmwail kumwail en dehr kasakasauala en amwail koluhla lao lel ni imwio de mwurin mour wet, me kodohng kitailehr en kaunopada ong ni mour soutuk, kilang, ma kitail sohte kamwahuijala atail ahnsou ni mour wet, eri pwohng rotorot pahn kohdo me sohte doadoahk kak wiawi.

34 Kumwail sohte kak inda, me ni ahnsou me kumwail lelehr nan ahnsou apwalo, me I pahn koluhla, pwe ien pwurala rehn ei Koht. Soh, ke sohte kak inda met, pwe ngehnohte me kolokol paliwaromwen ni ahnsou me kowe mwesel sangehr nan mour wet, ihte ngehno me pahn ahneki manaman en kolokol paliwaromwen nan sahpwo kokkohahte.

35 Pwe kilang, ma kumwail pahn kapwandehla rahn en amwail koluhla lao lel amwail mehla, kilang, kumwail milahr pahn ngenen tepelo, oh e pahn katengehdi kumwail en wiahla nah; eri Ngenen Kauno ketisang rehmwailehr, oh solahr sapwellime wasa loalemwail; oh tepelo eri kolokolehr manaman koaros rehmwail, oh met iei keimwsek lahn irair suwed akan.

36 Oh met I ese, pwe Kauno ketin mahsanhier me e sohte kin ketiket nan tehnpas akan me sohte sarawi, ahpw e kin ketiket nan mohngiong me pwung kan; ehi, oh e ketin pil mahsanhier me irail me pwung kan pahn mwohdalahr

nan sapwellime wehio, oh re ahpw solahr pahn kohlasang wasao; ahpw arail likou kan pahn pwetepwetkihla intahn simpwulo.

37 Oh met riei kempoak kan, I kin anahne kumwail en tamataman mepwukat koaros, oh me kumwail en koadoahkehda amwail mour mwohn Koht sang ni masak, oh kumwail en dehr kasohwe duwen ketidohn Christ.

38 Pwe kumwail en solahr kin uhwong Ngehn Sarawio, ahpw kumwail en alehda Ngehn Sarawio; oh kumwail alehiong kumwail mwaren Jesus Christ; pwe komwail en karakarahkala rasohng pwel par, oh kaudekiong Koht ni ngehn oh mehlel nan wasa sohte lipilipil me kumwail pahn mie; oh me kumwail en momour ni amwail kaping rahn koaros, pwehki kalahngan akan oh paih kan me e ketikihong kumwailehr.

39 Ehi, I pahn kaweid kin kumwail, riei ohl akan, kumwail en poaden pirida kapakap, pwe kumwail en sohte kak iangala kasongsong kan sang rehn tepelo, pwe en dehr kin powehdi kumwail, pwe kumwail en dehr mihla pah ni rahn en neko; pwe kilang, e pahn kin kihong kumwail pwais me sohte mwahu.

40 Oh met riei kempoak kan, I pahn kaweid kin kumwail en ahneki kanangamah, oh me kumwail en kanangamah ong soangen kahpwal koaros; pwe kumwail en dehr lahlahwe irail akan me kausieilahr kumwail liki, pwehki kumwail, me semwehmwe mehlel pwe kumwail de wiahla me dipan ekei duwehte irail.

41 Ahpw me kumwail en ahneki kanangamah, oh kanangamah ong amwail apwal akan, sang ni koapwoaroapwoar laud me ehu rahn kumwail pahn kommoaldi sang amwail apwal akan.

Kosonned akan en Alma ong nah pwutak Corianton. Wiadahr iralaud 39 lel 42 koaros.

IRALAUD 39

Nenek iei tiahk samin ehu -- Dipen Corianton kan kihsang en mehn Zoram akan en alehda mahseno -- Sapwellimen Christ komouro iei me manaman en komourla me pwoson akan mihier mwohn komouro.

1 Oh met, nei pwutak, pil mie ekis me I men padahkihong uhk sang dahme I indaiong riomwo; kilang, iaduwe, ke saikinte kilang duwen tengeteng en riomwo, sang ni eh loalapwoat, oh eh ngoang en dadauhr kosonned en Koht akan? Kilang, kaidehn e kasaleiong uhkehr karasepe mwahu ehu?

2 Pwe ke sohte kin karonge laud mahsen kan sang ie duwehte riomwo, rehn mehn Zoram akan. Met iei me I kin uhkiong uhk; ke kin wenlahte suweiki ahmw kehl oh loalokong.

3 Oh met kaidehn koaros, nei pwutak. Ke kin wia mehkan me kin kapahtou ongie, pwe ke soikalahr doadoahk en lamalam, oh kolahr rehn Isabel me kin netiki paliwere nan sapwen Siron ni irepen sapwen mehn Laman akan.

4 Ehi, e kihsangehr mohngiong en me tohto, ahpw met sohte mahk pahn kohieng uhk, nei pwutak. Pwe ke udahn pahn apwali doadoahk en lamalam me kohieng uhkehr.

5 Nei pwutak, dah, ke sehse me mepwukat me kin wia tiahk samin ehu mwohn sihlangin Kauno; ehi, iei ihme keieu samin sang koaros, ihte kakerehdi inta mwakelekel de kamahm kihla Ngehn Sarawi?

6 Pwe kilang, ma ke kin lahlahwe Ngehn Sarawio me mie ehu ansou e ketier rehmw, oh ke ese me kowe kin lahlahwe, kilang, dihp wet sohte kak lapwada; ehi, oh mehmen me kin mwersuwed ni e kin uhwongada marain oh erepit en Koht, e sohte pahn mengei ong ih en alehda mahk; ehi, I indaiong uhk, nei pwutak, me e sohte mengei ong ih en alehda mahk.

7 Oh met, nei pwutak, I men kowe en dehr dipaniki dihp laud wet rehn Koht. I sohte men wenlahte kosoia dipomw akan pwe en kin kamedekeiukala, ma kaiden e pahn wia mehn kamwahupemw.

8 Ahpw kilang, ke sohte kak karukiala dipoamw akan sang Koht; oh ihte ma kowe sohte koluhla dipoamw kan pahn wia mehn kadehde iuk ni rahn neko.

9 Met nei pwutak, I men ken koluhla oh en soikala dipoamw akan, oh dehr kolahng wasa kan me pwoaren mesemw akan kin noahrokke, ahpw dehr pein kihong uhk ong nan mepwukat; pwe ma ke pahn wia met, ke sohte pahn kak sohsohki wehini Koht. O, tamataman, ken alehiong uhk oh panguhkala ong ni mepwukat.

10 Oh I padahkihong uhk en alehda uhk met ong ni mehn kaweid kin uhk iangahki riomw me mahkan nan amwail doadoahngkan; pwe kilang, kowe mihmi nan omw pwulopwul, oh kin anahne sawas sang riomw akan. Oh kowe en kin rong arail kaweid.

11 Dehr mweidohng mehkot me sohte katepe oh pweipwei en kin kahluwa iukala; dehr mweidohng tepelo en kahluwahla ahmw mohngiong en rehn lien nenek dipan akan. Kilang, O nei pwutak, ia uhwen dihp laud me kowe pahn kihong mehn Zoram; pwe ni ansou me irail kilangehr ahmw wiewia, re ahpw pahn sohte kamehlele mahsen akan sang ie.

12 Oh met Ngenen Kauno ketin mahsanihongiehier: Padahkihong noumwail seri kan en kin wiahda mwahu; pwe irail de kahluwahla mohngiong en me tohto en mehla; ihme kahrehda I padahkihong uhk, nei pwutak, sang ni ei masak Koht, pwe kowe en liksang ahmw suwed akan.

13 Pwe kowe en sohpeilahng Kauno ki omw lamalam unsek, ngehn unsek, oh kehl unsek, pwe kowe en dehr kahluwahla arail mohngiong kan en wiahda suwed; ahpw kowe en kapwure irailedo, oh wek ong irail ahmw sapwungla kan oh me sapwung me ke wiadahr.

14 Dehr rapahki kepwehpwe de me sohte katepe kan en sampah wet; pwe kilang kowe sohte kak wa irailada.

15 Oh met, nei pautak, I pahn indahiong uhk ekis duwen ketido en Christ. Kilang, I indahiong uhk, me e udahn pahn ketido pwehn ketikihsang dipen sampah kan; ehi, e ketidohng kasalehda rong kaperen en komouro ohng sapwellime aramas akan.

16 Oh met, nei pwutak, met iei doadoahk me ke lukdohngehr, pwe en kasalehiong aramas pwukat rohng kaperen pwukat, pwe en kin kaunopada arail lamalam; de ehme me komouro en kak kodohng irail, pwe irail en kak kaunopada medemedewehn neirail serihkan en rong mahseno ni ansou me e pahn ketido.

17 Met I pahn ekis kansenamwahuiala nan ahmw madamadau ong ni mehwet. Kilang, ke kin doandoaropwe ong ni dahme kahrehda mepwukat en sansalada ni e saikinte keren. Kilang, I indahiong komwail, dah sohte emen ansou wet me kesempwal rehn Koht duwehte irail akan ni ansou me e pahn ketido?

18 Dah, sohte anahnepen plahn en komouro en sansal ong aramas pwukat duwehte neirail serihkan?

19 Kaidehn, e sohte pahn mengei ong Kauno ansou wet en ketin poaroanehdo sapwellime tohnleng en kasalehiong rohng kaperen pwukat ong kitail duwehte ong neitail serikan, de sang mwurin ansou me e pahn ketido?

IRALAUD 40

Christ ketin eledahr iasada en aramas koaros -- Me pwungkan me melahr kin kohla paradais oh me dipan akan kin kohla nan ehl pwe irail en awiawi rahn en arail iasadao -- me koaruhsie pahn pwuralahng nin duwerail oh mwomwarail unsek ni ansou en iasadao.

1 Nei pwutak, met, mie ekis me I pahn indaiong uhk; pwe I eseier me nan ahmw madamadau pwunodkidahr duwen iasadahn me melahr akan.

2 Kilang, I indaiong uhk me sohte iasada -- de, I en inda, pil ehu, me paliwar en mehla wet sohte pahn kin wia paliwar me pahn momour kokkohlahte, olahn paliwar wet sohte pahn kamwahula -- lao mwurin ketidohn Christ.

3 Kilang, ih me ketin wiadahr iasadahn me melahr akan. Ahpw kilang, nei pwutak, iasadahn me melahr akan saikinte pahn wiawi. Met, I pahn kasalehiong uhk, me rir ehu, ahpw, mie me tohto me wie nekinek, me sohte emen kin ese, ihte Koht me ketin mwahngih. Ahpw I pahn padahkihong uhk mehkot me I pekihier rehn Koht ni ngoang pwe I en kak esehla -- Me pid duwen iasadao.

4 Kilang, mie ansou ehu me kileldier me aramas koaros pahn iasada sang mehla. Met sohte emen ese ni ansou wet me e pahn wiawi; ahpw Koht ete me ketin mwahngih ansou me kilelediero.

5 Met, ma e pahn mie pak ehu, de pak riau, de pak siluh, me aramas akan pahn iasada sang mehla, e sohte katepe ongie; pwe Koht ete me ketin mwahngih mepwukat koaros, oh e itarehr me ien ese me iet iei irairo -- me mie ehu ansou kileledier me aramas koaros pahn iasada.

6 Met mie anahnepen ansou nan pwungen ansou en mehlah oh ansou en iasadao.

7 Oh met I pahn peki, dahme pahn wiawihong ngenen aramas akan sang ni ansou en mehla met lao lel ansou me kilelediongehr iasadao?

8 Met ma mie ansou me kileldier ong aramas en iasada dauli pahn pak ehu, e sohte katepe ongie; pwe koaros sohte kin melahte ansou kis. Koaros pahn kin rasehng rahh ehute rehn Koht, oh ihte aramas me kin wadek ansou.

9 Ihme kahrehda, mie ansou ehu me kileldier ong aramas koaros en iasada sang mehla; oh mie ansou nan pwungen ansou mehla oh ansou en iasada. Oh met, nin duwen erein ansouo, dahme kin wiawihong ngehn en aramas akan iei me I pekilar rehn Kauno ni ngoang pwe I en esehla; oh met iei duwen me I ese.

10 Oh ni ansou pahn kohdo me koaros pahn iasada, eri irail pahn esehla me Koht ete me ketin mwahngih ansou kan koaros me kileledier ohng aramas akan.

11 Met, me nin duwen irair en mour nanpwungen mehla oh iasada -- Kilang, e sansalohngiehier sang rehn tounleng emen, me ngenen aramas koaros, ni ansou ohte me irail mwesel sangehr paliwahr en sampah wet, ehi, ngehn en aramas koaros, ma irail pahn mwahu de suwed, irail pahn kolahng deurail rehn Koht me ketikihong irail mour.

12 Oh e pahn wiawi, me ngenen me pwung kan pahn kasamw ong wasahn pereperen, me kahdaniki paradais, wasahn kommoal ehu, wasahn meleilei ehu, wasa me irail koaros pahn kommoaldi sang arail kehnaudek kan oh arail pwukoah, oh arail pahtou.

13 Oh e pahn wiawi me ngehn suwed akan, ehi, irail me dipan akan -- pwe kilang, sohte arail pali de mehkot sang rehn Kaun; pwe kilang, irail kin pilada doahk suwed sang doahk me mwahu: Ihme kahrehda, ngenen tepelo kin pedelong loaleraill, oh pahn kin kohwakilahr imwarail akan -- oh irail pwukat pahn kin lekidekla nan rotorot; me pahn mie mwahmwahiei, oh weriwer, oh tehtehrek en ngih kan, oh met pwehki duwen diparail akan, sang ni arail selidier sang ni koasoandi en tepelo.

14 Met iei ihme wasahn ngenen me suwed akan, ehi, nan rotorot, oh wasa ehu me kin suwed, mwohmw kamasepwehk en lullul en engieng en Koht ohng irail; met irail pahn mihmi nan wasaht, duwehte me pwung kan nan paradais, lao lel ansou en iasada.

15 Met, mie ekei irail me wehwehki lahr me met iei wasahn pereperen oh wasahn lokolok en ngehn, mwohn iasado. Ehi, I inda me e pahn kahdaniki iasada, me iasadahn ngehno de paliwar unsek or arail en kolahng pereperen oh lokolok, nin duwen mahsen akan me sansalehr.

16 Oh kilang, e pil sansansalehr, me pahn mie iasada keieu ong irail koaros me melahr akan, de mehkan me melahr met, de mehkan me pahn mehla lao lel en Christ ketin iasada sang me melahr akan.

17 Met, se sohte kin lemecki me met iei ihme iasada keieu, me sansalehr ni mwomw wet, kitail sohte lemeckiong me met iei iasadao en aramas akan oh arail kolahng pereperen de lokolok. Ke sohte kak lemecki me iei wehwehn met.

18 Kilang, I indaiong uh, soh; ahpw e wehwecki me patpenehn ngehno oh paliwahro, en irail akan sangete ni rahn en Adam akan lao lel ni iasadahn Christ.

19 Met, ma ngehn akan oh paliwar en irail akan me sansalehr me koaros pahn pwurepene ansou ehu, me dipan akan duwehte me mwahu kan. I sohte inda; e itarehr, pwe I kosoia me irail koaros pahn iasada; de pil ehu, arail iasada en wiawi mwohn iasada en irail akan me melahr mwurin iasadahn Christ.

20 Met, nei pwutak, I sohte inda me arail iasada pahn kohdo ni en iasadahn Christ; ahpw kilang, I kihwei sang nin duwen ei pepehm, me ngehn akan oh paliwar en me pwung kan pahn pwurepene ni iasadahn Kraiso, oh eh ketidahla nanleng.

21 Ahpw ma pahn wiawi ni sapwellime iasadao de mwuri, I sohte inda; ahpw iet uhwen me I kak koasoia, me mie erein ansou ieu nan pwungen mehla oh iasadahn paliwahro, oh irair ehu ngehn akan pahn pereperen oh lokolok lao lel ansou me Koht ketin kileledier ong me melahr akan en iasada, oh ngehn oh paliwar pahn pwurehng patpene, oh pahn wisikido pwe irail en kesihnen mwohn Koht, oh en ale kadeik sang nin duwen arail doadoahngkan.

22 Ehi, met kahrehdahr kapwurupwuredahn mehkan me kohsangehr nan ewen soukohp akan.

23 Ngehno pahn pwuredohng paliwahro, oh paliwahro pahn pwurelahng ngehno; ehi, oh peh koaros, neh koaros oh

kakon koaros pahn pwurelahng paliwahro; ehi, pil duwehte piten moang ehu sohte pahn salongala; ahpw mehkoaros pahn pwurelahng ni udahn oh unsekpen mwomwarail.

24 Oh met, nei pwutak, met iei kapwurupwuredao me kohsangehr nan ewen soukohp akan --

25 Oh eri me pwung kan pahn linganla nan wein Koht.

26 Ahpw kilang, mehla suwed ehu pahn kohieng irail me dipan akan; pwe irail pahn mehla sang ni mehkan me pwung; pwe irail me samin, oh sohte me samin kot kak sohsohki wein Koht; ahpw irail pahn ledekla, oh kolahng pwe irail en alehda wahn arail doadoahk laud kan oh arail doadoahk kan, me kin suwed; oh irail pahn nimasang me samin akan nan kep me sadiko.

IRALAUD 41

Ni iasadao aramas akan kodohng irair en popohl de lokolok kohkohlahte -- Suwed kaidehn mwahn popohl -- Aramas me kin ahneki ineng en uduk sohte Koht reh rail nan sampah -- Aramas koaros pwurehng alehda ni ansou en kapwurupwuradao mwomwarail oh ahneperail me re wiahda sampah.

1 Oh met, nei pwutak, mie ekis me imen kosoia duwen kapwurupwuredohn mehkan me mahseneperail wiawiher; pwe kilang, ekei wekidalahr mahsen en Koht akan, oh kadohlasangehr me pwungo pwehki met. Oh I esehier me nan omw madamadau kin pil pwunodkidahr duwen met. Ahpw kilang, I pahn kawehwe ong uhk.

2 I indaiong uhk, nei pwutak, me koasoandi en kapwurupwuredo kin anahne kosonned en Koht; pwe iei ihme kin anahne mehkoaos en kin pwurelahng nin duweo. Kilang mie anahnepe oh pwung, nin duwen manaman oh iasadahn Christ, pwe ngenen aramas en pwurelahng paliwahro, oh kisehn paliwar akan koaros pahn pwurelahng nin duweo.

3 Oh iei e kin anahne kosonned en Koht pwe aramas akan pahn kadeik nin duwen arail doadoahk kan; oh ma arail doadoahk kan kin mwahu nan mouret, irail pahn pil pwurehng mehkot me kin mwahu.

4 Oh ma arail doadoahk kan kin suwed, irail pahn pwurelahng ale me suwed. Ihme kahrehda, mehkoaros pahn kin kapwurupwurelahng nin duwen ahneparail, mehkoaros pahn pwurehng nin duwen mwohmwarail akan -- Me melahr akan pahn iasadahng mour kokkohlahte -- Mwasahngotala ong ni solahr mwasahngotala -- iasadahng mour poatoapoat pwe en sohsohki wein Koht, de pil iasadahng pwe irail en sohsohki wein tepelo, ehu ong ni ehu, oh ehu ong ni mehteio --

5 Mehmen me iasadahng popohl kin kohsang nin duwen eh kin anahne popohl, de iasadahng mwahu kin kohsang nin duwen eh kin anahne mwahu; Oh mehteio iasadahng ni me suwed me iei ihme sang ni eh anahn suwed akan; pwe nin duwen e kin anahnedahr wiahda me suwed rahno pwon, iei ihme kahrehda e pahn ahneki pwais suwed, ni ansou me pwohng pahn lelledo.

6 Oh iei me pahn wiawi duwehte palio. Ma e kolukilahr dipihkan, oh kin anahne pwung lao imwin eh rahn akan, iei me kin kahrehda e pahn ketingki me pwung.

7 Mepwukat iei irail me Kauno ketin pwaindahr; ehi, irail pwukat me katohrohr sangehr, me pitsangehr nan rotorot en pwohng kokkohlahte; oh met irail aramas koaros pahn kin kesihnen de pwupwidi, pwe kilang, irail me kin pein wia arail sounkopwung kan, ma irail pahn kin wiahda mwahu de wiahda suwed.

8 Met, koasoandi en Koht akan kin sohte kak wekila; ihme kahrehda, ahlo kaunopadahr pwe mehmen me anahne alu loale, ah e pahn komourla.

9 Oh met kilang, nei pwutak, kaleke kowe songen wiahda ehute dihp ong Koht sang ni oaretik en padahk kan, iei me kowe kin songen wiahda lao lel ni ansou wet.

10 Kaleke kowe lemehta, pwehki mahsen akan wiawiher duwen kapwurupwuredo, me ke pahn pwuredohng popohl sang dihp. Kilang, I indaieng uhk, suwed, kaidehn mwahn popohl.

11 Oh met, nei pwutak, aramas koaros me mihmi nin duwen irair en arail kapikipikdahro, de ien inda, ni irair en pali uduk, irail kin mihmi nan kapahtou oh nan selidien dihp; sohte arail Koht nan sampah, oh irail kin peliandahr duwen koasoandi en Koht; ihme kahrehda, irail kin mihmi nan irair ehu me kin pelianda koasondi en popohlo.

12 Oh met kilang, pwe dah, iei wehwehn lepin koasoai kapwurupwuredo pwehn ale mehkot me mihmi nin duwen e kapikipikadahro oh kawikalahng nan ehu irair tohrohr, de kihong nan irair ehu me pelianda duwen ahnepeo?

13 Oh, nei pwutak, met kaidehn iei irairo; ahpw wehwehn lepin lokaia kapwurupwuredo iei en pil kapwuredo me suwed ohng me suwed, de anahn en pali uduk ohng anahn en pali uduk, de doahk en tepelo ong ni doahk en tepelo -- mwahu ong mehkot me mwahu; pwung ong mehkot me pwung; mehlel ong ni mehkot me mehlel; kalahngan ohng ni mehkot me kalahngan.

14 Eri, nei pwutak, kilang pwe kowe en kin kadek ong riomw kan; doadoahk pwung, tenek pwung, oh kin wia me mwahu kaukaule; oh ma kowe kin wiahda mepwukat koaros, eri kowe pahn alehda ahmw sohso; ehi, kadek pahn pil pwuredo rehmw pwe kowe en ahneki; pwung pahn pil pwuredo rehmw pwe kowe en ahneki, oh tenek pwung pahn pil pwuredo rehmw pwe kowe en ahneki; oh kowe pil ahneki sohso mwahu.

15 Pwe dahme kowe kin kihla pahn pil pwurodohng uhk, oh en kin kapwurupwuredo; lepin lokaia kapwurupwuredo kin kasuwedi mehlel me dipano, oh sohte mwahn kin kamwahui ih.

IRALAUD 42

Mour en sampah iei ansoun kasongsong pwe aramas en kak koluhla oh papah Koht -- Pwupwilao kahrehda melahn paliwar oh pali ngehn ong aramas koaros -- Komouro kohsang ni koluhla -- Pein Koht ketin tomwikiher dipen sampah kan -- Mehkan koaros pahn milahr pahn kosonned en Koht -- Mahk miehla pwehki tomwo -- Ihte irail me koluhla kan pahn komourala.

1 Oh met, nei pwutak, I eshier me mie mehkai me kin kapwunode nan ahmw lamalam, me kowe sohte kak wehwehkihla -- me pid duwen kopwung en Koht ong ni kalokepen me dipan akan; pwe kowe kin songen medewe me e sapwung duwen me dipano en kin kolahng ni ehu irair en kalokolok.

2 Met kilang, nei pwutak, I pahn kawehwe ong uhk meuwet. Pwe kilang, mwurin Kaun Koht ketin poaroanelahr tepin atail pahpa oh nohno sang nan mwetuwel en Eden, pwe ira en koadoahkehda pwehlo, wasa me ira wiawidahr sangie, ehi, e ketiki sangehr ira, oh e ketikihdiong ni pali mesehn mwetuwel en Eden, kerupim, oh kedlahs kisinie pwoat me kin umpwul sirangarang ong ni pali koaros, pwe en kin sinsile tuhke komouro --

3 Met, me kitail ese me aramas duwelahr Koht, ese me mwahu oh me suwed; oh pwe e de kin kihla peho, oh pil ale tuhkehn komouro, oh kang, oh momour kokkohlahte, Kauno Koht ahpw ketikidier wasao kerupim oh kedlahs kisinie pwoat, pwe en dehr kang wahn tuhkeo.

4 Oh met kitail wehwehkier, me mie ansou ehu me mweimweiong aramas en koluhla, ehi, ansoun songisong ehu, ansou en koluhla oh papah Koht.

5 Pwe kilang, ma Adam mwadangete kihla peho, oh alehda tukehn komouro, e pahn momour kokkohlahte, eri, sang nin duwen mahsen en Koht, e sohte pahn wia aramasla pwe en koluhla; ehi, oh pil mahsen en Koht solahr pahn oh plahn en komour kesempwalo solahr pahn pweida.

6 Ahpw kilang, e kohleng aramas en mehla -- ihme kahrehda nin duwen ara lekdeksang tukehn komouro, ira pahn pil lekdeklahsang, sampah -- aramas pahn salongala kokkohlahte, ehi, irail wiahla aramas pwupwila kei.

7 Oh met, ke ese me sang met me tepin atail pahpa oh nohno lekdek sangehr mwohn sihlengin Kauno ni paliwar oh pali ngehn; oh met irail wialahr aramas ekei me pahn idawehn pein insenarail.

8 Met kilang, e sohte konehng aramas en kolang melahn paliwar, pwe e pahn kauwehla koasoandi lap en popohlo.

9 Ihme kahrehda, nin duwen ngehno oh palwahro sohte kak mehla, oh pwupwilao wadohng aramas koaros mehla en ngehno duwehte melahn paliwahro, iei me, irail palidi sangehr mwohn Kauno, ihme konehng aramas koaros en komourla sang melahn ngehn wet.

10 Ihme kahrehda, nin duwen arail kin ahneki ineng en uduk, re kin pereniki tiahk en sampah, oh tiahk en tepelo, sang nin duwen arail koasoandio, irair en kasongsong wet

wialahr irair ehu ong irail en kaunopada; e wialahr irair en kaunopada ieu.

11 Oh met tamataman, nei pwutak, ma kaidehn plahn en komouro, (solahr doadoahk) ni ansouhte me irail mehla, ngehnirail akan pahn kin weirek sang ni arail palidi sang mwohn sihlengin Kauno.

12 Oh met, sohte mehkot mie pwe en kin kapwurehdo aramas akan sang ni irair en pwupwila, me pein aramas akan wiahiong irailehr pwehki sang pein arail sapeik.

13 Ihme kahrehda, nin duwen kosonnedo, plahn en komouro sohte kak wiawi, ihte ma e pahn mihmi ni irair en koluhla en aramas akan nan irair en kasongsong wet, ehi, irair en kaunopada wet; pwe ma kaidehn irair pwukat, kalahngan sohte kak wiawi ahpw e pahn kauwehla doadoahk en kosonnedo. Met doadoahk en kosonnedo solahr pahn ohla; ma iei, Koht solahr pahn ketin wia Koht emen.

14 Oh met kitail ese me aramas koaros pwupwilahr, oh irail milahr pahn kosonnedo; ehi, iei kosonned en Koht, me kihong irail en lekdeksang mwohmw sihlangio.

15 Oh met, koasoandi en mahk sohte kak wiawi, ihte ma ehu tomw pahn wiawi; ihme kahrehda, pein Koht me pahn ketin tomwikihla dipen sampah, pwe en ketikihdo koasondi en mahko pwe en kaitarala anahnepen kosonnedo, pwe Koht en ketin wia Koht unsek oh mehlel, oh pil Koht kalahngan emen.

16 Met, koluhla sohte kak kodohng aramas, ihte ma mie kalokolok ehu, me pil iei kin sohtuk duwehte mour en ngehn kin wia, me kin kohsang ni uhwongada koasoandi en popohlo, me pil kin poatoapat soutuk rasehng mour en ngehno.

17 Met eri, ia duwen aramas emen en kak koluhla, kaidehn ihte ma e dihp? Ia duwen e kak dihp, ma sohte kosonned? Ia duwen kosonned ehu en kak miehla, kaidehn ihte ma mie ehu kalokepe pahn miehla?

18 Met, miher ehu kalokolok me wiawidahr, oh ehu kosonned mehlel wiawidahr, me wadohr pepehm en koluhla ong aramas.

19 Met, ma sohte kosonned ehu wiawihda -- ma emen pahn kemehla emen e pahn mehla -- dah, e pahn masak en mehla ma e pahn mwersuwed?

20 Oh pil, ma sohte kosonned wiawidahng dihp, aramas sohte pahn kin masak en wiahda dihp.

21 Oh ma sohte kosonned wiawihda, dahme kosonnedo, de pil kalahngano kak wia, ma aramas pahn wiahda dihp, kaidehn sohte arail pwung pohn emenemen?

22 Ahpw mie kosonned ehu me kodahr, oh kalokepeo kohsangehr ni kosonnedo, oh koluhlao kodahr; iei koluhlao, me mie eh pwungen alehda kalahngano; pwe kosonnedo pwaindah aramas oh doadoahngkier kosonnedo, oh kosonnedo kidahr kalokepeo; oh ma soh, doadoahngkan en kosonnedo pahn ohla, oh Koht solahr pahn ketin wia Koht emen.

23 Ahpw Koht sohte kin ketin tukidihsang eh ketin wia Koht, oh kalahngano pwaindah me koluhlao, oh kalahngano wiawi pwehki tomwo; oh tomwo me kahrehda iasadahn me melahr akan, oh iasadahn me melahr akan me kapwurelahr aramas akan rehn Koht; oh met irail pwurelahngehr mwohn sihlangin Koht, pwe irail en kadeik nin duwen kosonnedo oh pwuhngo.

24 Pwe kilang, pwuhngo kin doadoahk ki eh anahn koaros, oh pil kalahngano pwaindah koaros irail me e nainiki; oh met, sohte emen, ahpw ihte irail akan me kin koluhla ni mehleh me pahn komourala.

25 Dah, kumwail kin leme me kalahngano kak pirapa pwuhngo? I indaiong kumwail, soh; sohte kak, ma iei, Koht solahr pahn ketin wia Koht emen.

26 Oh met iei duwen Koht eh ketikihdo kahrepe me soutuk kan, me kaunopadah sang ni poahsoan en sampah. Oh met wadohr komour oh pweipweidahn aramas akan, oh pil arail mehla oh lokolok.

27 Eri, O nei pwutak, mehmen me pahn kohdo a ih en kohdo oh ale pilen komour ni sohte pweine; oh mehmen me sohte pahn kohdo, ihete me sohte kin idingki ih en kohdo, ahpw ni rahn neko, e tiahk kan pahn kapwurupwurieng ih.

28 Ma e kin anahne wiahda suwed, oh sohte koluhla nan eh rahn akan, kilang, suwed me pahn kohieng ih, nin duwen en Koht eh pahn ketin kapwurehiong ih.

29 Oh met, nei pwutak, I men kowe en dehr mweidohng mepwukat en kin kedirepweiuk, oh ihte mweidohng dipomw akan en kin kedirepwe iuk, sang ni kedirepw wet e pahn kin kahrehiong uhk en koluhla.

30 O nei pwutak, I men ken solahr kin kasohwe pwung en Koht. Ke dehr kin songen kihsang uhk mwahi me keieu tikitik pwehki dipoamw akan, sang ni omw kin kasohwe pwung en Koht; ahpw kin mweidohng pwung en Koht, oh sapwellime kalahngan, oh sapwellime lokolok en kin mwekimwek nan omw mohngiong; oh en kihinukdihla nan pwehlo pwe kowe en karakarahkala.

31 Oh met, O nei pwutak, Koht ketin malipei iukehr pwe kowe en padahkihong aramas pwukat mahseno. Oh met, nei pwukat, kohla oh kalohki mahseno ni mehleh oh pwung, pwe kowe en kak wahdo mour tohto en koluhla, pwe koasoandi kalahngan lapalapo en ahneki pwung en alehda irail. Oh Koht en ketikihwei rehmw nin duwen me I kasaledahr.

PWUKEN HELAMAN

Kokohp en Samuel, mehn Laman, ong mehn Nephi kan, me kapatapat penehr oh wiahda iralaud 13 lel 15.

IRALAUD 13

Samuel mehn Laman, kohpadahr duwen olahn mehn Nephi kan, ihte ma re koluhla -- Irail oh arail pahi akan rialahr -- Irail soikalahr oh kin kate soukohp akan, ngehn saut akan kin kapelpene irail oh re kin rapahki peren ni arail kin wiewia suwed.

1 Oh e wiawiher me ansou wet e lelehr sounpar welihsek-wenu, mehn Nephi kan mihmihte nan arail wiewia suwed akan, ehi, suwed kouwahlapie, a mehn Laman akan me kin loaloapwoat ong ni arail nantiheng en wiahda kosonned akan en Koht, nin duwen kosonned en Moses.

2 Oh e wiawiher me nan pahrohte mie emen Samuel, mehn Laman, kodohngehr nan sapwen Zarahemla, oh tepier padahkohng aramas akan, oh rahn tohto me e kin padahk ki duwen koluhla ong aramas akan, oh irail kin pwakih, oh e kereniong pwuralahr nan udahn sapwe.

3 Ahpw kilang, kapitien Kauno peidohngehr pwe en pil pwurala oh kohpehng aramas akan duwen mehkan me pahn kodohng nan eh mohngiong.

4 Oh irail sohte kin mweidohng pwe en kin pedelong nan kahnimwo; eri e kolahr oh douda pohn kehl en wasao, oh kapahwei peh kan oh ngihllaudida oh wie kokohp ong aramas akan nin duwen mehkan me Kauno ketikihiohng.

5 Oh e ahpw indaiong irail: Kilang, ngehi, Samuel, mehn Laman emen, me kin kasalehda duwen mahsen akan en Kauno me e ketikihongehr nan mohngiongi; oh kilang e ketikihongehr nan mohngiongi pwe ien indaiong aramas pwukat me kedlahs en pwungo kin wie tentenek pohn aramas pwukat; oh e sohte pahn dauili sounpar pahpwiki me kedlahs en pwungo pahn pwupwidiong pohn aramas pwukat.

6 Ehi, ohla laud me kin awiawi aramas pwukat, oh mehlel e pahn leledohng aramas pwukat, oh sohte me kak kamaurala aramas pwukat, ihte sang ni koluhla oh pwoson Kaun Jesus Christ, me ni mehlelo pahn ketido sampah, oh pahn ketin lokolongki me tohto oh pahn ketin matkihla sapwellime aramas akan.

7 Oh kilang, oh tounleng en Kauno me kasaleiongieher, oh wadohr rong kapereno ong nan ngeni. Oh kilang, e ketin poaroneiehdo pwe I en pil padahkiong kumwail, pwe kumwail en ahneki popohl en rong kapereno, ahpw kilang kumwail pahn soikiehla.

8 Eri, iet me Kauno ketin mahsanih: Pwehki kekeluwak en mohngiong en mehn Nephi kan, I pahn kihsang ei mahseno rehrail, oh ngeni pahn kohsang irail, oh I solahr pahn mweidohng irail oh I pahn wekidala mohngiong en riarail kan en uhwongada irail.

9 Oh sounpar pahpwiki sohte pahn nekila mwohn ei pahn kahrehiong irail en ohla; ehi, I pahn tukkihiong irail kedlahs oh lehk oh soumwahu.

10 Ehi, I pahn pwarehng kin irail ni ei lingeringer laud, oh irail me dih kapahieu me pahn momour, sang amwail imwintihti kan pahn kilang amwail udahn ohla; oh met ni mehlel pahn pwarada; oh ni dih kapahieu me amwail ohla kan pahn pwarohng kumwail, ihte ma kumwail pahn koluhla, Kauno me ketin mahsanihier met.

11 Ahpw ma kumwail pahn koluhla oh pwurodohng Kauno amwail Koht, ei lingeringer pahn sohrala, Kauno me mahsanihier met; ehi, iet me Kauno mahsanier, mehd pah irail me pahn koluhla oh sopeidohngie, ahpw meid suwediong ih me sohte pahn koluhla.

12 Ehi, mehd suwediong kahnimw lap wet en Zarahemla; pwe kilang, pwehki irail me pwung akan me pahn pitila; ehi, meid suwediong kahnimw lap wet, pwe I wehwehkier me mie me tohto, ehi, duwehte pali tohto en kahnimw lap wet, me pahn kekelwakiala arail mohngiong ongie, Kauno ketin mahsanier.

13 Ahpw mehd pah irail akan me pahn koluhla pwe iei irail me I pahn men komourala. Ahpw kilang, ma sohte me pwung kan me mihmi nan kahnimw lap wet, kilang, I pahn mweidohng kisiniei en kohdihdohsang nanleng oh kauwehla kahnimw wet.

14 Ahpw kilang, irail me pwung kan me kahrehiong en sohte ohla. Ahpw kilang, ansouo pahn kohdo me Kauno ketin mahsaniher, me ni ahnsou me kumwail pahn kesehla me pwung sang nan pwungamwail, eri iei ahnsouo pahn konehngehr kumwail en kamala; ehi, meid suwed ong kahnimw lap wet, pwehki wiewia suwed oh tiahk kelingeringer akan me mihmi loale.

15 Ehi, meid suwediong kahnimw en Gideon, pwehki wiewia suwed oh tiahk kelingeringer akan me mihmi loale.

16 Ehi, oh meid suwediong kahnimw akan me mihmi seli nan sahpwet me mehn Nephi akan sapweniki, pwehki wiewia suwed oh tiahk kelingeringer akan me mihmi loaloraihl.

17 Oh kilang, ria ehu pahn pwaradahng sahpwet, Kauno wasa lapalahpie me ketin mahsaniher, pwehki irail akan me mih pohn sahpwet, ehi, pwehki arail wiewia suwed oh tiahk kelingeringer.

18 Oh e pahn wiawi, me Kauno wasa lapalahpie ketin mahsaniher, ehi, atail Koht lapalap oh Koht mehlel, me mehmen me karukiala paih kan nan sampah sohte pahn pwurehng diarada, pwehki sahpwet rialahr mehlel, ihte ma ih aramas pwung emen oh e pahn kin karukiala rehn Kauno.

19 Kauno ketin mahsaniher: Imen irail en karukiala arail paih kan rehi, oh ria en kohieng irail akan me sohte nekidala arail paih kan rehi; pwe ihte irail me pwung kan me kin karukiala arail paih kan rehi; oh mehmen me sohte kin karukiala eh paih kan rehi, ih en riahla, oh pil eh paih kan, oh sohte dipwisou pahn dierek pwehki riahla en sahpwo.

20 Oh rahn pahn kohdo me irail pahn nekidala arail paih kan pwehki irail kauwohng arail mohngiong ong ni dipwisou kesempwal akan; oh pwehki arail kauwohng arail mohngiong ong ni dipwisou kesempwal kan, oh pahn nekidala arail paih kan ni ansou me irail pahn tangasang mwohn arail imwintihti kan; pwehki arail sohte wia nekinek rehi, irail en riahla oh pil arail paih kan; oh ni rahno irail pahn kamakamala, Kauno me ketin mahsanihier met.

21 Kumwail mwasahn, tohn kanihmw laud wet en rong ei padahk kan; ehi, rong mahsen akan me Kauno ketin mahsaniher; pwe kilang, e ketin mahsanihier me kumwail rialahr pwehki amwail paih kan; oh amwail paih kan pil

rialahr pwehki amwail mohngiong kin uhwong amwail pah kan, oh sohte kin rong ih me ketikihwei rehmwail.

22 Kumwail sohte kin tamataman Kauno amwail Koht ong ni mehkan me e ketin kapai kin kumwaildahr, ahpw kumwail kin kalapw tamataman amwail dipwisou kesempwal akan, sohte kin poaden kaping kihong Koht amwail dipwisou kan, ehi, amwail mohngiong kan sohte kin uhlahng rehn Kauno, ahpw kin laudkihla pohnmahsu, pweh kin lokaia laud akan, *oh aklapalap, oh lokaia suwed akan, noahroak akan, uhpene kan, ineng suwed, kalokolok kan, oh mwersuwed akan, oh soangen dihp koaros.

23 Pwehki sang ni kahrepe wet Kauno Koht ketikihongehr me ria ehuhahn kohda pohn sahpwet, oh pil ong amwail dipwisou kan, oh pwehki met sang ni amwail wiewia suwed akan.

24 Ehi, me suwediong aramas pwukat; pwehki ahnsou wet e lallehr, me kumwail en kin kaus amwail soukohp akan, oh kin kouruhrki irail, oh kin katehki irail takai kan, oh kin keme iraila, oh kin wiahiong irail soahng suwed akan koaros me duwehte irail kin wia mahso.

25 Oh met ni amwail kin koasoi, kumwail kin inda: Ma atail ansou iei ansou en samatail akan mahso, kitail sohte pahn kin kemehla soukohp akan; kitail sohte pahn kin katehkin irail takai kan, oh pwakih iraila.

26 Kilang kumwail ahpw suwed sang irail; pwe nin duwen Kauno ketin ieias, ma emen soukohp pahn pwarada nan pwungamwail oh indahwei mahsen en Kauno, me kin kadehdehda dipamwail akan oh amwail suwed akan, kumwail kin lingeringiong ih, oh kumwail kin kaus ih oh kin rapahki soahng koaros pwe en kemehla ih; ehi, kumwail pahn inda me e soukohp likamw emen; oh kumwail pahn inda me ih iei me dipan emen, oh ih iei me kohsangehr rehn tepelo, pwehki e kin kadehdehda me amwail wiewia kan me suwed.

27 Ahpw kilang, ma emen pahn kohdo nan pwungamwail oh pahn inda: Wia met, pwe sohte dipe; wia mwo oh kumwail sohte pahn lokolok ki; ehi, e pahn inda: Kumwail en kekeidiki pohn mwahsu en nan amwail mohngiong kan; ehi, kumwail en kekeidiki pohn mwahsu en nan masamwail akan, oh kin wia nin duwen dahme amwail mohngiong kan kin anahne -- oh ma emen me pahn kohdo oh inda met, kumwail pahn alehda ih, oh inda me ih iei soukohp emen.

28 Ehi, kumwail pahn kasapwilada ih, oh kumwail pahn kihong amwail dipwisou kan; kumwail pahn kihong ih amwail kohl akan, oh amwail silper akan, oh kumwail pahn kalikouiada ih ki likou pweilaud akan; oh pwehki eh kin kihong kumwail koasoai mwahu kan, oh kin kosoia meh koaros me mwahu, eri kumwail sohte pahn kin diarada suwed reh.

29 Oh kumwail me suwed akan oh kumwail dih suwed wet, kumwail aramas kekeluwak kei oh aramas keptakai kei, ia werein amwail leme me me Kauno pahn ketin mweidohng kumwail? Ehi, ia werein amwail pahn mweidohng me pweipwei kan oh me a masukun akan en kin kahluwa kumwail? Ehi, ia werein amwail pahn pilada rotorot sang amwail en pilada marain.

30 Ehi, kilang, engieng en Koht wie okohkier pwehki kumwail; kilang, e ketin karialahr sahpwet pwehki dipemwail akan.

31 Oh kilang, ansouo pahn leledo me e pahn ketin kariaala amwail dipwisou kan, me irail pahn solahr kak tengedi, pwe kumwail en sohte kak kolokol irail; oh ni ansou en amwail paisuwedilahr kan, kumwail sohte pahn kak kolokol irail.

32 Oh ni rahn en amwail paisuwedilahr kan, kumwail pahn weriwer ong Kauno, oh amwail weriwer pahn kin sohte katepe, pwe amwail pahtou lelehr kumwail, oh amwail mehla dehdehier; oh eri pilen masamwail pahn keredi oh weriwer ni rahno, iei me Kaun wasa lapalahpie mahsaniher. Oh eri kumwail pahn pahtoukihla, oh koasoia:

33 Oh ma I koluhlahr oh I sohte kin kemehla soukohp akan, oh sohte kin kate irail, oh sohte kin pwakih iraila. Ehi, ni rahno kumwail pahn inda: O ma se kin tamanda Kauno atail Koht ni rahno me ihme kin ketikihdo atail dipwisou kan, oh eri re sohte pahn likekiris pwe en dehr salongasang kitail; pwe kilang, atail dipwisou kan kohsang kitailehr.

34 Kilang, kitail kin kihdi ehu kepwehn doadoahk met oh lakapw e pahn kohsang kitail oh kilang neitail kedlahs akan pahn kin kohsang kitail ni rahno me kitail pahn rapahki pwe en mahwen kin irail.

35 Ehi, se nekidalahr aht dipwisou kan oh irail kohweisang kihdehr pwehki sang nin duwen rialahn sahpwet.

36 Oh ma se koluhlahr nin rahno me mahsen en Kauno kodohn kiht; pwe kilang sahpwet rialahr, oh mehkoaros me mihmi powe sohte kak tengeteng, oh se sohte kin kak kolokol irail.

37 Kilang, ngehn sout akan kapel kitail penehr, ehi, iengen sehteno tounleng kan kapel kihtpenehr pwe en rapahki duwen arail en kin kauwehla palingenat. Kilang atail suwed akan me laud. O Kaun eri dah, komwi sohte kak ketin sohpeikihweisang kiht sapwellimomwi engieng kan? Oh met pahn kin iei duwen amwail koasoai ni rahn oko.

38 Ahpw kilang, amwail rahn en songisong daulilahr; kumwail kapwandalahr rahn en amwail komourla lao e pahn pwandala kokkohlahte, oh amwail ohla dehdehier; ehi, pwe kumwail kin rapahki rahn koaros nan amwail mour mehkan me kumwail sohte kin kak alehda; oh kumwail kin rapahki peren sang ni amwail en kin wiahda dihp, me kin uhwongada duwen pwung me kin mihmi rehn atail Kaun lapalap oh Kaun soutuk.

39 O aramas akan en sahpwet, kumwail en kin rong mahsen kan sangie! I kin kapakapki pwe engieng en Koht en kin pwurasang kumwail, oh me kumwail en koluhla oh komourala.

IRALAUD 14

Samuel kohpada marain nihpwong oh usu kapw ehu ong ni ipwidien Kraiso -- Christ ketin komourla aramas sang melahn paliwar oh pali ngehn -- Kilel en sapwellime matalao iangahki rotorot en rahn siluh, oh pwalpweseng en takai kan, oh reradahn sahpwo.

1 Oh met e wiawiher me, Samuel mehn Lamano, kohpadahr me tohto me sohte kak intingidi.

2 Oh kilang, e indaiong irail: Kilang, I pahn kihwei rehmwail ehu kilel; pwe sounpar limau me pahn kohdo, oh kilang, Ieros en Koht ahpw pahn ketido pwehn komourla irail akan me pahn kamehlele mwareo.

3 Oh kilang, met I pahn kihwei rehmwail kilel en ansouo me e pahn ketido; pwe kilang, e pahn mie marain lingaling laud kei nanleng, ni uhwe ieu me pwohngo mwohn eh pahn

ketidohu, e sohte pahn rotorotala, mwomwente me pwohngo pahn kohdo duwehte nin rahn ong aramas akan.

4 Eri, e pahn rahn ehu oh pwohng ehu oh rahn ehu, me pahn duwehla rahn tehieu oh sohte pwohng mie, oh met pahn wia kilel ehu ong kumwail; pwe kumwail pahn ese duwen kodahn ketipino oh pil kihrlahn ketipino; ihme kahrehda irail pahn ese ni mehlel me rahn riau oh pwohng ehu; ahpw pwohngo sohte pahn rotorotala; oh e pahn iei pwohngo mwohn eh pahn ketin ipwidi.

5 Oh kilang, mie usu kapw ehu pahn pwarada, me rasehng usu ehu me kumwail sohte kin kilang, oh met pahn pil wia ehu kilel ong kumwail.

6 Oh kilang kaidehn mehkoaros met, e pahn tohto kilel akan oh me kopwuriamwei akan nanleng.

7 Oh e pahn wiawi me kumwail pahn pwuriamweikihla, oh pahn lemeleme laud mehlel, kumwail eri pahn pwupwidiong pohn pwehl.

8 Oh e pahn wiawi me mehmen me kamehlele Ieros en Koht, ihete me pahn ahneki mour soutuk.

9 Oh kilang, Kauno ketin mahsani ongehr sapwellime tounlengo, me ien kohdo kasalehwei met rehmwail; ehi, e padahkihongie me ien kohp ong kumwail mepwukat; ehi, e padahkihongiehier me ien padahkihong aramas pwukat, en koluhla oh kaunopada alen Kauno.

10 Oh met pwehki ngehi mehn Laman emen, oh I kasalehweier mahsen akan me Kauno ketin poangokihongiehier, oh pwehki sang ni duwen amwail kekeluwak, kumwail kin lingeringer kinie oh kin rapahki pwe kumwail en kemeiehla, oh kin pwakih ie sang nan amwail pwung kan.

11 Oh kumwail en kin rong mahsen kan sang ie, pwe sang ni kahrehpe wet I doudahr pohn kehl en kahnimw wet, pwe kumwail en kak rong oh esehla duwen koasoandien Koht akan me kin awiawi kumwail pwehki dipamwail akan, oh kumwail en pil kak esehla duwen irair en koluhla kan.

12 Oh pil kumwail en kak esehla duwen ketidohn Jesus Christ, Ieros en Koht, Pahpahn nanleng oh sampah, me ketin kapikadahr mehkoaros nin tapio, oh pwe kumwail en esehla kilel akan me pid duwen e pahn ketido, ong ni kahrepen amwail en kak kamehlele mwareo.

13 Oh ma kumwail pahn pwoson mwareo, kumwail pahn koluhkihla dipemwail akan koaros, pwe kumwail en kak

alehda mahkepen dipemwail akan sang ni sapwellime kapai kan.

14 Oh kilang, pil ehu kilel me I pahn kihwei rehmwail, ehi, iei kilel en sapwellime matalao.

15 Pwe kilang, ni mehlel me e pahn matala pwe komouro en kak pweida; ehi, mie anahnepe oh konehng pwe en matala pwe en karehiong iasadahn me melahr akan; pwe aramas en kak kolahng rehn Kauno.

16 Ehi, kilang, matala wet kahrehda iasadao, oh komourlahn aramas koaros sang mehla keiehu, me iei melahn ngehno me kohsang ni pwupwilahn Adam, aramas koaros eri lekdekla sangehr mwohn sihlangin Kauno, nin duwen aramas melahr ekei ong ni mehkan koaros en paliwar oh pali ngeh.

17 Ahpw kilang, iasadahn Christ pwaindahr aramas koaros, ehi, iei aramas koaros, oh kapwurehdo irail rehn Kauno.

18 Ehi, oh e kin kahrehda irair en koluhla, pwe mehmen me koluhla, iei ihete me sohte pahn palidi oh lekdeklahng nan kisinieio; ahpw mehmen me sohte pahn koluhla pahn kin palidi oh lekdekla nan kisinieio; oh re pahn pwurehng mehlahn ngehno, ehi, iei mehla keriau, pwe irail pahn pwurehng palidi, nin duwen mehkan me pidada pwuhngo.

19 Eri kumwail en koluhla, kumwail en koluhla, pwe sang ni amwail esehla mepwukat oh sohte kapwaiada, kumwail kin mweidohng kumwail en lekdekla oh kumwail pahn kolahng ni mehla keriau wet.

20 Pwe kilang, nin duwen ei indaiong kumwailehr duwen kilel tohrohr ehu, iei kilel en e kamatalao, kilang, ni rahno me e pahn ketin lokolongki matalao, ketipino pahn rotala oh pahn sohte kihong kumwail marain, oh pil duwehte sounpwongo oh usu kan; oh sohte marain pahn mih pohn sahpwet, sangete ansou me e pahn ketin lokolongki matalao, pwe ni erein rahn siluh sang ni ansou me e pahn ketin iasada sang rehn me melahr akan.

21 Ehi, ni ansou me e pahn ketin kadalahr ngehno, nansapwe kan oh lioal akan pahn wiawi ni erein awa tohto kei, oh sampah pahn mwekidida oh rerrer; oh takai akan me mihmi pohn sahpwet, mehkan mihmi pohn sampah oh loalen sampah, me kumwail kin ese ansou wet me kekeluwak de pali laudo iei me kekeluwak pahn kin pwalpeseng.

22 Ehi, irail pahn pwalpeseng ni pali riahu, oh pahn dierek ni elen pwalada oh ni pwal akan, oh ni pelien takai akan me pwalpesengehr pohn sahpwet pwon; ehi, koaros me mihmi pohn sampah oh pahn sampah.

23 Oh kilang, melimel akan pahn mie, oh ni rahno nahna tohto pahn karakarahkala rasohngala wahu ehu, oh wasa tohto pahn kahdaniki wahu me pahu wiahla nahna, me pahn ileile mehlel.

24 Oh ahl lap tohto pahn ohla, kahnimw tohto pahn sohla towe.

25 Oh sousou tohto pahn sarapeseng oh kihda me melahr tohto kan, oh souleng tohto me pahn iasada pahn pwarohng me tohto.

26 Oh kilang, iet me tounlengo kasalehiongihier; pwe e indaiongie me pahn mie nansapwe oh lioal pahn wiawi ni erein awa tohto kei.

27 Oh e ahpw padahkihongie me ni ansou me nansapwe oh lioal pahn nekila, oh melimel, pwe mepwukat pahn udahn wiawi, oh rotorot pahn kipehdi pohn sahpwet pwon ni erein rahn siluh.

28 Oh tounlengo padahkihongie me tohto pahn kilangada me kopwuriamwei sang mepwukat ong ni kahrehpen arail en kak kamehlele me kilel pwukat oh kopwuriamwei pwukat me pahn wiawi pohn sahpwet, pwehn sohte kahrepe ieu me aramas akan en dehr kamehlelehki.

29 Oh pwe sang ni kahrehpe wet mehmen me kin kamehlele pahn komourala, oh irail akan me sohte pahn kamehlele, kopwung ehu en wiawihiong irail; oh pil ma irail pahn dipaniki, pein irail me wiahiong diparail.

30 Oh met tamataman, tamataman, riei kan, pwe mehmen me salongala, pein ih me kahrehiong ih en salongala; oh mehmen me wiahda suwed, pein ih me wiahiong ih; pwe kilang, kumwail kin saledek; kumwail kin mweimwei ong en wiewia pein kumwail; pwe kilang, Koht ketikihwei rehmwailehr marain oh e ketikihong kumwailehr saledek.

31 E ketikihong kumwailehr pwe kumwail en kak ese me mwahu sang me suwed, oh e ketikihong kumwailehr pwe kumwail en pilada mour de mehla; oh kumwail en kak wiahda mwahu oh kumwail pahn pwurehng loisang mehkot me mwahu de me mwahuo en pwurowei rehmwail; de

kumwail kak wiahda suwed, oh suwedo me pahn purowei rehmwail.

IRALAUD 15

Kauno ketin keme mehn Nephi kan pwehki e kin ketin loaloale irail -- Mehn Laman akan me wekilahr kan kin kehlail oh kin tengeteng ni pwosono -- Kauno pahn ketin kalahngan ong mehn Laman akan ni imwin rahn akan.

1 Oh met, riei kempoak kan, kilang I indaiong kumwail, ma kumwail sohte pahn koluhla, imwamwail akan pahn sohla towe.

2 Ehi, ma kumwail sohte koluhla, eri pahn mie kahrehpen noumwail lih akan pahn kin wie mamauk ni rahno me irail pahn kadihdi neirail seri kan; pwe kumwail pahn songen tang oh sohte wasahn rukila pahn mie; ehi, mehd suwediong irail me liseian kan, pwe irail pahn toutou oh sohte kak tang; eri, aramas pahn tihak irailedi oh re pahn mihmi pwe irail en mehla.

3 Ehi, meid suwediong aramas pwukat me kahdaniki mehn Nephi kan, ma irail sohte pahn koluhla, ni ansou me re pahn kilangada kilel oh me kopwuriamwei kan me pahn sansal ong irail; pwe kilang, irail pilipildahr en wiahla sapwellimen Kauno aramas akan; ehi, e ketin loaloale mehn Nephi kan, oh e kin pil ketin keme irail; ehi, ni rahn akan me irail milahr nan dihp me e kin ketin keme pwehki e kin ketin loaloale irail.

4 Ahpw kilang riei kan, e sohte kin ketin loaloale mehn Laman akan pwehki arail kin poaden wiahda tiahk suwed akan, oh met pwehki duwen dipen tiahk kan en samamwail akan. Pwe kilang, komouro pahn kodohng irail sang ni padahk en mehn Nephi kan; oh sang ni kahrehpe wet Kauno ketin katohtowe lahr arail rahu akan.

5 Oh imen kumwail en kilang me pali moron en irail akan me mihmi nan alen arail pwukoah kan, oh irail kin kanaiehng arail alu mwohn Koht, oh kin nantihong kolokol sapwellime mahsen kan oh kosonned akan oh sapwellime koasoandien tiahk kan me pid duwen kosonned en Moses.

6 Ehi, I indaiong kumwail, pali moron en irail me kin wiewia met, oh irail kin songisong ni sohte pwangada pwe

irail en kak wahdo riarail me luwehdi pwe irail en esehla mehlelo; ihme kahrehda, me tohto me kin iang iraila.

7 Oh kilang, kumwail kin pein ese kumwail, pwe kumwail kadehdehier, me irail tohto me eselahr mehlelo, oh kin esehla me suwed akan oh tiahk samin akan en samarail akan; oh me kahrehiong irailehr en kamehlele mahsen sarawi kan, ehi, kokohp akan en soukohp sarawi kan, me intingdier, me kahrehiong irailehr en pwosonla Kauno, oh koluhla, iei pwosono oh koluhlao me wiahda wekidekilahn nan arail mohngiong kan.

8 Eri nin duwen tohtohn kumwail me kodohng met, kumwail kin ese me pein kumwail me kin kehlail oh kin tengediong pwosono, oh ni mehkan me kasaledek irailahr.

9 Oh kumwail pil ese me irail sarepedier neirail kepwehn mahwen akan, oh irail kin masak en alehda irail pwe irail de pahn riahkihla; ehi, kumwail kak kilang me irail kin masak en wiahda dihp -- pwe kilang irail pahn mweidohng arail imwintihti kan en tihak irailedi oh keme iraila, oh re sohte pahn usada neirail kedlahs akan pwehn pelian irailda, oh met pwehki sang ni arail pwoson Christ.

10 Oh met, pwehki arail kin wonoweite, ni ansou me re kin kamehlele me re kin kamehlele, pwehki arail kin kehlail ni ansou me irail marainkihla, kilang, Kauno pahn ketin kapai irailda oh ketin karairaihela arail ansou kan, mendahte arail suwed akan.

11 Ehi, mendahte ma irail pahn milahr nan arail soh pwoson Kauno, e pahn ketin karairaihala arail rahn kan, lao lel ansou me pahn kohdo nin duwen atail oh pil sansal sangehr soukohp Zenos, oh pil soukohp tohto akan, nin duwen kopwurupwurudohn riatail akan, mehn Laman akan, pwe irail en pwurehng esehla duwen mehlelo--

12 Ehi, I indaiong kumwail, me ni imwin ansou kan me inou kan en Kauno pahn kolahng riatail, mehn Laman kan, oh mendahte kalokolok tohto me irail pahn ahneki, oh mendahte arail pahn kin pwekilahng ekis wasa de pwurasang ekis wasa pohn sahpwet oh re pahn kin lohdi oh pahn kin kamakam, oh re pahn kin kohieila liki, ni eh sohte arail wasahn rukila, a Kauno pahn ketin kalahngan ong irail.

13 Oh met iei duwen kokohpo, me irail pahn pwurehng esehla pwung mehlelo, me iei irail en esehla duwen

Sounkomouro, oh duwen sileparail mehleh oh lapalap, oh irail en iangala sapwellime sihpw akan.

14 Ihme kahrehda, I indaiong kumwailehr me e pahn mwahu ong irail sang kumwail, ma kumwail sohte pahn koluhla.

15 Pwe kilang, doahk kopwuriamwei kan me sansalohng kumwailehr, ehi, ong irail me solahr arail pwoson pwehki tiahk en samarail akan, kumwail pein kak kilang me arail pwoson pahn sohte kak en sohla pwurehng.

16 Eri, Kauno ketin mahsanhier: I pahn kauwehla irail koaros, ahpw I pahn wiahiong irail en pwurodohngie ni rahno me I koasoanedier, Kauno ketin mahsanier.

17 Oh met kilang, Kauno ketin mahsanier, me pid duwen mehn Nephi kan: Ma irail sohte pahn koluhla, oh nantiheng wiahda ei koasoandio, I pahn kasohrehla irail koaros, Kauno ketin mahsanhier pwehki arail soh pwoson, mendahte doahk kopwuriamwei kan me I wiahier nan pwungarail; oh nin duwen en Kauno ketin ieias mepwukat koaros pahn wiawi, Kauno ketin mahsanier.

IRALAUD 16

Mehn Nephi kan me kamelele Samuel iei irail me Nephi pepdaisialahr -- Samuel sohte kak mehkihla neirail arep akan oh neirail takai kan -- Ekei kekelwakiala arail mohngiong kan, oh ekei kilangada tounleng kan -- Me sohte kamehlele kan kosoia me sohte kahrepen kamehlele Christ oh sapwellime ketido nan Jerusalem.

1 Oh met, me tohto rongehr mahsen kan sang Samuel, mehn Laman, me e kosoiahier pohn kehl en kahnihmwo. Oh me tohtohie me kamehlele mahsen kolahr pwe irail en rapahki Nephi; oh ni arail kodahr oh diaradahr ih oh wek ongehr diparail akan oh sohte kahmahmikihla, pwe irail kin anahne me irail en pepdais ong Kauno.

2 Ahpw tohtohie irail akan me sohte kamehlele mahsen kan sang Samuel lingeringer dahr pah oh katehki ih takai kan pohn kehlo, oh pil me tohto me kesingki arep akan ni ansou me e kesikesihnen pohn kehlo; ahpw Ngenen Kauno me ketin ieiang ih, eri irail ahpw sohte kak kalelehki ih neirail takai akan de neirail arep akan.

3 Ansou me irail diaradahr me irail sohte kak kalelehki ih, mie ekei pil kamehlelahr mahsen kan sang ih, eri irail ahpw kolahr rehn Nephi pwe en pepdaisala.

4 Pwe kilang, Nephi kin wie pepdais, oh wie kokohp, oh kin wie padapadahk, weriweriki koluhla ong aramas akan, kasakasalehiong irail kilel akan oh me kopwuriamwei akan, wiewia manaman akan nan pwungen aramas akan pwe irail en ese me Christ pahn ketido ansou keren --

5 E kin wie padapadahkihong irail mehkan me pahn udahn kohdo ni ansou keren, pwe irail en kak ese oh tamataman ni ansou me re pahn kohdo pwe irail en esehla mehkan mwohn ansouo, pwehn kahrehiong irail en kamehlele; eri me tohto me kamelelehlahr mahsen akan sang Samuel, irail eri kolahr reh pwe en pepdaisala, pwe irail kin kohkihdo arail koluhla oh irail en kin wekisang diparail akan.

6 Ahpw pali moron en irail sohte kamehlele padahk en Samuel akan; eri, ni ansouo me irail diaradahr me irail sohte kak kalelehki ih neirail takai kan oh neirail arep akan, irail werikilahng arail kaun en sounpei akan, inda: Ale ohl menet oh pirepene ih, pwe kilang tepelo iang ih, oh pwehki manaman en tepelo me mihmi reh, kitail sohte kak kalelehki ih neitail arop akan; eri ale oh pirepene ih, oh wahwei ih.

7 Oh ni ansou irail kolahng pwehn kemehla ih, kilang e lusidi sang pohn kehlo, oh tangasang nan sapwarailo, ehi, kolahng nan sahpweo, ih eri tepier padahk oh wie kokohp ong rehn nah aramas akan.

8 Oh kilang, solahr ronge rehn mehn Nephi akan; oh met iei duwen tiahk en aramas akan.

9 Oh me sounpar welihsek-wenehu douwer powe ni mwein sounkopwung kan en mehn Nephi akan.

10 Oh pil met inwisekalar sounpar welihsek-wenehu ni mwein sounkopwung akan, pali moron en aramas akan mihmihte nan arail pohn mwahsu oh wiewia suwed, oh pali tikitiko me kin kanaiehng arail alialu mwohn Koht.

11 Oh mepwukat pil duwehte irair akan ni pahr welihsek-waluh ni mwein sounkopwung kan.

12 Oh ahpw mie wekila tikitik ong ni tiahk en aramas akan, ihte aramas akan tepier mihla nan arail suwed, oh kin kalaudehla arail kin uhwongada kosonned en Koht akan ni sounpar welihsek-duwahu en mwein sounkopwung akan.

13 Ahpw e wiawiher ni sounpar duweisek ni mwein sounkopwung kan, miehler kilel kopwuriamei akan me kohiengehr aramas akan, oh me kopwuriamei kan; oh mahsen akan sang rehn soukohp akan tepier pweida.

14 Oh tounleng kan kin pwarohng aramas akan oh aramas loalokong kan, oh kin padahkiong duwen rong kaperen duwen kapohlo, Ihme kahrehda nan pahr wet mahsen en Koht akan tepier pweida.

15 Mendahte, en aramas akan tepier kekelwakialahr nan arail mohngiong kan, koaros ihte tohto rehrail me kamehlele pali laud en mehkan, koaros mehn Nephi akan oh pil mehn Laman akan oh irail tepier kehlki pein arail kehl oh pein arail loalokong, inda:

16 Mie mehkei me irail kak kohpada me pwung nan pwungen me tohto; ahpw kilang, kitail ese me koaros doahk laud oh doahk kopwuriamei pwukat sohte kak wiawi, me kasansaladahr.

17 Irail ahpw tepier akpwung pene oh akamai pene nan pwungarail, inda:

18 Sohte kahrehpen soangen aramas me rasehng Christ pahn ketido; ma ehi, oh e pahn ketin wia leros en Koht, Papahn nanleng oh sampah, nin duwen me sansalehr, dahme kahrehda e sohte ketin kasalehdo pein ih duwehte e pahn ketin sansalohng irail akan me pahn mihmi nan Jerusalem?

19 Ehi, dahme kahrehda e sohte pahn ketin kasalehdo pein ih nan sahpwet duwehte nan Jerusalem?

20 Ahpw kilang, kitail ese me tiahk suwed ieu met, me kohsangehr rehn samatail akan, me kahrehiong kitail en kamehlele ekei mehkan me kesempwal oh kopwuriamei kan me pahn wiawi, me pahn sohte wiawi nan pwungatail, ahpw nan sahpw ehu me doh, sahpw ehu me kitail kin sehse; eri, irail pahn kin kapweipwei kitail, pwe kitail sohte kin kak kadehdehki pein masatail akan me irail me pwung.

21 Oh irail pahn, sang ni piht oh doahk rir kaperen akan en sehteno wiahda doahk laud rir me kitail sohte kak wehwehki, me pahn kahrehiong kitail en kin papah mahsen akan sang rehrail, oh pil kin wiahla neirail papah kan, pwe kitail kin pahsante irail en kin padahkiong kitail mahseno; oh pwe irail en kapweipwei kitail rahn koaros nan atail mour ma kitail pahn mihla pahrail.

22 Oh me tohto mehkan me aramas akan kin medewehda nan arail mohngiong, me sohte me kak kamehlele oh me sohte katepe; oh me kauwe onopek mwahu, iei Satan me kin kamwakid irail en kin poaden wiahda me suwed; ehi, e kin kohla oh kalohki rohng kan me saikinte dehde oh uhpene kan pohn sahpwet pwe en kakeluwakiala mohngiong en aramas akan pwe en kin uhwongada me mwahuo oh uhwongada dahme pahn kohdo.

23 Oh mendahte kilel akan oh me kopwuriamwei kan me wiawier rehn sapwellimen Koht aramas akan oh manaman tohto kan me irail wiadahr, Satan kin kolokol mohngiong en aramas akan wasa koaros nan sahpwo.

24 Oh met sounpar duweisek imwisekalahr ni mwein sounkopwung en aramas en Nephi kan.

25 Oh met iei keimseken Pwuken Helaman, nin duwen inting kan en Helaman oh nah pwutak kan.

KESILUH EN NEPHI

PWUKEN NEPHI
NEIN NEPHI PWUTAK,
ME WIA NEIN HELAMAN PWUTAK

Oh Helaman iei nein Helaman pwutak, me wia nein Alma, iei nein Alma pwutak, me sang ni kadaudok en Nephi nein Lehi, me kohsangehr nan Jerusalem ni sounpar keieu en nwein Zedekiah, nahnmwariki en Judah.

IRALAUD 1

Nephi me iei nein Helaman pwutak, mwesel asangehr nan sahpwo, oh nah pwutak Nephi me kin kolokol arail inting kan -- Mendahte eh diren kasansal kopwuriamwei akan, irail me suwed akan koasoanehdi me irail pahn kemehla me pwung kan -- Pwohng me Christ ketin ipwidi leledohr -- Kilelo wiawidahr oh usu kapw ehu pwaradahr -- Likamw akan oh piht akan wia lalaudla, oh mehn kulih kan en Gadianton kemehla me tohtohie.

1 Met iei sounpar wenopwiki duweisek-ehu sang ni ansou me Lehi mwesel sangehr Jerusalem; oh iei nan pahro Lachoneus wie sounkopwung lapalap oh kepina en sahpwo.

2 Oh Nephi, nein Helaman, mwesel sangehr nan sapwen Zarahemla, ni eh kihongehr nah pwutak meseni Nephi, luwen mehkan me pid sleit prahs akan, oh inting kan koaros me re kin kolkol, oh inting kan koaros me re kin kolokol me sarawi sangete en Lehi mwesel dohsangehr nan Jerusalem.

3 Eri e kohsangehr nan sahpwo, oh wasa e kohla ie, sohte emen ese, oh nah pwutak Nephi me weliandi ih kolokol poadoapoad akan, ehi, iei poadoapoad en aramas pwukat.

4 Oh me ni tepin pahr duweisek-riau, kilang, kokohp akan en soukohp akan tepier pweida; pwe kilel kopwuriamwei akan oh manaman laud akan tepier wiawi nan pwungen aramas akan nan wasao.

5 Ahpw mie me tepier kosoia me e daulilahr ansou me kokohp akan pahn pweida, me Samuel, mehn Lamano, kasaledahr.

6 Oh irail tepier kouruhriki riarail akan, inda: Kilang ansou daulihér, oh kokohp akan sang Samuel sohte pweida; eri amwail pereperen oh amwail pwoson me pidada met solahr katepe.

7 Oh irail eri wiadahr mwarong laud ehu nan sahpwo; oh aramas akan me kamehlele tepier pahtoula, pwe mehkan koaros me sansanladahr ele e sohte pwarada.

8 Ahpw kilang, irail kin poaden kilangalahng rahno oh pwohngo oh rahno me pahn wiahla rahn ehu me pahn sohte pwohng, pwe irail en kak esehla me arail pwoson mie katepe.

9 Ansou wet irail akan me sohte kin kamehlele koasoanedier rahn ehu, me koaros me kamehlele tiahk pwukat pahn kamakamala, ihte ma kilelo pahn pwarada, me soukohp Samuel kohpadahr.

10 Ansou wet ni en Nephi, me wia nein Nephi pwutak kilangehr duwen suwed en aramas pwukat, eri eh mohngiong ahpw pahtoukilahr kouwahlapie.

11 Oh ih eri kohieila liki oh dairukedihong nan pwehlo, oh weliandi nah aramas akan oh wie likilikiweriohng eh Koht, ehi, ahpw ni mehlelo, irail akan me kereniong luwetala pwehki arail pwoson tiahk en samarail akan.

12 Oh ih eri wie likilikwer kehlail ong Kauno rahno pwon; oh kilang, kapitien Kauno peidohngehr ih, mahsani:

13 Sarada oh perenda, pwe kilang kereniongehr, oh pwohng wet me kilelo pahn pwarada, oh lakapw I pahn kodohng sampah pwe en kasalehiong sampah me I pahn kapwaiada mehkoaros me I kasaledahr sang nan ewen emenemen nei soukohp sarawi kan.

14 Kilang, I kohkihdo pein ngehi, pwe I en kapwaiada mehkoaros me sansal ohngehr aramas akan sangete ni poahsondahn sampah, oh en wiahda kupwuren Sahmo oh Naho -- Pwehki ngehi I pahn wiahda kupwuren Sahmo, oh pwehki Naho iei werei. Oh kilang, ansouo lellehr, oh pwohng wet kilelo pahn pwarada.

15 Oh e wiawihér me mahsen akan sang Nephi pweidahr, nin duwen eh sansaladahro; pwe kilang, ni en ketipino kihrila, sohte rotala wiawi, oh aramas akan tepier

pwuriamweila pwehki sohte rotorot wiawi ni pwohngo eh lelledo.

16 Oh irail akan me tohto, me sohte kin kamehlele mahsen akan sang soukohp akan, me pwupidi ongehr pohn pwehlo oh mwomwen me irail melahr, pwe irail eseier me koasoandi lap me wiawidahr en kemehla irail akan me kamehlele mahsen akan sang soukohp akan olah; pwehki e lelehr ansouo me kilelo pahn kohda.

17 Oh irail tepier esehla me sapwellimen Koht Ieros pahn ketido ni ansou mwadang, ehi, ni imwio aramas koaros nan sahpwo sang palikapi oh palimese, koaros nan palieir en sahpwo oh paliepeng en sahpwo, me inenen pwuriamweikihla mehlel me kahre iongehr irail en pwupidihong pohn pwehlo.

18 Pwe irail esehier me pahr tohto me soukohp akan kadehdehier mepwukat, oh kilel me kokohp dahr lellehr; oh irail tepier masakada pwehki diparail akan oh arail soh pwoson.

19 Oh e wiawiher me pwohngo unsek sohte rotala, ahpw e marain duwehte nin souwas, oh e wiawiher me ketipino pwurehng dakadahr ni mensengo, nin duwen eh kin mwekimwekid; oh irail esehier me iei rahno me Kauno pahn ketin ipwidi, pwehki kilel me kokohpdahr wiawiher.

20 Oh e wiawiher, ehi, nin duwen mehkoaros, mwahi koaros, me sang nin duwen mahsen akan sang rehn soukohp akan.

21 Oh usu kapw ehu pil pwaradahr nin duwen mahseno.

22 Oh sang ni ansouo likamw kan tapidahr nan pwungarail me Satan kapwileweiehr pwe en kin kakeluwakiala arail mohngiong kan, pwe en kahrehiong irail en sohte kak kamehlele kilel akan oh me kopwuriamwei akan me irail kilangehr; ahpw mendahte likamw pwukat oh piht pwukat, pali moaron en aramas pwukat kin kamehlele, oh wekiongehr Kauno.

23 Oh e wiawiher me Nephi kolahr rehn aramas akan, oh pil me tohto, me e pepdaisialahr sang ni arail koluhla, me kin laud mehlel lapwapen diparail akan. Oh aramas akan pwurehng tapiada ahneki meleilei nan sahpwo.

24 Oh solahr pei pene kan mie, ihte me malaulau me tepier padahk, songisong en kadehde sang ni mahsen en Koht akan me e solahr mie ahnahnepen irail en kolokol

kosonned en Moses. Irail sapwungalahr met ong ni irair wet, sang ni arail sohte wehwehki mahsen en Koht akan.

25 Ahpw mwurin ansouo irail wekilahr, oh wehwehkidahr sapwung me irail miher loale, pwe irail eselahr me kosonnedo saikinte pweida, oh e pahn pweida koaros; ehi, mahseno kohieng irail pwe e udahn pahn pweida; ehi, pwe mwahi eh u de kisehkan koaros sohte pahn sohrala lao mehkoaros pahn pweida; eri nan pahrote irail diaradah arail sapwungo oh irail wehkadah arail sapwung kan.

26 Oh met sounpar duweisek-riahu douwer powe, me wadohr rong kaperen pwehki kilel akan me wiawiher, nin duwen mahsen en kokohp akan sang rehn soukohp sarawi kan koaros.

27 Oh e wiawier me mwurin sounpar duweisek-siluh pil douwer powe ni meleilei, ihte mehn kuli en Gadianon kan, me kin kousoan pohn nahna kan me kin kauwe sahppo; pwehki sang ni uhwen kehlail en wasa kan me irail kin kolokol oh arail wasa rir akan me kahrehiong aramas akan sohte kak kalowe irailidi; eri irail wiadah mwersuwed tohto; oh irail kemelahr me tohto rehn aramas akan.

28 Oh ni sounpar duweisek-pahieu, irail tepier tohtohla mehlel, pwehki me tohto me sohte pwungki mehn Nephi kan tangalahr reh rail me kahrehiong kapahtou laud ong mehn Nephi akan me kin kouson nan sahppo.

29 Oh pil kahrehiong pahtou laud rehn men Laman akan; pwe kilang, neirail seri tohto me kekeiradah oh tapiahdah kekeirada ni kehlail nan pahr akan; kahrehiong irail en pwurelahng duwen pein ahneparail oh ekei mehn Zoram akan me kahluwa kin iraillehr arail likamw akan oh lokaiahn widing kan pwe irail en iangala mehn kulih kan en Gadianon.

30 Oh met mehn Laman akan pil apwalkihla oh arail pwoson oh pwung tepier tikitikla, pwehki suwed lahn dih me kodahr ni ansouo.

IRALAUD 8

Melime kan, rerrer dahn sahppo akan, oh kisiniei kan, oh luwair kan, oh kihrlahn sahppo akan kadehdehda duwen lohpuwulahn Christ -- Aramas tohto melahr -- Rotorot

pwaindi sahpw rahn siluh -- Irail akan me momourete kin mamauhngki arail mour.

1 Oh met e wiawihher me sang ni aht intingo, oh se ese me aht intingo me mehlel, pwe kilang, aramas pwung emen me kin kolokol aht intingo -- pwe, ni mehlel, e wiahier manaman tohto sang ni mwaren Jesus; oh sohte emen aramas me kak wiahda ehu manaman ni mwaren Jesus, ihte ma e mwakelekel dahsang dipehkan koaros.

2 Oh sounpar silihsek-pahieu imwisek lahr, ma sohte sapwungala ieu me wiawidahr sang ohl menet ong ni wadawad en aht ansou.

3 Oh aramas akan ahpw tepier ngoangkihla mwasamwasahn kilelo me soukohp Samuel, mehn Lamano, kohpadahr, ehi, ong ni ansou me pahn rotorotala pohn sahpw ni erein rahn siluh.

4 Oh tepier lalaudla soh likilingkan oh uhpene kan me wiawi nan pwungen aramas akan.

5 Oh e wiawihher me ni sounpar silihsek-pahieu, ni tepin sounpwong, ni rahn kapahieu en sounpwongo, melimel laud ehu pwaradohr, me saikinte kin dierek nan sahpw pwon.

6 Oh pil ehu kisinieng laud oh kamasapwehk, oh mie nansapwe laud me kahrehiongehr sahpw eh rerrada mwomwente me pohn sahpw pahn pwalkihpeseng.

7 Oh mie lioal akan me laud, me sohte kin dierek nan sahpw pwon.

8 Oh kahnimw en Zarahemla lulidahr.

9 Oh kahnimw en Moroni kihrlahr pahn sehdo, oh towehkan koaros duhlahr.

10 Oh pwehl pwaindier kahnimw Moronihah, pwe e wialahr lapalahn nahna ehu nan wasao me kanihmwo mie.

11 Oh mie ohla me laud oh kamasepwehk mehlel me wiawi ni paliepeng en sahpw.

12 Ahpw kilang, ohla me tohto sang oh suwed me wiawi palieir en sahpw; pwe kilang, pohn sahpw pwon wekilahr pwehki melimelo oh eng eir kan, oh nansapwe kan oh pil lioal akan, oh sahpwet pwon rerrer kouwahlapie.

13 Oh ahl lap akan ohlahr, oh ahl patapat akan olahr, oh wasa tohto mwangaingai dahr.

14 Oh kanihmw tohto laud oh wadawad kihrlahr, oh me tohto mwasikalahr, oh kahnimw tohto me mwekidahr oh

ihmw akan rengkidier nan pwehl, oh tohn wasao melahr, oh wasa kan solahr towe.

15 Oh mie ekei kanihmw akan me mihmihte; ahpw ohla laud mehlel, oh me tohto rehrail melahr.

16 Oh ekei me iangalahr eng eiro, oh wasa me irail kolahr ie sohte emen ese, ihte irail ese me re wisikiei lahr.

17 Oh met iei duwen olahn nan sahpwet pwon, pwehki melimel akan, oh nansapwe kan, oh lioal akan, oh rerrer en pohn sampah.

18 Oh kilang, takai kan pwalpeseng pahn pak riau; irail pwal peseng pohn pwehl en sahpwet pwon, eri irail kin dierek ni duwen kisehn takai pwal akan, oh kin elen pwalada oh pwalpeseng pohn sahpwo pwon.

19 Oh eri nansapwe kan, lioal akan, oh melimel, oh rer dahn sampah meleileilahr -- pwe kilang, irail tukediher ni erein awa siluh; oh ekei kin kosoia me ansou reirei sang mwo; ahpw koaros me laud oh inenen suwed pwukat wiawiher mwein awa siluh -- oh kilang ansouo, rotorot ahpw kipehdier pohn sahpwo.

20 Oh e wiawiher me rotorot laud mehlel kipehdier pohn sahpwo me kahrehiong towe kan me sohte mehla kakehr pehm duwen kisinieng en rotoroto.

21 Oh sohte marain kak mie, pwehki rotoroto, pil sohte neirail kandehla, de pil sohte neirail mehn ser; de pil sohte kisiniei kak lulikihda tiwi mwahu oh madekeng, eri sohte marain kak mie.

22 Oh sohte marain ieu, de pil kisiniei ieu, de pil marain tikitik ieu, de pil ketipino, de pil sounpwongo, de pil usu me dierek, pwe depwek en rotorot akan me pwaಿಂದier sahpwo.

23 Oh kedekedeo e imwiseklahr ni erein rahn siluh me sohte marain kak dierek; oh mamauk oh weriwer sang rehn aramas koaros sohte kin tukidi. Ehi, ngilen mamauk en aramas akan me laud mehlel, pwehki sang ni rotorotalao oh sang ni duwen ohla laud me irail alediero.

24 Oh nan ehu wasao irail kin sengiseng, inda: O ma se koluhlahte mwohn rahn lap oh kamasepwehk wet, oh eri riat akan pahn mourla, oh irail sohte pahn isila nan kanihmw lap en Zarahemla.

25 Oh nan ehu wasao irail kin sengiseng oh mamauk, inda: O ma se koluhlahr mwohn rahn lap oh kamasepwehk wet, oh ma se sohte kin kemehla oh kate soukohp akan, oh

pwahki iraila, ihme kahrehda atail nohno kan oh neitail serepein mwahu kan, oh neitail seri kan sohte komourkihla, oh irail sohte pahn serediong nan kanihmw lap en Moronihah. Oh met iei duwen weriwer en aramas akan me inenen laud oh kamasepwek.

Jesus Christ ketin kasalehiong ih rehn mehn Nephi kan ni en pokono pokonpenehr nan sapwen Rahk, oh e ahpw ketin padahkohng irailehr; oh sang ni irair wet, e ketin kasalehiong irailehr pein ih. E wiawikidahr iralaud 11 lel 26.

IRALAUD 11

Sahmo ketin kadehdehda sapwellime ieroso me e ketin loaloale -- Christ ketin sansalada oh ketin kasansalehda duwen sapwellime tomwo -- Aramas akan doahkehier lipwen ohla kan ni lime kan oh ni aluweluwe kan, oh ni pengepenge kan -- Irail werikihda Osahna -- E ketin wiahda tiahk oh mwomwen pepdais -- angin uhpene iei me sang tepelo -- Padahk en Christ iei me aramas en kamehlehle, oh pepdaisala, oh alehda Ngehn Sarawi.

1 Oh e wiawiher me ni ahnsou wet aramas tohto pokon penehr, irail me sang mehn Nephi kan, me wie kapikapil tehnpas sarawio, me mihmi nan sapwen Rahk; oh irail eri pwuriamweila oh wie doandoaropwe nan pwungarail; oh kin kasalehiong emenemen irail akan duwen wekidekla kesempwal oh kopwuriamwei me wiawiher.

2 Oh irail kin pil koasoakoasoia duwen Jesus Christ, ong ni me pid duwen kodahn kilelepen sapwellime matalao.

3 Oh e wiawiher me ni ansou me irail wie kosoakoasoi pene nan pwungarail, irail eri rongadahr ngihl ehu me mwomwen e peidihdo sang nanleng; irail eri sohpeiselihier pwe irail sohte wehwehki ngihl me irail rongehr; oh e kaidehn ngihl lemei ehu, de ngihl laud ehu, ahpw mendahte eh ngihl tikitik ehu, ahpw e lellohngehr irail akan me rongadahr, ni uhwe ieu me sohte wasahkis nan paliwararail me e sohte kahrehiong eh rerreda; ni mehlelo, e lelehr nan mouren emenemen irail; oh e kahrehiong mohngiong arail eh mwekidkihda.

4 Oh nin duwen e wiawiher me irail pil pwurehng rongadahr ngihlo, oh irail ahpw sohte wehwehki.

5 Oh pil kesiluh en arail pwurehng rongadahr ngihlo, oh irail wehk pesengehr nan salengerail akan pwe irail en rong ngihlo; oh masarail sohpei lahngkehr wasa me ngihlo peido sangie; oh irail eri kilangdalahng nanleng, wasao me ngihlo peido sangie.

6 Oh kilang, kesiluh en ansoume irail wehwehki lahr ngihlo me irail rongadahr; oh ngihlo peidohngkehr irail mahsani:

7 Tehk mwahu nei pwutak kempoake, me I kin poakepoake me I kelinganaki dahr mwareio -- rong ih.

8 Oh eri, nin duwen irail wehwehki dahr, irail eri sohpeidalahr nanleng; oh kilang, irail kilangehr ohl emen me ketdihdo sang nanleng; oh e ketier nan likou pwuhpw pwetepwet ehu: Oh e ahpw ketidi oh ketiket nan pwungarail. Oh masarail koaros nan pokono kilang ih. Oh ewerail sohte kak sarapeseng oh irail sohte ese ia wehwehn, pwe irail lemeleme me tounleng emen me pwarodohr rehrail.

9 Oh ih eri ketin kapahwei limeo oh mahsanlahng aramas akan mahsani:

10 Ngehi, iei Jesus Christ, me soukohp akan kin wie kadehde me pahn kohdo sampah.

11 Oh kilang, ngehi iei maraino oh komourpen sampah oh I nimasangehr nan kep katiko me Sahmo ketikihongieher, oh I kelinganadahr Sahmo ni ei alehdahr dipen sampah, me I lokolongkier mehkoaros sang ni tepio pwehki kupwuren Sahmo.

12 Oh e wiawiher me ni ansou me Jesus ketin kasaledahr mahsen pwukat, pokono unsek ahpw pwupwidiongehr nan pwehlo; pwehki irail tamandahr me e kokohpehng irailehr me Christ pahn ketin kasalehiong ih irail mwurin eh ketidahla nanleng.

13 Oh nin duwen me wiawiher me Kauno ketin mahsan lahng irail mahsani:

14 Uhda oh kohdo rehi, pwe kumwail en kak doahkehki pehmwail akan nan pengepengeiett, oh kumwail en pil kehn lipwen mete kan nan pehikat oh ni nehikat, pwe kumwail en ese me ngehi iei Koht en Israel, oh Koht en sampah unsek oh me melahr pwehki dipen sampah.

15 Oh nin duwen me wiawihier, pokono eri kolahr oh doahkehier pengepengeo, kehnehr lipwen metekan ni limekan oh ni aluweluwekan; oh met irail wiahier, me emen emen irail kin kohla reh lao koaros nekida, irail kilangkhier masarail akan oh kehnkier pehrail kan, oh eseier mehlelo oh kadehdehier, me iei ih, me intingdier sang rehn soukohp akan, me e pahn ketido.

16 Oh ni ansou me irail koaros kolahr on pein irail kadehdehier, irail koaros wiahte ehu werida, weriweriki:

17 Osahna! Meid paih mwaren Koht me lapalahpie! Oh irail eri pwupwidingehr ni limekan oh pwongih.

18 Oh ih eri ketin mahsan lahng Nephi (pwe Nephi mihmi nan pokono) oh e ahpw ketin mahsanihong ih en patohla reh.

19 Oh Nephi uhda oh kohdala, oh dairukihdi mwohn Kauno oh metikehr aluweluwe kan.

20 Oh Kauno ketin padahkihong ih en kesihnenda. Oh e udahr oh kesihnendahr mwowe.

21 Oh Kauno mahsanihong ih: I kihong uhk manaman pwe ken en pepdaisiala aramas pwukat ansou me I pahn pwurala nanleng.

22 Oh Kauno pil ketin malipeier ekei. Oh ketin padahkiong irail soahngohte; oh e ketkihong iraillehr manaman en pepdais. Oh ih eri mahsanihong irail; sang ni manaman wet kumwail pahn kin pepdais; oh sohte akpwung en kin wiawi nan pwungamwail.

23 Mehlel I indahiong kumwail, mehmen me koluhla sang dipeh kan sang ni amwail padahk kan, oh men pepdaisala ni edei, sang ni koasoandi wet kumwail en pepdaisiala irail -- Kilang, kumwail pahn kohdihla oh kesihnen nan pihlo, oh pepdaisiala irail ni edei.

24 Oh ansou wet kilang, iet lepin lokaia me kumwail pahn inda, eker kin irail adarail kan:

25 Sang ni manaman me Jesus Christ ketikiongiehr, I pepdaisiuhkala ni mwaren Sahm, oh Nah, oh Ngehn Sarawi. Amen.

26 Oh kumwail eri kaduhdihla irail nan pihlo, oh irail pil pwaradhsang nan pihlo.

27 Oh sang ni koasoandi wet kumwal en kin pepdais ni edei; pwe kilang, mehlel I indaiong kumwail, me Sahmo, oh Naho, oh Ngehn Sarawio, wiahkihte ehu, oh ngehi kin

ehu ong Sahmo. Oh Sahmo kin ketin ehu ongie, oh Sahmo oh Ngehi me kin ketin wiahki ehu.

28 Oh nin duwen ei koasoia, kumwail en kin pepdais nin duwe met. Oh sohte akpwung en kin wiawi nan pwungamwail, duwehte me kin wiawi mahso oh sohte akpwung pahn wiawi nan pwungamwail me pid duwen ei padahk kan me duwehte me kin wiawi mahso.

29 Pwe mehlel, mehlel I indaiong kumwail, mehmen me kin kolokol ineng en uhpene, kaidehn e kin kohsangie, ahpw e kin kohsang rehn tepelo, iei ihme pahpahn uhpene, oh e kin kamwakidada mohngiong en aramas akan en kin uhpene nan pwungarail.

30 Kilang, met kaidehn ei kosonned, en kin kamwakidada mohngiong en aramas akan en kin lingeriong emenemen; ahpw iet ei kosonned, me soahng pwuko en dehr kin wiawi.

31 Kilang, mehlel, mehlel, I indaiong kumwail, I pahn kasalehiong kumwail ei kosonnedo.

32 Oh met iei ei koasoandio, oh iei ihme kosonned ehu me Sahmo ketikihongiehier, oh I kin kadehde Sahmo. Oh Sahmo kin ketin kadehdeie, oh Ngehn Sarawi kin ketin kadehde Sahmo oh Ngehi; oh I kin kadehde Sahmo me ketin mahsanihier me aramas koaros, wasa koaros, en koluhla oh kamehleleie.

33 Oh mehmen me pahn kamehleleie oh kin pepdaisala, ihete me pahn komourala; oh iei irail me pahn sohsoki wein Koht.

34 Oh mehmen me pahn sohte kamehleleie, oh sohte pepdaisala, pahn lekdekla.

35 Mehlel, mehlel, I indaiong kumwail, me met iei ei padahk, oh I kin wia kadehde duwen met sang rehn Sahmo: Oh mehmen me kin kamehleleie pil kin kamehlele Sahmo; Oh Sahmo pahn ketin kadehdehiong ih duwen ngehi, pwe e pahn ketin pwarek kin ih kisiniei oh Ngehn Sarawi.

36 Oh iet duwen me Sahmo pahn ketin kadehde kin ie, oh Ngehn Sarawio pahn ketin kadehdehiong ih duwen Sahmo oh ngehi; pwe Sahmo, oh ngehi, oh Ngehn Sarawi me ketin wiahkihte ehu.

37 Oh I pil indaiong kumwail, kumwail uhdahn pahn koluhla, oh duwehla kisin seri men, oh pepdaisala ni edei, pwe kumwail en kak alehda mepwukat.

38 Oh I pil indahiong kumwail, kumwail udahn pahn koluhla, oh pepdaisala ni edei, oh duwehla kisin seri men, pwe kumwail de sohte kak sohsohki wein nanleng.

39 Mehlel, mehlel, I indaiong kumwail, me iet ei padahko, oh mehmen me pahn poahsoanda pohn padahk wet kin poahsoanda pohn ei takaio, oh ewen kehl en ehl akan sohte kak powehdi ih.

40 Oh mehmen me pahn padahkgki laud sang de tikitik sang met oh e kin wiahki me iei ei padahko, nahn ihete me kin kohsang rehn me suwedo, oh sohte kin poahsoanda pohn ei takaio; ahpw kin poahsoanda pohn pihk, oh ewen kehl en ehl akan kin ritdahng ih ni ansou me lapake kin pwilido oh kisinieng kan kin ipir irail.

41 Eri, kohla rehn aramas pwukat, oh kalohki ong tohn sampah koaros dahme I kasaledahr.

IRALAUD 12

Jesus ketin malipe oh ketikihong manaman rehn meh ehk-riemeno -- E ketikihong mehn Nephi kan padahk ehu me duwehte padahk en pahn dohlo -- E ketin padahk ki duwen iren kapai akan -- Sapwellime padahk kan kin daulihla oh kohdo mwohn kosonned en Moses. Aramas akan en unsekla duwehte ih oh Samarail me ketin unsek -- Karasahiong Madiu 5.

1 Oh e wiawiher me ni ansou me Jesus ketin mahsanhier mahsen pwukat ong Nephi, oh ong irail akan me e ketin malipeier, (met irail ehk-riemeno me e ketin malipeier, oh irail alehier manaman oh mweimwei en pepdais) oh kilang, e ahpw ketikihla limeo pohn pokono, oh mahsan lahng irail mahsani: Mehd paih kumwail ma kumwail pahn rong mahsen akan sang rehn me ehk-rienem pwukat me I piladahr sang rehmwail pwe irail en kin papah kumwail, oh pahn sounpapah kumwail; oh I kihong iraillehr manaman me irail en kak pepdais kin kumwaila pihl, kilang, I pahn pepdais kin kumwaila kisiniei oh Ngehn Sarawi; eri mehd paih kumwail akan ma kumwail pahn kamehleleie oh pepdaisala, mwurin amwail kilangiehier oh esehla ihs ngehi.

2 Oh pil kapai laud en koghieng irail akan, me kin kamehlele amwail padahk kan pwehki kumwail pahn kadehde me kumwail kilangiehier, oh kumwail ese ihs ngehi. Ehi, mehd paih irail akan me pahn kamehlele amwail padahk kan, oh pahn karakarahkala mehlel oh pepdaisala, pwe kisiniei oh Ngehn Sarawi pahn tih pohrail, oh irail pahn alehda lapwapen diparail akan.

3 Ehi, meid paih irail me semwehmwe ni ngenirail, ahpw kin kodohngie, pwe re pahn sohsohki wein nanleng.

4 Oh pil mehd paih me kin mauk, pwe re pahn insenamwahula.

5 Mehd paih me kin ohpampap, pwe re pahn sohsohki sampah.

6 Mehd paih irail me men mwenge oh men nin me pwung, pwe re pahn direkihla Ngehn Sarawi.

7 Oh mehd paih me kin kalahngan, pwe re pahn diar kalahngan.

8 Oh mehd paih me mwakelel nan mohngiong arail, pwe re pahn udiahl Koht.

9 Oh mehd paih irail me kin kaloalamwahu kan, pwe iei irail serien Koht.

10 Oh mehd paih irail akan me kin kamakamiki edei, pwe re pahn sohsohki wein nanleng.

11 Oh mehd paih kumwail ma aramas akan pahn lahlahwe kumwail oh kalokei kumwail, oh pahn karaunkin kumwail soahng suwed koaros, pwehki ngehi.

12 Kumwail pahn ngisingis oh perenda, pwehki pweinemwail me laud nanleng; pwe iei duwen ar kin kaloke soukohp akan me tihengehr mwohmwail.

13 Mehlel, mehlel, I indahiong kumwail, I kihong kumwail en wiahla soahl en sampah; ahpw ma manaman en soahlo pahn sohasang, dahme sampah pahn soahleki? Soahlo solahr mwahu ong mehkot, ahpw en lekdekla wasa me aramas akan pahn tiakpesengie.

14 Mehlel, mehlel, I indahiong kumwail, I kihong kumwail en wia kamarainpen aramas pwukat. Kanihmw me mih pohn dohl ehu sohte kak rirla.

15 Kilang, dah, aramas kin isikada kandehla oh oh kihong pahn kohpwa? soh, ahpw nan douppen mehn sero, oh e pahn kamairaini koaros me mih nan ihmwo;

16 Ihme kahrehda, amwail marain en kin sansal mwohn aramas pwukat, pwe irail en kak kilang duwen amwail

doahk mwahu kan oh kapikapingahki Sememwail me ketiket nanleng.

17 Dehr lemehiong me I kodohng kasohrehla kosonnedo de soukohp akan. I sohte kodohng kasohrehla, ahpw I kodohng kapwaiada.

18 Pwe mehlel I indaiong kumwail, sohte mwahi ehu de ire pisetik ehu en kosonnedo pahn sohrala, ahpw sang rehi, koaros pweidahr.

19 Oh kilang, I kihweiehr rehmwail kosonnedo oh mahsen akan en Semeio, me kumwail en kamehleleie, oh pwe kumwail en koluhla sang dipamwail akan, oh kohkidohngie amwail mohngiong ohla oh karakahrahk ni pali ngehn. Kilang, kumwail ahneki mahsan akan mwohmwail, oh kosonnedo pweidahr.

20 Eri kumwail kohdo rehi oh kumwail pahn komourla; pwe I indaiong kumwail, ihte ma kumwail pahn kin dadauhr ei kosonnedo akan, me I kihong kumwailehr ansou wet, kumwail ahpw pahn pedelong ong nan wein nanleng.

21 Kumwail rongehr duwen irail mehn mahso kin koasoia, oh e pil intingdiher mwohmwail, me kumwail en dehr kemehla aramas, oh mehmen me pahn kemehla aramas pahn mihmi nan keper ong ni mwoalen kopwung en Koht.

22 Ahpw I indaiong kumwail, me mehmen me kin lingerengeriong rie ohl, e pahn kin keper ong ni kopwungo. Oh mehmen me pahn indaiong rieo, Raka, pahn keper ong ni kopwung lapalapo; oh mehmen me pahn inda, kowe pweipwei men, pahn keper ong nan kisiniei en ehl.

23 Eri, ma ke pahn kohdo rehi, de kin inengieng kohdo rehi, oh tamanda ma mie mehkot riomwo insensuwedki pahmw.

24 Kohla rehn riomwo oh kapwungala mahs nan pwungamwa, oh kowe eri kohkidohngie mohngiong unsek oh I ahpw pahn aleiukada.

25 Mwadang kopwungala nan pwungen kowe oh ahmw imwintihtio ni ansou me ke pweipwand reh, pwe ede lelekin uhk ni mwoalen kopwung ni ehu ansou, oh kowe eri pahn lekidekiong nan imweteng.

26 Mehlel, mehlel, I indaiong uhk, ke sohte kak lapwada lao ke pwainla sent koaros. Oh dah, ke kak pwainla ehute sent nan ahmw kin mihmi nan imweteng? Mehlel, mehlel, I indaiong uhk soh.

27 Kilang, e intingdier mahso, me kumwail en dehr kamwahl;

28 Ahpw I indaiong kumwail, mehmen me kilangada lih emen ni eh noarekeda, e wiahier dipen kamwahl nan eh mohngiong.

29 Kilang, I kihong kumwail kosonned ehu, me kumwail en dehr mweidohng rehn ehu ehu mepwukat en pedelong nan amwail mohngiong kan;

30 Pwe e mwahu ong kumwail en soikala mepwukat, ni amwail pahn wahda amwail lohpuw kan, sang nan amwail en lekidekla nan ehl.

31 E intingdier, mehmen me kesehla eh pwoud, a ih en wiahda kisin likoun kamweid ong liho.

32 Mehlel, mehlel I indaiong kumwail, mehmen me pahn kesehla eh pwoud ni kahrepe ieu me kaidehkin kamwail, nahn e kin kahrehiong liho en kamwahl; mehmen me pwoudkihda lih emen me mweisangehr eh pwoud, e pil wiadahr dipen kamwahl.

33 Oh pil ehu e intingdier, kumwail dehr kahula mwahl, ahpw kumwail en kin kahukihla me kumwail pahn kapwaiada inou kan me kumwail wiahiongehr Kauno.

34 Ahpw mehlel, mehlel, I indaiong kumwail, kumwail dehr kahula, de pil kahukihla nanleng, pwe iei mwoalen Koht.

35 Dehr pil kahukihla sampah pwe iei wasahn kommoalpen aluweluwe kan.

36 Dehr pil kahukihla moangemw, pwe kumwail sohte kak wiahda piten moang ehu me pwetepwet de toantoal.

37 Ahpw amwail kosoakoasoi kan en kin ehi, ehi; soh, soh; pwe ma kumwail kin daulihla mepwukat iei ihme kin wiadahr dihp.

38 Oh kilang, e intingdiher, pwoaren mahs ehu pahn pwahinla pwoaren mahs ehu, oh apwoat ngih pahn pwainla apwoat ngih.

39 Ahpw I indaiong kumwail, me kumwail en dehr dupungki suwed me suwed, pwe mehmen me pahn pohr uhk ni palimaun en likin sepomw, pil kihiong ih pali teio.

40 Oh ma mehmen me pahn lelekin uhk mwoalen kopwung oh adiasang ahmw likou en liki en, pil kihiong ih omw likou pwuhpw en.

41 Oh mehmen me kin sokenehkin uhk en iang ih mwail ehu, kowe en iangala ih mwail riahu.

42 Mehmen pahn peki rehmw mehkot, kowe en kihong ih, oh ong ih me pahn peki rehmw mehkot pwe en kapwuredohng uk, kowe en dehr soupeisang ih.

43 Oh e pil intingdier, me kowe en poakohng mehn impoam kan oh kailongki ahmw imwintihikan.

44 Ahpw kilang I indaiong kumwail, poakohng amwail imwintihti kan me kin kaloke kumwail, wia mwahu ong irail me kin kailongkin kumwail, oh kapakapki irail me kin kauwe kumwail oh kaloke kumwail.

45 Pwe kumwail en wiahla sapwellimen Sememwail me ketiket nanleng; pwe e kin ketin kapwarahda sapwellime ketipino pohn me suwed akan oh me mwahu kan.

46 Eri mehn mahso kan, me mihmi pahn kosonnedo, koaros pweidahr rehi.

47 Mehn mahso mwomwilahr, oh mehkoaros weliakapwalahr.

48 Eri I men kumwail en unsekala duwehte ngehi, de duwehte Sememwail me ketin unseko me ketiket nanleng.

IRALAUD 13

Jesus ketin padahkihong mehn Nephi kan duwen kapakap en Kauno -- Irail en kin nekidala arail paih kan nanleng -- Meh ehk-riemeno en dehr kin medewe kepwehn sampah nan arail padahk -- karasalahng Madiu 6.

1 Mehlel, mehlel, I inda me I men kumwail en wia amwail kisakis ong me semwehmwe kan; ahpw kaleke pwe kumwail de wia amwail kisakis akan mwohn aramas akan; pwe ede sohte keting pamwail rehn Sememwail me ketiket nanleng.

2 Eri, ni ansou me kumwail kisakis, dehr peuk sewi mwohmwail, iei duwen me mwalauhn akan kin wia nan sinakoke kan oh nan ahl akan, pwe irail en linganla rehn aramas akan. Mehlel, I indaiong kumwail, irail alehier katingperail.

3 Ahpw ni ansou me kumwail kin kisakis, dehr mweidohng pali meing en pehmw en ese dahme pali mahun en pehmw kin wia.

4 Pwe amwail kisakis kan en mihmi nan wasa rir; oh sememwome kin ketin mwahngih nan wasa rir, pein ih pahn ketin ketingi kumwail.

5 Oh ni amwail pahn kapakap, kumwail en dehr kin wia duwehte me mwaluhn akan, pwe irail kin men kesinenda kapakap nan sinakoke kan oh nan keimw en ahl akan pwe aramas akan en kak kilang irail. Mehlel, I indaiong kumwail, irail alehier katingparail.

6 Ahpw ni amwail pahn kapakap, pedelong ong nan amwail pere, oh kumwail lao ritingidier wenihmwo, ahpw kapakap ong Sahmo me kin ketiket nan wasa rir; oh Sahmo me kin ketin mwahngih nan wasa rir pahn ketin ketingi kumwail.

7 Ahpw ni ansou me kumwail kin kapakap, kumwail dehr kapwukapwurehiengete mehkot pwe e sohte pahn katepe, duwehte mehn likih kan, pwe irail kin kihkihong me Sahmo pahn ketin karonge arail lokaia tohto kan.

8 Kumwail en kin dehr duwehte irail, pwe Sahmo ketin mwahngier mehkan me kumwail kin anahne mwohn amwail pahn peki reh.

9 Eri kumwail en kin kapakap nin duwe met: Samat me ketiket nanleng, mwaromwi me sarawi.

10 Kupwuromwi en wiawi sampah duwehte nanleng.

11 Oh komw ketin mahkikihong kiht dipat akan, duwehte aht kin mahkohng koaros me kin wia dihp ong kiht.

12 Oh komwi en dehr kahluwa kihtlahng nan songsong, a komw ketin nekid kiht sang me suwed.

13 Pwe iei sapwellimomwi wehio, oh manaman, oh klohri, kohkohahte. Amen.

14 Pwe ma kumwail pahn kin mahkikihong aramas diparail akan, Samamwail nanleng pahn pil ketin mahkohng kumwail.

15 Ahpw ma kumwail kin sohte mahkikihong aramas akan arail sapwung kan, Sahmo nanleng pil sohte pahn ketin mahkikihong amwail sapung kan.

16 Pil, ni amwail kin kaisihsol, kumwail en dehr seren pahtou duwehte me mwalaun akan, pwe irail kin kawekila masarail akan pwe irail en kak kasalehiong aramas me irail kin kaisihsol. Mehlel I indaiong kumwail, irail alehier katingperail.

17 Ahpw kumwail, ni amwail kin kaisihsol, wisoare moangemwail oh widen masamwail akan.

18 Pwe kumwail en dehr kasalehiong aramas akan amwail kaisihsol, ahpw Samamwail, me ketiket nan wasa rir, me kin ketin mwahngih nan wasa rir pahn ketin ketingi kumwail.

19 Kumwail dehr kihpene amwail paih akan nin sampah, wasa me loangen mwet oh mer kin kauwehla, oh lollap akan kin kauwehla oh pirapahla.

20 Ahpw kumwail en kihpene amwail paih kan nanleng, wasa me loangen mwet oh mer sohte kin kauwehla, oh wasa me lollap akan sohte kin kauwehla de pirapahla.

21 Pwe wasa amwail paih kin mie, iei wasa amwail mohngiong kin pil ulahngie.

22 Serepen paliwahro iei pwoaren maso. Eri, ma pwoaren masamwail mwakelekel, paliwar amwail pahn direkihla marain.

23 A ma pwoaren masamwail me suwed, paliwar amwail koaros pahn direkihla rotorot. Eri, ma marain me mihmi loalemwail pahn rotorotla. Ia pahn uhwen lauden rotoroto!

24 Sohte emen aramas me kak papah soumas riemen; pwe e pahn kailongki emen oh pahn poakohng me teio. De e pahn pil loalopwoatong emen oh pahn mwamwahleki me teio. Kumwail sohte kak papah Koht oh Tiahk en Sampah.

25 Oh met ni ansou me Jesus ketin kasaledahr mahsen pwukat, ahpw ketin mahsan lahng pohn sapwellime meh ehkriemeno me e ketin piladahr, oh ketin mahsanihong irail: Tamatam mahsen akan me I wiahier. Pwe kilang, kumwail iei me I piladahr en kin papah aramas pwukat. Eri, I indaiong kumwail, dehr pwunodiki amwail mour ong ni dahme kumwail pahn kang de ong ni dahme kumwail pahn nim; de pil ong ni dahme kumwail pahn likoukihda. Pwe kaidehn mour kesempwalasang mwenge, oh kaidehn paliwar kesempwalasang likou?

26 Kumwail tehk mwahu duwen menpihr en nan wehwe kan, pwe irail sohte kin kamwer, de re sohte kin dolung de re rik pene nan imwen nahngkan; eri soh, Sememwail nanleng kin ketin apwahpwalih irail. Eri kaidehn, kumwail kesempwal sang irail?

27 A ihs nan pwungamwail me medewehda me kak kapatahiong tipwengen pehieu ni paliwere?

28 Oh menda kumwail kin pwunodiki likou? Kumwail tehk mwahu tuhke lili en nansapw akan nin duwen arail kin kekeirada; irail sohte kin doadoahk, de irail pil sohte kin piripir seli.

29 Oh I ahpw indaiong kumwail, me nin duwen lingan en Solomon koaros, e sohte mwahn kapwatkihda likou lingan duwehte lili pwukat.

30 Eri, ma Koht kin ketin kapwatahda dihpin nansapw akan rahnwet, oh lakapw irail pahn lekdekla nan kisiniei, iei pahn kin duwen e pahn ketin kalikawi kumwail, mendahte ma amwail pwoson me tikitik.

31 Ihme kahrehda kumwail en dehr pwunodiki, indinda, dahme kitail en kang? De, dahme kitail en nin? De dahme kitail pahn likoukihda?

32 Pwe Sememwail nanleng me ketin mwahngih me kumwail kin anahne mepwukat koaros.

33 Ahpw rapahki mahs wein Koht oh sapwellime pwung, oh mepwukat koaros ahpw pahn peusewei rehmwail.

34 Dehr pwunodiki mehn lakapw, pwe lakapw pahn pein pwunodiki mehn lakapw. Itarehr duwen suwed en rahno.

IRALAUD 14

Jesus ketin mahsani: Dehr kadeikada; peki rehn Koht; kaleke soukohp likamw akan -- E ketin inoukidahr komouro ong irail akan me kin wiahda kupwuren Sahmo -- Karasalahng Madiu 7.

1 Oh met ni ansou me Jesus ketin kasaledahr mahsen pwukat ahpw ketin pwurehng sohpeilahng pokono, oh pil ketikihpeseng dauwase mahsani: Mehlel, mehlel, I indahiong kumwail, dehr kadeikada, pwe kumwail en dehr pakadeikada.

2 Pwe duwen kadeik me kumwail kin wia, iei duwen me kumwail pahn kin pakadeik kihda; oh duwen mehn sohng me kumwail kin sosohng ki, iei duwen e pil pahn sohng kin kumwail.

3 Oh dahme kahrehda kumwail kin tehngki diper me mih nan pwoaren mesen riamwail ohlen, ahpw sohte kin tehk lepin tuhke me mihmi nan pwoaren masamwail?

4 De iaduwen amwail pahn indahiong riamwailo: Mweidohngie Ien kihsang diper me mihmi nan mesemw -- oh kilang, kaidehn lepin tuhke eh u me mihmi nan pwoaren masamwail akan?

5 Mwalaun ekei kumwail, kihsang mahs lepin tuhke me mih nan masamwail, oh eri kumwail ahpw pahn kilang mwahu duwen amwail pahn kihsang diper en nan mesen riamwail ohlen.

6 Kumwail dehr kihong kidi kan mehkot me sarawi, de kumwail en pil kesehdiong takai kesempwal akan mwohn pwihk kan, pwe irail de tiakidihong pahn neh rail, oh pwurehng sohpeido oh teh rpeseng kumwail.

7 Peki, a kumwail pahn ale, rapahki, a kumwail pahn diar, letelet, a pahn ritidahng kumwail.

8 Pwe koaros me kin peki, e pahn kin kohieng irail; oh mehmen me kin rapahki, e pahn diar, oh ong ih me kin letelet, e pahn ritidahng ih.

9 De soangen aramas dahmen kowe, ma noumw pwukat peki rehmw pilawa, dah, ke pahn kihong ih takai eh u?

10 De ma e peki emen mwahmw, dah, ke pahn kihong ih serpent emen?

11 Ma kumwail kin suwed mahso, ahpw kumwail kin ese kihong noumwail seri kan kisakis mwahu kan, ia pahn duwen laud en Sahmo nanleng eh pahn ketikihong me mwahu kan ong irail akan me kin peki reh?

12 Eri mehkoaros me kumwail men aramas en wiahiong kumwail, iei ihme kumwail en kin wiahiong irail, pwe met iei kosonnedo oh soukohp akan.

13 Kumwail pedelong nan ewen kehl tehtiko; pwe ewen kehl me waleko oh ahl me tehlapo, kin kolahng mehla, oh me tohto kin keidlaie.

14 Pwe ewen kehl tehtiko, oh ahl tehtiko, kin kolahng mour, oh me malaulau me kin diarada.

15 Kaleke soukohp likamw akan, me kin pwarodohng kumwail ni mwomwen sihpw, ahpw loal rail kin rasehng kidi en wel akan.

16 Kumwail pahn kin ese irail sang ni wah rail akan. Pwe dah, aramas kin dolung wain sang tuhke tekatek, de wahn tuhke pik sang ni tuhke tisel?

17 Pwe mehlel tuhke mwahu koaros kin kapwarahda wah mwahu; a tuhke sakanakan kin kapwarahda wah suwed.

18 Tuhke mwahu kin sohte kapwarahda wah suwed, pil duwehte tuhke sakanakan apwoat sohte kak kapwarahda wah mwahu.

19 Tuhke koaros me sohte kin kapwarahda wah mwahu pahn kin palidi, oh lekdekla nan kisinieio.

20 Eri, kumwail pahn kin ese sang ni wahrail akan.

21 Eri kaidehn koaros me kin indaiongie, Kaun, Kaun, pahn pedelong nan wein nanleng, ahpw mehmen me kin kapwaiahda kupwuren Semei me ketiket nanleng.

22 Me tohto pahn indaiongie rahno: Kaun, Kaun, kaidehn se kin wie kokohpki ni mwaromwi, oh ni mwaromwi se kausikilahr tepil akan, oh ni mwaromwi se wiadahr manaman tohto?

23 Oh I ahpw pahn indaiong irail: I soh mwahn ese kumwail; kumwail me kin wiahda suwed, kohwei sangie.

24 Ihme kahrehda, mehmen me kin rong ei padahk pwukat oh kapwaiada, I pahn karasahiong ih ohl loalokong emen, me kauwada imwe pohn paip ehu--

25 Oh keteu lao mweredi, oh lapake pwilido, oh kisinieng ipido, oh lelohng ihmwo, oh e sohte pahn engkidi, pwe e kokouda pohn paip ehu.

26 Oh mehmen me rong ei padahk pwukat oh sohte kapwaiada pahn rasehng ohl pweipwei men me kauwada imwe pohn pihk--

27 Oh keteu lao mweredi, oh lapake pwilido, oh kisinieng ipido, oh lelohng ihmwo; oh e pahn engkidi, oh engkidi laud mehleh.

IRALAUD 15

Jesus ketin kasalehda me kosonned en Moses pweidahr sang reh -- Mehn Nephi kan iei ekei sihpw akan me e ketin mahsanhier nan Jerusalem -- Pwehki duwen suwed en sapwellimen Kauno aramas nan Jerusalem, irail eri kin sehse duwen katohrohr peseng en sihpw en Israel kan.

1 Oh met ni ansou me Jesus ketin kanekelahr mahsen pwukat, ahpw ketin mahsanlahng pohn pokono, oh mahsanihong irail: Kilang, kumwail rongehr mehkan me I padahnk kier mwohn ei pahn kohdala rehn Semeio; eri,

mehmen me pahn tamatam ei padahk pwukat oh kapwaiada irail, I pahn kaiasada ni keimwisek lahn rahno.

2 Oh ni en Jesus ketin mahsanihier mepwukat, e ahpw ketin mwahngiadahr me mie ekei nan pwungarail me pwuriamweilahr, oh medemedewe dahme e pahn ketin kupwurehiong kosonned en Moses; pwehki irail sohte wehwehki koasoio me mehn mahs mwomwilahr, oh mehkoaros weliakapwalahr.

3 Oh e ketin mahsanihong irail: Kumwail en dehr pwuriamweiki me I indaiong kumwail me mehn mahs mwomwilahr, oh mehkoaros weliakapwalahr.

4 Kilang, I indaiong kumwail me kosonnedo pweidahr me kohieng Moses.

5 Kilang, iei ngehi me kilahr kosonnedo, oh iei ngehi me inou kihongehr nei mehn Israel akan. Eri kosonnedo pweidahr sangie, pwe I kodohng kapwaiada kosonnedo; eri, e nekier.

6 Kilang, I sohte kasohwe kokohp en soukohp akan pwe me tohto me saikinte pweida rehi, mehlel I indaiong kumwail, koaros pahn pweida.

7 Oh pwehki I indaiong kumwail me mehn mahs mwomwilahr, I sohte kin kasohwe duwen kokohp akan me pidada mehkan me pahn pwarada.

8 Pwe kilang, inou me I wiahiongehr nei aramas akan saikinte pweida koaros. Ahpw kosonnedo me kohiengehr Moses pweidahr rehi.

9 Kilang, Ngehi iei kosonnedo, oh maraino. Sopeidohngie, oh dadaurete lel imwi, oh kumwail pahn sohte mehla; pwe mehmen me dadaurete lel imwi, I pahn kihong ih mour soutuk.

10 Kilang, I kihwei rehmwailehr kosonned akan; eri kumwail en kin dadauhr ei kosonned akan. Oh iei met kosonnedo oh soukohp akan, pwe mehlel irail kin kadehde kinie.

11 Oh met ni ansou me Jesus ketin kasaledahr mahsen pwukat, ahpw ketin mahsanihong sapwellime ehk-riemeno me e ketin piladahr:

12 Kumwail iei ei werek kan; oh kumwail iei marain en aramas pwukat, me kisehn kadaudok en Joseph.

13 Oh kilang, met iei sapwamwail sapwen sohso, oh Sahmo me ketikihwei rehmwailehr.

14 Oh sohte ansou ieu me Sahmo ketin mahsani ongie ie me I en kosoiahiong riamwail akan nan Jerusalem duwe met.

15 De pil sohte ansou ieu me Sahmo ketin mahsani ongie me I en padahkihong irail mehkan me pid ekei keinek en mehn Israel akan me Sahmo ketin kahluwa irail sangehr nan sahpwo.

16 Met iei duwen me Sahmo ketin mahsani ongie me I en padahkihong irail:

17 Me mie nei sihpw ekei me sohte mih nan kehl wet; I pil pahn wa irailedo, oh irail pahn kin rong ngilei: oh kehl ehute pahn mie oh sileparail pahn mehtehmen.

18 Oh met, pwehki kepitakai oh so kamehlele, iei me irail sohte kin wehwehki ei padahk, eri Sahmo ketin mahsani ongie me I solahr pahn padahkihong irail duwe met.

19 Ahpw, mehlel, I indaiong kumwail me Sahmo me ketin mahsani ongie dahme Ien wia, oh I indaiong kumwail, me kumwail katohrohr sang iraillehr pwehki arail suwed; eri sang ni arail suwed me irail sehsekila kumwail.

20 Oh mehlel, I pil indaiong kumwail me mie ekei keinek me Sahmo ketin katohre sang iraillehr; oh iei pwehki arail suwed me irail kin sehse kihla irail.

21 Oh mehlel I indaiong kumwail, me kumwail iei me I koasoia, ekei sihpw me sohte mih nan kehl wet; I pahn pil wahdo irail, oh irail pahn kin rong ngilei; oh kehl ehute pahn mie oh sileparail emente.

22 Oh irail sohte wehwekinie, pwe irail lemehkiong me iei mehn liki kan; pwehki irail sohte wehwehki me mehn liki kan sohte pahn wekila sang ni arail padahk kan.

23 Oh irail sohte wehwekinie me I kosoia me irail pahn kin rong ngilei; oh irail sohte wehwekinie pwe mehn liki kan sohte pahn rong ngilei ni ansou kan -- pwe I sohte kaselehiong irail pein ngehi, ihte ma pahn kin kohsang rehn Ngehn Sarawio.

24 Ahpw kilang, kumwail koaros rongehr ngilei, oh kilangiehier; oh kumwail iei nei sihpw akan, oh kumwail me iangehr irail akan me Sahmo ketikihongiehier.

IRALAUD 16

Jesus pahn ketin pwarohng ekei sihpw en Israel me salongalahr akan. Ni imwin rahn akan rongamwahuo pahn kolahng rehn mehn liki kan oh eri ahpw pahn kolahng mehn Israel akan -- Sapwellimen Kauno aramas akan pahn kilangki masarail akan ni ansou me e pahn ketin pwurehng kauwada Zion.

1 Oh mehlel, mehlel, I indaiong kumwail me mie nei sihpw ekei me sohte mih nan sahpwet, de pil nan sapwen Jerusalem, de pil mihmi limwahn sahpwo me I kolahr pwehn seuwese.

2 Pwe irail me I kosoia me saikinte rong ngilei; de pil sohte ansou ehu me I kasalehiong irail pein ngehi.

3 Ahpw I aledahr mahsen ehu sang rehn Sahmo me I pahn kohla rehrrail, oh irail pahn rong ngilei, oh re pahn iangala nei sihpw akan, pwe en kehl ehute oh silepe emente; ihme kahrehda Ien kohla rehrrail pwe I en kasalehiong irail duwen pein ngehi.

4 Oh I indaiong kumwail en intingihdi padahk pwukat mwurin ei pahn samwalahr, pwe ma mehlel me nei aramas akan nan Jerusalem; me kilangiehier oh iangiehier ni ei wie padapadahk, sohte pahn kin peki Sahmo ni edei, pwe irail en esehla duwen kumwail sang rehn Ngehn Sarawio; oh pil ekei keinek me irail sohte ese, eri mahsen pwukat me kumwail pahn intingihdi pahn lekidekla oh pahn sansal ong mehn liki kan, pwe sang ni unsekla en mehn liki kan, kisehn neirail akan, me pahn kohpeseng pohn sampah pwehki arail so kamehlele, en kak pwurodo, de en kak esiehla me ngehi iei arail Soundor.

5 Oh I pahn wa irail pene sang ni keimw pahieu en sampah, oh I ahpw pahn kapwaidahr inouo me Sahmo wiahiongehr mehn Israel akan.

6 Oh mehd paih mehn liki kan, pwehki ar pahn kin kamehleleie, sang ni en Ngehn Sarawio pahn ketin kadehdehiong irail duwen ngehi oh Sahmo.

7 Kilang, pwehki ahr pahn kin kamehleleie, oh pwehki duwen amwail sohte kamehlele, O mehn Israel, ni keimwsek lahn rahno, mehlelo pahn kodohng mehn liki kan, pwe irail en esehla duwen unsek en mepwukat, Sahmo me ketin mahsaniher.

8 Ahpw mehd suwed duwen soh pwoson en mehn liki kan, pwe mendahte ma irail pahn kohdo pohn sahpwet; oh kihpeseng nei aramas akan me iei mehn Israel akan; oh nei aramas akan me iei mehn Israel akan pahn lekdek sang nan pwungarail, oh re pahn tihak irailedi ong pahn Sahmo nehraail akan ketin mahsaniher.

9 Oh pwehki duwen kalahngan akan en Sahmo ong mehn liki kan, oh pil kalokolok kan en Sahmo ong nei aramas en Israel akan, mehlel, mehlel, I indaiong kumwail, pwehki mepwukat koaros, oh I wiahiongehr nei aramas akan iei me mehn Israel akan en kin kamakam, oh en ohla, oh en kamakamala, oh pahn lekdekala sang nan pwungarail, oh me ren kin lingeringer pahraail, oh irail en wiahla aramas me re sohte kin pwungki, oh wiahla mehn koasoai nan pwungarail.

10 Oh met iei me Sahmo ketin mahsani ongie me Ien indaiong kumwail: Ni rahn me mehn liki kan pahn wiahda dihp me pahn uhwongada ei rongamwahuo, oh pahn kalaudehla arail pohnmwahsu ong aramas koaros en sampah, oh irail pahn direkihla soangen likamw koaros, oh pit koaros, oh sapwung koaros, oh soangen mwomwehda kan, mwersuwed akan, winahni kan, oh tiahk en nenek kan, de tiahk rir kelingeringer akan, oh ma irail pahn wia mepwukat koaros oh pahn soikala unsek en ei rongamwahuo, I pahn kihsang irail unsek en ei rongamwahuo, kilang Sahmo ketin mahsaniher.

11 Oh eri I ahpw pahn tamataman ei inouo me I wiahiongehr nei aramas, O mehn Israel, oh I pahn wadohng irail ei rongamwahuo.

12 Oh I pahn kasalehwei rehmwail, O mehn Israel, me mehn liki kan sohte pahn ahneki manaman pohmwail; ahpw I pahn tamataman ei inouo ong kumwail, O mehn Israel, oh kumwail pahn esehla unsek en ei rongamwahuo.

13 Ahpw ma mehn liki kan pahn koluhla oh pwuredo rehi, kilang irail pahn towehla nei aramas akan, O mehn Israel, Sahmo me ketin mahsaniher.

14 Oh I sohte pahn mweidohng nei aramas akan, me mehn Israel, en kohla nan pwungarail oh tihak iraildi, Sahmo me ketin mahsaniher.

15 Ahpw ma irail sohte pahn sopeidohngie, oh rong ngilei, I pahn mweidohng irail, ehi, I pahn mweidohng nei aramas akan, O mehn Israel, pwe irail en kohla, oh tihak

iraildi oh irail pahn duwehte soahl me solahr neme, me pahn solahr mwahu ong mehkot, ahpw pahn lekdekla, oh nei aramas akan pahn tiakidihong pahn nehraail akan, O mehn Israel akan.

16 Mehlel, mehlel, I indaiong kumwail, met me Sahmo ketin padahkihongie -- me Ien kihong sahp wet aramas pwukat arail sohso.

17 Oh eri mahsen sang soukohp Aiseia pahn pweida, me mahsani:

18 Nounwail soun irohir akan pahn koul ni arail pahn ngihl laudida ki ngihl ehute ni ansou me re pahn koul, pwe irail pahn pein kilangki masarail ni ansou me Kauno pahn pwurehng ketikihdo Zion.

19 Tepiada peren, kokoul pene, wasa solahr towe kan en Jerusalem; pwe Kauno ketin kamwaitalahr sapwellime aramas akan, e ketin doarehlahr Jerusalem.

20 Kauno ketin kasansalehiongehr lime sarawio ong wehi koaros en kilang; oh aramas koaros en sampah pahn kilang komour en Koht.

IRALAUD 17

Jesus ketin kaweidki aramas akan en kin wadewadek sapwellime mahsen akan oh irail en kapakapki wehwehn mahsen akan -- E ketin kakehlada me soumwahu kan rehraail -- E ketin loulouki aramas akan, ni eh ketin doadoahk ki mahsen me sohte aramas kak intingihdi -- Tohnleng kan kihda kapai oh kisiniei kapelpene neirail kisin seri kan.

1 Kilang, met ni ansou me Jesus ketin kasaledahr mahsen pwukat, e ketin mahsenlahng pokono, oh e ketin mahsenihong irail: Kilang ei ansou kerendohr.

2 I wehwehkier me kumwail me luwet, pwe kumwail sohte kin kak wehwehki ei padahk kan me Semeio ketin poahngokihongie me Ien padahkihwei rehmwail ansou wet.

3 Eri, kohla nan imwamwail akan oh kin wadewadek mehkan me I kasaledahr. Oh kalelapak rehn Sahmo, ni edei, pwe kumwail en wehwehki; oh kaunopada amwail lamalam ong lakapw, oh I pil pahn pwurehng kohdo.

4 Ahpw met Ien kohla rehn Semeio, oh I pil pahn kasalehiong keinek salongalahr akan en Israel pein ngehi, pwe irail sohte salongasang Sahmo, pwe e ketin mwahngih wasa me e ketkilahr irailie.

5 Oh eri Jesus ketin mahsanihier mepwukat, ahpw pil ketin sohpeila pohn pokono, oh mwahngiadahr me pilen masarail wie kereker, oh irail kin nantihlahte kilangalahng ih mwomwen me irail pahn indaiong ih ketiket ekis werei rehral.

6 Oh e ketin mahsanihong irail: Kilang, loalei direkihla ei poakehng kumwail.

7 Eri dah, mie me soumwahu nan pwungamwail? Wahdo irail met. Iaduwe, mie me mwator, de me masukun, de me sikel, de me alu suwed, de me tokutok, de me luwetalahr, de me salengoapon, de irail akan me ahneki soangen weirek kan? Wahdo irail met pwe I pahn kakehlailada irail, pwe I poakehla irail; loalei me kin diren kalahngan.

8 Pwe I wehwehkier me kumwail anahne Ien kasalehwei dahme I wiahiongehr riamwail akan nan Jerusalem, pwe I ese me amwail pwoson itarohng Ien kakehlahda kumwail.

9 Oh ni eh ketin mahsanihier met, tohn pokono koaros, wiahki eh, kohla reh iangahki me soumwahu akan, oh me weiweirek akan, oh me sikel akan, oh iangahki me masukun akan, oh pil iangahki me lohteng kan, oh iangahki irail koaros me weiweirek ki ong ni irair sohte lipilipil akan; oh e ketin kakelahda irail akan me wisikdohngehr ih.

10 Oh irail koaros me kehlailadahr oh unsekalahr, dairukedi sangehr mwohwe, oh pwongih ih; oh uhwen tohtohn irail akan me kak kodohng ni pokon, kin metik aluweluwe kan irail lao widenki aluweluwe kan; ki pilen maserail kan.

11 Oh e ahpw ketin mahsani ong seri tiketik kan en wisik dohng reh.

12 Irail eri wahdo neirail kisin seri kan oh pwilikihi irail limwah pohn pwehlo, oh Jesus ketin kouhl ehng ehr irail; oh pokono wiadahr ahl en seri kan lao koaros wisik dohngehr reh.

13 Oh e wiawiher me ni ansou me irail koaros wisik dohr, oh Jesus ketin koulengehr irail; ih eri ketin mahsani ong pokono me irail koaros en kelepwkihi pohn pwehlo.

14 Oh e wiawihier me ni ansouo me irail kelepwikidier pohn pwehlo, Jesus ketin tentenihr, oh mahsani: Sahm, I soansuwedlahr pwehki duwen dipen mehn Israel akan.

15 Oh ni ansou me e ketin mahsanihier mepwukat, pein ih pil ketin kelepwukidi pohn pwehlo; oh kilang e ahpw ketin kasakas ong Sahmo, oh mehkan me e ketin kasakasiki sohte kak intingdi, oh irail akan nan pokono me rongehr ih oh kadehdeier met.

16 Oh mwurin mwekid wet irail kin wia kadehde: Me pwoaren mas sohte kin kilang, de saleng kan sohte kin rongada mahso duwen mehkan me kesempwal oh kopwuriamei mehler me se kilangehr oh rongehr duwen en Jesus eh ketin mahsanihong Sahmo.

17 Oh sohte loh ehu kak koasoi, de pil sohte aramas emen kak intingihdi, de pil sohte ehu mohngiong en aramas kak en medewehda duwen mehkan ma kesempwal oh kopwuriamei mehler me se kilangehr oh rongehr duwen dahme me Jesus ketin mahsaniher; oh sohte emen kak medewehda duwen aht direkilahr popohl ni ansou me se rongehr duwen eh ketin kaskaskin kin kiht ong Sahmo.

18 Oh e wiawihier me ni ansouo me e ketin kaimwsekialahr sapwellime kasakas ong Sahmo, ih eri ketidahr; pokono ahpw perendahr mehler.

19 Oh e wiawihier me Jesus ketin mahsenlang irailahr, oh e ketin mahsani ong irail en kesihnenda.

20 Oh irail eri kesihnenda sang nan pwehlo, oh ih eri ketin mahsanihong irail: Mehd paih kumwail pwe kumwail ahneki pwoson. Oh me kilang, ei peren me unsek.

21 Oh ni ansou me e ketin wiahier mahsen pwukat, ahpw ketin tenteniher, oh pokono kadehdehier met, oh ih eri ketin alehda emenemen neirail kisin seri kan, oh ketin kapai iraildahr, oh ketin kapakap kihongehr Sahmo irail.

22 Oh ni ansou me e ketin wiahier met, e pil ketin pwurehng tenteniher.

23 Oh e ketin padahkihong pokono, oh ketin mahsanihong irail: Tehk mwahu noumwail kisin serihkan.

24 Oh ni ansou me irail sohpeilahng pwe irail en kadehde, masarail akan ahpw sopeidalahng nanleng, oh irail kilangehr me nanleng kan ritidahr, oh irail kilangehr duwen en tounleng kan en keredi sangehr nanleng me ni mwomwen me irail mihmi nan werengen kisiniei ehu; oh

irail doudiher oh kapilpenehier serihkan, oh kisiniei ehu ahpw kapel irail pene; oh tounleng kan eri kapai iraildahr.

25 Oh pokono kilangehr oh rongehr oh kadehdehier oh irail ese me arail kadehde me pwung pwe irail koaros kilangehr oh rongehr, pein emenemen irail me wiahier mepwukat; oh irail tohtohki ele riekid riepwiki; oh irail iei ohl, lih, oh serihkan.

IRALAUD 18

Jesus ketin wiadahr kamadipw sarawi rehn mehn Nephi akan -- E ketin mahsaniong irail en kin wie kapakap ni mwareo ansou koaros -- Irail akan me alehda wereo oh intah ni ahr sohte warehng pahn lekdekla -- Werengkan alehier manaman en kihla Ngehn Sarawi.

1 Oh kedekedeo Jesus ahpw ketin poahngokihong sapwellime werengkan en wahdo ekei pilawa oh wain.

2 Oh ansou me irail kolahng wahdo waino oh pilawao, e ahpw ketin poahngokihong pokono en mwohndihong pohn pwehlo.

3 Oh ni ansou me werengkan wadohr pilawa oh waino, ih eri ketikihsang irail pilawo oh ketin pilitikihpene pilawo oh ketin kasarawialahr; oh ahpw ketikihong werengkan oh ketin poahngokihong irail en alehda.

4 Oh ni arail alehier oh irail direkilahr, e ahpw ketin poahngokihong irail en kihong pokono.

5 Oh ni ansou me pokon aledahr oh direkilahr, ih eri ketin mahsanihong sapwellime werengkan: Kilang emen rehmwail me I pahn kasarawiala, oh I pahn kihong ih manaman en pilitikihpene pilawao oh kapaida oh kihong irail me towe ei mwomwohdiso, irail koaros me pahn kamehlele oh pepdaisala ni edei.

6 Oh met kumwail en kolokol pwe kumwail pahn kin wiewia ansou koaros, duwehte me I wiahier, pil duwehte ei kapiltikihpene pilawo oh kapaida oh kihwei rehmwail.

7 Oh met kumwail pahn wiahki mehn katamanpen paliwerei, me I kasalehiong kumwailehr. Oh e pahn wia ehu mehn kadehdeiong Sahmo me ansou koaros kumwail kin tamataman ie. Oh ma kumwail pahn tamatam ie ansou koaros, ngeni pahn kin mihmi rehmwail.

8 Oh e wiawihher me ni ansou me e ketin kasaledahr mahsen pwukat, e ahpw ketin mahseniong sapwellime werengkan en alehda wain nan kepo oh nin, oh irail pahn pil kihong pokono pwe irail en nin.

9 Oh irail wiadahr, oh irail nimehr oh medlahr; oh irail kilahr rehn pokono, oh irail nimehr oh direkilahr.

10 Oh ni ansou me werengkan wiahier met, Jesus ahpw ketin mahsanihong irail: Meid paih kumwail ong ni tiahk me kumwail wiahier, pwe met pweidahr ei kosonned akan, oh met kin kadehdehiong Sahmo me kumwail kin anahne wia dahme I padalik kiong kumwail ehr.

11 Oh met kumwail pahn kin poaden wiahong irail akan me koluhla oh pepdaisala ni ede; oh kumwail pahn wia ni mehn katamanpen intahi, me I kapwiliweier pwehki kumwail, pwe kumwail en kak kadehde ong Sahmo me kumwail kin tamataman ie. Oh ma ansou koaros kumwail kin tamatam ie, Ngeni pahn kin mihmi rehmwail.

12 Oh I pahn kihwei ehu kosonned ong kumwail me kumwail pahn wia mepwukat. Oh ma kumwail kin poaden wia mepwukat, meid paih kumwail, pwe kumwail poahsondahr pohn ei takaio.

13 Oh mehmen nan pwungamwail me pahn wiahda laud sang oh tikitik sang mepwukat sohte kin poahsoanda pohn ei takaio, ahpw e kin poahsoanda pohn pihk: oh ansou me keteu kin mwer, oh lapake kin pwilido, oh ahng kin ipido, oh kin lelohng irail, irail pahn pwupwidi, oh ewen kehl en ehl pahn kin kaunopada pwehn ritidahng ale irail.

14 Eri meid paih kumwail ma kumwail pahn kolokol ei kosonned akan, me Sahmo ketin pahngokihong ie pwe I en kihwei rehmwail.

15 Mehlel, mehlel, I indahiong kumwail, kumwail en poaden mwasamwasahn oh kapakap, pwe Satan pahn song kumwail oh e pahn kahluwahwei kumwail pwe en saliedi kumwail.

16 Oh nin duwen ei kapakap nan pwungamwail iei pahn kin duwen amwail en kapakap nan ei mwomwohdiso, nan pwungen nei aramas akan me kolulahr pepdaislahr ni edei. Kilang ngehi iei ihme maraino. I wiahier mehn kahlmang ieu ong kumwail.

17 Oh kedekedeo ni en Jesus ketin kasaledahr mahsen pwukat ong sapwellime werengkan, eri e ahpw pil ketin pwurehng sohpeilahng pokono oh mahsanihong irail.

18 Kilang, mehlel, mehlel, I indahiong kumwail, kumwail en mwasamwasahn oh kapakap pwe kumwail en dehr lelohng nan songosong; pwe Satan kin anahne kumwail; pwe en kak katohrehla kumwail duwehte tuhke wihd.

19 Eri kumwail en kin poaden kapakap ong Sahmo ni edei.

20 Oh mehkoaros me kumwail pahn peki rehn Sahmo ni edei, ni me pwung, oh kamehlele me kumwail pahn alehda, kilang e pahn kin kohieng kumwail.

21 Kapakap ong Sahmo nan amwail peneinei kan ansou koaros ni edei, pwe amwail pwoud akan oh noumwail serihkan en kak kapaida.

22 Oh kilang, kumwail en kin tuhpene ni ansou kan; oh kumwail en dehr kainepwiedi mehmen me pahn kohdo ni ansoun amwail pokon pene, ahpw mweidohng irail en kohdo rehmwail oh dehr kainepwiedi irail.

23 Oh kumwail pahn kapakapkin irail, oh dehr pwakih iraila; oh ma iei irail kin kohdo rehmwail ni ansou kan, kumwail pahn kapakap kihong irail Sahmo ni edei.

24 Eri, kolada amwail mehn ser pwe en kamarainiada sampah. Kilang ngehi iei maraino me kumwail pahn kolada -- iei mehkan kumwail kilang I wiahier. Kilang kumwail kilangehr me I kapakap ong Sahmo, oh kumwail koaros kadehdehier.

25 Oh kumwail kilangehr me I kosoia me sohte emen pahn kohkohla, ahpw me I kosoia me kumwail en kohdo rehi, pwe kumwail en pehm oh kilang; iei duwehte me kumwail pahn wiahiong sampah; oh mehmen me kauwehla kosonned wet iei ih me pein mweidohng ih en lelohng kasongosong.

26 Oh met e wiawiher ni ansou me Jesus ketin kasaledahr mahsen pwukat, e pil ketin pwurehng soupeilahng sapwellime werengkan me e ketin piladahr, oh mahsanihong irail:

27 Kilang, mehlel, mehlel, I indahiong kumwail, I pahn kihwei kosonned ehu, oh eri I ahpw pahn kohla rehn Sahmo pwe I en kapwaiada ekei kosonned akan me e ketikidohngiehier.

28 Oh met kilang, met iei kosonnedo me I pahn kihwei rehmwail, me kumwail en dehr mweidohng emen me ese

me e sohte warohng en alehda werei oh intahi ni ansou me kumwail wia kamadipw sarawio;

29 Pwe mehmen me alehda werei oh intahi ni e sohte warohng kin kariahla pein ih; ihme kahrehda ma kumwail ese mehmen me sohte warohng en alehda intahi oh werei, kumwail en dehr mweidohng ih.

30 Ah, kumwail sohte pahn kesepwekehla ih sang nan pwungamwail, ahpw kumwail en kin padahki ih oh kapakapki ih ong Sahmo, ni edei, oh ma e pahn koluhla oh pepdaisla ni edei, eri kumwail pahn ale ih, oh kihong ih intahi oh werei.

31 Ah ma e pahn sohte koluhla e sohte pahn iang towehla nei aramas akan, pwe e pahn kauwehla nei aramas akan, pwe kilang I ese nei sihpw akan, oh irail iei me towehkan.

32 Ahpw eri, kumwail sohte pahn kihieisang ih nan amwail sinakoke kan, de wasahn amwail kaudengkan, kumwail en nantihlahte padahk ong soangen aramas menet; pwe kumwail sehse ma re pahn pwuredo oh koluhla, oh kohkihdo rehi arail mohngiong unsek, oh I ahpw pahn kakehlailirailada; oh kumwail pahn wiahla mehn wadohng irail komouro.

33 Eri, kolokol padahk pwukat me I padahkihong kumwailehr pwe kumwail en dehr lekdekla; pwe meid suwed ong ih me Sahmo ketin lakidala.

34 Oh I kihwei kosonned pwukat pwehki duwen uhpene kan nan pwungamwail. Oh meid paih kumwail me ahneki minimin nan pwungamwail.

35 Oh met I pahn kohla rehn Sahmo pwe e konehngehr Ien kohla rehn Sahmo pwehki kumwail.

36 Oh kedekedeo Jesus ketin kaimwsekilahr padahk pwukat, e ahpw ketin sairiki lime emenemen werengkan me e ketin piladahr, e lao ketin sairehr koaros, oh e kin ketin mahsaniong irail ni ansou me e ketin sair irail.

37 Oh pokono sohte rong mahsen me e ketin wiahier, eri irail sohte kak kadehde; ahpw werengkan me kadehdehier me e ketikihong irailehr manaman en kihla Ngehn Sarawi. Oh I pahn kasalehwei rehmwail mwuri me kadehde wet iei ihme mehlel.

38 Oh e wiawiher ni en Jesus ketin sairehr irail koaros, eri mie depwek ehu me kodohr oh pwaindier pokono, irail ahpw solahr kak kilang Jesus.

39 Oh ni ansou me irail milahr pahn mweteo, ih eri ketiweisang irail, oh ketidahla nanleng. Oh werengkan me kilangehr oh kadehdehier me e pil ketin pwurehng ketidahla nanleng.

IRALAUD 19

Werek ehk-riemeno padahk ong aramas akan oh kapakapki Ngehn Sarawio -- Irail pepdaislahr oh alehier Ngehn Sarawio oh sawas en tounleng kan -- Jesus ketin kasakas ni e ketin doadoahngki mahsen me sohte kak intingidi -- E ketin kadehdehda pwoson en mehn Nephi kan me laud kouwahlapie.

1 Oh e wiawihier me Jesus ketin ketidalahr nanleng, pokono ahpw mwerpeseng, oh emente ohl alehier eh pwoud oh na serihkan oh pwurelahr ni imweo.

2 Oh mwardangete mwarongada nan nanpwungen aramas akan, mwohn e pahn rotorotala, pwe pokono kilangehr Jesus, oh me e ketin padahkohng iraillehr, oh me e pahn pil ketin pwarohng pokono mandahn rahno.

3 Ehi, oh pwohngo koaros mwarongkidahr duwen Jesus; oh eri irail pakairki ong aramas akan me mie me tohto, ehi, me tohtohie kouwahlap, me doahk laud pwohngo pwon, pwe irail e kak mih wasao mandahn rahno me Jesus pahn ketin kakansalehiong pein ih pokono.

4 Oh e wiawihier ni mandahn rahno, ni ansou me irail pokon penehier, kilang, Nephi oh rieo me e kapwourada sang mehla, me adaneki Timothy, oh pil nah pwutak Jonas, oh pil Mathoni, oh rie Mathonihah, oh Kumen, oh Kumenonhi, oh Jeremiah, oh Semnon, oh Jonas, oh Zedekiah, oh Aiseia -- met iei eden werengkan me Jesus ketin piladahr -- oh irail kolahr oh kesinendahr nan pwungen pokono.

5 Oh kilang, pokono me laud mehlel me kahrehda irail en pwalpeseng ong ni pwihn eisek riau.

6 Oh me ehk-riemeno padahkohngehr pokono; oh kilang, irail kahrehiongehr pokon en kelepwukidi pohn pwehlo, oh en kapakap ong Sahmo ni mwaren Jesus.

7 Oh werengkan pil kapakap ohngehr Sahmo ni mwaren Jesus. Oh irail eri uhda oh padahkohng aramas akan.

8 Oh ni ansou me irail kasaledahr duwen masan akante me Jesus Christ ketin padahkier -- kilang, irail pil kelepwukidi oh kapakap ong Sahmo ni mwaren Jesus.

9 Oh irail kapakapkihongehr me irail kin keieu anahne laud; oh irail anahneier me Ngehno Ngehn Sarawio en ketidohng irail.

10 Oh ni ansou me irail pekier nin duwen met, irail eri kolahr ni keilen pihlo, oh ahpw pokono idawehnla irail.

11 Oh Nephi kohdilahr nan pihlo oh pepdaislahr.

12 Oh e pwaradahsang sang nan pihlo oh tepier pepdais. Oh e pepdaisialahr irail koaros me Jesus ketin piladahr.

13 Oh ni en koaros pepdaisialahr oh kohsangehr nan pihlo. Ngehn Sarawi ahpw ketin mweridihong pohrail, oh irail eri direkilahr Ngehn Sarawi oh iangahki kisiniei.

14 Oh kilang, mwomwen kisiniei me kapel irail penehr, oh e ketsangehr nanleng, oh pokono eri kadehdehier met; oh tounleng kan doudisang nanleng oh kin wie papah irail.

15 Oh ni ansou me tohnleng kan kin wie papah werengkan, kilang, Jesus ketido oh ketin kaukauleng nan pwungarail oh ketin padahk ong irail.

16 Oh e wiawiher me e ketin mahsanlahng pokono, oh ahpw ketin poahngokihong irail en pwurehng kelepwukidi pohn pwehlo, oh pil iangahki sapwellime werengkan en pil kelepwukidi pohn pwehlo.

17 Oh ni ansou me irail koaros kelipwukidier pohn pwehlo, e ketin mahsanihong sapwellime werengkan me irail en kapakap.

18 Oh kilang, irail eri tapihadahr kapakap, oh irail kin kapakap ong Jesus likiwerihki ih arail Kaun oh arail Koht.

19 Oh eri Jesus ahpw ken ketiwei sang nan pwung arail, oh mwur e ahpw ketin kadohwanla ih oh ketin poaridiher pohn pwehlo, oh mahsanih:

20 Semei, I patowan dangke komwi pwehki komwi ketikihongehr Ngehn Sarawi ong irail pwukat me I patohan piladahr; oh pwehki arail pwoson ie me I patohan pilkin iraildahr sang nan sampah wet.

21 Semei, I peki komwi pwe komwi en ketikihong Ngehn Sarawi irail koaros me pahn patohan kamehlele arail tungoal padahngkan.

22 Semei, komwi ketikihong irailehr Ngehn Sarawi pwehki arail kin patohan kamehlele ie; oh komw ketin mwahngier me irail patohan kamehlele ie pwehki komwi

ketin karonge iraillehr, oh irail kin patohan wie pekipeki ie pwehki I patohan ieiang irail.

23 Oh met Semei, I patohan pekipeki rehmwi pwehki irail, oh pil irail ko koaros me pahn kin patohan kamehlele arail padahngkan, pwe irail en kak patohan kamehlele ie, pwe I en patopato loaleraail, rasehng komwi, Semei, me ketiket loalei, pwe kita en ketin wia ehu.

24 Oh ni en Jesus ketin wiahier kapakap wet ong Sahmo, ih eri ketila rehn sapwellime werengkan, oh kilang, irail nantihlahte, sohte kin tukedi wia pekipeki reh, oh irail sohte katohtohla lokaia kan, pwe e kohiengehr irail dahme irail pahn peki, oh irail direkilahr arail anahn akan.

25 Oh eri Jesus ketin kapai iraildahr ni nin e ketin kasakas kin irailer, oh sihlangio ketin polaulkidahr irail, oh marain en sihlangih daker irailadahr, oh kilang irail pwetepwetala duwehte; oh kilang duwen arail pwetepwetala dauli pwetepwet koaros, ehi, pil sohte mehkot pohn sampah me pahn kak pwetepwetala duwehte.

26 Oh Jesus ketin mahsanihong irail: Kumwail kapakap; irail eri ahpw sohte tukedih sang arail kapakap.

27 Oh e ketin pwurehng, sohpeisang irail, oh e ahpw ketin kadohwanla ih oh ketin dairukedi; oh ketin pwurehng kapakap ong Sahmo mahsanih:

28 Semei, I patohan dangke komwi pwe komwi ketin kamwakel irailadahr me I patohan piladahr, pwehki arail tungoal pwoson, oh I patohan kapakapki irail, oh pil ong irail akan me pahn patohan kamehlele arail tungoal padahngkan, pwe ren patohan mwakelekelada sang rehi, sang ni pwoson arail padahngkan me duwehte arail mwakelekel kiniehda.

29 Semei, I sohte patohan pekipeki tohn sampah, ahpw irail akan me komwi ketikidohngiehier sang nan sampah, pwehki arail tungoal pwoson, pwe irail en patohan kak mwakelekel kiniehda, pwe Ien kak patopato loaleraail, duwehte komwi Semei me ketiket loalei, pwe kita en ketin wia ehu, pwe Ien kak patohan linganla loaleraail.

30 Oh ni en Jesus ketin mahsanihier mepwukat, e pil ketin sapahledohng sapwellime werengkan; oh kilang irail kin kehlail wie pekipeki reh sohte tukedi; oh e ketin pohkomwkomw ong irail; oh kilang irail pwetepwetala duwehte Jesus.

31 Oh eri e pil ekis ketilahsang iraillehr oh ih eri ketin kasakas ong Sahmo.

32 Oh lohkan sohte kak kosoia mahsen akan me e ketin kasakas ki, de pil sohte aramas kak intingihdi mehkan me e ketin pekipeki.

33 Oh pokono rongehr oh kadehdehier; oh mohngiongirail ritidahr oh arail mohngiong kan wehwehkidahr mahsen akan me e ketin kasakaski.

34 Ahpw, e udahn kesempwal oh kopwuriamwei lepin mahsen akan me e ketin doadoahngki nan sapwellime kasakaso, pwehki irail sohte kak intingihdi, de aramas pil sohte kak koasoia.

35 Oh e wiawiher me ni ansou me Jesus ketin kaimwsekialahr kasakaso, I eri ketin pwurodohng sapwellime werengkan, oh ketin mahsanih ong irail: I sohte kin kilang duwen amwail pwoson kouwahlahpie rehn mehn Jews akan koaros; sang ni kahrehpe wet, I sohte kak kasalehiong irail manaman laud tohto, pwehki ar soh pwoson.

36 Mehlel I indahiong kumwail, sohte emen rehrrail me kilangehr manaman laud akan me rasehng me kumwail kilangehr; de pil rongehr mehkan me inenen kesempwal rasehng me kumwail rongehr.

IRALAUD 20

Jesus ketikidahr pilawo oh wahino sang ni sapwellime manaman oh pil ketin pwurehng wiahiong irail kamadipw sarawi -- Kisehn Jacob kan pahn esehla Kauno arail Koht oh pahn sohsohkihla America -- Jesus iei soukohp me duwehte Moses, oh mehn Nephi akan iei serien soukohp akan -- Ekei sapwellimen Kauno aramas akan, pahn pokonpene Jerusalem.

1 Oh e wiawiher me e ketin poahngoki pokono irail en tukedihsang arail kapakap, oh pil iangahki sapwellime werengkan. Oh e ketin poahngokihong irail en tukedi arail kapakap nan mohngiongirail.

2 Oh e ahpw ketin poahngokihong irail en uhda oh wie kesikesihneniki nehrrail akan.

3 Oh ih eri ketin pilitikihpenehr pilawao oh ketin kapaidahr, oh ketikihong sapwellime werengkan en tungoale.

4 Oh ni arail tungoalehier, e ahpw ketin poahngokihong irail en pilitikihpene pilawa oh kihlahng pokono.

5 Oh ni ansou me irail kihlangehr pokono, e pil ketikihong irail wain pwe irail en nim, oh ketin mahsanihong irail me irail en kihong pokono.

6 Ansou wet, sohte pilawa, de pil wain me werengkan wahdo, de tohn pokono wahdo:

7 Ahpw, mehlel e ketikihongirailehr pilawao pwe irail en kang oh wahino pwe irail en nim.

8 Oh e ketin mahsanihong irail: Mehmen alehda pilawao, kin alehda wereiet ong palingenio: Oh mehmen me kin nim wain wet, kin nim intahi ong palingenio.

9 Oh, met ni ansou me tohn pokono koaros nimehr pihlo oh wahino, kilang, irail direkilahr Ngehno, oh irail ahpw likiwerdahte ansou kis, oh klohri kihong Jesus duwen me irail kilangehr oh rongehr.

10 Oh e wiawiher me ni ansou me irail koaros wiahier arail klohri ong Jesus, ih eri ketin mahsanihong irail: Kilang met I kapwaidahr kosonnedo me Sahmo ketikihongiehier me pidada duwen aramas pwukat, me iei ehuhisehn keinek en Israel.

11 Kumwail tamataman me I padahkihong kumwailehr, oh kasaledahr me ni ansou me mahsen akan sang Aiseia pahn pweidahr -- kilang irail intingdiher, oh kumwail kolokol mwohmwail, eri kumwail en rapahki kin irail.

12 Oh mehlel, mehlel, I indahiong kumwail, pwe ni ansou me irail pahn pweida, eri inouo me Sahmo ketin wiahiongehr aramas pwukat pahn pweidahr, O mehn Israel akan.

13 Oh eri ansou me kisehkan, me kohpesengehr pohn sampah, pahn pwurepene sang ni palimese oh palikapi, oh sang ni paliepeng oh palieir; oh irail pahn esehla duwen Kauno arail Koht, me ketin pwainiraildahr.

14 Oh me Sahmo ketin poangokihongiehier ie me I en kihong kumwail sahpwet, amwail sohso.

15 Oh I indahiong kumwail, pwe ma mehn likihkan sohte koluhla mwurin arail pahn alehda kapaio, mwurin arail kihpesengehr nei aramas akan.

16 Eri kumwail, me kisehn keinek en Jacob akan, pahn kohla nan pwungarail; oh kumwail pahn mihla nan pwungarail me ngeder mehleh; oh kumwail pahn mihmi nan pwungarail duwehte laion emen nan pwungen men kerep en nan wel akan, oh duwehte laion pwulopwul emen nan pwungen pelin sihpw ehu, me ma e kin kohla loale, e pahn tihak irailedi oh tehr irail peseng, oh sohte emen kak pitila.

17 Pehmwail akan pahn kohda pohn amwail imwintihti kan, oh amwail imwintihti kan koaros pahn palidi.

18 Oh I pahn kihpene nei aramas akan, duwehte aramas emen kin rikpene kapakap en tuhke me kin wiahda pilawa kan pohn tato.

19 Pwe I pahn wiahiong nei aramas akan, me Sahmo ketin inoukidahr, ehi, I pahn wiahiong neirail mehn pepeuk mete, oh I pahn wiahiong pahn nehmwail akan prahs. Oh kumwail pahn kaluwehdi aramas tohto; I pahn katohrehla arail mwahu kan ong Kauno, oh arail dipwisou kan ong Kaun en sampah pwon. Oh kilang, ngehi, ih iei me wiaher met.

20 Oh e pahn wiawi, me Sahmo ketin mahsaniher, me nei kedlahs en kalokoloko pahn wie tentenek pohrail rahno; oh ihte ma irail pahn koluhla, eri e ahpw sohte pahn pwupwidiong pohrail, ehi, pil pahn duwehte pohn wehi en mehn likihkan koaros.

21 Oh e pahn wiawi me I pahn kauwada nei aramas akan, O mehn Israel.

22 Oh kilang, aramas pwukat I pahn poasonehda irail pohn sahpwet, pwe en kapwaiada inou me I wiahiongehr samamwail Jacob; oh e pahn wiahla Jerusalem Kapw ehu. Oh manaman akan en nanleng pahn mihmi rehn aramas pwukat; ehi, duwehte ei pahn mihmi nan pwungamwail.

23 Kilang, ngehi, iei ih me Moses koasoahier indahda: Soukohp emen me Kauno pahn ketikihwei rehmwail, duwehte ngehi; kumwail pahn karonge ih ni mehkan koaros me e pahn ketin padahkihong kumwail.

24 Mehleh I indahiong kumwail, ehi, oh koaros soukohp akan sang Samuel oh irail akan me kohdo mwuri, nin duwen tohtohn irail akan me kin padahk, irail kin wie kadehde kin ie.

25 Oh kilang, kumwail iei serihn soukohp akan; oh kumwail iei mehn Israel akan; oh kumwail iei inou me

Sahmo ketin wiahiongehr samamwailoko, me e ketin mahsanihong Abraham: Oh sang ni kadaudokemw, keinek koaros en sampah pahn kapaikihda.

26 Sahmo ketin kaiesiedahr ong kumwail mwohn, mehkoaros, oh ketin poaroneiehdo pwe I en kapai kumwail sang ni amwail sopeisangehr dipamwail akan; oh met pwehki kumwail iei serien inouo.

27 Oh mwurin amwail kapaidahr, ni ansouo e pahn pweidahr inou me Sahmo ketin wiahiongehr Abraham: Sang ni kadaudokemw, keinek koaros pohn sampah pahn kapaikihda -- ong ni ei pahn kapwiliwei Ngehn Sarawi ong mehn likihkan, me iei kapai me pahn mihmi rehn mehn likihkan pahn kahrehiong irail en kehlaila sang koaros, pwehn katorehpeseng nei aramas akan, O mehn Israel.

28 Oh irail pahn kin suwediong tohn sahpwet. Ahpw, ni ansou me irail pahn alehda unsek en ei rongamwahuo, ahpw ma ni ansou irail pahn kakeluwakiala arail mohngiong kan ong ie, I pahn kapwurehiong diparail akan pohn moangerail akan, iei ihme Sahmo ketin mahsaniher.

29 Oh I pahn tamatam inouo me I wiahiongehr nei aramas akan: Oh I inou kihongirailehr me I pahn kihpene irail ni pein ei ansou me konehng pwe I pahn pwurehng kihong irail sapwen samarail akan arail sohso, me iei sapwen Jerusalem, me iei sapwen inouo kokkohlahte, iei ihme Sahmo ketin mahsaniher.

30 Oh e pahn wiawi me ansouo pahn kohdo, ni ansou me unsekpen rongamwahuo pahn lelohng irail.

31 Oh irail pahn kamehlele ie, me ngehi, iei Jesus Christ, Ieros en Koht, oh irail pahn kapakap ong Sahmo ni edei.

32 Ni ansou neirail souniroir akan pahn kalaudehla ngilarail akan, oh irail pahn koul ni ngihl pahrek; pwe irail pahn kilangehr.

33 Eri Sahmo pahn ketin pwurehng kapokonehpene irail, oh ketikihong irail Jerusalem arail sohso.

34 Eri irail pahn tapihada arail peren -- koul pene, kumwail wasa kan me sohte towe nan Jerusalem, pwehki Sahmo ketin kamwaitalahr sapwellime aramas akan, e ketin doarehlahr Jerusalem.

35 Sahmo ketin kasansalehiongehr lime sarawi wehi koaros nan sampah; oh wasa koaros nan sampah pahn

kilang duwen komour en Sahmo; oh Sahmo oh ngehi iei ihme kin ehu.

36 Oh eri pahn wiawi duwen me intingdiero: Pirida, pwurehng pirida, oh kihda ahmw kehlail, O Zion; kihong ahmw likou ringan akan, O Jerusalem, kahnimw sarawi, pwe sang met kohkohla sohte me so sirkomsais oh me samin pahn pedelong loale.

37 Itikasang pwel par me mihmi rehmw; pirida, mwohndi, O Jerusalem, sapwadada sahl akan sang ni tepin weremw, O nein Zion serepein me wie sensel.

38 Pwe iet me Kauno ketin mahsaniher: Ke netikilahr kowe ni sohte mehkot, oh ke sohte pahn pweipweikihda mwohni.

39 Mehlel, mehlel, I indahiong uhk, me nei aramas akan pahn ese edei; ehi, ni rahno irail pahn ese me ngehi me kosoiahier met.

40 Oh eri irail ahpw pahn inda: Meid ringan aluweluwen mehmeno pohn nahna kan me kin ketikihdohng irail rongge me mwahu, me kin wiahda meleilei; me pahn wahdo rongamwahu me mwahuo ong irail, me kin kalohki komouro; me pahn kin indahiong Zion. Ahmw Koht en ketin kakaun.

41 Oh eri ngihl ehu pahn kohla: Kumwail mwesel, kumwail mwesel, kumwail kohsang men, dehr sair mehkot me samin; kohsang nan werengen kahnimw wet; kumwail en mwakelekelada me pahn kin weuwa sapwelimen Kauno dipwisou kan.

42 Pwe kumwail sohte pahn kin pwurupwurur de sohte pahn tang ni amwail pahn kohsang met; pwe Kauno pahn ket mwohmwail, oh Koht en Israel pahn ket mwurimwail.

43 Kilang, ei papaho pahn doadoahngki koahiek; e pahn ringanla oh pahn ale kaping laud oh pahn udahn lapalapala.

44 Me tohto me pahn pwuriamweikihla ni ar pahn kilangada wasa ileileho me inenen ohla laud sang aramas koaros, oh sapwellime erikso pil ohla laud sang nein aramas koaros.

45 Eri e pahn ketikihong dingiding wehi tohto; nahnmwariki kan pahn ketikikpene dawasarail akan ong ih, pwe mehkot me irail saikinte mwahngiada, re ahpw pahn mahsaniada, oh mehkot me irail saikinte ketin karongehda, re ahpw pahn ketin kupwurehda.

46 Mehlel, mehlel, I indahiong kumwail koaros, mepwukat koaros pahn udahn pweida, nin duwen me Sahmo ketin mahsaniongiehier. Ni ansou me inou me Sahmo ketin wiahiongehr sapwellime aramas akan pahn pweida, oh ansouo nei aramas pahn pwurehng mihla nan Jerusalem, oh e pahn wiahla sapwarail sapwen sohso.

IRALAUD 21

Israel pahn pokon pene ni ansou me Pwuken Mormon pahn kohda -- Mehn likihkan pahn wiahla nin duwen aramas saledek kei en nan America -- Irail pahn mourla ma irail kamehlele oh peikihong: De eh u irail pahn palidi oh ohla -- Israel pahn kauwada Jerusalem kapwo, oh keinengkan me salongalahr pahn pwurepene.

1 Oh mehlel I indahiong kumwail, I kihwei kilel eh u rehmwail, pwe kumwail en kak ese ansou me mepwukat pahn kereniong wiawi -- pwe I pahn wahpene irail loale, sang ni duwen wereilahn arail kohpeseng, en nei aramas akan, O mehn Israel oh ehi Zion pahn pwurehng kokouda nan pwungarail;

2 Oh kilang, met iei ih kilelo I pahn kihwei rehmwail -- pwe mehlel I indahiong kumwail me ni ansou me I pahn kasalehwei mepwukat rehmwail, oh me I pahn kasalehwei pein ngehi mwurin met, oh sang ni manaman en Ngehn Sarawi me Sahmo pahn ketikihwei rehmwail, me pahn kesehkin mehn likihkan pwe irail en kak ese duwen aramas pwukat me iei irail kisehn keinek en Jacob, oh duwen nei aramas pwukat me mehn likihkan pahn katohre irail peseng.

3 Mehlel, mehlel, I indahiong kumwail, ni ansouo me mepwukat pahn sansal ong irail duwen Sahmo, oh me e pahn kohsang rehn Sahmo me irail me pahn kasalehiong kumwail.

4 Pwe iei duwen erepit en Sahmo me irail pahn poahsoanda pohn sahpwet, oh pahn kokouda nin duwen aramas saledek akan sang ni manaman en Sahmo, pwe mepwukat en wiawi sang reh rail ong kisehn kadaudek amwail akan, pwe inou en Sahmo pahn pweida me e ketin inoukiongehr sapwellime aramas akan, O mehn Israel.

5 Eri, ni ansou me doahk pwukat oh doahk kan me pahn wiawi nan pwungamwail mwurin met, e pahn sang rehn mehn likihkan, pwehn kohieng noumwail akan me pahn milahr nan arail soh kamehlele pwehki dihp.

6 Pwe met iei kupwuren Sahmo me e pahn kohsang rehn mehn likihkan, pwe e pahn ketin kasalehiong sapwellime manaman ong mehn likihkan, pwe sang ni kahrepe wet ma mehn likihkan sohte pahn kakeluwakiala arail mohngiong kan, a irail en koluhla oh kohdo rehi oh pepdaisala ni edei pwe irail en oh esehla ei padahk mehlel kan, pwe irail en mihla nan pwungen nei aramas akan, O mehn Israel.

7 Oh ni ansou me mepwukat pahn wiawi, noumwail kan pahn tepier esehla mepwukat -- E pahn wia kilel ehu ong irail, pwe irail en ese me doahk en Sahmo tepier pwe en kapwaiada inouo me e ketin wiahiongehr aramas akan me iei mehn Israel akan.

8 Oh ni en rahno pahn kohdo, e pahn wiawi me nahnmwariki kan pahn ketikikpene dauwasarail akan; pwe mehkot me irail saikinte mwahngiada re ahpw pahn mahsaniada. Oh mehkot me irail sohte kin ketin karonge, irail pahn kin kupwukupwure.

9 Pwe ni rahno, Sahmo pahn ketin wia doahk ehu pwehki ngehi, me pahn doahk kesempwal oh kopuriamwei nan pwungarail; oh pahn mie irail akan nanpwungarail me sohte pahn kin kamehlele; ahpw emen me pahn padahkihong irail.

10 Ahpw kilang, mour en nei tohn doadoahko pahn mihmi nan pehiet; eri irail sohte pahn kamedakahla ih, mendahte ma e pahn ohla pwehki irail, ahpw I pahn kamaiowehda ih, pwe I pahn kasalehiong irail me ei loalokong laud sang pit in tepelo.

11 Eri e pahn wiawi me mehmen me sohte pahn kamehlele ei mahsen akan, iei ih Jesus Christ me Sahmo pahn ketikihong ih en wahla rehn mehm likihkan, oh e pahn ketikihong ih manaman me e pahn wahla rehn me likihkan, (e pahn wiawi duwehte me Moses koasoiahier) irail pahn lekdeklahsang rehn nei aramas en inou kan.

12 Oh nei aramas akan me wia luhwen kisehn Jacob pahn mihmi nan pwungen mehn likihkan, ehi, mihmi nan pwungarail duwehte laion emen nan pwungen mahn lawalo kan en nan wel, duwehte laion pwulopwul emen nan pwungen pelin sihpw ehu, me ma e pahn kotehla irail, e

pahn tihak irailedi oh tehr irail peseng oh sohte me kak kapitala.

13 Pehrail akan pahn kodahng pohn arail imwintihti kan, oh arail imwintihti kan koaros pahn palidi.

14 Ehi, meid suwediong irail mehn likihkan ma re sohte pahn koluhla; pwe e pahn wiawi ni rahno, me Sahmo ketin mahsanih, me I pahn kemehla noumwail oahs akan nan pwungamwail, oh I pahn kauwehla mehn dakepemwail akan;

15 Oh I pahn kasohrehla kanihmw akan nan sapwamwail akan; oh pahn kesehdi amwail wasahn mahwen kan koaros.

16 I pahn kasohrehla amwail mehn kosetipw sang nan sapwamwail en, oh kumwail solahr pahn naineki sounkosetipw akan.

17 I pahn pil pelehdi amwail sansal takai kan, oh amwail eni mwahl akan sang nan pwungamwail; oh kumwail solahr pahn pwongih doadoahk en pehmwail akan;

18 I pahn usada welin tuhken sang nan pwungamwail; eri I pahn kauwehla amwail kahnimw akan.

19 Oh e pahn wiawi me likamw koaros, pit koaros, oh peirin koaros, oh uhpene koaros, oh doadoahk en eni mwahl akan koaros, oh nenek kan pahn solahr mie.

20 Pwe e pahn wiawi, me Sahmo ketin mahsaniher, me ni rahno ma mehmen me sohte pahn koluhla oh kohdo rehn nei pwutak kempoako, I pahn kihsang ih nan pwungen nei aramas akan, O mehn Israel;

21 Oh I pahn iki oh kihong ei mwakar pohrail, rasehng mehn likin lamalam akan, me inenen laud mehlel me rasehng me re saikinte rong.

22 Ahpw ma irail pahn koluhla oh rong ehi padahngkan, oh sohte kakeluwakiala nan mounngionarail akan, I pahn kauwada ei mwomwohdiso nan pwungarail, oh irail pahn kodohng nan inouo oh pahn wiahla kisehn Jacob, me I pahn kihong sahpwet sapwarail sapwen sohso.

23 Oh irail pahn sewese nei aramas akan, kisehn Jacob kan, oh pil pahn tohto keinek en Israel me pahn kohdo, pwe irail en kak kauwada ehu kanihmw, me pahn kahdaniki Jerusalem Kapw.

24 Oh irail pahn sewese nei aramas akan, me kohpeseng wasa koaros pohn sahpwet, pwe irail en kohpene ong nan Jerusalem Kapwo.

25 Oh ansouo manaman en nanleng pahn kohdihong irail; oh I pil pahn mihmihte nan pwungarail.

26 Oh ni rahno doahk en Sahmo ahpw pahn tepier, pil duwehte ansouo rongamwahuo pahn kolahng kisehn aramas pwukat. Mehlel I indahiong kumwail, ni rahno me doahk en Sahmo pahn tepida nan pwungen nei aramas koaros me kohpesengehr, ehi, iei keinek me salongalahr, me Sahmo ketin kahluwa irail sangehr nan Jerusalem.

27 Ehi, doahko pahn tepiada nan pwungen irail akan koaros me kohpesengehr, sang ni en Sahmo pahn ketin kaunopada ahlo me irail en kohdo rehi, pwe irail en likweriong Sahmo ni edei.

28 Ehi, oh ansou me doahko pahn tepiada, ni en Sahmo pahn ketiket nan sahpw koaros pwe en kaunopada ahlo ong sapwellime aramas akan, pwe irail en kak pwuripene arail wasa nan sapwarail sapwen sohso.

29 Oh irail pahn kohsang nan sahpw koaros, oh irail sohte pahn kohla ni pwurur, de irail pil sohte pahn tang, pwe I pahn mih mwohrail, oh I pahn mih mwurirail, Sahmo me ketin mahsaniher.

IRALAUD 22

Ni imwin rahn akan, Zion oh rahn Zion akan pahn kokouda, oh Israel pahn kohpene ni kalahngan oh limpoak mehlel -- Irail pahn powehdi -- Karasahiong Aiseia 54.

1 Oh eri dahme intingdiero pahn wiawi: Koul, oh lih me sohte noumw seri, ke sohte kin neitik; tepida koul, oh ngisingis, ke sohte kin ahneki medek en neitiki; pwe nein me sohte kin neitiko pahn kin tohto sang lih me mie eh pwoudo, Kauno ketin mahsaniher.

2 Kalaudehla wasahn imwomw impwal en, oh mweidohng irail en kihpeseng likou kan en wasahkan me ke kin mihe; dehr luwehkidi mehkot, kareireiala ahmw sahl akan oh katengehdi ahmw lepin tuhke kan.

3 Pwe ke pahn mihla palimaun oh palimeing, oh ke pahn sapwen iki mehn likihkan, oh ke pahn kadirehla kanihmw me sohte towehkan.

4 Dehr perki pwe kowe sohte pahn namenekala, oh ke sohte pahn ehkihla, pwe ke sohte pahn sarohdi; pwe ke solahr pahn tamataman duwen namenek en omw

pwulopwulo, oh ke solahr pahn pahn tamataman duwen namenek me kowe kin ahneki ni omw wia lihdi men.

5 Pwe me ketin wiahiukadahro iei me pahn ketin wia omw pwoud, mware iei Kauno wasa lapalahpie, oh iei ih omw Soundor, iei Koht Sarawi en Israelo -- me pahn mwareniki Koht en sampah pwon.

6 Pwe Kauno ketin malipeiukehr nin duwen lih emen me lekdeklahr oh likdeklahr nan ngenomw, oh ni omw pwulopwulo ke kin pwopwoud ahpw lekdeklahr, omw Koht me ketin mahsanihier met.

7 Pwe ansou tehkis me I kесеiukala; ahpw sang ni kalahngan lapalahpie me I pahn kapwureiukodo.

8 Ansou me I kin kisin lingeringer, I kin karukiala mesei sang uhk ni ansou tikitik, ahpw sang ni kadek kohkohlachte, I pahn kin mahkehng uhk, Kauno omw Soundor me ketin mahsanihier met.

9 Pwehki met, nohlik en Noah ong ie, me nin duwen me I kahukilahr me e solahr pahn kadirehla sampah, me rasohng ei kahukilahr me I solahr pahn lingeringeriong uhk.

10 Pwe nahna kan oh dohl akan pahn mwekidada, a ei limpoak ong uhk pahn poatoapatete, oh ei inou en meleileio pahn pil sohte pahn mwekid, Koht me kin ketin loaloale iuk me ketin wie mahmahsan.

11 O ke lokalahr, ke kin iang melimelo wie lekilekdek seri, oh ke saikinte insenamwahula! Kilang, I pahn koasoanehdi omw takai kan ki mwahi kaselel akan, oh I pahn koasoanehdi omw poahson akan ki takai kesempwal akan.

12 Oh I pahn wiahiong omw wenihmw en iroir akan ki takai me kin wie pipir akan, oh omw ewen kehl akan ki takai lingaling kan, oh irepen sapwemw kan koaros ki takai kesempwal akan.

13 Oh noumw seri koaros pahn esehla duwen Kauno, oh meleilei laud pahn kin kipe irailedi.

14 Ni pwung me ke pahn poahsoanda sang ie, ke pahn kin dohsang apwal akan pwe kowe en dehr kin masak, oh ke pahn kin dohsang lemw pwe e sohte pahn karanih iuk.

15 Kilang irail pahn udahn kohpene pwehn kin mahweniong uhk, me pahn kaidehn sang rehi; irail akan me pahn kohpene pwehn pelianuhkada pahn kin lohdi pwehki kowe.

16 Kilang, I wiadahr sounsuk meteo pwe en kin peuk mwalusoko nan kisinieio, oh I wiadahr kepwehn doadoahk ehu ong ni eh doadoahko; oh I wiadahr mehn kauwehlao pwe en kin kauwehla.

17 Sohte tetehn mahwen ehu pahn pweida ma e pahn wiawihda pwehn pelianuhkada, oh loh koaros me pahn lahlahwe ong ni kedipe uik; kowe pahn sapeng irail. Met iei duwen sohsohn sapwellimen Kauno papah kan, oh arail pwung kin kohsang rehi, Kauno ketin mahsaniher.

IRALAUD 23

Jesus ketin kamanahla mahsen kan sang Aiseia -- E ketin poahngokihong aramas akan en kin rapahki soukohp akan -- Mahsen akan sang Samuel mehn Lamano me pid iasadao patehngehr mehkan me irail intinghdi.

1 Oh met, kilang, I indahiong kumwail, me kumwail en rapahki mepwukat. Ehi, iei ehu kosonned me I kihong kumwail pwe kumwail en kin pwerisek rapahki mepwukat; pwe mahsen akan sang Aiseia me kesempwal.

2 Pwe mehlel e kosoiahier mehkan koaros me pidada duwen nei aramas akan me iei mehn Israel akan; eri ihme kahrehda mie anahnepen ei pahn pil koasoai ong irail mehn likihkan.

3 Oh mepwukat koaros me e kasaledahr wiawihier oh pahn pil wiawi; iei duwen mahsen akan me e kasaledahr.

4 Eri rong ei mahsen akan; kumwail intinghdi mehkan me I padahkihong kumwailehr; oh nin duwen ahnsouo oh kupwuren Sahmo me irail pahn kolahng rehn mehn likihkan.

5 Oh mehmen me rong ei mahsen akan oh koluhla oh pepdaisala, ihete me pahn komourala. Rapahki rehn soukohp akan, pwe me tohto me kin kadehde mepwukat.

6 Oh met ni en Jesus ketin mahsanihier mepwukat, e pil ketin kasalehiong irail, mwurin e ketin kawehwehiong iraillehr duwen mahsen en Koht akan koaros me re aledier, e ahpw ketin mahsanihong irail: Kilang, ekei mahsen en Koht akan me I men kumwail en intinghdi, me kumwail saikinte intinghdi.

7 Oh ih eri ketin mahsanihong Nephi: Wahdo inting kan me kowe kin wie nekinekid.

8 Oh ni ansou me Nephi wadohr inting kan, oh kihdier mwowe, ih eri ketin mahsanlahng irail oh mahsanih:

9 Mehlel, I indahiong kumwail, I padahkiong nei papah Samuel, mehn Lamano, me en kadehdehiong aramas pwukat, me ni rahno me Sahmo pahn ketin kawawih sapwellime lenglengo pwehki ngehi tohto soulang kan me pahn iasadahsang me melahr akan, oh pahn pwarohng me tohto, oh re pahn padahk ong irail. Oh e ahpw ketin mahsanihong irail: Kaidehn met me mehlel?

10 Oh sapwellime werengkan sapeng oh inda: Ehi, Kaun, Samuel kohpadahr nin duwen sapwellimomwi mahsen akan, oh irail koaros pweidahr.

11 Oh Jesus ketin mahsanihong irail: Iaduwen amwail sohte intingihdi met, me tohto souleng kan iasadahr oh pwarohngehr me tohto oh padahkong irailehr?

12 Oh e wiawiher me Nephi tamandahr me met re saikinte intingidi.

13 Oh Jesus ketin poahngokihong ih en intingihdi; eri e intingdier nin duwen e ketin poahngokihongehr ih.

14 Oh met ni ansou me Jesus ketin kawehwedahr mahsen en Koht akan koaros nin duwen me intingdier, ih eri ketin poahngokihong irailehr en kin padahngki mehkan me e ketin kawehwehiong irailehr.

IRALAUD 24

Meninkeder en Kauno pahn kaunopada ahlo ong ni ketido keriau -- Christ pahn ket ni kopwungo -- Israel en kin kihda meirong oh meirong kan. Pwuhk en kataman en irail kin mihmi -- Karasahiong Malakai 3.

1 Oh e wiawiher me e ketin poahngokihong irailehr en kin intingihdi mahsen akan me Sahmo ketikihongehr Malakai, me e pahn ketin padahkihong irail. Oh e wiawiher me mwurin arail intingihdier, e ahpw ketin kawehwehiong irail. Oh iei mahsen pwukat me e ketin padahkihong irailehr, me mahsanih: Iet me Sahmo ketin mahsanihongehr Malakai -- Kilang, I pahn kadarewei nei meninkedero, oh e pahn kaunopada ahlo mwohi, oh eri Kauno me kumwail kin kasikasik pahn ketidohng sapwellime tehnpas sarawio ni ansou mwadang, iei

meninkeder en inouo, me kumwail kin pereniki, kilang e pahn ketido, Kauno Wasa Lapalahpie ketin mahsaniher.

2 Ihs me kakohng rahno ni e pahn ketido, oh ihs me kakohng ni e pahn ketido? Pwe e pahn ketin rasehng kisiniei en kamwakele mete ehu, oh rasehng sohpw kehlail.

3 Oh e pahn ket nin duwen mehmen me kin inim oh kamwakelehda silper; oh e pahn ketin kamwakelehda nein Levi pwutangkan; oh ketin kamwakelehda irail duwehte kohl oh silper, pwe irail en kak kihong Kauno meirong me pwung.

4 Eri meirong en Judah oh Jerusalem en pwungla rehn Kauno, duwehte nin rahn akan mahso; oh sounpar akan mahso.

5 Oh I pahn kohdo impamwail pwehn kapwung kumwail; oh I pahn wia sounkadehde pwtatiet emen me kin uh Wong sounwunahni kan, ah me kin kamwahl akan, oh me kin kauhla likamw akan, oh irail akan akan me kin kauwe lihdi kan, me sepwoupwou kan, oh irail akan me kin soikala mehn likihkan, oh sohte masak ie, Kauno, Wasa Lapalahpie me ketin mahsaniher.

6 Pwe ngehi iei ihme Kauno, I sohte kin wekila; ihme kahrehda kumwail nein Jacob akan saikinte salongala.

7 Sangete rahn en samamwail ako me kumwail salongasangehr ei tiahk sarawihkan, oh solahr kolokol irail. Kohdo rehi oh I pahn pwurowei rehmwail, Kauno, Wasa Lapalahpie me ketin mahsaniher. Kumwail kin koasoia: Ia mwomwen aht pahn pwurewei?

8 Ia duwe, mie aramas emen kak pitih Koht? Ahpw, kumwail kin pitih ie, eri kumwail kin inda: Ia mwomwen aht kin pitih komwi? Sang nan meirong kan oh nan meirong kan.

9 Kumwail rialahr, pwe kumwail kin pitih ie, duwehte tohn weiet pwon.

10 Kauno, wasa lapalahpie ketin mahsanih: Wahdo amwail meiroang kan nan wasahn nahk peneo, pwe en mie mwenge wasao; oh kumwail song kin ie sang met ma I sohte pahn ritingadahng kumwail wenihmw tok en nanleng kan, oh kamwerihdihong kumwail kapai ehu me sohte ehu wasa pahn itarohng deukada.

11 Kauno wasa lapalahpie ketin mahsanih, oh I pan lipwoare me kin kang wahntuhkeo, pwehki kumwail, oh e sohte pahn kauwehla wahntuhke kan me mih nan

sapwamwail akan; de pil amwail tuhke wain akan en kesehdi wahrail akan nan mwetuwelo mwohn arail ansou.

12 Oh tohn wehi koaros pahn kin kahdaniki kumwail meid pai, pwehki sapwamwail pahn wiahla sahpw kaselel ieu

13 Kumwail kin lokaia laud ong ie, ahpw kumwail kin inda: Dahme se kin lokaia laud kihwei rehmwi?

14 Kumwail kin inda: Sohte katepen aht pahn papah Koht, oh ia duwe, e kin mie kamwahupe ma kitail kin kolokol sapwellime tiahk sarawihkan oh pwe se kin mamauk ni at kin alialu mwohn Kauno, wasa lapalahpie?

15 Oh met kitail kin indahki me pohn mwahsu kan, me iei irail me kin pereperen; ehi, irail akan me kin wiahda doadoahk sapwung kan kin pweida. Ehi, ni mehlel, irail akan me kin kasongosong Koht kin pil pitila.

16 Eri irail me kin lemwiki Kauno kin koasoipene ni ahnsou kan, oh Kauno kin ketin karonge oh kin ketin kupwure; oh pwuhk en kataman ieu intingidier mwowe duwen irail akan me kin lemwiki Kauno, oh irail akan me kin medemedewe mwareo.

17 Oh irail pahn wiahla nei aramas, Kauno, wasa lapalahpie ketin mahsanih, ni rahno me I pahn kapwurehpene nei aramas akan; I pahn kapit iraila nin duwen ohl emen kin kapitala nah pwutako me kin uhpa ih.

18 Oh kumwail pahn pwuredo oh esehla wekpeseng en me pwungkan oh me sapwung kan, nan pwungen mehmen me kin pahpa Koht oh mehmen me sohte kin uhpa Koht.

IRALAUD 25

Ni ketido keriau me pohn mwahsu kan oh me suwed akan pahn isila duwehte mwuten dihpw meng -- Elias pahn pwuredo mwohn rahn lapalap oh kamasapwehko -- Karasalahng Malakai 4.

1 Pwe kilang, rahno pahn kohdo me pahn lulida duwehte uhmw ehu; oh irail koaros me kin pohnmwahsu, ehi, irail koaros me kin wiahda suwed pahn duwehla mwuten dihpw meng; rahno pahn pwarodo me re pahn isila, oh sohte kalowe ehu de rah ehu pahn luhwehdi, Kauno, Wasa Lapalahpie me ketin mahsaniher.

2 Ahpw ong irail me kin lemwiki edei, iei me sapwellimen me pwungo me pahn ketin kapwarahda kamwahu kan koaros nan lime kan; oh kumwail pahn kohwei oh kekeirada duwehte kow pwulopwul akan me kin mi nan kehlo.

3 Oh kumwail pahn kin tiakidi irail me suwed akan; pwe irail pahn wia mwalus pahn nehmwail akan ni rahn me I pahn wia met, Kauno, Wasa Lapalahpie, me ketin mahsanhier met.

4 Kumwail tamataman kosonned en Moses, me kin papah ie, me I kihongehr ih nan Horeb ong mehn Israel koaros, me iangahki kosonned akan oh koasoandi kan.

5 Kilang, I pahn kadarewei soukohp Elias mwohn rahn lapalap oh rahn kamwasepwehko en Kauno;

6 Oh e pahn kapwurehla mohngiong en sahm akan ong neirail akan, oh mohngiong en serihkan ong samarail akan, pwe ma soh, I pahn kohdo oh kariahla sampah.

IRALAUD 26

Jesus ketin kawewehda mehkoaros sang ni tapio lel ni imwio -- Seri pwelel akan oh serihkan kosoia me kopwuriamei kan me sohte kak intingihdi -- Irail akan me mih nan mwomwohdiso en Jesus Christ kin ahneki soangen dipwisou tehieu nan pwungarail.

1 Oh met ni ahnsou Jesus ketin padahngkier mepwukat, ih eri ketin kawehwehiongehr pokono; oh e ketin kawehwehiong irailehr, mehkoaros, me kesempwal akan oh me sohte nohn kesempwal kan.

2 Oh e ketin mahsanhi: Mahsen en Koht pwukat, me kumwail saikinte alehda: Pwe iei duwen erepit en ih pwe mepwukat kohieng dien mwuhr akan.

3 Oh e ahpw ketin kawehwehdahr mehkoaros, me sangete ni tapio lao lel ahnsou me e pahn ketikihdo ni sapwellime klohri -- Ehi, ni mehlel, me mehkoaros me pahn kodohng pohn pwelen sampah, lao pahn peipesengki karakar laud sang mehkan me wia irailda, oh sampah pahn pirapir pene duwehte doaropwe me kin pirapir ong ni tepin tuhke, oh nanleng oh sampah pahn sohrala.

4 Oh me ni rahn lapalapo oh rahn neko, ni aramas koaros, oh keinek koaros, oh wehi koaros, oh sahpw koaros, oh loh koaros pahn uh mwohn Koht, pwe en ale kadeik en arail doadoahngkan, ma irail mwahu de suwed --

5 Ma irail pahn mwahu, irail pahn iasadahng mour poatoapoat; oh ma irail pahn suwed, irail pahn iasadahng kalokolok soutuk sang ni ara sohte kak pahrek pene kohkohlachte, nin duwen mahk, oh pwung, oh sarawi me mih rehn Christ, me ketier mwohn kapikipikdahn sampah.

6 Oh met e sohte kak kilelehdi nan pwuhk wet nin duwen epwiki kis eh u en me Jesus, ni mehlelo, ketin padahkihongehr aramas akan.

7 Ahpw kilang sleit en Nephi адаудикидахр pali laud en mehkan me e ketin padahkihongehr aramas akan.

8 Oh mepwukat me I kilelediher, iei pali tikitik en mehkan me e ketin padahkihongehr aramas akan; oh I kileledier irail ong ni kahrehpen mepwukat en kak pil pwurodohng aramas pwukat, sang rehn mehn likihkan, nin duwen mahsen akan me Jesus ketin mahsaniher.

9 Oh ni arail eh pahn alehda met, ma iei e konehng irail en alehda mahs, pwe en sohngada arail pwoson, oh ma mehlel me re pahn kamehlele mepwukat, eri me inenen kopwuriamwei kan ahpw pahn kin sansal ong irail.

10 Oh ma mehlel me re sohte pahn kamehlele mepwukat, eri me kopwuriamwei akan pahn kohsang reh rail pwehn kahrehiong irail en lekdekla.

11 Kilang, I kerentiong I pahn intingihdi mepwukat, koaros me intingdiher pohn sleit en Nephi, ahpw Kauno sohte ketin mweidohng ie, e ahpw ketin mahsanih; I pahn song pwoson en nei aramas akan.

12 Eri ngehi, Mormon, kileledier mehkan me Kauno ketin poahngokihongiehier. Oh met ngehi, Mormon, kanekelaehr ei padahk pwukat, oh tepier kilelehdi mehkan me e ketin poahngokihongiehier.

13 Eri, I men kumwail en wehwehki pwe, ni mehlelo, Kauno ketin padahkohngehr aramas akan ni erein rahn siluh; oh mwurin ansou e kin ketin kasalehiong irail ih ni ansou kan, oh kin ketin pilitikihpene pilawo, oh kin ketin kapaiada, oh ketikihong irail.

14 Oh e wiawiher me e ketin padahkohngehr oh kapaidahr serihkan nan pokono me sansalehr, oh e ketin lapwahda loh rail akan, oh irail eri koasoai ong arail pahpa

kan mehkan me kesempwal oh kopwuriamei kan, me laudsang mehkan e ketin kasalehiongehr aramas akan; oh e ketin lapwahdahr loh rail akan pwe irail en kak lokaia.

15 Oh ih eri ketidahla nanleng -- keriapak en eh ketin kasalehiong iraillehr pein ih, oh ih eri ketidahla rehn Sahmo, mwurin eh ketin kamwahualahr arail soumwahu kan koaros; neirail me mwator akan, oh ketin kapehd pesengehr me masukun akan, oh ketin kamwahualahr salengen me salengepon kan, oh e ketin kamwahualahr soangen soumwahu koaros nanpwungarail, oh ketin kamourada ohl emen sang mehla, oh ketin kasalehiong iraillehr sapwellime manaman, oh e ahpw ketin peukdalahr rehn Sahmo.

16 Kilang, pokono kohpehnehr, oh irail koaros kilangehr oh rongehhr seri pwukat; ehi, pil seri pwelel kin kihpeseng nan ewerail akan oh kin kosoia me kopwuriamei akan; oh mehkan me re kosoiahier kin sohte mweimwei ong aramas en kilele iraledi.

17 Oh e wiawihher me werengkan me Jesus ketin piladahhr tepier pepdais oh padahk sangete ni ansouo ong irail me tohto kan me kin kodohng reh rail; oh irail akan me pepdaiskilahr mwaren Jesus Christ kin direkilahr Ngehn Sarawio.

18 Oh me tohto reh rail kilangehr oh rongehhr mehkan me aramas sohte kin kak koasoia, mehkan me sohte mweimwei ong irail en intingihdi.

19 Oh irail kin padahk oh kin apwali emenemen; oh irail kin ahneki mehkan me kin soahng tehieu nanpwungarail, aramas koaros eri kin wia mwahu ong emenemen irail.

20 Oh irail wiahier mehkoaros me Jesus ketin poahngokihong iraillehr.

21 Oh irail akan me pepdaislahr ni mwaren Jesus kin adaniki mwomwohdiso en Christ.

IRALAUD 27

Jesus ketin mahsanihong irail me eden mwomwohdiso pahn kohsang ni mwareo -- Sapwellime doadoahk oh meirong en tomw me wiadahr sapwellime rongamwahuo -- Aramas akan en kin koluhla oh pepdaisala pwe irail en

mwakelekelkihda Ngehn Sarawio -- Irail en kin duwehte Jesus Christ.

1 Oh nin duwen werek en Jesus kan wie seiseilok seli oh padapahngki mehkan me irail kilangehr oh rongehr oh kin wie pepdaisiki ni mwaren Jesus, eri irail ahpw pokon penehier oh soukihpenehr kapakap kehlail oh kaisihsol.

2 Oh Jesus pil pein ketin sansal ong irailehr, pwe irail kin wia kapakap ong Sahmo ni mware; oh Jesus ketidohr oh ketiketehr nan pwungarail, oh ketin mahsanihong irail: Dahme kumwail men I en kihong kumwail?

3 Oh irail indahiong ih: Kaun, se patohan mwahuki komwi en ketin padahkihong kiht ahd me se pahn kin kahdaniki mwomwohdiso wet; pwe mieier mwaromwarong nanpwungen aramas pwukat me pid duwen met.

4 Oh Kauno ketin mahsanihong irail: Mehlel, mehlel, I indahiong kumwail, dahme kahrehda aramas pwukat en lipahned oh mwarongkihda pwehki kisin mehkot et.

5 Ia duwe, irail saikinte wadek pwuhk sarawihkan, me kumwail pahn alehiong kumwail mwaren Christ, iei ihme edei? Pwe iei mwahro, me kumwail pahn kin adaniki ni imwin rahn akan;

6 Oh mehmen me alehda edei, oh kolokolete lel imwi, ihete me pahn komourla ni imwin rahn akan.

7 Eri, dahme kumwail pahn kin wia, kumwail en kin wia ni edei; eri, sang ni kahrehpe wet, kumwail pahn kihong eden mwomwohdiso wet sang ni edei; oh kumwail pahn peki Sahmo ni edei pwe e pahn ketin kapaida mwomwohdiso wet pwehki ngehi.

8 Oh iaduwen ei mwomwohdiso ehu ma e sohte pahn kin adaniki edei? Pwe ma ehu mwomwohdiso pahn adaniki eden Moses; e pahn kin en Moses; de ma e pahn adaniki eden aramas emen, e pahn kin en aramaso; ahpw ma e pahn kin adaniki edei, e pahn kin ei mwomwohdiso, ma e pahn me irail kin poahsoanda pohn ei rongamwahuo.

9 Mehlel I indahiong kumwail, me kumwail iei me poahsoandahr pohn ei rongamwahuo; Ihme kahrehda kumwail pahn peki mehkoaros sohte lipilipil me kumwail kin peki ni edei; eri ma kumwail pahn peki Sahmo, ong ni mwomwohdiso wet, ma e pahn ni edei, Sahmo pahn ketin karonge kumwail.

10 Oh ma mehlel mwomwohdiso wet poahsondahr pohn ei rongamwaho, eri Sahmo pahn ahpw ketin kasalehda pein sapwellime doadoahngkan loale.

11 Ahpw ma e sohte kin poahsoanda pohn ei rongamwahuo, oh kin poahsoanda pohn doahk en aramas akan, de pohn doadoahngkan en tepelo, mehlel I indahiong kumwail me irail pahn pereniki arail doadoangkan nan lepin ahnsou ieu, oh ni imwin ahnsou pahn lelledo; oh irail pahn palidi oh lekdekla nan kisinieio nan wasa me sohte me kin pwurasang ie.

12 Pwe arail doadoahk kin idawehn irail, pwe iei arail doahdoahngkan me re kin palikihdi ihme kahrehda kumwail en kin tamatam me I indahiong kumwailehr.

13 Kilang, I kihong kumwailehr ei rongamwaho, oh iet ei rongamwahuo me I kihong kumwailehr -- me I kodohng sampah pwe Ien kapwaiahda kupwuren Semeio, pwehki Semeio me ketin poaroneiehdohr.

14 Oh Semeio ketin poaroneiehdo pwe I en langadahng nin lohpuwo; oh mwurin ei langadahnr nin lohpuwo, Ien wadohng aramas akan rehi, pwe nin duwen aramas akan kilangiedahr, iei pahn kin duwehte en Koht pahn ketin kalangada irail, pwe ren kesihnen mwohi ong ni kadeikpen arail doahngkan, ma arail doahngkan pahn kin mwahu de pahn kin suwed.

15 Oh pwehki kahrehpe wet, I langadahnr ihme kahrehda nin duwen manaman en Sahmo me I pahn wadohng aramas koaros rehi, pwe irail en kadeik nin duwen arail doahngkan.

16 Oh e pahn wiawi, me mehmen me koluhla oh pepdaisala ni edei e pahn direla; oh ma e pahn dadaurete lel imwi, kilang, e pahn kin mwakelekel mwohn Semeio ni rahm me I pahn kadeik sampah.

17 Oh mehmen me sohte pahn dadaurete lel imwi, iei ihete me pahn palidi oh lekdekla nan kisinieio, wasa me sohte me kin kak pwurasang ie, pwehki iei duwen pwung en Sahmo.

18 Oh met iei mahseno e ketikihongehr aramas akan. Oh pwehki sang ni kahrehpe wet, e pahn ketin kapwaiahda mahsen akan me e ketikilahr, oh e sohte ketin likamw, ahpw e kin ketin kapwaiahda sapwellime mahsen akan koaros.

19 Oh sohte mehkot me samin kak pedelong ong nan sapwellime wehio, ihme kahrehda sohte mehkot kak pedelong ong nan sapwellime wasahn kommoalo, ihte irail akan me widenier arail likou kan nan intahi, pwehki arail pwoson, oh arail koluhlahsangehr diparail akan, oh arail loaloapwoat lel imwi.

20 Met iei kosonnedo: Koluhla, kumwail koaros me mihmi nan sampah pwon, oh kodohng ie, oh kohdo rehi oh pepdaisla ni edei, pwe kumwail en kak mwakelekelada ong ni amwail pahn alehda Ngehn Sarawi, pwe kumwail en mwakelekel ni amwail en kesihnen mwahi ni rahn en neko.

21 Mehlel, mehlel, I indahiong kumwail, met iei rongamwahuo; oh kumwail kin ese mehkan me kumwail en wiahda nan ei mwomwohdiso; pwe kumwail en pil wiahda doahngkan me kumwail kilang I wiahier; pwe me kumwail kilangehr I wia iei me kumwail en kin wia.

22 Eri, meid paih kumwail me kin kapwaihda mepwukat, pwe kumwail pahn lapalapala ni rahn en neko.

23 Kumwail en intingihdi mehkan me kumwail kilangehr oh rongehr, ihte dehr intingihdi mehkan me sohte mweimwei.

24 Kumwail intingihdi duwen doadoahk en aramas pwukat.

25 Pwe kilang, sang nan pwuhngkan me intingdier, oh me pahn intingdi, aramas pwukat pahn kadeik sangie, pwe sang reh rail, arail doadoahngkan pahn sansal ong aramas akan.

26 Oh kilang, Sahmo ketin intingihdier mehkoaros, ihme kahrehda sang nan pwuhngkan kan me pahn intingdi sampah pahn kin kadeik sangie.

27 Oh kumwail ese me kumwail pahn wia sounkopwung en aramas pwukat, sang nin duwen pwuhngo me I pahn kihong kumwail, me pahn pwung, eri, soangen aramas dahnge me kumwail en wia? Mehlel I indahiong kumwail, kumwail en duweiehte.

28 Oh me I pahn kolahng rehn Sahmo. Oh mehlel I indahiong kumwail, dahme kumwail kin peki Sahmo ni edei pahn pweieng kumwail.

29 Ihme kahrehda, peki, oh kumwail pahn ale; letelet a e pahn ritidahng kumwail; pwe mehmen me kin peki, e

pahn kin ale, oh ong ih me pahn kin letelet, e pahn kin retidahng ih.

30 Oh met, kilang, ei peren me laud, me unsek, pwehki kumwail, oh pil dih wet, oh pil rasehng Sahmo me kin ketin kupwur perendahr, oh pil tounleng sarawihkan koaros perendahr pwehki dih wet oh kumwail; pwe sohte emen me pahn salongala.

31 Kilang, I men kumwail en wehwehki; pwe I inda irail akan me momour ansou wet sang dih wet, oh sohte emen rehrrail pahn salongala; oh I ahneki peren unsek pwehki irail.

32 Ahpw kilang, I pahtoukilahr pwehki dih kapahieu sang dih wet, me tepelo iei nein ehl me pahn kahrehla irail nin duwen me selidi kei; pwe irail pahn pwainkiniehla silper oh kohl, oh ong me loangenmwet kin kauwehla oh me lollap akan kin kak kauwehla oh pirapahla. Oh ni rahno me I pahn pwarohng irail iei me I pahn kihong pohrail duwen pein arail doadoahngkan.

33 Oh kedekedeo ni ansou me Jesus ketin kaimwsekilahr padahk pwukat, e ahpw ketin mahsanihong sapwellime werengkan: Kumwail en pedelong nan ewen kehl me tehtiko; pwe ewen kehlo me tehtiko; oh ahlo me tehtik kin kolahng mour, oh me malaulau me kin diarada; a ewen kehlo me tehlapo, oh ahlo me tehlapo kin kolahng mehla, oh me tohto kin keidla loale lao wasa pwong lelledo, oh sohte emen kin kak doadoahk ie.

IRALAUD 28

Meh duwemen sang nan meh ehk riemeno pehmadahr oh inoukier duwen sohsohki sapwellimen Christ wehio ni ansou me irail pahn mehla -- En me silimeno en Nephi anahno oh manaman en powehdi mehla nin duwen irail pahn mihmi sampah lao Jesus pil pahn ketin sapahldo -- Irail wekila mohmwarail oh kin kilangada mehkan me sohte mweimwei ong aramas en koasoia, oh met irail wie padapadahk nan pwungen aramas akan.

1 Oh ni ahnsou me Jesus ketin padahngkier mahsen mepwukat; ih eri ketin mahsanihong emenemen sapwellime werengkan, ni e ketin mahsanih: Dahme

kumwail kin anahne I en wia mwurin ei pahn kohla rehn Sahmo?

2 Oh irail koaros kasalehda, ihte me silimeno me sohte iang, ni arail inda: Se anahne me mwurin aht mourkiher nin duwen sounpar en aramas, se anahne aht doadoahk me komwi ketin malipehkin kitehr en nekila, pwe sen mwadang kohwei rehmwi nan sapwellimomwi wehio.

3 Oh e ketin mahsanihong irail: Meid paih kumwail pwehki kumwail kin anahne sang ie met; eri, mwurin amwail pahn mahkiher sounpar isihsek riau, kumwail pahn kadohng ie nan ei wehio; oh kumwail pahn diar koammoal rehi.

4 Oh ni e ketin mahsanihier mepwukat ong irail, ih eri sopeilahng irail me silimeno, oh mahsanihong irail: Dahme kumwail pahn men I en wiahiong kumwail, ni ahsou me I pahn kohla rehn Sahmo?

5 Oh irail pahtoulahr nan arail mohngiong kan, pwe irail sohte kak indahiong ih duwen me irail anahneo.

6 Oh e ahpw ketin mahsanihong irail: Kilang, I ese amwail medemedewehkan, oh kumwail kin men wia duwehte anahn en Sohn, kempoako, me iangiehier ni ei kin wie padapadahk seli, mwohn en mehn Jews akan arail kalopwuielahr.

7 Eri, meid paih kumwail, pwe kumwail sohte pahn pehm mehla; ahpw kumwail pahn momour pwe kumwail en kilang doadoahk en Sahmo ong aramas akan, lao mehkoaros pahn pweida nin duwen kupwuren Sahmo, ni ahsou me I pahn kohdo ni ei klohri ki manaman en nanleng kan.

8 Oh kumwail sohte pahn pehmada medek en mehla; ahpw ni ei pahn kohdo ni ei klohri kumwail pahn wikila ni marep tehieu sang ni paliwar me kin mehla ong ni paliwar me kin momour kokkohlahte; oh eri kumwail ahpw pahn kapaida nan wein Semeio.

9 Oh pil ehu, kumwail sohte pahn medekla ni pali uduk ni amwail pahn koukouson pohn sampah, de kumwail pil pahn sohte insenwedala, ihte ma pahn sang ni dipen sampah kan; oh koaros met I pahn kapwaihda pwehki iei me kumwail kin anahne I en wia, pwe kumwail kin anahne me kumwail en kin wahdo aramas tohto rehi, ni ahsou me sampah pahn mihmiehte.

10 Oh pwehki kahrehpe wet, kumwail pahn ahneki peren unsek; oh kumwail pahn mwohndihong nan wein Semeio; ehi, amwail peren pahn kin unsek; duwehte me Sahmo ketikihong ie; oh kumwail pahn duwehte ngehi, oh ngehi iei me duwehte Sahmo; oh Sahmo oh ngehi me wia ketin wiahkihte ehu.

11 Oh Ngehn Sarawio kin ketin kadehdehda Sahmo oh ngehi; oh Sahmo ketikihong aramas akan Ngehn Sarawio pwehki ngehi.

12 Oh ni en Jesus ketin kasaledahr mahsen pwukat, e ahpw ketin sairiki irail koaros limehkan, ihte irail silemeno me pahn mihmi me e sohte ketin sair, oh I eri ketidahr.

13 Oh kilang, nanleng ahpw ritidahr, oh irail peukdahla nanleng, oh irail kilangehr oh rongehr mehkan me sohte mweimwei ong aramas en kak koasoia.

14 Oh e sohte mweimweiohng irail en koasoia, de sohte manaman me pil kohiong irail en kak koasoiyahda mehkan me irail kilangehr oh rongehr;

15 Oh ma irail momourkihte paliwar de so, irail sohte kak koasoia; pwe irail mwomwen ringanla, me irail wekilahsang nan paliwar en uduk wet ong ni irair en momour kohkohlahte, pwe irail en kak kilang duwen mehkan me sapwellimen Koht.

16 Ahpw e wiawiher irail pil padahkehr pohn sampah, ahpw irail sohte padahngki mehkan me irail rongehr oh kilangehr, pwehki kosonnedo me kohieng irailehr nanleng.

17 Oh met, ma irail aramas de soh, sangete ni arail ringanlao; I sehse.

18 Ahpw uhwen ei ese sang nin duwen inting me kiledier -- irail kolahr pohn sahppo, oh kin padahkohngehr aramas koaros, kahrehiong aramas tohto en iangala mwomwohdiso nin duwen irail kin kamehlele arail kin wie padapadahk; irail kin pepdais, oh duwen tohtohn irail akan me pepdaislahr, irail kin alehda Ngehn Sarawio.

19 Oh irail lekdeklong nan imweteng sang irail akan me sohte towe mwomwohdiso. Oh imweteng kan sohte kin kak kolokol irail, pwe irail dampeseng wiahda riau.

20 Oh irail lekdekdhongehr nan pwel, ahpw irail kin kihong pwehlo mahsen en Koht, eri sang nin duwen sapwellime manamano, irail pitisangehr nan wasa loal

akan en sampah; oh irail eri solahr kak weirada pwoahr akan me pahn itar en koledi irail.

21 Oh pahn pak siluh me irail lekdeklahr nan uhmw oh re sohte kin ehkihla.

22 Oh pahn pak riau irail lekdekiongehr nan kehl en mahn lawalo kan; oh kilang irail kin mwadohng ong mahn lawalo kan rasehng seri men kin mwadohng simpwul emen oh sohte kin ohla.

23 Oh nin duwen me wiawiher me irail eri kolahr rehn mehn Nephi koaros oh kalohkier rongamwahu en Christ ong aramas koaros me mihmi pohn sahpwo: Oh irail ahpw wekiongehr Kauno, oh re miniminiongehr mwomwohdiso en Christ, oh met aramas en dihwo kapaidahr, nin duwen mahsen en Jesus.

24 Oh met, ngehi, Mormon, kanekelahr ei koasoai me pidada mepwukat ong ni ansou eh.

25 Kilang, I kereniong kilededi eden irail akan me sohte pahn pehmada mehla ahpw Kauno sohte ketin mweidada; eri I sohte pahn intingihdi irail, pwe irail karirirsangehr sampah.

26 Ahpw kilang, I kilang irailahr, oh irail kin seuwese ie.

27 Oh kilang irail pahn pil mih nan pwungen mehn likihkan, oh mehn likihkan pahn kin sohte ese irail.

28 Irail pahn pil mih nan pwungen mehn Jews akan, oh mehn Jews akan pahn kin sehse irail.

29 Oh e pahn wiawi, ni ansou me Kauno pahn ketin mwahngier me e konehngiehr sang ni sapwellime erepit me irail pahn doadoahk ong keinek en Israel akan me tohrohr pesengehr; ong wehi koaros, kadaudok koaros, loh kan koaros, oh aramas akan koaros, oh pahn wadohng me tohto rehn Jesus, pwe arail anahno en pweida, oh pil pwehki manaman kehlail en Koht me mihmi rehrail.

30 Oh irail pahn duwehla tounleng en Koht akan, oh ma irail kapakap ong Sahmo ni mwaren Jesus irail kak kasalehiong pein irail mehmen me mwomwen mwahu ong irail.

31 Eri, doahk kesempwal oh kopwuriamei kei me irail pahn wiahda, mwohn rahn lapalap me kohkohdo ni ahnsou me aramas koaros pahn uh mwohn mwoalen kopwung en Christ;

32 Ehi, e pahn mie doahk kesempwal oh kopwuriamei ehu nan pwungen mehn likihkan me irail pahn wia, mwohn rahn en kadeiko.

33 Oh ma kumwail ahnekier mahsen en Koht akan koaros kasaledahr duwen doadoahk kopwuriamei koaros en Christ, nin duwen mahsen en Christ, kumwail udahn pahn ese me mepwukat koaros pahn pwarodo.

34 Oh meid suwediong mehmen me sohte pahn kin karonge mahsen en Christ, oh pil ong irail akan me e ketin piladahr oh poaroanehla rehrrail; pwe mehmen me sohte kin alehda mahsen en Jesus oh mahsen en irail akan me e ketin poaroanehwei kin sohte alehda ih; oh eri e sohte pahn ketiki irail ni rahn en neko.

35 Oh e pahn mwahu ong irail ma irail sohte pahn ipwidi. Pwe, ia duwe, kumwail kin leme me kumwail kak soikala kosonned en Koht emen me ketin kupwur olahr, me aramas akan kin sok powe, me komouro kin kolang ie?

36 Oh met kilang, nin duwen ei kosoiahier duwen irail akan me Kauno ketin piladahr, ehi, nin duwen irail me silemeno me peukdalahr nanleng kan, I sehse me re me mwakelekeldahsangehr paliwar en sampah ong ni paliwar me sohte pahn mehla kohkohlachte --

37 Eri kilang, sangete ni ei wie intinting, I kin peki Kauno, oh e ketin kasalehiongihier me mie anahnepen wekila en paliwararail en wiawi, pwe ma soh, irail pahn udahn pehm mehla;

38 Eri, ihme kahrehda mie ehu wekila en wiawihong paliwararail, pwe irail en dehr mehla, pwe irail en dehr medekla de pahtoula, ihte ma pahn sang ni dipen tohn sampah kan me irail en kin medengkihla.

39 Wekila wet sohte rasehng wekilao me pahn wia ni rahn en neko: Ahpw mie ehu wekila me wiawihong irailahr ong ni irair ehu me Satan pahn kin sohte kak powehdi irail, pwe en sohte kak song irail; oh irail mwakelekaladahr ni pali uduk, pwe irail me sarawi, oh manaman en sampah kan sohte kak kaluwe irailedi.

40 Oh irail en kin mihmihte nan irair wet lao lel ni rahn en kadeiko me Christ sapwellimaniki; oh ni rahno irail pahn alehda wekila laud ehu, oh irail en solahr kohiela, ahpw en kolahng nan sapwellimen Sahmo wehio, pwehn mihla rehn Koht nanleng kohkohlachte.

IRALAUD 29

Kodahn Pwuken Mormon iei ehu kilel me Kauno ketin tapihadahr pwe en ketikihpene mehn Israel akan on en ketin kapwaiada sapwellime inou kan -- Irail akan me kin soikala sapwellime kisakis oh kaudiahl en imwin rahn akan pahn riahla.

1 Oh met kilang, I indahiong kumwail me ni ansouo me kauno pahn ketin mwahngier me e konehngehr, sang nin duwen sapwellime erepit, me padahk pwukat pahn kodohng me likihkan me sang nin duwen sapwellime mahseno, eri mwurin ahnsouo kumwail pahn esehla duwen inouo me Sahmo ketikihongehr serien Israel akan, me pid duwen arail pahn pwuredohng sapwarail sapwen sohso kan, me pahn tepier pweida.

2 Oh kumwail en esehla duwen mahsen akan en Kauno koaros, me soukohp sarawihkan kasaledahr pahn pweidah; oh kumwail en dehr kosoia me Kauno pahn ketin kapwendahla duwen sapwellime ketidohng serien Israel akan.

3 Oh kumwail solahr pahn anahne medemedewe nan amwail mohngiong kan me sohte pahn mie katepen mahsen akan me sansaladah, pwe kilang, Kauno pahn ketin tamatam sapwellime inouo me e ketin wiahiongehr sapwellime mehn Israel akan.

4 Oh ni amwail pahn kilang duwen padahk pwukat pahn pwarada nan pwungamwail, eri kumwail solahr pahn soikala wiewia kan en Kauno, pwe kedlahs en sapwellime pwungo mihmi ni pali maun en limeo; oh kilang, ni rahno, ma kumwail pahn soikala sapwellime wiewia kan, e pahn ketikihong kumwail en lohdi sang ni amwail wiewia kan ni ahnsou keren.

5 Meid suwediohng ih me kin soikala wiewia kan en Kauno; ehi, meid suwediong ih me pahn kasohwe Christ oh sapwellime doadoahngkan!

6 Ehi, meid suwediong ih me pahn kasohwe kaudiahl akan en Kauno, oh me pahn kin kosoia me Kauno solahr pahn ketin doadoahk sang ni kaudiahl, kokohp, de sang ni kisakis akan, de sang ni loh kan, de sang ni kakehlelda aramas, de ni manaman en Ngehn Sarawi!

7 Ehi, oh meid suwediong ih me pahn kin kosoia ni rahno, pwe en kin kepwehpwehkihla, me Christ sohte kak ketin wiahda manaman; pwe mehmen me wia met e pahn wiahla nein tepelo, eri sohte mahk pahn koghieng ih, met iei sang nin duwen mahsen en Christ!

8 Ehi, oh kumwail solahr anahme en lipahnedede, de soikala, de pil wia mwardongki mehn Jews akan, de pil ekei kisen mehn Israel akan; pwe kilang, Kauno kin ketin tamataman sapwellime inouo me wiawihong irailehr, oh e pahn ketin wiahiong irail nin duwen me e ketin kaukilahr.

9 Eri kumwail en dehr leme me kumwail kak kahrehiong Kauno en dehr ketin wia ni pwung en kapwaiada inouo me e ketin wiahiongehr mehn Israel.

IRALAUD 30

Mehn likihkan en imwin rahn akan aledier poahngok ehu me ren koluhla oh kodohng Christ oh iang towehla mehn Israel akan.

1 Kumwail mehn likihkan, rong, oh rong mahsen akan en Jesus Christ, iei me Ieros en Koht Ieias, me ketin poahngokihongiehier me I pahn kasalehda mehkan me pid duwen kumwail, pwe, kilang e ketin poahngokihongiehier me Ien intingihdi, me mahsanih:

2 Kumwail koaros mehn likihkan, sohpei ang amwail tiahk suwed akan; oh koluhla sang nan amwail doahk suwed akan, likamw akan, widing kan, oh amwail tihak en nenengkan, akan, oh amwail tiahk kelingeringer rir akan, oh amwail pwongih eni mwahl akan, oh amwail mwersuwed, oh amwail winahni kan, oh amwail reirin akan, oh amwail samiminin akan, oh sohpeisang wiewia suwed oh tiahk kelingeringer koaros, oh kohdo rehi, oh pepdaisala ni edei, pwe kumwail en kak alehda lapwapen dipamwail akan, oh kumwail en audaudkihda Ngehn Sarawi, pwe kumwail en kak iang towehla nei aramas me kin wie mehn Israel.

KAPAHIEU EN NEPHI

PWUKEN NEPHI ME IEI IH ME NEIN NEPHI--
EMEN WEREK EN JESUS CHRIST

Koasoiepen Nephi, nin duwen e intingidier.

Mehn Nephi kan oh mehn Laman akan koaros wekieng mwomwohdiso en Christ -- Irail kin ahneki mehkan me kin pahrek, irail wiahda manaman akan, oh pweida nan sahpwo -- Mwurin arail kohpesengehr ni erein sounpar riepwiki, suwed akan, mwomwohdiso likamw akan, oh kamakan en souleng kan pwarada -- Mwurin sounpar silipwiki mehn Nephi akan oh mehn Laman akan suwedlahr -- Ammaron karukialahr podoapoad sarawihkan.

1 Oh e wiawiher me sounpar silihsek-pahieu dower powe, oh pil lelehr sounpar silihsek-limau, oh kilang werek en Jesus akan kauwadahr mwomwohdiso en Christ ehu nan wasa me kapelpene sahpwo pwon. Oh me tohto me kin kohdo rehrazil, oh irail akan me kin koluhla mehleh kin pepdaisla ni mwaren Jesus; oh irail pil kin alehda Ngehn Sarawi.

2 Oh e lelehr ni sounpar silihsek-weneu aramas koaros wekiongehr Kauno, koaros mehn Nephi kan oh mehn Laman akan pohn sahpwo pwon, oh sohte akpwung oh akamai kan kin wiawi nan pwungarail, oh koaros kin wiahda mwahu nan pwungarail.

3 Oh arail dipwisou kan kin pahrek nan pwungarail, eri sohte me semwehmwe oh sohte me kepwehpwe, sohte me sapwadekla oh kaliduhla, ahpw koaros kasaledekalahr, oh irail me alehier kisakis en nanlengo.

4 Oh pil lelehr keimsekpen sounpar silihsek-isuh, oh meleilei pil mihmihete nan sahpwo.

5 Oh mie doahk laud oh kopwuriamwei me sapwellimen Jesus werengkan wiadahr, pwe irail kamwahualahr me soumwahu akan, kapwohrada me melahr akan, oh kin kahluhda me mwator akan, kin kahrehiong me masukun akan en kilangada wasa, oh me salengepon akan en kin rongada wasa, oh soangen manaman akan koaros irail

wiadahr rehn aramas akan; oh sohte mehkot me irail kin wiahkihda manaman akan, ihte ma pahn sang ni mwaren Jesus Christ.

6 Oh met lelehr keimwsekpen sounpar silihsek -- waluh, oh pil sounpar slihsek -- duwau, oh pahisek oh pahisek -- ehuh, oh pahisek -- riau, ehi, pil sounpar pahisek -- duwau lao imwesekalahr, oh pil sounpar limeisek -- ehuh, oh sounpar limeisek -- duwau imwisekalahr.

7 Oh Kauno eri ketikihong irail en pweida mehleh nan sahpwo; ehi, pwe irail pwurehng kauwadahr kahnimw akan wasa kan me kahnimw akan isilahr.

8 Ehi, pil rasehng kahnimw laud Zarahemla me irail pwurehng kauwadahr.

9 Ahpw kahnimw tohto me kihrlahr, oh pihl akan milahr nan deurail kan. Eri, sang ni kahrepe wet, kahnimw pwukat sohte kak kamwahula.

10 Oh met, kilang, mehn Nephi akan kin kekeirda mwahu, oh irail pil mwadong en tohtohla, oh wialahr aramas paliwar mwahu kei oh aramas kaselel kei.

11 Oh irail kopwopwoudlahr, oh kin pwopwoud, oh kapaidahr nin duwen kapai tohto kan me Kauno ketin wiahiong irailahr.

12 Oh irail solahr kekeid ni duwen wiewia kan oh tiahk sarawihkan en kosonned en Moses; ahpw irail kin kekeid nin duwen kosonned akan me irail alehsangehr Kauno oh arail Koht, irail nantihlahte nan arail kaisihsol oh kapakap, oh kin tuhpene ni ansou kan pwe irail en kin kapakap oh rong mahsen en Kauno.

13 Oh e wiawiher me solahr uhpene wiawi nanpwungen aramas akan koaros nan sahpwo pwon; ahpw mie manaman laud akan me sapwellimen Jesus werengkan wiadahr.

14 Oh e wiawiher me ni sounpar isihsek-ehuh oh isihsek-riau imwiseklahr ehi, oh ni imwio lao sounpar isihsek-duwau pil imwisekalahr, ehi, duwehte sounpar epwiki me pil imwisekalahr, oh werek en Jesus akan me e ketin piladahr, irail koaros kolahr nan paradais en Koht; ihte me silemeno me pahn mihmihte me sohte iang; oh miehler ekei werengkan me kasarawihongehr nan deurail akan; oh pil tohto irail sang nan dih wet me pil melahr.

15 Oh e wiawiher me sohte uhpene nan sahpwo, pwehki limpoak en Koht me kin mihmi nan mohngiong aramas akan.

16 Oh sohte peirin akan, de pil mahwen kan de pil akamai kan, de pil tiahk en nenengkan, de pil likamw akan, de pil mwersuwed akan, de pil mwomwen noahrok ieu mie; oh mehlel saikinte pwihn en aramas ehu nan pwungen aramas akan me pein limen Koht ketin kapikadahr me kin peren duwehte irail.

17 Oh sohla mehn kuli akan oh me mwerisuwed akan, solahr mehn Laman akan, de ehu ehu keinengkan, ahpw irail wiahki ehu, serien Christ, oh irail me pahn sohsohki wein Koht.

18 Oh ia uhwen arail pai! Pwe Kauno me ketin kapai iraildahr koaros sang ni arail doadoahngkan. Ehi, irail, pil kapaidahr oh pweidahr lao lel keimwsekpen sounpar epwiki-eisek; oh dih keieu sang Jesus Christ pil sohralahr, oh sohte uhpene wiawi nan sahppo pwon.

19 Oh Nephi melahr, iei ih me kin wie nekinekid inting kan me wiawidahr keieu mwuhr, (oh me e kin intingihong pohn sleit akan en Nephi), oh nah pwutak Amos me weliandi ih kolokol intingko, oh e kin pil intingih pohn sleit en Nephi akan.

20 Oh e wie kolokolehr ni erein sounpar welihsek-pahieu, oh miehte meleilei nan sahppo, ihte me malaulau en aramas akan me uhwongadahr mwomwohdiso wet oh adankilahr mehn Laman akan. Eri, sang ni kahrehpe wet, mehn Laman pwurehng miehla nan sahppo.

21 Oh e wiawiher me Amos pil melahr (oh ni ansou iei sounpar epwiki duweisek-pahieu sang ni ketido en Christ) oh nein Amos pwutako me weliandiher ih oh kolokolehr poadoapoado, oh e pil kin intingi pohn sleit en Nephi kan, me iei pwuhk wet.

22 Oh sounpar riepwiki imwiseklahr; oh dih keriau koaros sohralahr, ihte me malaulau kei me luhwehdi.

23 Oh met, ngehi Mormon, me men kumwail en ese me aramas akan tohtohlahr, eri irail kohpesengehr pohn sahppo pwon, oh irail kepwepwelehr mehlel, pwehki arail pweidahr sang rehn Christ.

24 Oh met, ni sounpar riepwiki ehu wet mie me mih nanpwungarail me tepier pohnmwahsuhla, me rasehng arail kin kapwatiki likou pweilaud, oh kin kapwatiki takai kesempwal akan oh dipwisou kesempwal akan en sampah.

25 Sangete ni ansou arail kepwehkan oh dipwisou kan solahr pahrek.

26 Oh irail tepier katohre irail peseng ong nan pwihn akan, oh irail tepier kauwadahng irail mwomwohdiso kan pwe irail en kepwehpwehkihla oh kasohwe mwomwohdiso mehlel en Christ.

27 Oh ni ansou me sounpar riepwiki eisek dower powe mwomwohdiso tohto miehler nan sahpwo; ehi, mie mwomwohdiso tohto me kin kasalehda me irail kin ese Christ, oh irail ahpw kin kasohwe pali laud en sapwellime rongamwahuo, eri irail kin alehiong irail soangen mwohmw suwed koaros, oh kin kihla mehkot me sarawi ong mehmen me kin sohte ale mweimwei, pwehki e sohte warohng.

28 Oh mwomwohdiso wet paraparalahr mehlel pwehki duwen eh suwed, oh pwehki manaman en Satan, me koledier arail mohngiong kan.

29 Oh pil, mie ehu mwomwohdiso me kin kasohwe Christ; oh irail kin kaloke mwomwohdiso mehlel en Christ, pwehki duwen arail aktikitik oh duwen arail kamehlele Christ; oh re kin kailongki irail pwehki manaman tohto me irail wiadahr nan pwungarail.

30 Sang ni kahrehpe wet, irail kin doadoahngki arail manaman oh mweimwei pohn sapwellimen Jesus werengkan me kin mihmihte rehral, oh re kin kesehiong irail nan imweteng, ahpw sang ni manaman en Koht, imweteng kan kin pwalpeseng, oh irail kin kohwei oh wiahda manaman laud akan nan pwungarail.

31 Ahpw mendahte manaman pwukat koaros, aramas akan kin kekeluwakiala arail mohngiong kan, oh irail kin rapahki pwehn keme iraila, duwehte en mehn Jews akan kin rapahki pwe irail en kamatala Jesus, me sang nin duwen sapwellime mahseno.

32 Oh irail kin lekdeklong nan kisiniei kan, oh irail kin kohieisang nan kisiniei kan sang ni arail sohte roangala.

33 Oh irail kin pil lekdeklahng nan kelen mahn lawalo akan, oh irail kin mwadong ong mahn lawalo akan, duwehte seri men me kin mwadong ong simpwul emen; oh irail kin kohieisang rehral ni arail sohte kin diar kahpwal.

34 Ahpw mendahte, aramas akan kin kakeluwakialahr nan arail mohngiong kan, pwe tohto samworo akan oh soukohp likamw akan me kaweid kin irail en kauwada mwomwohdiso tohto, oh irail en kin wia soangen dihp koaros. Oh irail kin kaloke sapwellimen Jesus aramas akan; ahpw sapwellimen Jesus aramas akan sohte kin pil

kapwurehiong irail. Oh sang met irail kin pwupwila nan arail soh pwoson oh wiewia suwed nan ehu ehu pahr akan lao lel sounpar riepwiki silihsek dower powe.

35 Oh eri nan pahr wet, ehi, nan pahr riepwiki silihsek -- mie pwal lap ehu wiawidahr nanpwungen aramas akan.

36 Oh e wiawiher me nan pahr wet mie ekei aramas me pwaradahr me kahdaniki mehn Nephi kan oh iei irail me kin mehlel arail kamehlele Christ; oh pil mie nanpwungarail me kin kadeniki, mehn Laman akan -- mehn Jacob akan, oh mehn Joseph akan, oh mehn Zoram akan.

37 Eri me kamehlele Christ akan, oh me kin pwongih Christ ni mehlel, (me irail werek silimino en Jesus pahn mihmihte nanpwungarail) iei irail me adanikihla mehn Nephi kan, oh mehn Jacob akan, oh mehn Joseph akan, oh mehn Zoram akan.

38 Oh e wiawiher me irail akan me soikalahr rongamwahuo iei irail me adanekihla mehn Laman akan, oh mehn Lemuel akan, oh mehn Ishmael akan; oh ahpw kaidehnte irail pwupwilahsang nan arail pwoson, ahpw irail kin inengieng en uhwongada rongamwahu en Jesus Christ, oh irail kin padahkihong neirail serihkan en kin sohte kamehlele, me pil duwehte samarail ako sangete nin tapio, me pwupwilahr.

39 Oh met iei pwehki duwen wiewia suwed oh tiahk kelingeringer en samarail akan, sangete nin tapio. Oh irail kin kaihanda pwe irail en kin kailongkihla serien Koht, iei duwen en mehn Laman akan me pil kin kaihanda pwe irail en kailongkihla mehn Nephi kan sangete ni tapio.

40 Oh kedekedeo lel ni sounpar riepwiki pahisek-pahieu dower powe, oh met iei duwen mwomwen irair akan en aramas akan. Oh pali moron en aramas me kin suwed kehlaillahr, oh mehlel irail tohto sang sapwellimen Koht aramas akan.

41 Oh irail pil nantihlahte wie kakau pein arail mwomwohdiso kan, oh kin kapwatahkihda irail soangen dipwisou kesempwal kan koaros. Oh met sounpar riepwiki limeisek douwer powe, oh pil sounpar riepwiki weneisek douwer powe.

42 Oh e wiawiher me pali suwed en aramas akan pwurehngehr wiahda kahula rir akan oh wiahda pwihn Gadianton kan.

43 Oh pil aramas akan me kin kahdaniki mehn Nephi akan tepier pohnmwahsuhla nan arail mohngiong kan, pwehki ar kepwehpwehla mehlel, oh kin pohnmwahsulahr mehlel duwehte riarail, mehn Laman akan.

44 Oh sangete ansou wet werengkan tepier pahtoukihla dipen sampah kan.

45 Oh e wiawiher me ni sounpar silipwiki douwer powe; koaros mehn Nephi kan oh mehn Laman akan suwedla mehlel me mihmi ni soangen irair tehieu.

46 Oh e wiawiher mehn kuli akan en Gadianon kohpesengehr pohn sahpwo pwon; oh solahr me pwung mie, ihte werek en Jesus kan. Oh irail kin nekidala kohl oh silper ni me tohto, oh kin wia netinet ni soangen mwohmwewen netinet koaros.

47 Oh mwurin sounpar silipwiki limau dower powe, (aramas akan mihmihte nan arail dihp) Amos melahr, oh rie pwutak, Ammaron me wiliandier ih oh kolokol poadopoado.

48 Oh lao lel ni sounpar silipwiki rieisek douwer powe, Ammaron, sang ni e mwekidkidahr Ngehn Sarawio, karukialahr inting sarawihkan -- ehi, iei poadopoad sarawihkan koaros me kohsang ni ehu ehu dih en mahs akan -- lao lel ni sounpar silipwiki riesek mwurin ketidohn Christ.

49 Oh e karukialahr rehn Kauno, pwe en kak pwuredohng kisehn keinek en Seikopo, me sang nin duwen koko hp akan oh inou kan en Kauno. oh met iei duwen keimwsekpen inting en Ammaron.

PWUKEN MORMON

IRALAUD 1

Ammaron kaweidki Mormon duwen poadoapoad sarawihkan -- Mahwen tepier nanpwungen mehn Nephi akan oh mehn Laman akan -- Mehn Nephi me silimeno kohsang wasao -- suwed, so pwoson, winahni kan, oh kosetipw kipedier wasao.

1 Oh met ngehi, Mormon, wiadahr ehu pwuhk en mehkan me I kilangehr oh rongehr, oh kahdaniki Pwuken Mormon.

2 Oh iei ele ansouo me Ammaron karukilahr intingko rehn Kauno, e kodohng ie, (ngehi ele sounpar eisek, oh I tapidahr ekis kaiahn ni mwomwen kaskuhl en nei aramas akan) oh Ammaron indahiong ie: I kilangehr me kowe seri inen emen, oh kin mwiadang en wehwehla.

3 Eri, ni omw pahn ele mahkier sounpar rieisek pahieu I men kowe en tamataman mehkan me ke kilangehr duwen aramas pwukat; oh ni ansou me ke lelehr sounparo kohla nan Antum, ni nahna ehu me kahdaniki Shim; oh iei wasao me I pwilikidier rehn Kauno inting sarawihkan koaros nin duwen me pid aramas pwukat.

4 Oh kilang, ke pahn alehda sleit en Nephi kan, oh luhwe kan ke pahn pwilikihdi wasa me irail kin mie; oh ke pahn pwilikihdi wasa me irail kin mie; oh ke pahn intingihdi pohn sleit en Nephi kan me koaros me ke kilangehr duwen aramas pwukat.

5 Oh ngehi, Mormon, sang ni ei wia emen kadaudek en Nephi, (oh eden ei pahpahu iei Mormon) I ahpw kin tamataman mehkan me Ammaron padahkihongiehier.

6 Oh eri me ngehi, mahkier sounpar eisek-ehu, ei pahpahu eri waiedilahr ni palieir en sahppo, ong nan sapwen Zarahemla.

7 Pohn sahppo pwon ihmw kan kokoudahr, oh pil aramas akan kereniong wie tohtohn duwehte pihk en nan sehd.

8 Oh e wiawihher me nan pahr wet mahwen tepier nanpwungen mehn Nephi kan, me wiawikidahr mehn Nephi kan, oh mehn Jacob akan oh mehn Joseph akan oh mehn Zoram akan; oh mahwen wet wiawihher nanpwungen mehn

Nephi kan, oh mehn Laman akan oh mehn Lemuel akan oh mehn Ishmael akan.

9 Met mehn Laman akan oh mehn Lemuel akan oh mehn Ishmael me kahdenikier mehn Laman akan, oh pwihn riau wet iei mehn Nephi kan'oh mehn Laman akan.

10 Oh e wiawiher me mahwen tepier nanpwungarail ni irepen Zarahemla akan, ni en Sidon pihlo.

11 Oh e wiawiher me ohl tohtohie sang rehn mehn Nephi akan pokon penehr, me dauli me silinen. Oh wiawiher me nan pahrohte mie mahwen ekei me mehn Nephi akan kaluwehdier mehn Laman akan oh kemehlar me tohto rehral.

12 Oh e wiawiher me mehn Laman akan keselahr arail koasoandio, oh meleilei kipehdier nan sahpwo; oh meleilei wiawihkier erein ele sounpar pahieu, oh kakarehdi inta solahr kin wiawi.

13 Ahpw dihp kipedier laud nan sahpwo pwon me kahrehda Kauno ketikihsangehr sapwellime werék kempoakehkan, oh doadoahk manaman akan oh doadoahk en kamwahuiala aramas pwehki wiewia suwed en aramas akan.

14 Oh solahr mie kisakis akan sang rehn Kauno, oh Ngehn Sarawio solahr ketin tih pohn emenemen irail, pwehki ar suwed oh soh pwoson.

15 Oh ngehi, mahkier sounpar eisek-limau oh sang ni ei kin ekis inen nan ei lamalam, ihme kahrehda Kauno ketidohr rehi, oh I pehmehr oh eseier duwen mwahu mehlel en Jesus.

16 Oh I song en pwe en padahk ong aramas pwukat, ahpw eweiet tenglahr, I sohte mweimweiong en padahk ong irail; pwe kilang irail kin inengieng pelianda Koht; oh werék kempoakehkan kohsangehr nan sahpwo, pwehki duwen arail dihp.

17 Ahpw ngehi kin mihmihte nanpwungarail, ahpw I sohte kin mweimweiong en padahk ong irail, oh pwehki duwen kekeluwak en arail mohngiong kan sahpwo eri rialahr pwehki irail.

18 Oh mehn kuli kan en Gadianton, me kin mihmi nanpwungen mehn Laman akan, tohtohlahr nan sahpwo mehlel, eri tohn wasao tepier karukialahr arail dipwisou kesempwal akan nan pwehl; oh dipwisou pwukat solahr

tengeteng, pwehki Kauno ketin karialahr sahppo, pwe irail solahr kak kolokol irail de pwurehng koledi irail.

19 Oh e wiawiher me mie winahni kan oh kosetipw akan, oh me sarawi akan; oh manaman en me suwedo me wiawiher pohn sahppo pwon, ong ni pweidahn mahsen akan sang rehn Abinadi, oh pil Samuel mehn Lamano.

IRALAUD 4

Mahwen oh kamakam aramas nantilahte -- Me suwed akan kaloke me suwed akan -- Suwedala kowahlapie me laudsang nan Israel pwon mahso -- Lih akan oh serihkan kin meirongla ong eni mwahl akan -- Mehn Laman akan tepier kemehsang mehn Nephi kan mwohrail.

1 Oh met e wiawiher me ni sounpar silipwiki weneisek-siluh mehn Nephi akan kohdalahr iangahki neirail karis en sounpei akan pwe en mahweniong mehn Laman akan sang nan sapwen Desolation.

2 Oh e wiawiher me karis en sounpei en Nephi akan pil pwurehngehr pwekido nan sapwen Desolation. Oh ansou me irail pwangadahr, ehu karis en sounpei kapw ahpw kodohng rehrrail; oh irail wiahier mahwen laud mehlel pwe mehn Laman akan koledier kanihmw Desolation, oh kemelahr mehn Nephi tohto, oh tohto me selidihkan me irail wadahr.

3 Oh me luwehdi kan tangehr oh towehla tohn kanihmw Teancum. Met kanihmw Teancum kin mihmi ni irepen oaroahr en sehdo; oh e pil limwahn kanihmw Desolation.

4 Oh pwehki karis en sounpei kan me kodalahng rehn mehn Laman akan me iei irail tepier kamala; pwe ma kaidehn met, mehn Laman akan pahn sohte ahneki manaman pohrrail.

5 Ahpw, kilang, kalokolongkan en Koht pahn kin lelohng me suwed akan; oh sang irail me suwed akan me irail me suwed akan kin kalokolongki; pwe iei me suwed me kin kamwekidada mohngiong en aramas akan en kemehla aramas.

6 Oh eri mehn Laman akan eri kaunopadahr pwe irail en kohdo mahweni kanihmw Teancum.

7 Oh e wiawiher me nan pahr silipwiki weneisek-pahieu mehn Laman akan mahwiniongehr kanihmw Teancum, pwe irail en pil koledi kanihmw Teancum.

8 Oh eri mehn Nephi akan uhwongadahr irail oh kaus irailahr. Oh ni ansou me mehn Nephi akan diaradahr me irail pwakialahr me Laman akan, irail pil pwurehng suweiki arail kehl; oh irail kohkihla pein arail kehl, oh pwurehng alehda kanihmw Desolation.

9 Oh met mehkoaros wiawiher, oh meh kid kei me kamalahr ni pali koaros sang rehn mehn Nephi kan oh mehn Laman akan.

10 Oh eri pahr silipwiki weneisek-woneu imwisekalahr, oh mehn Laman akan pil pwurehng kodohng rehn mehn Nephi akan pwe en mahwen; oh mehn Nephi kan saikinte koluhkihla suwed me irail wiadahro, ahpw kin nantihla nan arail wiewia suwed.

11 Oh sohte loh me kak kasalehda, de aramas emen en kak intingihdi ni unsek duwen mwohmw kamasepwehk en inta oh kam aramas me mihmi rehn aramas akan koaros en Nephi akan oh mehn Laman akan koaros; oh mohngiong koaros kin kekeluwakala, pwe irail kin pereniki arail kin poaden kapwilewei inta.

12 Oh e saikinte mie soangen suwedo rehn nein Lehi kan, de pil nanpwungen mehn Israel kan, nin duwen mahsen en Kauno, me rasehng me miher rehn aramas pwukat.

13 Oh e wiawiher me mehn Laman akan koledier kanihmw Desolation, oh pwehki sang ni arail tohto sang mehleh mehn Nephi kan.

14 Oh irail pil kapar kolahng pwe en mahwen ong kanihmw Teancum, oh irail eri pwakiasangehr tohn wasao, oh salihdier me tohto iangahki lih akan oh seri akan, oh kin meirongkin iraila rehn koht likamw akan.

15 Oh e wiawiher ni sounpar silipwiki weneisek-isuh, mehn Nephi kan lingerengeradahr pwehki ar meirongkilahr neirail lih akan oh serihkan, irail eri kohla mahweniongehr mehn Laman ni lingeringer kouwahlahpie me kahrehiong irail eh pil kaluwehdi irail, oh kausasang irail nan sapwarail akan.

16 Oh mehn Laman akan solahr pil pwurehng kohdo mahweniong mehn Nephi akan lao sounpar silipwiki isihsek-limau.

17 Oh nan pahr wet irail kohdihdohr mahweniongehr mehn Nephi akan ki arail kehl koaros; oh sohte me kak wadek irailedi pwehki uhwen tohtohn irail.

18 Oh sang met kohla, mehn Nephi kan solahr kak ong mehn Laman akan, ahpw irail tepier kamalahsang mwohn mehn Laman akan me rasehng pweik me kin madada mwohn ketipino.

19 Oh e wiawiher me mehn Laman akan kodidohr mahweniongehr kanihmw Desolation; oh mie mahwen laud mehlel ehu me wiawiher wasao nan sapwen Desolation, me irail kaluwedier mehn Nephi kan.

20 Oh re pwurehng tangasangehr mwohrail, oh irail kolahr nan kanihmw en Boaz; oh iei wasao me irail peliankin iraildahr ki arail komwad unsek, me kahrehiong en mehn Laman akan sohte kak kaluwehdi irail lao irail pil pwuredo keriapak.

21 Oh ni keriapak en arail pwuredo, mehn Nephi kan tangehr oh mehkilahr kamakam laud ehu; neirail lih kan oh serihkan pil pwurehng meirongla rehn eni mwahl akan.

22 Oh e wiawiher me mehn Nephi kan pil pwurehng tangasang mwohrail, wadahr towehkan koaros, koaros me kin kousoan nan kanihmw oh nan kanihmw tikitingkan.

23 Oh met ngehi, Mormon, kilangehr me mehn Laman akan pahn kereniong kaluwehdi sahppo, eri ngehi kolahr ni nahna Shim, oh aledahr inting kan me Ammaron karukilahr rehn Kauno.

IRALAUD 6

Mehn Nephi kan pokonlahng sapwen Cumorah ong ni keimwsehpen mahwen akan -- Mormon karukilahr poadoapoad sarawihkan ni nahna Cumorah -- Mehn Laman akan powehdier, oh en mehn Nephi kan wehio olahr -- me lopw kei me kamakamkilahr kedlahs.

1 Oh me I kanekelahr ei inting me pidada duwen olahn nei aramas akan, mehn Nephi kan. Oh kiht eri kapar kolahng mwohn mehn Laman akan.

2 Oh ngehi, Mormon, me intingiadahr ehu kisin likou ong nahnmwariki en Laman akan, oh lhme en ketin mweidohng kiht en kapokonehpe nait aramas akan pohn sapwen

Cumorah, ni nahna me kahdaniki Cumorah, oh wasao sen kak mahweniong irail.

3 Oh e wiawiher me nahnmwariki en mehn Laman akan eri kupwure kiniehla me I anahneo.

4 Oh e wiawiher me kiht eri kapar kolahng sapwen Cumorah, oh se kauwadahr imwat ihmw likou kan me kapil penehr nahna Cumorah; oh iei nan sapwen pihl tohto kan, pillap akan, oh utin pihl akan; oh wasaht se koapwoaroapwoariki me pahn me mwahu ong nan mahwen sang rehn mehn Laman akan.

5 Oh ni sounpar silipwiki welihsek-pahieu douwer powe, se kihpenehr luhwen nait aramas akan pohn sahpw Cumorah.

6 Oh e wiawiher me kiht eri kihpenehr nait aramas akan koaros wasahtehieu nan sapwen Cumorah, kilang ngehi, Mormon, tepier milahr; oh esehier me met iei me pahn wia keimwseksen mahwen, oh sang ni en Kauno e ketin poahngokihongiehier me Ien dehr mweidohng intingkan me sarawi me kohsangehr rehn aht pahpa kan, en pwupwilahng nan pehn mehn Laman akan, (pwe mehn Laman akan pahn kauwehla irail) ihme kahrehda I wiadahr poadoapoad wet sang ni sleit en Nephi kan, oh karukialahr ni nahna Cumorah intingkan koaros me limen Kauno ketikihdo pwe Ien kohwahki, ihte me malaulau pwukat me sohte iang me I kihongehr nei pwutak Moroni.

7 Oh e wiawiher me nei aramas akan, iangahki arail pwoud akan oh neirail serihkan, ansou wet irail kilangehr karis en sounpei en mehn Laman akan wie kohkohdohng iraillehr; oh sang ni masak en mehla me kadirelahr nan adin me suwed akan, irail eri awi pwe irail en tuhpene.

8 Oh e wiawiher irail kodohr pwe en mahweniong kiht, oh aramas koaros direkilahr masak pwehki uhwen tohtohn irail.

9 Oh e wiawiher me arail kohkikhong nei aramas akan kedlahs, oh iangahki kesik ketieu, oh arep, oh sile, oh soangen dipwisou en mahwen koaros.

10 Oh e wiawiher me nei ohl akan palidier, ehi, nei me nen me kin ieiang ie, oh I olahr oh pwupwudihongehr nan pwungarail; oh irail dauliehier oh sohte kemeiehla.

11 Oh ni arail kodohng kihtehr oh nei aramas koaros paldier ihte meh riehk pahmen reht me sohte iang palidi, (nei pwutak Moroni iei emen me mihmi nanpwungat) oh

kiht me momour sang rehn nait aramas akan koaros me melahr, iei me iang, kilang ni mandahn rahno, ni ansou me mehn Laman pwurelahngehr wasa kan me irail kin mihe, sang ni pohn nahna Cumorah, nei me nen me palidier, me I kin kahluwa irail mwohn karis kan.

12 Oh se pil kilangehr nei aramas meh nen, me nei pwutak Moroni kin kakauhn.

13 Oh se pil kilangehr nein Gidgiddonah me nen pwupwidiher, oh e pil mihmi nan pwungarail.

14 Oh Lamah pil pwupwidiher iangahki nah me nen; oh pil Gilgal pwupwidiher iangahki nah me nen; oh Limhah pil pwupwilahr iangahki nah me nen; oh Seneum pwupwidier iangahki nah me nen; oh Kumenaia, oh Moronihah, oh Antionum, oh Siplom, oh Shem, oh Sos, pwupwidiher iangahki me nen me emente kin naineki.

15 Oh e wiawihher me pil me ehk me pil pwupwikilahr kedlahs iangahki me nen me emen rehrrail kin naineki; ehi, koaros nei aramas akan, ihte irail mehriehk-pahmeno me iang ie, oh pil irail me malaulau me iangalahr mehn Laman akan me sohte iang pwupwidi; oh udukarail kan, tihrrail, oh intarail milahr pohn pwehl, sang pehn irail akan me kemelahr irail pwe en mwasahngotala pohn sahpw, oh pahn mweredi oh pwurelahng pwehl.

16 Oh mohngiongi teikihpesengehr ei pahtou pwehki melahn nei aramas akan, oh I ahpw werikihda:

17 Oh kumwail me kaselel akan, ia duwen amwail kak kohsang nan ahl akan en Kauno! O kumwail me kaselel akan, ia duwen amwail soikalahr Jesus, me ketikihpesengehr limekan pwe en ketiki kumwail.

18 Kilang, ma kumwail sohte wiahda met, kumwail sohte pahn pwupwidi. Ahpw kilang, kumwail pwupwidiher. Ahpw kilang I kin sengisengki amwail mehla.

19 Oh kumwail pwutangkan oh serepein kaselel akan, kumwail pahpa kan oh nohno kan, kumwail ohl pwopwoud kan oh lih pwopwoud kan, kumwail me kaselel akan, ia mwomwen amwail kak pwupwidi?

20 Ahpw kilang, kumwail samwalahr oh ei pahtoula kan sohte kak kapwure kumwaildo.

21 Oh rahno me keren me pahn kohdo me paliwaramwail akan pahn sohla mehla kohkohlahte, oh paliwar pwukat me ansou pahn mwerpeseng sang ni arail mwasahngotala me keren ar pahn wiahla paliwar unsengkei; oh kumwail pahn

MORMON 7

kesihnen mwohn mwoalen kopwung en Christ, pwe kadeingki duwen amwail doadoahngkan, oh ma iei mehlel me kumwail me pwung, kumwail eri pahn kapaida duwehte samamwailoko me kolahr mwohmwail.

22 Oh me kumwail en koluhla mwohn ohla laud wet pahn leledohng kumwail. Ahpw kilang, kumwail samwalahr, oh Sahmo, ehi, Sahn Soutuk nanleng, ketin mwahngier iramwail akan; oh e pahn ketin wiahiong kumwail nin duwen sapwellime pwung oh kalahngan.

IRALAUD 7

Mormon luke mehn Laman en imwin rahn akan en kamehlele Christ, alehda sapwellime rongamwahuo, oh en komourla -- Koaros me kamehlele Paipelo pil pahn kamehlele Pwuken Mormon.

1 Oh met, kilang I pahn kosoia ekis ong me kisehn aramas pwukat me sohte iang mehla, ma iei mehlel me Koht kak ketikihong irail mahsen akan sang ie. Pwe irail en kak esehla mehkan me pid duwen samarail akan; ehi, I koasoai ong kumwail, kumwail kisehn keinek en Israel; oh iet mahsen akan me I en koasoia:

2 Kumwail en ese me iei kumwail mehn Israel ekei.

3 Kumwail en ese me kumwail en koluhla, de ma soh, kumwail sohte pahn komourala.

4 Kumwail en ese me kumwail udahn pahn pwilikhdi amwail dipwisou en mahwen kan, oh solahr pereniki kakerehdi inta, oh solahr pwurehng alehda irail, ihte ma Koht pahn ketin mahsanihong kumwail.

5 Kumwail en ese me kumwail en esehla duwen samamwail akan, oh koluhkihla dipamwail akan oh amwail suwed akan, oh kamehlele Jesus Christ, me ih iei Ieros en Koht, oh me mehn Jews akan kamatalahr ih, oh sang ni manaman en Sahmo e pil ketin iasadahr, ihme kahrehda e ketin powedier mehla kan, oh pil sangete ih masak mehla sohralahr.

6 Oh e ketikihdo iasadahn me melahr akan, sang met aramas pahn iasada pwehn kesihnen mwohn sapwellime mwoalen kapwungo.

7 Oh e ketikihdo komourpen sampah, sang met mehmen me pahn dierek mwakelekel mwowe ni rahn en kadeiko pahn mihla rehn Koht nan sapwellime wehio, pwe en koulki kaping kan iangahki pwihn en koul kan powe kokkohahte ong Sahmo, ong sapwellime Ieroso, oh ong Ngehn Sarawio, me ketin wia emen Koht, ni irair en popohl soutuk.

8 Ihme kahrehda koluhla, oh pepdaisla ni mwaren Jesus, kolokol rongamwahu en Christ, me pahn kodohng kumwail, kaidehn sang ni inting wet ahpw pil pahn sang ni inting me pahn kodohng mehn likihkan sang rehn mehn Jews akan, iei pwuhko me pahn kodohng rehmwail sang mehn likihkan.

9 Pwe kilang, met e intingdier pwehn kahrehiong kumwail en kin kamehlele met; oh ma kumwail kamehlele me kumwail pahn pil kamehlele met; oh ma kumwail kin kamehlele met, kumwail pahn esehla duwen samamwail akan, oh pil doadoahk kopwuriamei akan me wiawi ong irailahr sang ni manaman en Koht.

10 Oh kumwail pil pahn ese me kumwail iei kisehn nein Jacob; ihme kahrehda kumwail pahn towehla aramas akan en inou keieuo; oh ma mehlel me kumwail kamehlele Christ, oh pahn pepdaisala, keieuo ni pihl, mwuri iangahki kisiniei oh Ngehn Sarawi, ideidawen kahlmeng en atail Sounkomouro, nin duwen me e ketin mahsanihong kitailehr, e pahn kin mwahu mehlel ong kumwail ni rahn en kadeiko. Amen.

IRALAUD 8

Mehn Laman akan rapahki oh kemehla mehn Nephi kan -- Pwuken Mormon pahn kohda sang ni manaman en Koht -- Suwed akan kohieng pohn irail akan me kin lingeringeriki oh peiong doahk en Kauno -- Inting en mehn Nephi kan pahn kohda ni rahno me kin suwed, suwedala, oh pwupwila wiawi.

1 Kilang ngehi, Moroni, kanekelahr inting en ei pahpao, Mormon. Kilang, I pahn intingihdi me malaulau kei, iei mehkan me ei pahpahu padahkihong I en wia.

2 Oh e wiawihher me mwurin mahwen laud oh kehlail nan Cumorah, kilang, mehn Laman akan pwakiher mehn Nephi

kan me tangdilahr palieir en sahpraw, lao koaros kamakamalahr.

3 Oh irail pil kemelahr ei pahpao, oh ngehite kelehpw mihmi pwe I en intingihdi duwen koasoai kempoake en olahn nei aramas akan. Ahpw kilang, irail samwalahr, oh I pahn kapwaihda kosonned en ei pahpao. Oh ma irail pahn kemeiehla, I sohte ese.

4 Ihme kahrehda I pahn intingihdi oh karukihla inting pwukat nan pwehl; oh ia wasa I en kohla ie sohte kesempwal.

5 Kilang, ei pahpahu me wiadahr inting pwukat, oh e intingihdi kahrehpeo. Oh kilang, I pahn pil intingihdi ma mie dewe pohn sleit akan, ahpw I sohte kak; oh sohte pwelen mete rehi, pwe ngehite kelehpw. Ei pahpahu kamalahr nan mahweno, oh pil ei peneinei kan koaros, oh solahr kempoakepahi kan de wasa me I pahn kohla ie; oh ia werein en Kauno pahn ketin mweidohng pwe I en momour, I sohte ese.

6 Kilang sounpar pahpwiki daulier ketidohn atail Kaun oh Sounkamour.

7 Oh kilang, mehn Laman akan, parokedier nei aramas akan, mehn Nephi kan, nan ehu ehu kanihmw kan oh nan ehu ehu wasa kan, lao solahr emen luhwe; oh arail kamala ma inenen kesempwal; ehi, inenen laud oh kopwuriamwei duwen olahn nei aramas akan, mehn Nephi kan.

8 Oh kilang, iei limen Kauno me ketin wiahier met. Oh pil kilang, mehn Laman akan pil peipeipene nan pwungarail; oh pohn sahpraw pwon kin arail pwurepwurohng mwerisuwed oh kakerehdi inta; oh sohte me kin ese imwilahn mahweno.

9 Oh met, kilang, I solahr kak kosoia duwen irail, pwe solahr me wie momour pohn sahprawet, ihte mehn Laman akan oh mehn kuli akan.

10 Oh sohte me mie me ese duwen Koht mehlelo, ihte wahnpoaron en Christ akan, me mihmi nan sahpraw lao suwedala mehlel en aramas akan me Kauno solahr ketin mweidohng irail en mihmi rehn aramas akan; oh ma irail kin mihmi pohn sahprawet, sohte mehmen me ese.

11 Ahpw kilang, ei pahpahu oh ngehi kilangirailehr, oh irail seuwese kihlehr.

12 Oh mehmen me pahn alehda inting pwukat, oh sohte pahn kauwe pwehki sohte unsekla en mehkan me mihmi

loale, ihete pahn esehla me laud sang mepwukat. Kilang, ngehi iei Moroni; oh ma kak, I pahn wiahda mehkoaros en kin sansal ong kumwail.

13 Kilang, I kanekelahr ei koasoai me pid duwen aramas pwukat. Ngehi iei nein Mormon pwutak, oh ei pahpahu iei kadoudok en Nephi.

14 Oh ngehi iei ih ohte me karukilahr inting pwukat rehn Kauno; oh sleit kan sohte kesempwal pwehki iei kosonned en Kauno. Pwe mehlel e ketin mahsanihier me sohte emen pahn alehda sleitko pwe en kepwehpwehkihla; ahpw inting kan me kesempwal mehlel; oh mehmen me pahn kapwarahda, Kauno pahn ketin kapaiahda ih.

15 Pwe sohte emen kak ahneki manaman en kapwarahda, ihte mehmen me koht pahn ketikihong ih; pwe Koht ketin kupwuriki me e pahn wiawiohngete sapwellime klohri, de sawasepen aramas en inou en Kauno me tohrohr pesengehr keilahn aio.

16 Oh meid pah mehmen me pahn kapwarahda met; pwe e pahn kodohng nan marain sang nan rotorot, nin duwen mahsen en Koht; ehi, e pahn kohda sang nan pwehl, oh e pahn kihla marain sang nan rotorot, oh aramas akan pahn esehla; oh e pahn wiawi sang ni manaman en Koht.

17 Oh ma mie sapwung kan, iei sapwung en aramas. Ahpw kilang, kitail sohte kin ese sapwung; ahpw me Koht ketin mwahngih mehkoaros; ihme kahrehda, mehmen me kin kauwe, a en ese me e pahn mihmi ni keper en nan kisiniei en ehl.

18 Oh mehmen me pahn inda: Kasalehdo rehi, de ke pahn kamakamada -- en ese pwe e intingki mehkot me Kauno sohte ketin mweidohng en wiawi.

19 Pwe kilang, ihete me kin kadeik ni sohte per pahn pil pakadeikada ni sohte per; pwe pahn sang nin duwen eh doadoahngkan; ihme kahrehda mehmen me kin keme aramas, pahn pil ale kamakam sang rehn Kauno.

20 Kilang dahme pwuhk sarawi mahsanih -- aramas akan sohte pahn kin ale kamakam, de irail pil sohte pahn kin ale kadeik; pwe ei kadeiko, oh pil ei kalokoloko, oh I pahn pwainla, Kauno me ketin mahsaniher.

21 Oh mehmen me pahn esingekihla mwehl oh mahweniong doahk en Kauno, oh uhwongada aramas en inou en Kauno me iei mehn Israel, oh pahn inda: Kitail pahn kauwehla doahk en Kauno, oh pwe Kauno pahn sohte

ketin tamataman inouo me e ketin wiahiongehr mehn Israel akan -- ihete pahn mihmi nan keper en palidi oh lekdekla nan kisinieio.

22 Pwe kahrehpe poatoapoat akan en Kauno en kin poatoapoatete, lao sapwellime inou kan pahn pweida.

23 Rapahki kokohp en Aiseia kan kilang, I sohte kak intingi irailedi. Ehi, kilang I indahiong kumwail, me irail souleng kan me samwalahr mwohi, me sapwenikiher sahpwet, pahn likwer, ehi, sang nan pwehlo ong Kauno; oh nin duwen Kauno ketin ieias, e pahn ketin tamataman inouo me e ketin wiahiong irailehr.

24 Oh e kin ketin mwahngih arail kapakap akan, pwe irail kin kapakapki riarail akan. Oh e ketin mwahngih arail pwoson, pwe sang ni mwareo, irail kak kamwekidada nahna kan; oh sang ni mwareo, irail kak kamwekidada sampah; oh sang ni manaman en sapwellime mahseno, irail kak karengedi imweteng kan pohn pwehl; ehi, uhmw me kin lullul sohte kak kauwehla irail, de pil mahn lawalo kan, de pil serpent me kin pwoisin, pwehki sang ni manaman en sapwellime mahseno.

25 Oh kilang, arail kapakap akan pil pahn ong ih me Kauno pahn ketin mweidohng en kapwarehda mepwukat.

26 Oh sohte emen me anahne en inda me irail sohte pahn wiawi, pwe mehlel irail pahn wiawi, pwe Kauno ketin mahsaniher; pwe irail pahn kohsang nan pwehl sang ni limen Kauno; oh pahn sohte me kak katukiedi; oh e pahn kohda ni rahno ansou me re pahn kalohkiseli me solahr manaman akan pahn wiawi; oh e pahn kohdo nin duwen mehmen pahn kin koasoai sang rehn me melahr akan.

27 Oh e pahn kohda ni rahno me intahn souleng kan pahn likiweriong Kauno, pwehki pwihn rir akan oh doadoahk en nan rotorot akan.

28 Ehi, ehu rahn pahn pwarada me re pahn kasohwe manaman en Koht, oh mwomwohdiso kan pahn saminla oh pahn kin akalapalapkihla pohn mwahsu nan arail mohngiong kan; pil duwehte ni ahno me kaun en mwomwohdiso kan oh sounpadahngkan pahn ileilehkihla pohn mwahsu en arail mohngiong kan, pwe en kin luwangki tohn arail mwomwohdiso kan.

29 Ehi, ehu rahn pahn pwarada me mie kalohk en kisiniei kan, oh melimel kan, oh ediniei kan pohn sapwen likihkan;

30 Oh pahn pil mie kalohk en mahwen akan, rong en mahwen akan, oh rerrer en sahpw akan nan wasa tohto.

31 Ehi, ehuhahn pahn pwarado me sampah pahn saminla mehleh; pahn mie mwersuwed akan, oh kuliasang mehkan, likamw, pit akan, oh nennengkan, de soangen tiahk kelingeringer koaros; ni ansou me tohto pahn inda, wia met, de wia mwo, oh e pahn sohte katepe, pwe Kauno pahn ketin kolokol soahngo ni rahn neko; ahpw meid suwediong soangen aramas akan me duwehte met, pwe irail pahn kin mihmi nan weireklaud oh nan selidi en dihp.

32 Ehi, e pahn kohda ni rahno me mwomwohdiso kan pahn kokouda me pahn koasoia; kohdo rehi, oh pwehki noumwail mwohni kan dipamwail pahn lapwada.

33 Oh kumwail me suwed akan oh loal suwed kan oh me keptakai kan, dahme kahrehda kumwail wiahkihda mwomwohdiso kan pwe kumwail en kepwehpwehkihla? Dahme kahrehda kumwail wekidala duwen mahsen sarawi en Koht, pwe kumwail en kin keria kumwaila? Kilang, kumwail sohpeilahng kaudiahl en Koht akan pwe kilang, ansou pahn kohdo ni rahno me mepwukat koaros pahn pweida.

34 Kilang, Kauno ketin kasalehiong ie me kesempwal oh me kopwuriamwei akan me udahn pahn pwarodo ni ansou keren, ni rahno me mepwukat pahn kohda nanpwung amwail.

35 Kilang, I koasoai ong kumwail nin duwen me kumwail mihmi rehi, oh kumwail sohte mihmi rehi. Ahpw kilang, Jesus Christ me ketin kasaledohngiehier duwen kumwail, oh I ese duwen amwail wiewia.

36 Oh I ese me kumwail kin aluhki pohnmwahsuhn amwail mohngiong kan; oh sohte emen, ihte me malaulau kei me sohte kin akileilehkihla pohnmwahsuhn nan arail mohngiong kan sang ni likouki likou kaselel, sang ni peirin kan, oh uhpene kan, oh ineng suwed, oh lokolongkan, oh soangen suwed koaros; oh amwail mwomwohdiso kan, ehi, koaruhsie, pahn saminla pwehki pohnmwahsuhn arail mohngiong kan.

37 Pwe kilang, kumwail kin poakehng mwohni, oh amwail dipwisou kan, oh amwail likou kaselel akan, oh kin kapwatahda amwail mwomwohdiso kan laud sang amwail poakehng me semwehmwe kan oh me mie arail anahn akan, oh me soumwahu akan oh me lokolokalahkan.

38 Oh kumwail me saminlahr akan, kumwail me mwalaun akan, kumwail sounpadahngkan, me netikilahr pein kumwail ong ni mehkot me pahn mwasahngotala, dahme kahrehda kumwail kasaminehla mwomwohdiso sarawi en Koht? Dahme kumwail namenengki en alehda mwaren Christ? Dahme kumwail sohte kin medewe duwen kesempwal laud en peren soutuk sang kalokolok me sohte pahn tokedi -- pwehki duwen kapingping en sampah?

39 Dahme kumwail kin kapwata kin kumwail mehkot me sohte moure, oh ahpw mweidohng me duhpekla kan, oh me mie arail anahn akan, oh me kilisou kan en kin dauli kumwail, oh kumwail eri sohte kin kilang?

40 Ehi, dahme kumwail kin wiahkihda amwail tiahk kelingeringer rir akan pwehn kepwehpwehkila, oh kahrehiongehr lihdi kan en kin mauk mwohn Kauno, oh pil seri sopwoupwou kan en kin mauk mwohn Kauno, oh pil intahn arail pahpa kan oh arail pwoud ohl akan en kin likiwer ong Kauno sang nan pwehlo, pwe kalokepe en kin mih pohn moangemwail akan?

41 Kilang, kedlahs en kalokolok wie tentenekehr pohmwail; oh ansouo kerendohr me e pahn ketin iki intahn souleng kan rehmwail, pwe e sohte pahn ketin mweidohng irail en wie likihkiwer ansou werei.

IRALAUD 9

Moroni luke irail akan me sohte kamehlele Christ en koluhla -- E kasalehda duwen Koht manaman, me ketikihda kaudiahl akan oh ketin kapwilewei kisakis akan oh kilel akan ong me pwoson akan -- Manaman akan uhdi pwehki soh pwoson -- Kilel akan idawehn irail akan me kin kamehlele -- Aramas akan en kin ale kaweid pwe irail en marainla oh kolokol kosonned akan.

1 Oh met, I pil pahn koasoiu duwen irail akan me sohte kin kamehlele Christ.

2 Kilang, dah kumwail pahn kamehlele ni rahno me e pahn ketidohng kumwail -- kilang, ni ansou me Kauno pahn ketido, ehi, iei rahn lapalapo me sampah pahn welpene duwehte tehn doaropwe ieu, oh mehkan me wiahda sampah pahn peikihpeseng karakar laud, ehi, ni

rahn lap me kumwail pahn wisikido pwehn kesihnen mwohn simpwul en Koht -- eri dah, kumwail pahn kosoia me sohte Koht?

3 Eri ia duwe, kumwail pahn kin kasohwehte Christ, de dah, kumwail kak kilang simpwul en Koht? Dah, kumwail leme me kumwail pahn mihla reh ma kumwail ese duwen dipamwail akan? Dah, kumwail leme me kumwal kak pereniki mihla rehn Koht Sarawio, ni ansou me kumwail ohkilahr amwail ese duwen amwail dipaniki amwail kasapwungelahr sapwellime kosonned akan?

4 Kilang, I indahiong kumwail me e pahn inenen kansensuwed en mihla rehn Koht sarawi oh pwung, ni amwail ese amwail samin mwohwe sang amwail en mihla rehn irail akan me lekdeklahr nan ehlo.

5 Pwe kilang, ni ansou me kumwail pahn wisikidohng pwehn kilang duwen amwail sohte mehkot mwohn Koht, oh pil kilang duwen klohri en Koht, oh duwen sarawi en Jesus Christ, me pahn isikada kisiniei me sohte kak tukedi rehmwail.

6 O eri kumwail me kin sohte kamehlele kan, kumwail en sohpeiohng Kauno; kehlail likiwer ong Sahmo ni mwaren Jesus, pwe mweinele kumwail en kak kaidek nin duwen me sohte dipe, mwakelekel, mwahu, oh pwetepwet, sang ni wideudki intahn simpwulo, ni rahn neko oh lapalapo.

7 Oh I pil indahiong kumwail me kin kasohwe kaudiahl en Koht akan, oh kin inda me irail solahr pahn wiawi, pwe solahr kaudiahl akan, de pil kokohp akan, de pil kisakis akan, de pil kamwahuiala soumwahu akan, de pil lokaiaihki mahsen tohrohr akan, oh wehwehki mahsen kan.

8 Kilang I indahiong kumwail, mehmen me kin kasohwe mepwukat sohte kin ese rongamwahu en Christ; ehi, e saikinte wadek pwuhk sarawihkan; oh ma ehi, e sohte kin wehwehkin irail.

9 Pwe kaidehn kitail kin wadek me Koht kin ketin duwehte aio, rahnwet, oh pahn kohkohlahte, oh kaidehn reh me sohte kin wekila de pil sohte mwetehn wekila ieu kin mie?

10 Oh met, ma kumwail medewedahr pein amwail Koht emen me kin wekila, oh me pahn mie mwetehn wekila reh, eri kumwail pein medewedahr Koht emen me kaidehn Koht manaman emen.

11 Ahpw kilang, I pahn kasalehiong kumwail Koht manaman emen, Koht en Abraham, oh Koht en Isaac, oh Koht en Jacob; oh iei Koht ohte me ketin kapikadahr nanleng kan oh sampah, oh mehkoaros me mih nanleng oh sampah.

12 Kilang, e ketin kapikadahr Adam, oh sang ni Adam pwupwilahn aramas eri wiawiher Oh pwehki pwupwilahn aramas, Jesus Christ ketidohr, iei Sahmo oh Naho; oh pwehki ketidohn Jesus Christ, komouren aramas ahpw wiawiher.

13 Oh pwehki duwen komouren aramas, me Jesus Christ ketidohr, iei me kapwurehdo irailehr rehn Kauno; ehi, met iei me aramas koaros komourkilahr, pwehki matalahn Christ kahrehda iasada, me kahrehda komourla sang ni meir soutik, sang ni soangen meirlao me aramas koaros pahn pirikihda manaman en Koht ni ansou me sewi pahn pepeuk; oh irail pahn iasada, me tikitik oh me lapalap koaros, oh koaros pahn kesihnen mwohn sapwellime mwoahlo, sang ni arail komourla oh mweisangehr ni arail selidiong mehla kokkohlahte, iei mehla melahn sampah.

14 Oh eri kopwung en Koht Sarawio pahn wiawia ong irail; oh eri ansouo pahn kohdo me me mehmen me kin samin pahn kin samisaminte; oh mehmen me kin pwung pahn kin pwungipwungte; mehmen me kin peren pahn kin pereperente; oh mehmen me kin insensuwed pahn kin insensensuwed.

15 Oh met, O koaros kumwail me kin pein medewehda Koht emen me sohte kak wiahda manaman akan, I pahn idek rehmwail, dah, mepwukat nekilahr, me I koasoiadahr? Ia duwen, e lelehr ni imwio? Kilang, I indahiong kumwail, soh; oh Koht sohte ketin tukidihsang wia Koht manaman emen.

16 Kilang, kaidehn mehkan me Koht ketin wiadahr me kin kopwuriamwei ong nan masatail akan? Ehi, oh ihs me kak wehwehkila doadoahk kopwuriamwei akan en Koht?

17 Ihs me pahn kosoia me kaidehn manaman ehu me sang ni sapwellime mahseno me nanleng oh sampah en duwehla met; oh sang ni manaman en sapwellime mahseno me aramas en kapikipikadahsang pwehl; oh sang ni manaman en sapwellime mahseno me manaman kin wiawi?

18 Oh ihs me pahn kosoia me Jesus Christ sohte ketin wiadahr manaman laud tohto? Oh mie manaman laud tohto me wiawi sangehr ni pehn wahnpoaroan akan.

19 Oh ma mie manaman akan me wiawiher mahso, dahme kahrehda Koht en ketin tukedihsang wia Koht manaman emen oh ahpw kin ketin wia mehmen me sohte kin ketin wekila? Oh kilang, I indahiong kumwail me e sohte kin ketin wekila; ma mehlel e pahn solahr ketin wia Koht emen; oh e sohte kin ketin tukedihsang wia Koht, oh ih iei Koht manaman emen.

20 Oh kahrephen e ketin tukedihsang wia manaman akan rehn aramas akan pwehki sang ni ar soh pwoson, oh re kohsangehr nan ahl pwungo, oh solahr ese Kohto me irail en kin liki.

21 Kilang, I indahiong kumwail ma mehmen me pahn kamehlele, sohte peikasal, dahme e pahn peki rehn Sahmo ni mwaren Jesus Christ pahn kin pweiong ih; oh inou wet kohieng koaros, iei aramas koaros nan sampah.

22 Pwe kilang, iet me Jesus Christ, Ieros en Koht, ketin mahsanihongehr werengkan me pahn mihmihte, ehi, oh pil koaros sapwellime werengkan, ni en pokono wie karokaronge: Kumwail kohwei wasa koaros nan sampah, oh padahkihong aramas koaros rongamwahuo.

23 Oh mehmen me kamehlele oh pepdaisala pahn komourala, oh mehmen me sohte kamehlele pahn kin lekdekla.

24 Oh iet kilel akan me pahn kin idawehn irail akan me kin kamehlele -- ni edei irail pahn kin kauskihla tepel akan; oh irail pahn koasoiki mahsen kapw akan; irail pahn kin pwekada serpent akan; oh ma irail pahn kin nimada mehkot me pahn kemehla irail, e sohte pahn kauwe iraila; irail pahn kin kihwei pehrail akan pohn me soumwahu akan or re pahn kehlaikihda.

25 Oh mehmen me pahn kamehlele edei, ni sohte peikasal, ong ih I pahn kamanahiong ei mahsen akan, pil duwehte aramas koaros nan sampah.

26 Oh met, kilang, ihs me kak pelianda doadoahngkan en Kauno? Ihs me kak kasohwe sapwellime mahsen akan? Ihs me pahn pelianda manaman kouwalahpie en Kauno? Ihs me pahn kailongki doadoahngkan en Kauno? Ihs me pahn kailongki serien Christ kan? Kilang, kumwail koaros me

kin kailongki sapwellimen Kauno doadoahngkan pahn kin sohte kamehlele oh salongala kokkohahte.

27 Oh eri dehr kin kailongki, oh dehr kin sohte kamehlele, ahpw kin karonge mahsen akan en Kauno, oh kin peki Sahmo ni mwaren Jesus mehkoaros me kumwail pahn kin anahne. Dehr peikasal, a en kin kamehlele, tapihada wia duwehte mahso, oh kokkidohng Kauno amwail mohngiong unsek, oh koadoahkehda pein amwail mour sang ni masak oh rerrer mwowe.

28 Kumwail en kin marain ni ansou en amwail kasongosong kan; sipedalhsang rehmwail samin koaros; dehr kin peki pwe kumwail pahn doadoahngki ong amwail noahroangkan, ahpw kehlail tengediong amwail pekipek pwe kumwail dehr lohdi ong nan songosong, oh me kumwail en papah Koht mehlel oh ieias.

29 Kilang pwe kumwail en dehr pepdaisla ni amwail sohte warohng; kilang pwe kumwail en kin warohng ale kamadipw sarawio; ahpw kilang pwe kumwial en wia mehkoaros ni duwen amwail kin warohng, oh kin wiahki ni mwaren Jesus Christ; oh kin dadaurete lel imwi, kumwail eri sohte pahn lekdekla.

30 Kilang, I koasoai wei rehmwail, nin duwen I koasoai sang rehn me melahr akan; pwe I ese me kumwail pahn ale mahsen kan sang ie.

31 Dehr kauwe ie pwehki ei sapwung, de pil ei pahpahu pwehki eh sapwung, de pil irail akan me pil intingehr mwohrail; ahpw kumwail en dangke Koht me ketin kasalehiong kumwailehr aht sapwung kan, pwe kumwail en kak esehla duwen maraino laud sang kiht.

32 Oh met, kilang, se intingidier padoapoad wet nin duwen aht ese, ni mwomwen inting kan me se k in kahdaniki kapwungupwunglahn inting en Egypt, me se alehier oh wekidalahngehr n in duwen mwomwen aht mahsen.

33 Oh ma nait sleit akan pahn laud oh itar, se pahn intingihdi ni Hebrew; ahpw se pil wekidalahr lokaiahn Hebrew; oh ma se kak intingihdi ni mahsen en Hebrew, kilang, kumwail pahn sohte ahneki sapwung sang nan aht inting kan.

34 Ahpw Kauno ketin mwahngih mehkan me se intingidier, oh pil sohte aramas ese aht mahseno oh

pwehki sohte aramas me ese aht mahseno, ihme kahrehda e ketin kaunopada mehn kawehwehpe.

35 Oh mepwukat intingdier pwe sen kak aht likou kan me kolokol intahn riat akan, me pwupwukilahr arail soh pwoson.

36 Oh kilang, mepwukat koaros me se kin anahne me pid riat akan, ehi, pwe irail en pwurehng esehla duwen Christ, iei me sang nin duwen kapakap akan en souleng kan koarose me miher nan sahpwo.

37 Oh Kauno Jesus Christ en ketikihong irail pasepeng en arail kapakap kan me pahn sang ni duwen arail pwoson; oh Koht Sahn en ketin kupwukupwure inouo me e ketin wiahiongehr mehn Israel akan, oh en ketin kapai irailda kohkohlahte sang ni arail pwoson mwaren Jesus Christ. Amen.

PWUKEN MORONI

IRALAUD 1

Moroni intingihdi mahsen en Koht akan mehn wia kamwahupen mehn Laman akan -- Mehn Nephi kan me sohte pahn kahmahmkihla Christ pahn kamakamala.

1 Met ngehi, Moroni, mwurin ei kaimwsekalahr poadoapoad en mehn Jared akan, I sohte lemehda me Ien pil intingihdi ekei, ahpw I saikinte mehla; oh I sohte pahn sansal ong mehn Laman akan pwe irail de kemeiehla.

2 Pwe kilang, arail mahwen akan ahpw suwedla mehlep nan pwungarail; oh pwehki sohte limpoak reh rail, irail kin kemehla mehn Nephi koaros me sohte pahn kahmahmkihla Christ.

3 Oh ngehi, Moroni, sohte pahn kahmahmkihla Christ; ihme kahrehda, I kin raparapahki seli wasa me I kak diar me sohte pahn keper ong ei mour.

4 Eri, I pahn intingihdi me malaulau kei, me pahn uhwongada dahme I medewedahr; pwe I sohte kin medewe me I pil pahn intingihdi ekei; ahpw I pahn intingihdi me malaulau kei, me ele pahn kak katapan ong riei kan, mehn Laman akan, ni rahn me kokkohdo kan, nin duwen kupwuren Kauno.

IRALAUD 2

Jesus ketikihong mehn Nephi kan manaman en soukohp akan pwehn kihda kisakis en Ngehn Sarawio.

1 Mahsen akan en Christ, me e ketkihong sapwellime werengkan, me ehk-riemeno me e ketin piladahro, me e ketikihiongehr limehkan poh rail --

2 Oh e ketin malipehier aderail akan, mahsanih: Kumwail pahn likweriong Sahmo ni edei, ni kapakap kehlail; oh mwurin amwail wiahier met, kumwail pahn ahneki manaman en pwilikihdi pehmwail poh rail, kumwail ahpw pahn kihla Ngehn Sarawi; oh ni edei me kumwail en kihla Ngehn Sarawi, pwe ih duwen me ei werengkan en wie.

3 Pwe Christ ketin mahsanihong irail mahsen pwukat, ni e ketin pwarohng irail ni tepio oh pokono sohte rong ahpw werengkohte me rong; oh nin duwen tohtohn me irail kin pwilikhdi pehrail powe, Ngehn Sarawio eri ahpw kin tih pohrail.

IRALAUD 3

Elder akan kin kasarawiala samworo kan oh sounpadahk kan sang ni lime kau.

1 Duwen en werengko, me kahdaniki elder en mwomwøhdiso kin kasarawiala samworo kan oh sounpadahngkan --

2 Mwurin arail kapakap ohngehr Sahmo ni mwaren Christ, irail eri pwiliki pehrail pohrail, oh koasoia:

3 Ni mwaren Jesus Christ, I kasarawiukala en wiahla samworo emen, (de, ma e pahn wiahla emen sounpadahk) I kasarawiukala en wiahla sounpadahk emen pwe kowe en padahngki koluhla oh lapwapen dihp akan sang Christ, sang ni dadaurete pwoson mware lel ni imwi. Amen.

4 Oh sang ni mwøhmwet, irail kasarawialahr samworo kan oh sounpadahk kan nin duwen kisakis kan oh mahsen en Koht akan ong aramas akan; oh irail kasarawialahr irail akan sang ni manaman en Ngehn Sarawi, me kin ketiket rehrazil.

IRALAUD 4

Duwen en elder kan oh samworo kan pahn kin kasarawiala pilawa en kamadipw sarawio.

1 Duwen en elder akan oh samworo kin kasarawiala war oh intahn Christ; oh irail kin wia nin duwen kosonned akan en Christ; ihme kahrehda kitail kin ese me tiahk wet me mehleh; oh elder de samworo me kin kasarawiala kamadipw sarawio.

2 Oh re kin kelepwikidi iangahki tohn mwomwodisou oh kapakap ong Sahmo ni mwaren Christ, inda:

3 Maing Koht, Sahn Soutuk, se patohan peki rehmwi ni mwaren sapwellimomwi Ieros, Jesus Christ, en ketin kapaiada oh kasarawiala pilawa wet ong war koaros me pahn patohan tungoale, pwe en wia mehn katamanpen war en sapwellimomwi Ieroso, oh kadehdehiong komwi, Maing Koht, Sahn Soutuk, me pein irail men patohan ale mwaren sapwellimomwi Ieroso, oh patohan tamatamaniki ih ansou koaros oh kapwaiada sapwellime kosonned akan me e ketikihong iraillehr; pwe sapwellime Ngehn en ketiket rehrrail ansou koaros. Amen.

IRALAUD 5

Koasoandien en kasarawiala wain en kamadipw sarawio wiawidahr.

1 Mwomwen kasarawiala waino -- Kilang, irail ahpw alehda kepo, oh koasoia:

2 Maing Koht, Sahn Soutuk, se patohan peki rehmwi ni mwaren sapwellimomwi Ieros, Jesus Christ, en ketin kapaiada oh kasarawiala wain wet ong war koaros me pahn patohan tungoale, pwe en wia mehn katamanpen intahn sapwellimomwi Ieroso, me kepwilipwikidier pwehki irail; pwe irail en patohan kadehdehiong komwi, Maing Koht, Sahn Soutuk, me re pahn patohan tamatamaniki ih ansou koaros, pwe sapwellime Ngehn en ketiket rehrrail. Amen.

IRALAUD 6

Aramas me kolulahr akan kin pepdaisala oh sawas kin kohieng irail -- Tohn mwomwohdiso me kolulahr kin alehda mahk -- Manaman en Ngehn Sarawi me kin ketin kaweid arail pokon akan.

1 Oh met I pahn kosoia duwen pepdaiso. Kilang, elder kan, samworo akan, oh sounpadahk kan me pepdaislahr; oh irail sohte kin pepdaisla ihte ma irail pahn kasalehda wahrrail akan me irail warongehr.

2 De ren dehr pil alehda mehmen ong ni pepdais, ihte ma irail pahn kohkihdo nan mohngiong ohla oh pahtoula ni

pali ngehn, oh kadehdeiong mwomwohdiso me irail koluhkilahr diparail ni mehlel.

3 Oh sohte me pahn alehda pepdais, ihte ma irail pahn alehiong irail mwaren Jesus Christ, sang ni arail pilada en doadoahk ong ih lao lel ni imwio.

4 Oh mwurin irail alehdahr pepdaiso, oh manaman en Ngehn Sarawi eri ketin tiher pohrail oh ketin kamwakel irailadahr, irail eri iang towehla aramas akan en mwomwohdiso en Christ; oh ederail akan alahdahr pwe irail en dehr monoknokala oh en alehda mahsen en Koht, pwe en kihong irail nan ahl pwungo, pwe en kolokol irail en nantihlahte mwasamwasahn oh kapakap, likihte kapai kan en Christ, iei ihme ketin wiadahr oh ketin keimwsekalahr arail pwoson.

5 Oh mwomwohdiso wet kin pokon pene ni ansou kan, ong ni kaisihsol oh ong ni kapakap, oh kosoia pene duwen sawasepen emenemen ni paliwar de pali ngehn.

6 Oh irail en kin tuhpene ni ansou kan pwe irail en ale pilawa oh wain, ong ni mehn wia katamanpen Kaun Jesus Christ.

7 Oh irail kin poadidihiong kolokol pwe sohte dihp en mihmi nanpwungarail; oh mehmen me dierek ni e wiadahr dihp, oh sounkadehde silimen en kin kihong kalokepen irail elder akan, oh ma irail sohte koluhla, oh sohte wehkada diparail akan, ederail pahn kohsang, oh irail sohte pahn iang mihmi nanpwungen sapwellimen Christ aramas akan.

8 Ahpw pahn pak tohto irail kin koluhla oh rapahki mahk, ni ineng mehlel, irail kin alehda mahk.

9 Oh arail pokon akan kin ale kaweid sang ni mwomwohdiso nin duwen doadoahngkan en Ngehn Sarawio, oh sang ni manaman en Ngehn Sarawio, pwe nin duwen Ngehn Sarawio kin ketin kahluwa irail sohte lipilipil ma ong ni padahk, de ong ni kaweid, de ong ni kapakap, de ong ni pekipek, de ong ni koul, iei duwen me e kin wiawi.

IRALAUD 7

Luhk ehu en pedelong ehu ong wasahn kommoal en Kauno -- Kapakap ni ineng mehlel -- Ngehn en Christ kin ketikihong aramas en kak esehla me mwahu sang suwed -- Satan kin kahrehiong aramas en kasohwe Christ oh wiahda

suwed -- Soukohp akan kasaledahr ketidohn Christ -- Sang ni pwoson, manaman akan wiawidahr oh tounleng kan kin sawas -- Aramas en kin koapwoaroapwoariki mour soutuk oh tengediong limpoak mehlel.

1 Oh met ngehi, Moroni, intingiada duwen mahsen malaulau kei sang ei pahpa Mormon, me e kaseledahr duwen pwoson, koapwoaroapwoar, oh limpoak mehlel. Pwe nin duwen met, e kasalehiongehr aramas akan, nin duwen e kin padahki irail nan sinakoke, me irail kauwadahr ong ni wasahn kaudek.

2 Oh met ngehi, Mormon, indahiong kumwail, riei kempoakepahi kan, oh sang ni kalahngan en Koht Sahm, oh atail Kaun Jesus Christ, oh kupwure me sarawi, pwehki kisakis me e ketin malipeikiniehier, me I mweimweiongehr pwe en koasoiwei rehmwail ansou kiset.

3 Eri, I pahn kosoiahiong kumwail duwen mehkan me mihmi nan mwomwohdiso wet, me kin meleilei ni arail ideidawen Christ, oh me kin alehier koapwoaroapwoar mwahu, sang ni amwail e kak pedelong wasahn kommoal en Kauno sang met kohla lao kumwail pahn koamoal reh nanleng.

4 Oh met rieikan, I kin kasawi kumwail ong ni mepwukat pwehki amwail kin iang aramas akan alialu ni meleilei.

5 Pwe I tamataman mahsen en Kohto me mahsanih me sang ni arail doadoahk kumwail pahn kin ese kin irail, pwe ma arail doadoahk kin mwahu, eri irail pil pahn kin mwahu.

6 Pwe kilang, Koht ketin mahsanihier me aramas suwed men kin sohte kak wiahda me mwahu; pwe ma e pahn kihda kisakis, de kapakap ong Koht, e sohte pahn wiahiong ih mehkot me mwahu, ihte ma e pahn wia ni ineng mehlel.

7 Pwe kilang, e sohte pahn kin wadeki me tiahk pwung ehu ong ih.

8 Pwe kilang, ma aramas men me kin suwed pahn kihla kisakis ehu, e kin kihla ni eh men seiren, e kin duwehte mehmen me sohte kihla eh kisakiso; eri, e pahn rasehng me e kin suwed mwohn Koht.

9 Oh pil rasehng me e pahn kin suwediong aramas emen, ma e pahn kapakap oh kaidehn ni ineng mehlel; ehi, e sohte pahn wiahiong ong ih mehkot, pwe Koht sohte pahn ketiki soangen aramaso.

10 Eri, ma aramas emen me kin suwed e sohte kak wiahda mehkot me mwahu; de e pil sohte pahn kihla kisakis eh u me mwahu.

11 Pwe kilang, utuhn pihl me kin namanam suwed sohte kin kak kapwarahda pihl me kin mwahu; de pil utuhn pihl me kin namanam mwahu sohte kak kapwarahda pihl me namanam suwed; ihme kahrehda, aramas emen me wia papahn tepelo, sohte kin kak idawen Christ; oh ma mehmen me pahn idawen Christ, e sohte pahn kak wia papahn tepelo.

12 Eri, mehkoaros me mwahu kin kohsang rehn Koht; oh mehkan me suwed kin kohsang rehn tepelo; pwe tepelo iei ihme imwintihti en Koht, oh kin poaden uh Wong ih oh kin luke oh songen wiahda dihp, oh en kin wia mehkot me suwed kohkohla.

13 Ahpw kilang, mehkan me sang Koht kin luke oh pahni kumwail en kin poaden wiahda mwahu; eri, mehkoaros me kin luke oh rahno kumwail en wia mwahu, oh poakehng Koht, oh papah ih, iei Koht me ketin kin wia.

14 Eri, kumwail rong, riei kempoakepahi kan, pwe kumwail dehr leme me mehkot me suwed kin kohsang rehn Koht, de mehkan mwahu oh sapwellimen Koht kin kohsang rehn tepelo.

15 Pwe kilang, riei kan, e kohwei remwailehr me kumwail en kin kasawi, pwe kumwail en kin kak ese me mwahu sang ni me suwed; oh nin duwen amwail en kin tenek en kin sansal pwe kumwail en kin kak esehla mwahu mehleh, rasehng marain en rahn sang pwong rotorot.

16 Pwe kilang, Ngehn en Christ kin ketiket rehn aramas koaros, pwe irail en kak ese me mwahu sang me suwed; I kasalehwei rehwailehr duwen amwail en kin tenek; pwe mehkoaros me kin luke kumwail en wiahda mwahu, oh kin kahrehiong kumwail en kin kamehlele Christ, e kin pekederedo sang ni manaman oh kisakis en Christ; eri kumwail en kak esehla mwahu me iei e kohsang rehn Koht.

17 Ahpw mehkot me kin kahrehiong aramas en wiahda suwed, oh en dehr kamehlele Christ, oh kasohwe ih, oh sohte papah ih, eri, kumwail en kin ese mehleh me iei sang rehn tepelo; pwe iet mwomwen doahk en tepelo, pwe e sohte kin kahrehiong aramas emen en wiahda mwahu soh, sohte emen, de pil nah tounleng kan; de irail akan me mihmi pahn eh manaman.

18 Oh met, riei kan, kumwail kilang pwe kumwail ese maraino me kumwail en kin tenengki, iei maraino me marain en Christ, kumwail en kilang pwe kumwail en dehr kin tenek sapwung; pwe soangen tenekohte me kumwail kin teneki iei me pil pahn tenengki kumwail.

19 Eri, I peki kumwail, riei kan, me kumwail en kin rapahki ni ngoang marain en Christ pwe kumwail en esehla me mwahu sang ni me suwed; oh ma kumwail kolokol me mwahu koaros, oh sohte kauwe, kumwail pahn wiahla serien Christ mehlel ekei.

20 Oh met, ia duwen amwail en kak kolokol me mwahu koaros?

21 Oh met I lelehr ni pwosono me, I koasoiher me I pahn koasoi; oh pahn indahiong kumwail duwen ahlo me kumwail en kin kak kolokol me mwahu kan koaros.

22 Pwe kilang, Koht ketin mwahngi mehkoaros, sangete ni tapio oh pil pahn kohkohlahte soutuk, kilang, e ketin poaronehdo tounleng kan en sewese aramas akan, en kasalehda duwen ketidohn Christ; oh me rehn Christ me mwahu koaros pahn kohsang ie.

23 Oh Koht pil ketin kasalehiongehr soukohp akan, sang nan pein dauwase me Christ pahn ketido.

24 Oh kilang, mie soangen ahl tohto me e ketin kasalehiongehr mehkan rehn aramas akan, me kin mwahu; oh mehkoaros me mwahu kin kohsang rehn Christ, pwe aramas de pahn mihmihte nan arail pwupwilao, oh sohte me mwahu ehu kak kodohng irail.

25 Eri, sang ni doadoahk en tounleng kan, oh sang ni mahsen koaros me kohsang ni silangin en Koht, aramas tepiahdahr doadoahngki arail pwoson Christ; oh met sang arail pwoson, irail kin kolokol me mwahu koaros; oh iei duwen met lao pahn ketido keriau en Christ.

26 Oh pil mwurin ansouo e ketidohr, aramas akan pahn komourkihla sang ni pwoson mware, oh sang ni pwoson, irail kin wiahla sapwellimen Koht. Oh nin duwen mehlel en Christ ieias, e ketin padahkiongehr samatail akan mahsen pwukat, me mahsanih: Dahme kumwail peki Sahmo ni edei, me kin mwahu, sang ni amwail pwoson kamehlele me kumwail pahn ale, kilang, e pahn kin pweiong kumwail.

27 Eri, riei kempoakepahi kan, pwe da, manaman akan uhdier pwehki Christ ketidalahr nanleng, oh ketidiher ni

palimaun en Koht, pwe en ketikhsang rehn Sahmo sapwellime pwung en mahk me rahn kohieng aramas akan?

28 Pwe e ketin kapwaidahr nin duwen kosonned akan, oh e ketiki koaros me pwoson ih; oh irail akan me kin pwoson ih pahn kin kolokol me mwahu kan koaros; eri e kin ketin utung kahrephen aramas akan; oh e kin ketiket nanleng kohkohahte.

29 Oh pwehki e ketin wiahier met, riei kempoakepahi kan, pwe dah, manaman akan uhdier? Kilang I indahiong kumwail, soh; pil tounleng kan sohte kin uhdhsang arail kin sewese aramas akan.

30 Pwe kilang, irail me kin mihmi pah, pwe en kin uhpah ih nin duwen mahsen en sapwellime mahseno, pwoson kehlail oh lamalam kehlail ong ni tiahk koaros me kin kekeid nin duwen kupwuren Koht.

31 Oh arail pwukoah doadoahk en rongamwahuo en kin lukehiong aramas koaros en koluhla, oh kapwaiada, oh en koadoahkehda inou kan me kohsang rehn Sahmo, me e ketin wiahiongehr aramas akan, me kin kaunopehng aramas akan ahlo, sang ni kalohkiwei mahsen en Christ ong irail me pilipil en Kauno, pwe irail en kak kadehde ih.

32 Oh sang ni wiawi wet, Kauno Koht ketin kasaledahr ahlo pwe me luhwe kan en kin ahneki pwoson Christ, pwe Ngehn Sarawi en kak ketiket nan arail mohngiong kan, sang ni duwen manamano; oh mwurin met sahmo pahn ketin kapwaiada duwen sapwellimen inou kan me e ketikihiongehr sapwellime aramas akan.

33 Oh Christ ketin mahsaniher: Ma kumwail pahn pwoson ie, kumwail pahn ahneki manaman en wiahda mehkoaros me kin konehng pahi.

34 Oh e ketin mahsaniher: Kumwail koaros nan sampah en koluhla me kin mihmi ni irepen lahng kan, oh kodohng ie, oh pepdaisala ni edei, oh pwoson ie, pwe kumwail en kak komourala.

35 Oh met, riei kempoakepahi kan, ma iei irair wet ong ni me mepwukat me mehlel me I padahkihong kumwaillehr, oh Koht pahn ketin kasalehiong kumwail ki manaman oh lingaling mehlel me pahn wiawi ni rahn neko pwe irail iei ihme mehlel, oh ma irail iei ihme mehlel, dah solahr ansou me manaman akan en kin wiawi?

36 De ia duwen, tounleng kan uhdisangehr arail kin pwarohng aramas akan? De, dah, e ketikhsang iraillehr

manaman en Ngehn Sarawio? De ia duwen, e pahn ketin ieiasete ni erein ansouhte ieu me pahn mie, de ni erein ansou me sampah pahn kesikesihnen, de emente me pahn komourla powe?

37 Kilang I indahiong kumwail, soh; pwe iei sang ni pwoson me manaman akan me wiawihier; oh sang ni pwoson me tounleng kan kin pwarada oh sewese aramas akan; eri, ma me pwukat uhdier, meid suwediong aramas akan, pwehki ar soh pwoson, oh mehkoaros solahr pahn mie katepe.

38 Pwe sohte mehmen kak komourala; nin duwen mahsen akan en Christ, ihte ma irail pahn pwosonla mwareo, eri, ma mepwukat uhdier, eri pwoson pil pahn uhdier. Oh meid kamasapwehk iren en aramas akan, pwe e mwomwen sohte komour pahn wiawihong irail.

39 Pwe kilang, riei kempoakepahi kan, I kin tenekis me mwahu sang rehmwail, I kin teneki me kumwail kin pwoson Christ pwehki amwail ohpampap akan; pwe ma sohte amwail pwoson oh, eri, kumwail kin sohte warohng iang mihmi rehn aramas akan en sapwellime mwomwohdiso.

40 Oh pil, riei kempoakepahi kan, I pahn koasoiawhei duwen koapwoaroapwoar. Ia duwen amwail en kak alehiong kumwail pwoson, kaidehn ihte ma pahn kin sang ni amwail en ahneki koapwoaroapwoar?

41 Oh dahme kumwail en kin koapwoaroapwoariki? Kilang, I indahiong kumwail me kumwail pahn koapwoaroapwoar sang ni tompen Christ oh manaman en sapwellime iasadao, pwe kumwail en iasada ong ni mour soutuk, oh met pwehki amwail pwosonlahr ih nin duwen inouo.

42 Eri, ma aramas emen ahneki pwoson, e pahn udahn en ahneki koapwoaroapwoar, pwe ma sohte pwoson, koapwoaroapwoar sohte kak mih reh.

43 Oh kilang I pil indahiong kumwail me e sohte kak ahneki pwoson oh koapwoaroapwoar, ihte ma e pahn oh pampapla oh karakarahkla nan eh mohngiong.

44 Ma mehleh, eh pwoson oh koapwoaroapwoar pahn sohte kin katepe, pwe sohte mehmen me kin warohng mwohn Koht, ihte irail akan me kin ohpampap oh me nan mohngiong karakarahk kan; oh ma emen pahn kin ohpampap oh nan mohngiong karakarahk, oh kin wehkada

MORONI 8

psang ni manaman en Ngehn Sarawio me Jesus iei Christ, e kin udahn ahneki limpoak unsek, pwe ma e sohte ahneki limpoak unsek, ih sohte mehkot; ihme kahrehda e pahn uhdahn anahne en ahneki limpoak unsek.

45 Oh limpoak unsek kin kanangamah, oh kin kadek, sohte kin peirin, oh sohte pohmwahsu. Sohte kin roporop ong pein ih, sohte kin mwiadang en lingeringerda, sohte kin medewehda suwed, sohte kin perenkihda me suwed ahpw kin perenkikihda mehlelo, kin kolokolete mehkoaros, kin koapwoaroapwoariki mehkoaros, kin dadaurete mehkoaros.

46 Eri, riei kempoak kan, ma sohte amwail limpoak unsek, sohte mehkot kumwail, pwehki limpoak unsek kin pweida. Eri, tengediong ni limpoak unsek, iei ihme keieu laud sang koaros, pwe mehkoaros sohte pahn kin pweida --

47 Ahpw limpoak unsek iei limpoak mehlel en Christ, oh e kin mihmi kohkohlahte: Oh mehmen me kin kolokol lao lel ni imwin rahno, e pahn kin mwahu ong ih.

48 Eri, riei kempoak kan, kapakap ong Sahmo sang ni kehl en amwail mohngiong kan koaros, pwe kumwail en kak audaudkihda limpoak wet; me e ketikihongehr pohn koaros me kin idawehn mehlel sapwellime Ieroso, Jesus Christ; pwe kumwail en kak wiahla sapwellimen Koht serihkan; pwe ni ansou me e pahn ketin pwarodo, kitail pahn duwehla ih, pwe kitail pahn kilang ih nin duwen ih; pwe kitail en kak ahneki koapwoaroapwoar wet; pwe kitail en kak mwakelekelada duwehte ih me ketin mwakelekel. Amen.

IRALAUD 8

Pepdais en kisin serihkan kin wia dih p suwed ehu -- Kisin serihkan kin momour nan Christ pwehki tomwo -- Pwoson, koluhla, ohpampap oh karakarahk en nan mohngiong, alehda Ngehn Sarawi, dadaurete lel imwi kin kolahng komouro.

1 Kisin likou en ei pahpa, Mormon, me intingdohng ie, Moroni; oh e intingdohng ie mwurinte ei lukehng ei doadoahk en rongamwahuo. Oh sang ni irair wet me e intingkidohngiehier, me koasoia:

2 Nei pwutak kempoake, Moroni, I peren kouwahlahpie pwe omw Kaun Jesus Christ ketin kupwukupwure iuk, oh ketin malipeiukehr ong ni sapwellime doadoahk en kalohki rongamwahu, oh ong ni sapwellime doadoahk sarawi.

3 I pil kin pohnese iuk nan ei kapakap akan, I kin poaden wie kapakap ong Koht Sahn ni mwaren sapwellime Ieros me Sarawio, Jesus, pwe ih sang ni sapwellime mwahu oh kalahngan kouwahlahpie, pahn kin kolokol uhk ong ni omw en dadaurete pwoson mware lao lel ni imwio.

4 Oh met, nei pwutak, I pahn indahiong kumwail duwen me kin kapahtouihela kouwahlahpie; pwe e kin kapahtouiehla ma mie uhpene kin pwarada nan pwungamwail.

5 Pwe, ma I eseier mehlelo, me mie uhpene nanpwungamwail duwen pepdais en kisin serihkan.

6 Oh met, nei pwutak, I men ke pahn doadoahk ni pwerisek, pwe sapwung laud wet en kohsang rehmwail; pwe sang ni kahrepe wet me I intingikidier kisin likou wet.

7 Pwe murinte I diaradahr duwen kowe ong ni mepwukat, I pekiehr rehn Kauno duwen ire wet. Oh mahsen en Koht eri lellohngiehier sang ni manaman en Ngehn Sarawi, me mahsanih:

8 Rong mahsen en Christ, omw Sounkamour, omw Kaun, omw Koht. Kilang, I sohte kodohng sampah pwe I luke me pwung kan, ahpw me dipan akan en koluhla; irail akan me kehlail sohte kin anahne sounwini, ahpw me soumwahu kan. Eri, kisin serihkan me mwakelekel, pwe irail sohte kak wiahda dihp; eri, rialahn Adam kohsangehr pwehki ngehi, pwe en dehr manaman pohrail; oh kosonned en sirkomaiso pil kohsangehr pwehki ngehi.

9 Oh ni mwohmw wet me iei Ngehn Sarawio ketin kasaledohngiehier duwen mahsen en Kohto: Eri, nei pwutak kempoake, I ese me kemenkouruhr laud mwohn Koht, me kumwail en kin pepdaisiala kisin serihkan.

10 Kilang, I pahn indahiong uhk me iet me kowe en kin padahngki -- Koluhla oh pepdais en wiawi ong irail akan me kak pwukoahki oh kak wiahda dihp; ehi, padahki pahpa oh nohno kan pwe irail en koluhla oh pepdaisiala, oh karakarahkala duwehte neirail kisin serihkan, oh irail ahpw pahn komourla iangahki neirail kisin serihkan.

11 Oh neirail kisin serihkan sohte anahne koluhla, de pil pepdais. Kilang, pepdaiso iei ong ni koluhla pwe en kapwaiada kosonned akan ong ni lapwapan dihp akan.

12 Ahpw kisin serihkan kin momour nan Christ, sangete ni poahsondahn sampah, ma e pahn sohte mehlel, Koht iei Koht en poupali emen, oh pil Koht me kin kak ketin wekila, oh e kin ketin lipilipilki aramas akan; pwe ia duwen, seri depe melahr ni arail sohte kin pepdais?

13 Eri, ma kisin serihkan kin sohte kak komourkihla pepdaiso, irail pahn udahn kohla nan ehl soutuk.

14 Kilang, I indahiong kumwail, me mehmen me leme me kisin serihkan anahne pepdaiso e miher nan weirek laud oh nan selidi en dihp, pwe e kin sohte ahneki pwoson, koapwoaroapwoar, de pil limpoak unsek; eri, e pahn lekdengkihla madamdau wet, ih eri udahn pahn kohdihla nan ehl.

15 Pwe meid suwed duwen suwed ne lemehkiong me Koht kin ketin komourla emen seri pwehki pepdaiso, oh emen pahn sohte komourla pwehki e sohte pepdaisala.

16 Meid suwediong irail akan me kin kawekala ahl akan en Kauno ong nin due met, pwe irail pahn salongala, ihte ma irail pahn koluhla. Kilang, I kin koasoai ni sohte per sang ni ei kolokol manaman en Koht, oh I sohte kin masak dahme aramas akan kak wia; pwe limpoak unsek kin kasohrehla kamasak koaros.

17 Oh I audaukidahr limpoak unsek, iei limpoak soutuk; eri, serihkan koaros kin pahrek pahi; eri, I kin poakehng kisin serihkan ki limpoak unsek; oh irail kin duwepenehte oh kin alehda komouro.

18 Pwe I ese me Koht kin sohte kin ketin poupali, pil kin ketin rasehng aramas emen me sohte kin ketin kak wekila. Ahpw e sohte kin ketin wekila sangete ni tapio oh pil pahn kohkohlahte soutuk.

19 Kisin serihkan sohte kak koluhla; eri, e inenen mehlel suwediong en kasohwe duwen kalahngan en Koht akan, pwe irail koaros momour nan Christ pwehki sapwellime kalahngano.

20 Oh mehmen me kin inda me serihkan anahne pepdais kin kasohwe duwen kalahngan en Christ; oh kin kosohwe sapwellime tomwo oh manaman en sapwellime komouro.

21 Me suwediong soangen aramas me duwehte met, pwe irail milahr nan keper en mehla, ehl, oh lokolok soutuk. I

kin koasoai ni ei soh periki; Koht me ketin mahsanih: Rong irail oh kanaiehgng, pwe re de pahn kin uhwonguhkada ni mwolen kopwung en Christ.

22 Pwe kilang pwe kisin serihkan koaros kin momour nan Christ, oh kosonned sohte sohte kin doadoahk rehrail. Pwe manaman en komouro kodohngehr irail koaros me sohte mih pahn kosonnedo; eri, mehmen me sohte kin dipaniki, de pil mihmi nan dihp, sohte kak koluhla; oh soangen pepdaiso sohte pahn mie katepe ong ih.

23 Ahpw, e kin inenen kemehn kourour mwohn silangin Koht, en kin kasohwe kalahngan akan en Christ, oh manaman en Ngehn Sarawio, oh kihong likilik ong ni doadoahk mehla kan.

24 Kilang, nei pwutak, meuwet sohte pahn wiawi; pwe koluhla iei ihme ong irail me miher nan dihp oh pahn ria en kauwehla kosonnedo.

25 Oh keieu wahn koluhla iei pepdais, oh pepdais kin kohdo sang ni pwoson en kapwaiada kosonned akan; oh kapwaiada kosonned akan kin kahrehda lapwapen dihp akan.

26 Oh lapwapen dihp akan kin kahrehda ohpampap, oh karakarakh en mohngiong; oh Ngehn Sarawi kin ketin pwarodo pwehki ohpampap oh karakarakh en mohngiong, iei Sounsawaso ketin audaudkidahr koapwoaroapwoar oh limpoak mehlel, iei limpoako me kin nanantihlahte sang ni ngoang en kapakap lao imwila pahn wiawi, ni ansou me souleng kan pahn mihla rehn Koht.

27 Kilang, nei pwutak, I pahn pwurehgng intingwei rehmw ma I sohte pahn mwadang kohla mahwen ong mehn Laman akan. Kilang, duwen pohn mwahsu en wehi et, de mehn Nephi akan, me kadehdedahr duwen ar pahn kamala, ihte ma irail pahn koluhla.

28 Kapakap kin irail, nei pwutak, pwe irail en kak koluhla. Ahpw kilang, I masak pwe Ngehno solahr ketin doadoahk rehrail; oh ni palie sahpwet irail kin raparapahki pwe irail en kauwehla manaman oh mweimwei me kohsang rehn Koht; oh irail kin kasohwe Ngehn Sarawio.

29 Oh mwurin ar soikalahr duwen marain laud wet, nei pwutak, irail pahn mehla ni ansou keren, pwehn kapwaiada kokohp akan me soukohp akan kohpadahr, pil duwehte mahsen akan sang pein atail Sounkamour.

30 Kaselel, nei pwutak, lao I pahn pil inting wei rehmw, de I pahn pil pwurehng tuhwong uhk. Amen.

IRALAUD 9

Kisin likou keriau en Mormon ong nah pwutak Moroni.

Koaros mehn Nephi kan oh mehn Laman akan suwedlahr mehlel oh pwupwilahr -- Irail kin kamedekehla oh kin mwersuwedi emenemen irail -- Mormon kapakap pwe kalahngan oh mwahu en kak mihla rehn Moroni kohkohlachte.

1 Nei pwutak kempoake, I pil pwurehng intingwei rehmw pwe kowe en kak ese me I momourete; ahpw I en intingihdi ekis duwen me kin kansensuwed mehlel.

2 Pwe kilang, I wiahier mahwen kalok ehu ong mehn Laman akan, me se sohte kaluwehdi irail; oh Archeantus pwupwikilahr kedlahs, oh pil Luram oh Emron; ehi, oh me pilpil tohto kei me salongasang kihtehr.

3 Oh met kilang, nei pwutak, pwe I masak pwe mehn Laman akan de kemehla aramas pwukat; pwe irail sohte koluhla, oh Satan kin poaden kamwakid irailada en kin lingeringer ong emenemen irail.

4 Kilang, I kin poaden wia doadoahk laud en sewese irail; oh ma I kin padahngki mahsen en Koht ni mwomwen peneu, irail kin rerrer oh lingeringer ong ie; oh ma I sohte kin doadoahngki peneu, irail kin kakeluwakiala arail mohngiong ong ni irehwet; ihme kahrehda, I masak pwe Ngenen en Kauno de solahr ketin doadoahk rehrail.

5 Pwe mehlel irail kin wie lingeringer ong ie kouwahlahpie me e likamwete irail sohte kin masak mehla; oh irail solahr ahneki limpoak ong emenemen; oh irail kin men kakerehdi inta oh kin poaden men ikih dahme wiawihong irailehr.

6 Oh met, nei pwutak kempoake, mendahte arail kekeluwak akan, kitail en doadoahk ni ngoang, pwe ma kita uhdi nan ata doadoahk, kita pahn mihla pahn dihp; pwe mie ata doadoahk ehu me kita en wia ni ansou me kita kohwahki paliwar en pwehl wet, pwe kita en

kaluwehdi imwintihti en pwuhngo koaros, oh ata mour en kommoaldi nan wein Koht.

7 Oh met I pahn intingihdi ekis me pid duwen apwal akan en aramas pwukat, pwe duwen ei ese me I alehsang Amoron, kilang, mehn Laman akan selidier me tohto, me irail khsang ni dauwer en Sherrizah; oh irail iei ohl akan, lih akan, oh serihkan.

8 Oh irail kemelahr pwoud en lih akan oh papahn serihkan; oh irail ahpw kin kamwengehki lih akan uduken arail pwoud akan; oh serihkan uduk en arail pahpa kan; oh pihl, ihte kisin pihl me kin kohieng irail.

9 Oh mendahte tiahk kelingeringer wet en mehn Laman akan, e sohte dauli suwed en neitail aramas akan me mihmi nan Moriantum. Pwe kilang, tohto nein mehn Laman akan serepein selidier; oh eri re ahpw kin khsang me irail kin keieu poakohng oh kesempwaliki sang mehkoaros iei ihme meipwon oh mwakelekel --

10 Oh mwurin arail wiahier met, irail eri mwersuedi irail ni mwohmw ehu me keieu suwed, re ahpw kin kaloke paliwararail pwe en keme iraila; oh mwurin arail wiaher met, irail eri kangala uduk arail duwehte mahn lawalo kan pwehki sang ni kekeluwak en arail mohngiong kan; oh irail wiadahr met ong ni mehn kasalepen komwad.

11 Oh nei pwutak kempoake, iadawen pwihn en aramas ehu en wia duwe met me sohte ahneki marain --

12 (Oh sounpar malaulau kei me douwer powe, oh me irail wiahier aramas marain ekei oh aramas mwahu kei)

13 Ahpw O nei pwutak, ia duwen aramas pwukat, me kin pereniki wiahda tiahk kelingeringer --

14 Ia duwen atail en kasik me Koht sohte pahn ketikihdo limeo pwehn kadeik kitail?

15 Kilang ei mohngiong kin wie weriwer: Meid suwediong aramas pwukat. Maing Koht, komw ketin karukiala diparail akan, oh arail tiahk kelingeringer akan sang mwohn sihlangomwi.

16 Oh pil ehu, nei pwutak, mie lihdi oh serepein akan me tohto me mihmihte nan Sherrizah; oh iei kisehn mehkan me mehn Laman sohte wahla, kilang, nein Zenepi sounpei kan me walahr irail, oh pwilikidier irail pwe en kakahnseli wasa kan me irail en kak diar mwenge; oh tohto lih mah kan me kin lipwongmasala wasao oh melahr.

17 Oh karis en sounpei kan me ieiang ie luwetalahr oh karis akan en sounpei en mehn Laman akan mihmi nanpwungen Sherrizah oh ngehi; oh nin duwen tohtohn irail akan me tangalahr rehn karis en sounpei en Aaron akan kin mehkila arail mwekid kamasapwehk suwed.

18 O suwedalahn nei aramas akan! Sohte arail meleilei oh kalahngan. Kilang, ahpw ngehi aramas emen, oh I ahpw ahneki kehl en aramas emen, I solahr kak idingki irail en wia me I inda kan.

19 Oh irail kin kehlail nan arail wiewia sapwung; oh irail koaros kin lemei suwed, sohte kin luhwehkihdi emen, iei me likeilapalahr akan de me pwulopwul akan; oh irail kin pereniki mehkoaros, ihte irail sohte kin pereniki mehkot me pwung; oh lokolok en nait lih akan oh serihkan iei me daulier mehkoaros pohn sahpwet; ehi, loh sohte kak koasoia, de pil sohte kak intingihdi.

20 Oh met, nei pwutak, I solahr mihmi nan wasa suwed wet. Kilang, ke ese duwen suwedla en aramas pwukat; ke ese me irail sohte kin ahneki kosonned oh sohte kin pehm mehkot; oh arail suwedla laud sang en mehn Laman akan.

21 Kilang, nei pwutak, I sohte kak utung ong irail pahn kupwuren Koht nin duwen aramas warohng kei pwe Koht pahn ketin kemeiehla.

22 Ahpw kilang nei, pwutak, I kin utung uhk rehn Koht, oh liki Christ me kowe pahn komourala; oh I kin kapakap ong Koht pwe en ketin kapitala omw mour, pwe kowe en kadehde pwuredohn sapwellime aramas akan reh; de duwen arail pahn kamakamala; pwe I ese me irail pahn mehla, ihte ma irail pahn koluhla oh pwuredo reh.

23 Oh ma irail pahn mehla, e pahn rasehng mehn Jared akan, pwehki sang ni ineng en nan arail mohngiong kan, me kin raparapahki inta oh kin ikih dahme wiawihong iraillehr.

24 Oh ma mehlel irail pahn kamakamala, kitail esehier me riatail tohto me tangalahngkehr rehn mehn Laman akan, oh me tohto pil tangalahng iraillehr, eri kowe en intingihdi ekei mehkan ma ke momourete oh I pahn mehla oh sohte kilang uhk; ahpw, I liki me I pahn kak tuhwong uhk ni ansou mwardang; pwe I kolokol inting sarawi kan me I pahn kihwei rehmw.

25 Nei pwutak, kowe en kin loalapwoat ong Christ; oh mehkan me I intingidier en dehr kin kapahtouiukala, pwe

MORONI 10

en kemeiukala; ahpw Christ en ketin kamaieukada oh sapwellime lokolongkan oh matala, oh duwen e ketin kasalehiongehr sapwellime erikso ong samatail akan, oh sapwellime kalahngan oh kanangaman oh koapwoaroapwoar en sapwellime klohri oh mour soutuk, en mihmi nan omw lamalam kokkohahte.

26 Oh limpoak en Koht Sahmo, iei mwoale me ileile nanleng, oh atail Kaun Jesus Christ, me ketiket ni pali maun en sapwellime roson, lao mehkoaros pahn mihla pahn sapwellime manaman, en ieiang uhk oh mihla rehmw kokkohahte. Amen.

IRALAUD 10

Kadehdehn Pwuken en Mormon kohsang ni manaman en Ngehn Sarawi -- Kisakis akan en Ngehno kin kohieng koaros irail akan me kin loaloapwoat -- Kisakis akan en Ngehno kin ieiangete pwoson -- Mahsen kan sang Moroni me kohsang nan pwehlo -- Kohdo rehn Christ, pwe en unsekala reh, oh widenda paliwaramwail oh palingenimwail.

1 Met ngehi, Moroni, intingidi ekis nin duwen me mwahu ong ie; oh I pahn inting ong riei kan, mehn Laman akan; oh I men irail en ese me sounpar pahpwiki rieisek douwer powe sang ni kodahn kilelo me pid duwen ketidohn Christ.

2 Oh I pahn katengehdi inting pwukat, mwurin ei pahn ekis kosoia sang ni alen kaweid ong kumwail.

3 Kilang, I pahn kaweid kin kumwail me ni ansou me kumwail pahn wadek mepwukat, ma iei kupwuren Koht me kumwail en wadek irail, pwe kumwail en kin tamataman duwen kalahngan en Kauno ong aramas akan sangete ni kapikipikdahn Adam lao lel ni ansou me kumwail pahn ale mepwukat, oh kumwail en kin doandoaropwe nan amwail mohngiong kan.

4 Oh ni ansou me kumwail aleier mepwukat, I pahn kaweid kin kumwail, me kumwail en peki Koht, Sahn Soutuk, ni mwaren Jesus Christ, ma iei mepwukat sohte mehlel, oh ma kumwail pahn peki ni mohngiong mehlel, ni ineng mehlel, sang ni amwail pwoson Christ, e pahn ketin

kasalehiong kumwail mehlelo, sang ni manaman en Ngehn Sarawi.

5 Oh sang ni manaman en Ngehn Sarawi, kumwail pahn kin esehla duwen mehlel en mehkoaros.

6 Oh mehkot me kin mwahu kin pwung oh mehlel; oh sohte mehkot me sohte mwahu kin kasohwe Christ, ahpw kin pohnese me iei ihme Christ.

7 Oh kumwail kak esehla me iei ih, sang ni manaman en Ngehn Sarawi; eri I pahn kaweid kin kumwail me kumwail en dehr kasohwe manaman en Koht; pwe e kin ketin doadoahngki manaman, ong ni duwen pwoson en aramas akan me kin duwehte rahnwet, lakapw, oh pahn kokkohahte.

8 Oh I pil pwurehng, kaweid kin rieikan, me kumwail en dehr kasohwe kisakis akan en Koht pwe me kin tohto; oh irail kin kohsang Koht tehmen. Oh mie ahl sohte lipilipil kan me kisakis pwukat kin doadoahk; ahpw Koht ohte me kin ketin doadoahk nan koaros; oh Ngenen en Koht me ketin kasalehiong ong aramas akan, pwe en kapaida irail.

9 Pwe kilang, ong emen e kin kohieng ih sang ni Ngehn en Koht, pwe en kak padahngki mahsen en eripito.

10 Oh ong emen pwe en kak padahngki mahsen en maraino sang ni ngehnohte.

11 Oh ong emen en pwoson kouwahlapie; oh ong emen kisakis kan en kakehlahda aramas kan sang ni ngehnohte.

12 Oh pil ong emen, pwe en kak wiahda manaman laud akan;

13 Oh pil ong emen en kak kohpada duwen mehkoaros.

14 Oh pil ong emen, pwe en kilang tounleng kan oh ngehn en sawas akan.

15 Oh pil ong emen, soahngen mahsen koaros.

16 Oh pil emen, kisakis en kawehwe lokaia akan oh ekei lokaia tohrohr.

17 Oh kisakis pwukat kohdo sang ni Ngehn en Christ; oh irail kin kohdohn emenemen, nin duwen kupwure.

18 Oh I pahn kaweid kin kumwail, riei kempoakepahi kan, pwe kumwail en tamataman me kisakis mwahu koaros kin kohsang rehn Christ.

19 Oh I pahn kaweid kin kumwail, riei kempoakepahi kan, me kumwail en tamataman me ih iei me kin ketin duwehte aio, rahnwet, oh pahn kokkohla, oh kisakis pwukat koaros me I kasaledahr, me mihmi ni pali ngehn,

sohte pahn kin sohrala, erein sampah pahn mihmiehte, ihte pahn kin sang ni soh pwoson en aramas akan.

20 Eri, udahn pwoson en kin mie; oh ma pwoson pahn kin mie, koapwoaroapwoar pahn pil mie; oh ma koapwoaroapwoar kin mie, limpoak unsek pahn pil mie.

21 Oh ma kumwail sohte ahneki limpoak unsek, kumwail sohte pahn komourla nan wein Koht; de kumwail sohte pil kak komourla nan wehio, ma sohte amwail pwoson, de kumwail sohte pil kak komourala, ma sohte amwail koapwoaroapwoar.

22 Ma kumwail sohte ahneki koapwoaroapwoar, kumwail udahn pahn mihla nan soh koapwoaroapwoar, oh sohte koapwoaroapwoar kin kohdo pwehki dihp.

23 Oh mehlel Christ ketin mahsanihongehr samatail akan: Ma mie amwail pwoson, kumwail kak wiahda mehkoaros me kin warohng ie.

24 Oh met I indahiong tohn sampah koaros -- pwe ma rahno pahn leledo me manaman oh kisakis en Koht pahn kin sohla wiawi nan pwung amwail, e pahn pwehki sang ni amwail soh pwoson.

25 Oh me suwediong aramas akan ma iei irair wet pahn wiawi; pwe sohte me pahn wiahda me pwung nan pwung amwail, sohte emen. Pwe ma mie emen nan pwung amwail kin wiahda mwahu, e pahn doadoahngki manaman oh kisakis kan en Koht.

26 Oh me suwediohng irail akan me kin kesehla mepwukat oh mehla, pwe irail pahn mehla nan diparail, oh irail sohte pahn komourla nan wein Koht; oh I kosoiahki nin duwen mahsen akan en Christ; oh I sohte likamw.

27 Oh I kaweid kin kumwail en kin tamataman mepwukat; pwe ansou keren pahn kohdo me kumwail en ese me I sohte likamw, pwe kumwail pahn kilang ie ni mwoalen kopwung en Koht; oh Kaun Koht pahn mahsanihong kumwail: Dah, I sohte kasalehiong kumwail ei padahngkan; me ohl menet kilelehdier, me rasehng emen aramas me kin wie likilikwer sang irail me melahr akan, ehi, pil rasehng mehmen me kin koasoai sang nan pwehlo?

28 I kasalehda mepwukat ong ni pweidahn koko hp akan. Oh kilang, irail pahn kohsang ni sihlengin Koht soutuk; oh sapwellime mahseno pahn kohsang ni ehu ehu dihkan.

29 Oh Koht pahn ketin kasalehiong kumwail, pwe me dahme I intinghdier iei ihme mehlel.

30 Oh I pil pahn kaweid kin kumwail pwe kumwail en kodohng rehn Christ, oh kin kolokol kisakis mwahu kan koaros, oh dehr sair kisakis suwed koaros, de kumwail pil doahke me samin.

31 Oh pirida, oh uhda sang nan pwehl, O Jerusalem; ehi, oh likou kihda ahmw likou kaselel akan, nein Zion serepein; katengehdi omw lepin tuhke kan oh kalaudehla irepen sapwemw akan kokkohlahte, pwe ede sohte mehkot kowe, pwe inou kan me Sahmo ketin wiahiongehr kumwail, oh mehn Israel akan, en kak pweida.

32 Eri, kohdo rehn Christ, oh en unsekala reh, oh soikala mehkoaros me sohte kin kekeid nin duwen Koht; oh ma kumwail pahn kesehla mehkoaros me sohte kin kekeid nin duwen Koht, oh poakohng Koht ki amwail kak unsek, lamalam unsek, oh kehl unsek, eri sapwellime kalahngano en kin konehng kumwail, pwe sang ni sapwellime kalahngan me kumwail en unsekala rehn Christ; oh ma sang ni kalahngan en Koht me kumwail kin unsekala rehn Christ, kumwail eri solahr kak kasohwe manaman en Koht.

33 Oh pil, ma sang ni kalahngan en Koht, kumwail kin unsekla rehn Christ, oh sohte kin kasohwe sapwellime manaman, eri kumwail pahn mwakelekelada rehn Christ sang ni kalahngan en Koht; sang ni kepwilipwildien intahn Christ, me iei mi nan inou en Sahmo ong ni lapwapen dihp akan, pwe kumwail en wiahla aramas sarawi kei; me sohte mwahi ehu rehmwail.

34 Oh met I indahiong kumwail koaros, kaselel. Me keren, I pahn kommoaledi nan paradais en Koht lao lel ni ansou me ngeni oh paliwerei pahn pwurepene, oh I pahn pwarodo ni ei pahn pwerido nan wehwe pwehn tuhwong kumwail mwohn mwoalen kopwung kaperen en Sihowa lapalap, me Sounkopwung Soutuk en me momour oh me melahr akan. Amen.

POHNPEIAN



4 02335 68885 2

33568 885